


শ্রী শ্রী বাসুদেব-বাণী

শ্রীশ্রীরামকৃষ্ণ-বাণী

শ্রীকুমারকৃষ্ণ নন্দী-সঙ্কলিত

দ্বিতীয় সংস্করণ
(পরিবর্তিত ও পরিবদ্ধিত)



শ্রীব্রজেন্দ্রমোহন দত্ত

ষ্টুডেন্টস্ লাইব্রেরী

৫৭।১, কলেজ ষ্ট্রীট, কলিকাতা

১৩৪১

সংস্কৃত সংরক্ষিত]

[মূল্য পাঁচ সিকা

প্রকাশক—শ্রী ব্রজেন্দ্রমোহন দত্ত

। ষ্টুডেন্টস্ লাইব্রেরী

৫৭১১, কলেজ ষ্ট্রীট, কলিকাতা

প্রাপ্তিস্থান—

কলিকাতা... ষ্টুডেন্টস্ লাইব্রেরী ; ৫৭১১, কলেজ ষ্ট্রীট ।

উদ্বোধন-কার্যালয় ; ১, মুখার্জি লেন, বাগবাজার

ঢাকা ... ষ্টুডেন্টস্ লাইব্রেরী, ঢাকা ।

মিনার্ভা লাইব্রেরী, ঢাকা ।

ময়মনসিংহ... নিউ ষ্টুডেন্টস্ লাইব্রেরী ।

প্রিণ্টার—শ্রী কালীপদ নাথ

নাথ ব্রাদার্স প্রিণ্টিং ওয়ার্কস্

৬, চান্দা বাগান লেন, কলিকাতা



উৎসর্গ পত্র

অখণ্ড-মণ্ডলাকারং ব্যাণ্ডং যেন চরাচরম্ ।
তৎপদং দর্শিতং যেন তস্মৈ শ্রীগুরবে নমঃ

ধর্মসমন্বয়ের প্রবর্তক—শিক্ষাগুরু—যুগাবতার ভগবান্
শ্রীশ্রীরামকৃষ্ণ পরমহংসদেবের লীলাসহচর
বেলুড় মঠাধ্যক্ষ

শ্রীমৎ স্বামী শিবানন্দজী মহারাজের
শ্রীকরকমলে

‘শ্রীশ্রীরামকৃষ্ণ-বাণী’

ভক্তিপূর্ণ-হৃদয়ে সমর্পণ করিলাম ।

আশীর্ব্বাদাকাজ্ঞী অকু-তী সন্তান
শ্রীকুগারকৃষ্ণ

মহাপুরুষজীর সংক্ষিপ্ত জীবনী .

পরমারাধা পরমপূজনীয় শ্রীমৎ স্বামী শিবানন্দ মহারাজ (মহাপুরুষজী) সন ১৯৬১ (১৮৫৪ খৃঃ) অগ্রহায়ণ মাসে ২৪পরগণা জেলার বারাসাত গ্রামে এক ব্রাহ্মণ পরিবারে ৩ কানাঠলাল ঘোষালের পুত্ররূপে জন্মগ্রহণ করেন। তাঁহার পূর্ব নাম ছিল তারকনাথ ঘোষাল। ১৮৮০ কি ১৮৮১ খৃঃ অর্থে তিনি ঠাকুরের প্রথম দর্শন লাভ করেন। পরে একদিন ঠাকুর তাঁহার জিহ্বাগ্রে কি যেন লিপিরা দিলেন। লেখার সঙ্গে সঙ্গেই তিনি একেবারে সমাধিস্থ হইয়া পড়িলেন। বিবাহের এক বৎসর পরেই ১৮৮৬ খৃঃ অর্থে ঠাকুরের জীবিতাবস্থায়ই তাঁহার স্ত্রী বিয়োগ হয় ও তিনি গৃহত্যাগ করেন।

বিবাহিত জীবনে তাঁহার অদ্ভুত ব্রহ্মচর্যা পালনের কথা স্বামী বিবেকানন্দ যখন শুনেন, তখন তিনি তাঁহাকে “মহাপুরুষ” এই নাম প্রদান করেন।

সন ১৩০২ সালের ২০শে আষাঢ় তিনি কাশীর “শ্রীশ্রীরামকৃষ্ণ অদ্বৈতাশ্রম” প্রতিষ্ঠা করেন। ১৩২২ সালের ১লা বৈশাখ পূজনীয় ব্রহ্মানন্দ স্বামীর দেহ রক্ষার পর ইনি মঠ ও মিশনের সভাপতির আসন গ্রহণ করেন। ১৩৩১ সালের ১৬ই মাঘ ৬সরস্বতী পূজার দিন দেওঘর বিদ্যাপীঠের নূতন বাড়ী উদ্বোধন করেন।

সন ১৩৪০ সালের ৮ই ফাল্গুন মঙ্গলবার বেলা ৫টা ৩৫ মিনিটে প্রায় আশী বৎসর বয়সে মহাপুরুষজী মহাসমাধি লাভ করেন।

ভূমিকা

অতি অল্প সময়ের মধ্যে শ্রীশ্রীরামকৃষ্ণ-বাণীর দ্বিতীয় সংস্করণ বাহির করিবার প্রয়োজন হইল। ইহা শ্রীশ্রীঠাকুরের অশেষ কৃপা এবং তাঁহার ভক্তগণের আগ্রহের নিদর্শন। এই সংস্করণে পুস্তকখানি আমূল পরিবর্তিত ও পরিবদ্ধিত হইয়াছে। শ্রীশ্রীঠাকুরের ও স্বামিজীর অনেকগুলি নূতন বাণী এই সংস্করণে সংযোজিত হইয়াছে।

এই সংস্করণের বিশেষত্ব,—মায়ের কথা,—সম্পূর্ণ নূতন জিনিস। মায়ের অমৃতময়ী বাণীগুলি সন্নিবেশিত হইয়া পুস্তকখানির অধিকতর শ্রীবৃদ্ধি করিয়াছে।

স্বামী বিবেকানন্দ বলিয়াছেন, “আমাদেরই মত দেহবান্ এক ব্যক্তিকে ঈশ্বর ব’লে নির্দেশ করা ও বিশ্বাস করা বড়ই কঠিন ব্যাপার। সিদ্ধ, ব্রহ্মজ্ঞ,—এ সব ভাবা চলে। তা যাই কেন তাঁকে (পরমহংস শ্রীশ্রীরামকৃষ্ণকে) বল্ না, ভাব্ না,—মহাপুরুষ বল্, ব্রহ্মজ্ঞ বল্,—তা’তে কিছু আসে যায় না। কিন্তু ঠাকুরের মত এমন পুরুষোত্তম জগতে ইতঃপূর্বে আর কখনও আগমন করেন নাই। সংসারের ঘোর অন্ধকারে এই মহাপুরুষই জ্যোতিঃস্তুত স্বরূপ। এঁর আলোতেই মানুষ এখন সংসার-সমুদ্রের পার চলে যাবে।”

শ্রীশ্রীঠাকুরের নশ্বর দেহ নষ্ট হইয়াছে সত্য, কিন্তু তাঁর শ্রীমুখনিঃসৃত অমৃতময় বাণীগুলি কামিনী-কাঞ্চনে আসক্ত, সংসার-তাপ-ক্লিষ্ট জগৎকে সত্যের দিকে,—শান্তির দিকে,—পথ দেখাইয়া লইয়া যাইবে, ইহা সূনিশ্চিত। ঈশ্বর লাভের জন্ম সংসারীকে, সন্ন্যাসীকে, বিভিন্ন সময়ে

জ্ঞান, ভক্তি, কৰ্ম প্রভৃতি বিষয়ে তিনি যে সব উপদেশ দিয়াছেন, সেগুলি অধুনা বিভিন্ন আধারে ইতস্ততঃ বিক্ষিপ্তভাবে রহিয়াছে। ভিন্ন ভিন্ন বিষয় সম্বন্ধে তাঁহার উপদেশগুলি একত্র গ্রথিত ভাবে পাঠ করিলে, পাঠকের মনের উপর ঐ ঐ বিষয়ে একটি স্পষ্ট অগচ গভীর দাবণা জন্মাইতে পারে, এই বিশ্বাসে বর্তমান গ্রন্থখানি সঙ্কলন করিতে প্রবৃত্ত হইয়াছি। বাহারা ভক্তগণের সহিত শ্রীশ্রীঠাকুরের লীলারস আশ্বাদন করিতে ইচ্ছা করেন, বাহারা তাঁহার দৈনন্দিন জীবনের একটি নিখুঁত চিত্র দেখিয়া জীবনকে ধন্য করিতে চাহেন, বাহারা অবশ্য ভক্তপ্রবণ শ্রীম-লিখিত “শ্রীশ্রীরামকৃষ্ণ-কথামৃত” এবং স্বামী সারদানন্দ প্রণীত “শ্রীশ্রীরামকৃষ্ণলীলা-প্রসঙ্গ” পাঠ করিয়া সে আশা মিটাইতে পারিবেন। আর বাহারা ঠাকুরের অমৃতময় উপদেশগুলিকে নিজ নিজ জীবন পথের সহায় ও সম্বল করিতে চাহেন, বাহারা সাধুসঙ্গের অভাবে ঠাকুরের বাণীগুলিকেই নিত্য সহচর করিতে চাহেন, বাহারা স্বাধায় হিসাবে এগুলি নিত্য পাঠ করিতে ইচ্ছা করেন,—এক কথায়, বাহারা এগুলিকে কণ্ঠহার করিয়া রাখিতে চাহেন,—তাঁহাদেরই সুবিধার জন্য ঠাকুরের বাণীগুলি এ পুস্তকে একত্র গ্রথিত হইল।

বাণীগুলিকে কয়েকটি শ্রেণীতে বিভক্ত করা হইয়াছে। তন্মধ্যে কোন কোন শ্রেণীর বিশেষ প্রয়োজনীয়তা না থাকিলেও সেই সেই বিষয়ে ঠাকুরের অনেকগুলি বাণী থাকায়, উহাদিগকে এক একটি ভিন্ন শ্রেণীতে সন্নিবদ্ধ করা সমীচীন বোধ হইল। ইহাতে সম্ভবতঃ বাণীগুলি পাঠের সুবিধা হইবে। আর এক কথা, ঠাকুরের এক রকমের কথাগুলি একসঙ্গে পাঠ করিলে ইহাকে একটি অভিনব বস্তু বলিয়া মনে হইবে। বিভিন্ন শ্রেণীর বাণীগুলির মধ্যে একটি শৃঙ্খলা রক্ষার চেষ্টা করা হইয়াছে। তবে বিভিন্ন সময়ে বিভিন্ন ব্যক্তির সহিত কথোপকথন-কালে বাণীগুলি

কথিত বলিয়া, এ বিষয়ে কিছু কিছু ত্রুটি থাকিয়া বাইবে, সে বিষয়ে সন্দেহ নাই।

বাঙ্গলাভাষায় এইরূপ শ্রেণীবদ্ধ ভাবে শ্রীশ্রীঠাকুরের উপদেশগুলি পাঠ কারবার আকাঙ্ক্ষা ভক্তগণের মধ্যে অনেক দিন হইতে পরিলক্ষিত হইতেছে। যদিও ইতঃপূর্বে বাঙ্গলাভাষায় দুই একখানি এই ধরনের পুস্তক বাতির হইয়াছে, সে গুলিতে যথাসম্ভব সংগ্রহ করিয়া শ্রীশ্রীঠাকুরের বাণীগুলি শ্রেণী-বিভাগ দ্বারা লিপিবদ্ধ করিবার চেষ্টা হয় নাই। কিন্তু বহুদিন পূর্বে মাদ্রাজ মঠ হইতে ইংরাজীভাষায় এইরূপ একখানি পুস্তক, —“Sayings of Sri Ramkrishna”—প্রকাশিত হইয়া অ-বাঙ্গালী ভক্তদের জ্ঞান-পিপাসা মিটাইতে সমর্থ হইয়াছে। অগচ আশ্চর্যের বিষয়, ঠাকুরের লীলাভূমি এই বাঙ্গলাদেশে বাঙ্গলাভাষায় আজ পর্যন্ত এইরূপ পূর্ণাবয়ব পুস্তক একখানিও প্রকাশিত হয় নাই। ভক্তগণ এইরূপ একখানি পুস্তকের প্রয়োজনীয়তা বহুদিন হইতে অনুভব করিয়া আসিতে-ছিলেন। আশা করি, এই পুস্তকের সঙ্কলন ও প্রকাশ দ্বারা সেই অভাব কিয়ৎপরিমাণে বিদূরিত হইবে।

এই স্থলে এই পুস্তকের সঙ্কলন ও প্রকাশের একটু সংক্ষিপ্ত ইতিহাস দিলে, বোধ হয় অপ্রাসঙ্গিক হইবে না। বিগত ১৩১৬ সাল হইতে বেঙ্গল মঠের সহিত আমার সম্পর্ক আরম্ভ হইয়াছে। পরে ১৩৩২ সালে আষাঢ় মাসে যখন মঠে কিছুদিন বাস করি, সেই সময় ২২শে আষাঢ় পূজনীয় মহাপুরুষ মহারাজ (স্বামী শিবানন্দ) কৃপাপূর্বক আমার পূর্ব দীক্ষা সংস্কার করিয়া দেন। সেই সময় একদিন কথা-প্রসঙ্গে মহাপুরুষজীকে নিবেদন করি, “ঠাকুরের উপদেশ নানা জায়গায় ছড়ান আছে; তাহা এক জায়গায় সংগ্রহ করিয়া একখানি বই লিখিতেছি, এবং উহা আপনার নামে উৎসর্গ করিতে ইচ্ছা করিয়াছি। আপনি যদি অনুমতি

দেন, তবে এই কার্যে অগ্রসর হই।” ইহাতে তিনি খুব আনন্দিত হইয়া বলিলেন; “ঐরূপ বই একখানি হইলে খুব ভাল হয়; ইহাতে সাধারণের উপকার হইবে। ঠাকুরের কথা যত প্রচার হয়, ততই ভাল। শীঘ্র শীঘ্র করিয়া ফেল।” উৎসর্গ করার কথা পুনরায় জিজ্ঞাসা করায় বলিলেন, “তোমার ইচ্ছা হইয়া থাকে, করিও।” ঐ সময়েই পূজনীয় স্বামী ঔকারানন্দ মহাবাজকে বইখানির যে অংশটুকু লিখিয়াছিলাম তাহা দেখাই। তাহা দেখিয়া তিনি বলিলেন, “বইখানি খুব ভালই হইবে। তবে শ্রেণী-বিভাগ করিয়া উহা লিখিতে পারিলে খুব ভাল হয়।”

বর্তমান জেলার “বৈষ্ণবপুত্র জর্জ ইন্সটিটিউশনের” মাননীয় প্রধান শিক্ষক শ্রীযুক্ত রাধাসুন্দর দাস মহাশয় শ্রেণী-বিভাগ দ্বারা সৌষ্ঠব সাধন করিয়া এই পুস্তকের পাণ্ডুলিপি প্রস্তুত করিয়া দিয়া আমাকে চিরবাধিত করিয়াছেন। পূজনাথ ঔকারানন্দ স্বামী শ্রেণী-বিভাগ করার উপদেশ না দিলে, আজ এই পুস্তক এত আদরণীয় হইত না।

অতঃপর কয়েকবার আমি যখনই মঠে যাইতাম, তখনই “বইখানি কত দূর হইয়াছে?” মহাপুরুষজী জিজ্ঞাসা করিতেন। পরে ১৩৪০ সালের ৮ই বৈশাখ পুনরায় কলিকাতায় যাই ও ঐ দিনই মঠে যাইয়া পূজনীয় মহাপুরুষজীকে প্রণাম করার পরেই, তিনি “বইখানি কতদূর হইল?” জিজ্ঞাসা করিলেন। আমি বলিলাম, “সামান্য বাকী আছে, এইবার ছাপিতে দিব।” পুনরায় ৯ই তারিখেও মঠে যাইয়া তাঁহার সহিত নানা বিষয়ে কথাবার্তা হয়। পরদিন জগদীশপুরে ফিরিয়া আসি ও বইখানি শেষ করিতে আরম্ভ করি। কিন্তু ১৩ই বৈশাখ পূজনীয় শ্রীমৎ স্বামী অভয়ানন্দ মহারাজের টেলিগ্রামে অবগত হইলাম যে, “মহাপুরুষজী হঠাৎ গতকল্য সন্ন্যাস রোগে আক্রান্ত হইয়াছেন।” তখনই মন অত্যন্ত খারাপ হইয়া গেল। ভাবিলাম, বোধ হয় মহাপুরুষজীর হাতে বইখানি অর্পণ করা

ভাগ্যে ঘটিল না। যাহা হউক, তাড়াতাড়ি করিয়া বইখানি শেষ করিয়া জ্যৈষ্ঠ মাসে কলিকাতা যাইয়া আমার পরম সুহৃদ্ ৫৭।১ নং কলেজ স্ট্রীটস্থ “ষ্টুডেন্টস্ লাইব্রেরী”র স্বত্বাধিকারী শ্রীযুক্ত ব্রজেন্দ্রমোহন দত্ত মহাশয়ের সাহায্যে প্রেসে দিবার ব্যবস্থা করিলাম এবং মঠে যাইয়া পূজনীয় মহাপুরুষজীকে দর্শন করিয়া মনে কতক শান্তি লাভ করিলাম। পরে ঐ বৎসর কার্তিক মাসে বইখানি ছাপা শেষ হইলে, সর্বাগ্রে একখানি বই মহাপুরুষজীকে পাঠাই। অসুস্থ অবস্থারও বইখানির স্থানে স্থানে পড়িয়া তাঁহাকে শুনান হইয়াছিল। ইহাতে যে তিনি বিশেষ আনন্দ প্রকাশ করিয়াছিলেন, তাহা পূজনীয় স্বামী অভয়ানন্দ মহারাজের ১৬।৭।:৩৪০ তারিখের পত্রে অবগত হইয়াছিলাম। স্বর্গীয় মহাপুরুষ মহারাজের আগ্রহ ও উৎসাহ এই পুস্তক সঙ্কলন কার্যে আমাকে প্রভূত সহায়তা করিয়াছে।

শ্রীম-কথিত শ্রীশ্রীরামকৃষ্ণ-কথামৃতে নাই এরূপ বহু বাণী এই পুস্তকে স্থান পাইয়াছে। “বাবুরাম মহারাজ (স্বামী প্রেমানন্দ) একদিন কয়েকটি ভক্তকে ঠাকুরের কথা কিছু বলেন। তাঁরা শুনে বলেছিলেন,—‘কই মহারাজ, এ সব কথা ত কথামৃতে বা কোন বইয়ে নেই।’ বাবুরাম মহারাজ শুনে বলেছিলেন, ‘কথামৃতে নেই ব’লে কি ঠাকুর বলেন নি, আমি তোমার মিথ্যা কথা বলছি? তোমাদের ঐ এক হযেছে কথা, যখন শ্রীরামকৃষ্ণ-কথামৃতে ঠাকুরের এ সব কথা নেই, তখন তিনি বলেন নি। আমিও তেমনি তোমাদের বলছি যে কথামৃত ছাড়া ঠাকুরের বহুকথা ও গান আছে, যা মাষ্টার মহাশয় জানতেন না।’ রামলাল দাদাও (ঠাকুরের ভ্রাতুষ্পুত্র) বলিয়াছেন, ‘মাষ্টার মহাশয় ঠাকুরের কাছে যে দিন আসতেন সেই দিনেরই কথা ও গান লিখে রাখতেন। তাঁর অসাক্ষাতে কত কথা ঠাকুর বলে গেছেন তার কি সীমা আছে।’ অতএব এই পুস্তকে

ঠাকুরের এতাবৎ প্রচলিত বাণীগুণি ভিন্ন যে বহু নূতন বাণী প্রকাশিত হইল, সে গুলিও ঠাকুরের শ্রীমুখ-নিঃসৃত ও অবিকৃত সূত্রাৎ ভক্ত সাধারণের নিকট পরম আদরণীয় হইবে বলিয়া মনে করি।

এই পুস্তকের সংকলন কার্যে বাহাদিগের নিকট সাহায্য গ্রহণ করিয়াছি, তাঁহাদিগকে আমার আন্তরিক কৃতজ্ঞতা জ্ঞাপন করিতেছি। ঠাকুরের বাণী সাধারণো প্রচার করিতে গিয়া যদি কোন ক্রটি ঘটিয়া থাকে, তাহা হইলে ভক্তগণ নিজগুণে এই দীন গ্রন্থকারের সে ক্রটি মার্জনা করিবেন।

৫৭১১, কলেজ ষ্ট্রীটস্থ “ষ্টুডেন্টস্ লাটব্রেরী”র স্বত্বাধিকারী পরম সজ্জদ শ্রীযুক্ত বজেন্দ্রমোহন দত্ত মহাশয় এবং তাওড়ার ১৩৩, নীলমণি মল্লিকের লেনস্থিত শ্রীযুক্ত রামলাল বস্মণ এম, এ মহাশয় এই পুস্তকের প্রফ সংশোধন করিয়া আমাকে চিরকৃতজ্ঞতাপাশে বদ্ধ করিয়াছেন।

এই পুস্তকের সমস্ত স্বত্ব ও আর বেলেড়মঠে প্রদত্ত হইল। অতঃপর বেলেড়মঠই এই পুস্তকের প্রকাশ ও প্রচার করিয়া ভক্তসাধারণের উপকার সাধন করিতে থাকিবেন।

“যৎ করোমি জগন্মাত স্তুদেব তব পূজনম্।”

“রামকৃষ্ণ কুটীর”
জগদীশপুর (সাঁওতাল পরগণা)
অক্ষয় তৃতীয়া দিবস
২রা জ্যৈষ্ঠ, ১৩৪১ সাল।

শ্রীকুমারকৃষ্ণ নন্দী

নিবেদন

“যদা যদা হি ধর্মস্য গ্লানির্ভবতি ভারত ।
অভ্যুত্থানমধর্মস্য তদাত্মানং সৃজাম্যহম্ ॥
পরিত্রাণায় সাধুনাং বিনাশায় চ দুষ্কৃতাম্ ।
ধর্মসংস্থাপনার্থায় সন্তুয়ামি যুগে যুগে ॥”

জীব যখন পাপের প্রলোভনে কুপথগামী হইয়া ত্রিতাপজ্বালায় অহরহঃ জ্বলিয়া পুড়িয়া মরিতেছিল, যখন অবিচার কুহকে পড়িয়া “কামিনী-কাঞ্চন” বিষ আকর্ষণ পান করিয়া সেই বিষের জ্বালায় ‘ত্রাহি মধুসূদন !’ বলিয়া কাঁদিতে লাগিল, তখনই সেই প্রেমের ঠাকুরের প্রাণও কাঁদিয়া উঠিল ! তাই তিনি সাধুদিগের পরিত্রাণের জন্ত ও ধর্ম সংস্থাপনের জন্ত, সন ১২৪২ সালের ৬ই ফাল্গুন (১৮৩৬ খৃঃ ১৭ই ফেব্রুয়ারি) বৃহবার শুক্লপক্ষের দ্বিতীয়া তিথিতে ব্রাহ্মমুহূর্ত্তে, হুগলী জেলার আরামবাগ থানা হইতে চারিক্রোশ পশ্চিমে বর্দ্ধমান হইতে বার তের ক্রোশ দক্ষিণে পুণ্যধাম কামারপুকুর গ্রামে, পুণ্যবান্ স্কুদিরাম চট্টোপাধ্যায়ের ও পুণ্যবতী চন্দ্রমণি দেবীর পুত্র রামকৃষ্ণ-রূপে অবতীর্ণ হইলেন । ‘ভক্তিই মুক্তি’ ‘ত্যাগই শান্তি’ এই দিব্যজ্ঞান জীবকে শিখাইবার জন্ত এই দয়াল ঠাকুর কত লীলাই করিয়াছেন ! সন ১২৬২ সালের ১৮ই জ্যৈষ্ঠ (১৮৫৫ খৃঃ ৩১শে মে) স্নান যাত্রার দিন কলিকাতার আড়াইক্রোশ উত্তরে ভাগীরথী তীরে ধর্মপ্রাণা দানশীলা রাণী রাসমণি কতক দক্ষিণেশ্বরের মন্দির প্রতিষ্ঠিত হইবার কিছুদিন পরে ঠাকুর তথায় বিষ্ণুঘরের পূজকের পদ গ্রহণ করেন,

১৩ সন ১২৬৩ সালে ৩কালীমাতার পূজাকার্যে নিযুক্ত হন। পূজা করিতে করিতে দুই চক্ষের জলে তাঁহার বক্ষঃ ভাসিয়া যাইত,—কখন বা তন্ময়ভাবে নিষ্পন্দ, অসাড়, বাহুজ্ঞানশূন্য হইয়া বসিয়া থাকিতেন, কখন বা উন্মাদের ন্যায় ‘মা’ ‘মা’ বলিয়া ডাকিতেন! যাহারা বড় ভাগ্যবান্ তাঁহারা ঠাকুরের সেই পূজাকালের তেজঃপুঞ্জ শরীর, শুদ্ধাভক্তি ও ভাব-তন্ময়তা দর্শন করিয়া নয়ন, মন, জীবন চরিতার্থ করিয়াছেন!

সন ১২৬৬ সালের বৈশাখের শেষভাগে বাঁকুড়া জেলার জয়রামবাটী গ্রামের নিষ্ঠাবান্ রামচন্দ্র মুখোপাধ্যায়ের পঞ্চমবর্ষীয়া একমাত্র কন্যা (জন্ম ১২৬০ সাল ৮ই পৌষ বৃহস্পতিবার, ইং ১৮৫৩ খৃঃ ২২শে ডিসেম্বর) সারদেশ্বরী দেবীর সহিত ঠাকুরের শুভ বিবাহ হয়। এই বিবাহ একটি আশ্চর্য্য পরিণয়!—ইহাদের দাম্পত্য-প্রেম সম্পূর্ণ কামগন্ধহীন। ঠাকুর তাঁহাকে নিকটে রাখিয়া স্নেহ, উপদেশ ও নিজের দৃষ্টান্তদ্বারা সহধর্ম্মিণীর মত করিয়া তুলিয়াছিলেন। ঠাকুর সর্বদাই ভাবে মগ্ন থাকিতেন, আর সেই ভাবাবেশেই তাঁহাকে বা কিছু সম্ভাষণ করিতেন, তাহাতেই মারের আনন্দের সীমা থাকিত না; বতটুকু স্বামীর সেবা-কার্যের ভার পাইতেন, তাহাই তাঁহাকে পরিতৃপ্ত রাখিত, এবং সেই তৃপ্তিতেই তিনি পরমানন্দিতা রহিতেন। ঠাকুর লোকশিক্ষার জন্ত সন ১২৬৮ সাল হইতে দ্বাদশ বৎসরকাল সাধন করেন ও তৎকালমধ্যে সন ১২৭১ সালে তিনি সন্ন্যাস গ্রহণ করেন। ১২৮০ সালে জ্যৈষ্ঠ মাসে ফলহারিণী কালী পূজার দিন রাত্রে ঠাকুর আপনাকে পরীক্ষোত্তীর্ণ ভাবিয়া শ্রীশ্রীমাকে জগন্মাতার অংশভাবে অভিষেক পূর্বক ষোড়শা পূজা করেন।

ঠাকুর, লীলাবসান পর্য্যন্ত, তাঁহার শরণাগত ভক্তদিগকে অজস্র উপদেশ দান করিয়া মুক্তির পথ দেখাইয়া দিয়াছেন,—গোমুখী-নিঃসৃত

পুণ্যসলিলা গঙ্গার তীর ঠাকুরের শ্রীমুখ-নিঃসৃত সেই সকল অমৃতময় উপদেশ একটি সুধাসিন্ধু সৃষ্টি করিয়া জগৎকে পবিত্র করিয়াছে! সন ১২৯৩ সালের ৩১শে শ্রাবণ (১৮৮৬ খৃঃ ১৬ই আগষ্ট) ঠাকুর লীলা সংবরণ করেন। জীবের প্রতি ঠাকুরের কি অপার করুণা!—লীলাসংস্কার দুইদিন পূর্বে লোকশিক্ষার ভার ঠাকুর তাঁহার লীলাসহচর অন্তরঙ্গ স্বামী বিবেকানন্দের উপর অর্পণ করেন। ইহার সংসারাশ্রমের নাম নরেন্দ্রনাথ দত্ত; ইনি কলিকাতার অন্তর্গত সিমুলিয়ার প্রসিদ্ধ দত্ত বংশে সন ১২৬৯ সালের ২৯শে পৌষ সোমবার (১৮৬৩ খৃঃ ১২ই জানুয়ারি) জন্মগ্রহণ করেন। ইনি ঠাকুরের সেই আদেশ পালনের জন্য ভারতের নানাস্থানে ঠাকুরের উপদেশ-সুধা বিতরণ করেন ও ১৮৯৩ খৃঃ ৩১শে মে স্বদূর আমেরিকায় ও পরে ইউরোপে ধর্মপ্রচার করেন। ১৮৯৮ খৃঃ ৯ই ডিসেম্বর হাবড়া জেলার বেলুড় গ্রামে ভাগীরথীতীরে 'বেলুড় মঠ' প্রতিষ্ঠা করেন, এবং অত্রাণ্ড নানাস্থানে মঠ ও সেবাশ্রম স্থাপন করেন। এইরূপে ভারতকে ধন্য ও গৌরবান্বিত করিয়া, তিনি সন ১৩০৯ সালের ২০শে আষাঢ় (১৯০২ খৃঃ ৪ঠা জুলাই) মানব-লীলা সংবরণ করেন। ইহার পর সন্ন্যাসী ও গৃহস্থ সন্তানগণ শ্রীশ্রীমায়ের নিকট আসিয়া নানা উপদেশ শুনিতেন। সন ১৩২৭ সালের ৪ঠা শ্রাবণ সেই চিন্ময়া-জননী ও ধরিত্রীকে কৃতার্থ করিয়া মৃত্যুর ঘট ভাঙ্গিয়া দিয়াছেন!

এস পাপী, তাপী, আর্ন্ত, এই সুধাসিন্ধু তীরে ছুটে এস,—এই সুধা পান কর,—তোমার সকল জ্বালা জুড়াইবে,—হতাশ-প্রাণে আশার সঞ্চারণ হইবে,—হৃদয়ে এক অভিনব ভাবের আবির্ভাব হইবে,—জীবন শান্তিময়, আনন্দময় হইবে!

সূচীপত্র

	বিষয়			পৃষ্ঠাঙ্ক
১।	সংসারাশ্রম	১
২।	কামিনী-কাঞ্চন	৭০
৩।	সন্ন্যাস-আশ্রম	৮৩
৪।	তাগ	৯৪
৫।	জ্ঞানযোগ	৯৮
৬।	কর্মাযোগ	১৪৫
৭।	ভক্তিযোগ	১৫৮
৮।	যোগতত্ত্ব	১৮৩
৯।	ধ্যানতত্ত্ব	১৯৩
১০।	সত্যকথা	২০০
১১।	সরলতা	২০১
১২।	বিশ্বাস	২০৩
১৩।	ব্যাকুলতা	২০৯
১৪।	সাকার ও নিরাকার	২১৮
১৫।	অবতার তত্ত্ব	২২৭
১৬।	শাস্ত্র ও পাণ্ডিত্য	২৩৭
১৭।	বিবিধ	২৪৬
১৮।	পরিশিষ্ট—শ্রীশ্রীমায়ের বাণী	২৮০
১৯।	স্বামী বিবেকানন্দের বাণী	২৮৬



শ্রীশ্রীরামকৃষ্ণ-বাণী

সংসারশ্রয়

১। তোমরা তো নিজে নিজে দেখছো, সংসার অনিত্য। এই বাড়ীই দেখনা কেন? কত লোক এলো, গেল, কত জন্মাল, কত দেহতাগ করলে, সংসার এই আছে, এই নাই। অনিত্য! যাদের এত 'আমার' 'আমার' করছে, চোক বজ্লেট নাই। কেউ নাই, তবু নাতির জন্য কাশী যাওয়া হয় না! 'আমার হারুর কি হবে?' "গতায়াতের পথ আছে, তবু মীন পলাতে নারে।" গুটী পোকা আপন নালে আপনি মরে! একরূপ সংসার মিথ্যা, অনিত্য। তাঁকে জেনে সংসার করলে অনিত্য নয়।

২। গুরু শিষ্যকে বললেন, "সংসার মিথ্যা; তুই আমার সঙ্গে চলে আয়।" শিষ্য বললে, "ঠাকুর, এরা আমায় এত সব ভালবাসে,—আমার বাপ, আমার মা, আমার স্ত্রী, এদের

ছেড়ে কেমন করে যাব ?” গুরু বল্লেন,—“তুই ‘আমার’ ‘আমার’ করছিস্ বটে, আর বলছিস্, ‘ওরা ভালবাসে।’ কিন্তু ওসব ভুল। আমি তোকে একটা ফন্দি শিখিয়ে দিচ্ছি, সেইটী করিস্। তা হলে বুঝবি, সত্য ভালবাসে কি না।” এই বলে একটা ঔষধের বড়ী তার হাতে দিয়ে বল্লেন,—“এইটী খাস্। তাহলে মরার মত হ’য়ে যাবি। কিন্তু তোর জ্ঞান যাবে না, সব দেখতে শুনতে পাবি। তারপর আমি উপস্থিত হলে তোর ক্রমে ক্রমে পূর্বাবস্থা হবে।” শিষ্যটী ঠিক ঐরূপ করলে। বাড়ীতে কান্নাকাটি পড়ে গেল। মা, স্ত্রী, সকলে আছড়া পিছড়ি করে কাঁদতে লাগল। এমন সময় একটী ব্রাহ্মণ এসে বললে,—“কি হয়েছে গা ?” তারা সকলে বললে, “এ ছেলেটী মারা গেছে।” ব্রাহ্মণ মরা মানুষের হাত দেখে বল্লেন, “সে কি ! এ ত মরে নাই ! আমি একটী ঔষধ দিচ্ছি ; খেলেই সব সেরে যাবে।” বাড়ীর সকলে তখন যেন হাতে স্বর্গ পেলে। তখন ব্রাহ্মণ বল্লেন,—“তবে একটী কথা আছে। এই ঔষধটী আগে একজনের খেতে হবে, তারপর ওকে খাওয়াতে হবে। আর যিনি আগে খাবেন, তাঁর কিন্তু মৃত্যু হবে। তা, এর ত অনেক আপনার লোক আছে দেখছি ; কেউ না কেউ অবশ্য খেতে পারে। মা কি স্ত্রী, এঁরা খুব কাঁদছেন, এঁরা অবশ্য খেতে পারেন।” তখন তারা সব কান্না থামিয়ে চুপ করে রইল। মা বল্লেন, “তাই ত, এ বৃহৎ সংসার, আমি গেলে কে এসব দেখবে

শুনবে ?” এই বলে ভাবতে লাগল। স্ত্রী এইমাত্র কাঁদছিল, “দিদি গো, আমার কি হলো গো” বলে। সে বললে, “তাইত ! ওঁর যা হবার হয়ে গেছে ; আমার দুটি তিনটি নাবালক ছেলে মেয়ে,—আমি যদি যাই, এদের কে দেখবে ?” শিষ্য সব দেখছিল, শুনছিল। সে তখন দাঁড়িয়ে উঠে বললে, “গুরুদেব, চল, তোমার সঙ্গে যাই।”

৩। একজন শিষ্য গুরুকে বলেছিল, “আমার স্ত্রী বড় যত্ন করে, ওর জন্ম সংসার ছেড়ে যেতে পারছি না।” শিষ্যটি হঠযোগ করতো। গুরু তাকে একটা ফন্দি শিখিয়ে দিলেন। একদিন তার বাড়ীতে খুব কান্নাকাটি পড়েছে। পাড়ার লোকেরা এসে দেখে, যে হঠযোগী ঘরে অসনে বসে আছে এঁকে বেঁকে, আড়ষ্ট হয়ে। সব্বাই বুঝতে পারলে সে মারা গেছে। স্ত্রী আছড়ে কাঁদছে, “ওগো আমাদের কি হলো গো,—ওগো তুমি আমাদের কি করে গেলে গো—ওগো দিদি গো, এমন হবে তা জান্তাম না গো !” এদিকে আত্মীয়স্বকুরা খাট এনেছে, ওকে ঘর থেকে বার করছে। এখন একটা গোল হলো। এঁকে বেঁকে আড়ষ্ট হয়ে থাকতে সে দরজা দিয়ে বেরুচ্ছে না। তখন একজন প্রতিবেশী দৌড়ে গিয়ে একখানি কাটারি নিয়ে দরজার চৌকাঠ কাটতে লাগলো। স্ত্রী অস্থির হয়ে কাঁদছিল, যোঁ-তুম্‌তুম্‌ শব্দ শুনে দৌড়ে এলো। এসে কাঁদতে কাঁদতে জিজ্ঞাসা করলে, “ওগো কি হয়েছে গো ?” তারা বললে, “ইনি বেরুচ্ছেন না, তাই চৌকাঠ

কাটছি।” তখন শ্রী বল্লে, “অমন কাজ কবো না গো : আমি এখন রাঁড় বেওয়া হলুম, আমার আর দেখবার লোক কেউ নাই, ক’টা নাবালক ছেলেকে মানুষ করতে হবে ; এ ছয়ার গেলে আর ত হবে না। ওগো, ওঁর যা হবার তা ত হয়ে গেছে ; ওঁর হাত পা কেটে দাও।” তখন হঠাৎ যোগী দাঁড়িয়ে পড়লো। তার তখন ঔষধের ঝাঁক চলে গেছে। দাঁড়িয়ে বল্ছে, “তবে রে শালী, আমার হাত পা কাটবে ?” এই বলে বাড়ী ছেড়ে গুরুর সঙ্গে চলে গেল। অনেক ঢং ক’রে শোক করে। কাঁদতে হ’বে জেনে আগে নথ খোলে, আর আর গহনা সব খোলে ; খুলে বাক্সের ভিতর চাবি দিয়ে রেখে দেয়। তারপর আচ্ড়ে এসে পড়ে আর কাঁদে, “ওগো দিদি গো, আমার কি হলো গো” ব’লে।

৪। একজন সাধু গুরুর উপদেশ নিয়ে একটা নির্জন স্থানে সামান্য একটা পর্ণকুটির করে সাধন-ভজন করতে লাগলেন। তিনি প্রত্যহ স্নান করে ভিজে কাপড় ও কোপীন কুটিরের কাছে একটা গাছে শুকোবার জন্য রেখে দিতেন। সাধু যখন ভিক্ষার জন্য বেরিয়ে যেতেন, সেই সময় ইঁহুর এসে কোপীন কেটে দিত। সাধু ভিক্ষায় বেরিয়ে গ্রামবাসীদের কাছে ইঁহুরের উপদ্রবের কথা জানালেন। গ্রামবাসীরা বল্লে, “আপনাকে রোজ রোজ কে কোপীন দিবে ? আপনি এক কাজ করুন, একটা বিড়াল পুষুন ; তা হলে আর বিড়ালের ভয়ে ইঁহুর আসবে না। সাধু তখন একটা

বিড়ালের বাচ্ছা নিয়ে এলেন। সেইদিন থেকেই ইঁদুরের উপদ্রব বন্ধ হলো। সাধু সেই বিড়ালটাকে দুধ ভিক্ষা করে এনে খাওয়াতে লাগলেন। কিছুদিন পরে কোন ব্যক্তি তাঁকে বলল, “সাধুজি, আপনার রোজ দুধের দরকার ; ছ’চারদিন ভিক্ষা ক’রে চলতে পারে ; বারমাস কে আপনাকে দুধ দিবে ; একটা গরু পুষুন, তাহলে তার দুধ খেয়ে আপনিও পরিতৃপ্ত হবেন, আর বিড়ালকেও খাওয়াতে পারবেন।” অল্পদিনের মধ্যেই সাধু একটা গাভী সংগ্রহ ক’রে নিয়ে এলেন। ক্রমেই সাধু সেই গরুর খড় বিচালী গ্রামে গ্রামে ভিক্ষা করতে লাগলেন। তখন গ্রামের লোকেরা তাঁকে বলল, “আপনার কুটীরের নিকট পতিত জমিতে চাষবাস করুন, তাহলে আর খড় বিচালীর জন্য ভিক্ষা করতে হবে না।” তখন সাধু নিকটের পতিত জমিতে চাষ আরম্ভ করলেন। শস্যাদি রাখবার জন্য গোলা বাড়ী ইত্যাদি প্রস্তুত করে তিনি ঠিক গৃহস্থের মত মহাবাস্ত হয়ে দিন কাটাতে লাগলেন। কিছুদিন পরে সাধুটির গুরু এসে উপস্থিত হলেন। শিষ্যকে জিজ্ঞাসা করলেন, “বৎস, এসব কি ?” শিষ্য অপ্রতিভ হয়ে বলল, “প্রভুজি, এসব এক কোপীন কা ওয়াস্তে।” গুরুর দর্শনে তাঁর সকল আসক্তি কেটে গেল ও তখনই সেই সব ত্যাগ ক’রে গুরুর সঙ্গে চলে গেলেন। দেখ, এক কোপীন কা ওয়াস্তে যত কষ্ট। বিবাহ করে ছেলেপুলে হয়েছে তাই চাকরি করতে হয়। সাধু কপি ল’য়ে বাস্ত, সংসারী বাস্ত ভার্য্যা ল’য়ে।

৫। পাড়ারগায়ে মাছ ধরবার জন্য বিলের ধারে ও মাঠে ঘুনি পাতে। ঘুনির ভিতর চিক্ চিক্ করে জল যায় দেখে ছোট ছোট মাছগুলি আনন্দে তার ভেতর চলে যায়, তারা আর বার হ'তে পারে না, সেইখানে আটকে যায়, পরে একেবারে প্রাণে মরে। দুটা একটা মাছ ঘুনির নিকটে গিয়ে ঐ দেখে একেবারে লাফিয়ে অন্তদিকে চলে যায়। সংসারেরও বাহ্য চাক্চিক্য দেখে লোকে সাধ ক'রে প্রবেশ করে; পরে মায়ামোহে জড়িয়ে দুঃখ কষ্ট পেয়ে নাশ পায়। আর যারা এই সব দেখে কামকাঞ্চে আসক্ত না হয়ে ভগবানের পাদপদ্ম আশ্রয় করেন, তাঁরাই যথার্থ সুখ ও আনন্দ পান।

৬। সংসারাসক্ত বদ্ধ জীবের হুঁস্ নাই। তারা জালে পড়েই আছে। অথচ জালে বদ্ধ হয়েছি এরূপ জ্ঞানও নাই। হরিকথা এদের সম্মুখে হ'লে, এরা সেখান থেকে চলে যায়। বলে, “হরিনাম মরবার সময় হবে, এখন কেন?” পরিবার ও ছেলেদের মনে করে, কাঁদে, আর বলে, “হায়! আমি ম'লে এদের কি হবে?” যাতে এত দুঃখ ভোগ করে, আবার তারা ভাব করে। যেমন উট কাঁটাঘাস খেতে খেতে মুখ দিয়ে দর্দর্ করে রক্ত পড়ে, তবু কাঁটাঘাস ছাড়ে না। এদিকে ছেলে মারা গেছে, শোকে কাতর, তবু আবার বছর বছর ছেলে হয়। সেই ছেলের মা, যে শোকে অধীর হ'য়েছিল, আবার কিছুদিন পরে চুল বাঁধলো, গয়না পড়লো। মেয়ের বিয়েতে সর্বস্বান্ত

হ'লো, আবার বছর বছর ছেলে মেয়ে হবে! বলে “কি করবো, অদৃষ্টে ছিল।” তীর্থ করতে গেলেও নিজে ঈশ্বর-চিন্তা করবার অবসর পায় না। কেবল পরিবারদের পুঁটলি বইতে বইতে প্রাণ যায়। ঠাকুরের মন্দিরে গিয়ে ছেলেকে চরণামৃত খাওয়াতে আর গড়াগড়ি দেওয়াইতেই তারা বাস্তু। বন্ধজীব নিজের ও পরিবারদের পেটের জন্য দাসত্ব করে, আর মিথ্যা কথা, প্রবঞ্চনা, তোষামোদ ক'রে ধন উপায় করে। যারা ঈশ্বর চিন্তা করে, ঈশ্বরের ধ্যানে মগ্ন হয়, বন্ধজীব তাদের পাগল ব'লে উড়িয়ে দেয়। সংসারাসক্ত বন্ধজীব মৃত্যুকালে সংসারের কথাই বলে। বাহিরে মাল। জপ্লে, গঙ্গাস্নান করলে, তীর্থে গেলে কি হবে? সংসারাসক্তি ভিতরে থাকলে মৃত্যুকালে সেটী দেখা দেয়। শুকপাখী সহজ বেলী “রাধাকৃষ্ণ” বলে, বিড়ালে ধরলে কিন্তু নিজের বুলি বেরোয়,—কঁা কঁা করে। গীতায় আছে, “মৃত্যুকালে যাহা মনে করবে, পরলোকে তাই হবে।” ভরতরাজা “হরিণ” “হরিণ” ক'রে দেহত্যাগ ক'রেছিল, তাই হরিণ জন্ম হ'লো। ঈশ্বর চিন্তা করে দেহ-তাগ করলে ঈশ্বর লাভ হয়; আর এ সংসাবে আস্তে হয় না।

৭। বিষয়ী লোকদের মন গুবরে পোকায় মতন। গোবরের পোকা গোবরের ভেতর থাকতে ভালবাসে। যদি গোবর ছাড়া তাদের কিছু দাও, তাহলে ভাল লাগে না। জোর করে যদি পদ্মের ভেতর বসিয়ে দাও তাহলে তারা

ছট্‌ফট্‌ ক'রে মরে । বিষয়ী লোকদের মনে সেই রকম বিষয় কথা ছাড়া অন্য কিছুই ভাল লাগে না । যদি ঈশ্বরীয় কথা প্রসঙ্গ হয়, তারা সেস্থান ত্যাগ করে যেখানে বাজে কথা হয়, সেখানে গিয়ে বসে ।

৮ । বদ্ধজীব সংসারের কামিনী ও কাঞ্চনে বদ্ধ হয়েছে, —হাত পা বাঁধা । আবার মনে করে যে, সংসারের কামিনী ও কাঞ্চনেতেই সুখ হবে আর নির্ভয়ে থাকবে । তারা জানে না যে, ওতেই মৃত্যু হবে । বদ্ধজীব যখন মরে, তখন তার পরিবার বলে, “তুমি ত চল্লে, আমার কি করে গেলে ?” বদ্ধজীবেরা ঈশ্বর-চিন্তা করে না । যদি অবসর হয়, তাহলে হয় আবেল তাবোল ফালতো গল্প করে, নয় মিছে কাজ করে । জিজ্ঞাসা করলে বলে, “আমি চুপ করে থাকতে পারি না, তাই বেড়া বাঁধছি ।” হয় ত সময় কাটে না দেখে, তাস খেলতে আরম্ভ করলে ।

৯ । সংসারী লোকের অবসর কই ? একজন একটা ভাগবতের পণ্ডিত চেয়েছিল । তার বন্ধু বললে, “একটা উত্তম ভাগবতের পণ্ডিত আছে ; কিন্তু তার একটু গোল আছে । তার নিজের অনেক চাষবাস দেখতে হয় । চারখানা লাঙ্গল, আটটা হেলে গরু, সর্বদা তদারক করতে হয় ; অবসর নাই ।” যার পণ্ডিতের দরকার, সে বললে, “আমার এমন ভাগবতের পণ্ডিতের দরকার নাই, যার অবসর নাই । লাঙ্গল হেলে গরুওয়ালা ভাগবত পণ্ডিত আমি খুঁজছি না । আমি এমন

ভাগবত পণ্ডিত চাই, যে আমাকে ভাগবত শুনতে পারে।”
 এক রাজা রোজ ভাগবত শুনতো। পণ্ডিত পড়া শেষ হলে
 রাজাকে বলতো,—রাজা, বুঝেছ ? রাজাও রোজ বলে,—তুমি
 আগে বোঝ ! পণ্ডিত রোজ বাড়ী গিয়ে ভাবে,—রাজা এমন
 কথা কেন বলে, যে আগে তুমি বোঝ। লোকটা সাধন ভজন
 করতো, ক্রমে চৈতন্য হলো। তখন দেখলে যে হরিপাদপদ্মই
 সার, আর সব মিথ্যা। সংসারে বিরক্ত হয়ে বেরিয়ে গেল।
 কেবল একজনকে রাজাকে বলতে পাঠালে যে,—রাজা,
 এইবার বুঝেছি।

১০। পায়রা-ছানার গলায় হাত দিলে যেমন মটর গজ্জক
 করে, সেইরূপ বদ্ধজীবের সঙ্গে কথা কইলে টের পাওয়া যায়,
 বিষয়-বাসনা তাদের ভেতর গজ্জক করছে। বিষয়ই তাদের
 ভাল লাগে, ধর্মকথা ভাল লাগে না।

১১। ভেতরে যার যে ভাব থাকে, তার কথাবার্তায় তা
 বেরিয়ে পড়ে। যেমন মূলো খেলে তার চেকুরে মূলোর গন্ধ
 বেরায় ; তেমনি সংসারী লোকেরা সাধুসঙ্গ করতে এসে
 বিষয়ের কথাই বেশী কয়ে থাকে।

১২। এক বাগানে ছুজন লোক বেড়াতে গিছিলো ; তার
 ভেতর যার বিষয়-বুদ্ধি বেশী, সে বাগানে ঢুকেই ক’টা আম-
 গাছ, কোন্ গাছে কত আম হয়েছে, বাগানটির কত দাম
 হতে পারে, ইত্যাদি নানারকম বিচার করতে লাগল। আর
 একজন বাগানের মালিকের সঙ্গে আলাপ করে গাছ তলায়

বসে একটী করে আম পাড়তে লাগলো আর খেতে লাগলো । বল দেখি, কে বুদ্ধিমান? আম খাও, পেট ভরবে, কেবল পাতা গুনে অত হিসাব কিতাব করে লাভ কি? যারা জ্ঞানাভিমानी, তাঁরা শাস্ত্র মীমাংসা তর্ক যুক্তি নিয়ে বাস্তব থাকেন : বুদ্ধিমান ভক্তেরা ভগবানের কৃপালাভ করে এ সংসারে পরমানন্দ ভোগ করেন ।

১৩। বদ্ধজীব সংসারী জীব । তাদের নিয়ে কি মহৎ কাজ হবে? যেমন কাকে ঠোকুরান আম; ঠাকুর-সেবায় লাগে না, নিজের খেতেও সন্দেহ । এরা যেমন গুটীপোকা : মনে করলে কেটে বেরিয়ে আসতে পারে, কিন্তু নিজে ঘর বানিয়েছে, ছেড়ে আসতে মায়া হয়; শেষে মৃত্যু ।

১৪। সংসারী লোক মনে করে,—“আমরা বড় বুদ্ধিমান ।” কিন্তু তারা বিষয়াসক্ত । নিজে খেলছে, নিজেদের চাল ঠিক বুঝতে পারে না । কিন্তু সংসার-তাগী সাধুলোক বিষয়ে অনাসক্ত । তারা সংসারীদের চেয়ে বুদ্ধিমান । নিজে খেলে না, তাই উপর চাল ঠিক বলে দিতে পারে । যেমন, যারা নিজে দাবা খেলে, তারা চাল তত বুঝে না; কিন্তু যারা না খেলে, উপর চাল বলে দেয়, তাদের চাল ওদের চেয়ে অনেকটা ঠিক ঠিক হয় ।

১৫। নিজেকে বেশী চতুর মনে করা উচিত নয়; যেমন কাক খুব চতুর, কিন্তু বিষ্ঠা খেয়ে মরে; তেমনি সংসার-ক্ষেত্রে যারা বেশী চালাকি করতে যায়, তাই কেবল ঠকে থাকে ।

১৬। হাজার লেক্চার্ দাও, বিষয়ী লোকদের কিছু করতে পারবে না। পাথরের দেওয়ালে কি পেরেক মারা যায়? পেরেকের মাথা ভেঙ্গে যাবে, তো দেওয়ালের কিছু হবে না। তরোয়ালের চোট্ মারলে কুমীরের কি হবে? সাধুর কমণ্ডলু (তুঙ্গা) চারধাম করে আসে; কিন্তু যেমন তেঁত, তেমনি তেঁত। বাছুর একেবারে দাঁড়াতে পারে না। মাকো মাঝে পড়ে যায়, আবার দাঁড়ায়;—তবে ত দাঁড়াতে ও চলতে শিখে।

১৭। যেমন কুমীরের গায়ে অস্ত্র মারলে, অস্ত্র ঠিকরে পড়ে যায়, তার গায়ে কিছুতেই লাগে না, তেমনি বদ্ধজীবের কাছে ধর্মকথা যতই বল না কেন, কিছুতেই তাদের প্রাণে লাগাতে পারবে না।

মলয়ের হাওয়া যে গাছে লাগে, সব চন্দন হ'য়ে যায়। কিন্তু শিমুল, অশ্বখ, আমড়া, এরা চন্দন হয় না।

১৮। যেমন বালককে রমণসুখ বোঝান যায় না, সেই রকম বিষয়াসক্ত মায়ামুগ্ধ সংসারী জীবকে ব্রহ্মানন্দ বোঝান যায় না।

১৯। যারা “সংসারে ধর্ম,” “সংসারে ধর্ম” করছে, তারা একবার যদি ভগবানের আনন্দ পায়, তাদের আর কিছু ভাল লাগে না; কাজের সব আঁট কমে যায়; ক্রমে যত আনন্দ বাড়ে কাজ আর করতে পারে না, কেবল সেই আনন্দ খুঁজে খুঁজে বেড়ায়। ভগবানের আনন্দের কাছে বিষয়ানন্দ আর

রমণানন্দ ! একবার ভগবানের আনন্দের আশ্বাদ পেলে, সেই আনন্দের জন্তু ছুটোছুটি করে বেড়ায় ; তখন সংসার থাকে আর যায় ।

২০ । ঈশ্বর দুইবার হাঁসেন । একবার হাঁসেন, যখন দুই ভাই জমি বখরা করে, আর দড়ি ফেলে বলে, “এদিকটা আমার, ওদিকটা তোমার ।” ঈশ্বর এই ভেবে হাঁসেন, আমার জগৎ ; তার খানিকটা মাটি নিয়ে কোর্ছে, “এদিকটা আমার, ওদিকটা তোমার ।” ঈশ্বর আর একবার হাঁসেন । ছেলের অসুখ সঙ্কটাপন্ন ; মা কাঁদছেন, বৈজ্ঞ এসে বলছে,—“ভয় কি, মা, আমি ভাল করবো ।” বৈজ্ঞ জানে না, ঈশ্বর যদি মারেন, কার সাধ্য রক্ষা করে ?

২১ । মৃত্যুকে সর্বদা স্মরণ রাখা উচিত । মর্বার পর কিছুই থাকবে না । এখানে কতকগুলি কস্ম করতে আসা । যেমন পাড়ার্গোয়ে বাড়ী—কল্কাতায় কস্ম করতে আসা । বড় মানুষের বাগানের সরকার ; বাগান যদি কেউ দেখতে আসে তো বলে, “এ বাগানটী আমাদের” “এ পুকুর আমাদের পুকুর ।” কিন্তু কোন দোষ দেখে বাবু যদি ছাড়িয়ে দেয়, তখন তার আমের সিন্ধুকটী নিয়ে যাবার যোগ্যতা থাকে না, দরওয়ানকে দিয়ে সিন্ধুকটা পাঠিয়ে দেয় ।

২২ । ভোগ থাকলেই যোগ কমে যায় । ভোগ থাকলেই আবার জ্বালা । শ্রীমদ্ভাগবতে আছে,—অবধূত চিলকে চক্ৰিশ গুরুর মধ্যে একজন কবেছিল । চিলের মুখে মাছ ছিল, তাই

হাজার কাক তাকে ঘিরে ফেললে। চিল মাছ মুখে করে বেদিকে যায়, সেই দিকে কাকগুলো পিছনে পিছনে কা কা করতে করতে যায়। যখন চিলের মুখ থেকে মাছটি আপনি হঠাৎ পড়ে গেল, তখন যত কাক মাছের দিকে গেল ; চিলের দিকে আর গেল না। মাছ অর্থাৎ ভোগের বস্তু ; কাকগুলো ভাবনা চিন্তা। যেখানে ভোগ, সেখানে ভাবনা চিন্তা। ভোগত্যাগ হয়ে গেলেই শান্তি। আবার দেখ, অর্থ ই আবার অনর্থ হয়। তোমরা ভাই ভাই বেশ আছ ; কিন্তু ভাইয়ে ভাইয়ে হিন্দ্রা নিয়ে গোল হয়। কুকুরেরা গা চাটাচাটি করছে, পরস্পর বেশ ভাব ; কিন্তু গৃহস্থ যদি ছুটি ভাত ফেলে দেয়, তাহলে পরস্পর কামড়া কামড়ি কনবে।

১৩। দাঁড়িপাল্লার যে দিক ভারি হয় সেই দিক ঝুঁকে পড়ে, আর যে দিক হাল্কা হয় সেই দিক উপরে উঠে পড়ে। মানুষের মন দাঁড়িপাল্লার ঞায়, তার একদিকে সংসার, আর একদিকে ভগবান। যার সংসার, মান, সম্ভ্রম ইত্যাদির ভার বেশী হয়, তার মন ভগবান থেকে উঠে গিয়ে সংসারের দিকে ঝুঁকে পড়ে ; আর যার বিবেক বৈরাগ্য ও ভগবদ্ভক্তির ভার বেশী হয়, তার মন সংসার থেকে উঠে গিয়ে ভগবানের দিকে ঝুঁকে পড়ে।

১৪। সংসারে ছুরকম স্বভাবের লোক দেখতে পাওয়া যায়। কতকগুলোর কুলোর ঞায় স্বভাব, আর কতকগুলোর চালুনীর ঞায়। কুলো যেমন ভূষি কি না অসার বস্তু ত্যাগ

ক'রে সার বস্তু আপনার ভিতর রাখে, সেই রকম কতকগুলি লোক সংসারে অসার বস্তু (কামিনী-কাঞ্চনাদি) ত্যাগ ক'রে সার বস্তু ভগবানকে গ্রহণ করে ; আর চালুনী যেমন সার বস্তু সকল ত্যাগ ক'রে অসার বস্তুগুলি নিজের ভেতর রাখে, সেই রূপ সংসারে কতকগুলি লোক সার বস্তু ঈশ্বরকে ত্যাগ ক'রে অসার বস্তু কামিনী-কাঞ্চনাদি গ্রহণ করে ।

২৫ । বিষয়ী লোকের জ্ঞান কখন কখন এক একবার দেখা দেয় । বিষয়ী লোকদের রোখ্ নাই । হলো হলো, না হলো না হলো । জলের দরকার হয়েছে, কূপ খুঁড়ছে ; খুঁড়তে খুঁড়তে যেমন পাথর বেরুল, অমনি সেখানটা ছেড়ে দিলে । আর এক জায়গা খুঁড়তে খুঁড়তে কেবল বালি বেরায়, সেখানটাও ছেড়ে দিলে । যেখানে খুঁড়তে আরম্ভ করেছে, সেইখানেই খুঁড়বে, তবে ত জল পাবে ! জীব যেমন কৰ্ম্ম করে, সেইরূপ ফল পায় । কুঁড়ের কোনও কালে ধর্ম্ম হয় না ।

১৬ । সকলেরই এক পথে যেতে হবে । এখানে দুদিনের জন্ম । সংসার কৰ্ম্মভূমি । এখানে কৰ্ম্ম করতে আসা । কিছু কৰ্ম্ম করা দরকার । সাধন । তাড়াতাড়ি কৰ্ম্মগুলি শেষ করে নিতে হয় । স্নাকরারা সোনা গলাবার সময় হাপর, পাখা, চোঙ, সব দিয়ে হাওয়া করে, যাতে আগুনটা খুব জোর হয়ে সোনাটা গলে । সোনা গলবার পর তখন বলে, “তামাক সাজ ।” এতক্ষণ কপাল দিয়ে ঘাম পড়ছিল । খুব

রোখ্ চাই ; তবে সাধন হয় । দৃঢ় প্রতিজ্ঞা । তাঁর নামবীজের খুব শক্তি ; অবিद्या নাশ করে । বীজ এত কোমল, অঙ্কুর এত কোমল ; তবু শক্ত মাটি ভেদ করে । মাটি ফেটে যায় ।

২৭। ওরে কালে হবে, কালে বুঝবি । বিচীটা পুঁত্লেই কি অমনি ফল পাওয়া যায় ? আগে অঙ্কুর হবে, তারপর চারা গাছ হবে, তারপর সেই গাছ বড় হয়ে তাতে ফুল ধরবে ; তারপর ফল—সেই রকম । তবে লেগে থাকতে হবে ; ছাড়লে হবে না । তাঁর সেবা, বন্দনা ও অধীনতা—কি না দীনভাব, এই নিয়ে বিশ্বাস করে পড়ে থাকতে থাকতে সব হবে ; তাঁর দর্শন পাওয়া যাবেই যাবে । তা না করে ছেড়ে দিলে কিন্তু ঐ পর্যন্তই হলো । একজন চাকরি করে কষ্টে কষ্টে কিছু কিছু করে টাকা জমাত । একদিন গুণে দেখে যে, হাজার টাকা জমেছে । অমনি আহ্লাদে আটখানা হয়ে মনে করলে, তবে আর কেন চাকরি করা ? হাজার টাকা ত জমেছে, আর কি ! এই বলে চাকরি ছেড়ে দিলে । এতটুকু আধার, এতটুকু আশা ! ঐ পেয়েই সে ফুলে উঠলো ; ধরাকে সরা দেখতে লাগলো । তারপর হাজার টাকা খরচ হতে আর কদিন লাগে ? অল্প দিনেই ফুরিয়ে গেল । তখন ছুঁখে কষ্টে আবার চাকরির জন্য ফ্যা ফ্যা করে বেড়াতে লাগলো ! ওরকম করলে চলবে না ; তাঁর (ভগবানের) দ্বারে পড়ে থাকতে হবে ; তবে ত হবে ।

২৮। জীব ঈশ্বর চিন্তা করে, কিন্তু ঈশ্বরে বিশ্বাস নাই ।

আবার ভুলে যায়, সংসারে আসক্ত হয়। হাতীকে স্নান করিয়ে দিলে আবার তারা ধুলো কাদা মাখে। মন মত্তকরী। তবে হাতীকে নাইয়েই যদি আস্তাবলে সাঁদু করিয়ে দিতে পার, তাহলে আর ধুলো কাদা মাখতে পারে না। যদি জীব মতুকালে ঈশ্বর-চিন্তা করে, তাহলে শুদ্ধমন হয়, আর সে মন কামিনী-কাঞ্চনে আবার আসক্ত হবার অবসর পায় না। ঈশ্বরে বিশ্বাস নাই, তাই এত কৰ্মভোগ। দেহত্যাগের সময় যাতে ঈশ্বর-চিন্তা হয়, তাই তার আগে থাকতে উপায় করতে হয়। উপায়—“অভ্যাসযোগ।” ঈশ্বর-চিন্তা অভ্যাস করলে শেষের দিনেও তাঁকে মনে পড়বে। ওদেশে ছুতোদের মেয়েরা চিঁড়ে বেছে। তারা কতদিক সামলে কাজ করে শোন। টেকির পাট পড়ছে, এক হাতে ধানগুলি ঠেলে দিচ্ছে, আর এক হাতে ছেলেকে কোলে করে মাই দিচ্ছে; আবার খদ্দের এসেছে। টেকি এদিকে পড়ছে, আবার খদ্দেরের সঙ্গে কথাও চলছে। খদ্দেরকে বলছে, “তা হলে তুমি যে ক’ পয়সা ধার আছে, সে ক’ পয়সা দিয়ে যেও; আর জিনিস লয়ে যেও।” দেখ, ছেলেকে মাই দেওয়া, টেকি পড়ছে, ধান ঠেলে দেওয়া ও কাঁড়াধান তোলা, আবার খদ্দেরের সঙ্গে কথা বলা, এক সঙ্গে করছে; কিন্তু তার পনের আনা মন টেকির পাটের দিকে রয়েছে, পাছে হাতে পড়ে যায়। আর এক আনায় ছেলেকে মাই দেওয়া আর খদ্দেরের সঙ্গে কথা কওয়া। এরই নাম “অভ্যাস যোগ।” তেমনি যারা সংসারে

আছে, তাদের পনের আনা মন ভগবানে দেওয়া উচিত ।
না দিলে সর্বনাশ । কালের হাতে পড়তে হবে । আর এক
আনায় অন্যান্য কর্ম কর ।

২৯ । সংসারে থাকতে গেলে ওরকম হয় । কখনও উঁচু,
কখনও নীচু । কখনও বেশ ভক্তি হচ্ছে, আবার কমে যায় ।
কামিনী-কাঞ্চন নিয়ে থাকতে হয় কি না ! তাই এমন হয় ।
সংসারে ভক্ত কখনও ঈশ্বর-চিন্তা, হরিনাম করে, কখনও বা
কামিনী-কাঞ্চনে মন দিয়ে ফেলে । যেমন সাধারণ মাছি,
—কখনও সন্দেশে বসছে, কখনও বা পচা ঘা বা বিষ্ঠাতেও
বসে ।

৩০ । অবতার ইচ্ছা করে নিজের চোখে কাপড় বাঁধে ।
যেমন ছেলেরা কাণামাছি খেলে ; কিন্তু মা ডাকলেই খেলা
থামায় । জীবের আলাদা কথা ; যে কাপড়ে চোখ বাঁধা,
সেই কাপড়ে পিঠে আটটা জুপ দিয়ে বাঁধা । অষ্ট পাশ ; লজ্জা,
ঘৃণা, ভয়, জাতি, কুল, শীল, শোক, জুগুপ্সা (গোপনের ইচ্ছা) ।
ঐ অষ্ট পাশ । গুরু না খুলে দিলে হয় না ।

৩১ । “লজ্জা, ঘৃণা, ভয়, তিন থাকতে নয় ।” লজ্জা, ঘৃণা,
ভয়, জাতি, অভিমান ; জীবের এসব পাশ । এ সব গেলে
তার সংসার হতে মুক্তি হয় ।

৩২ । সব কাজ করবে, কিন্তু মন ঈশ্বরেতে রাখবে । স্ত্রী,
পুত্র, বাপ, মা, সকলকে নিয়ে থাকবে ও সেবা করবে । যেন
কত আপনার লোক । কিন্তু মনে জানবে যে, তারা তোমার

কেউ নয়। বড়মানুষের বাড়ীর দাসী সব কাজ করছে, কিন্তু দেশে নিজের বাড়ীর দিকে মন পড়ে আছে। আবার সে মনিবের ছেলেদের আপনার ছেলের মত মানুষ করে। বলে “আমার রাম”, “আমার হরি”। কিন্তু মনে বেশ জানে, এরা আমার কেউ নয়। সংসারে সব কস্ম করবে, কিন্তু ঈশ্বরে মন ফেলে রাখবে।

৩৩। ঈশ্বরে ভক্তিলাভ না করে যদি সংসার করতে যাও, তা হলে আরও জড়িয়ে পড়বে। বিপদ, শোক, তাপ, এ সব অধৈর্য্য হয়ে যাবে। আর যত বিষয় চিন্তা করবে, ততই আসক্তি বাড়বে। তেল হাতে মেখে তবে কাঁচাল ভাজতে হয়। তা না হলে হাতে আঁঠা জড়িয়ে যায়। ঈশ্বরে ভক্তি-রূপ তেল লাভ করে তবে সংসারের কাজে হাত দিতে হয়।

৩৪। জাহাজ যে দিকে যাক না কেন, কম্পানের কাঁটা উত্তর দিকেই থাকে; তাই জাহাজের দিক ভুল হয় না। মানুষের মন যদি ঈশ্বরের দিকে থাকে, তা হলে আর কোনও ভয় থাকে না।

৩৫। নষ্ট স্ত্রীলোক যেমন আত্মীয় স্বজনের মধ্যে থেকে সংসারের সব কাজ করে, কিন্তু তার মন পড়ে থাকে উপপতির উপর—সে কাজ করতে করতে সর্বদা ভাবে যে কখন তার সঙ্গে দেখা হবে; তোমারও সংসারের কাজ করতে করতে মন সর্বদা যেন ভগবানের দিকে পড়ে থাকে।

৩৬। বালক যেমন এক হাত দিয়ে খোঁটা ধরে বনবন

করে ঘুর্তে থাকে, একবারও ভয় করে না, কিন্তু তার মন সেই খোঁটার দিকে সর্বদা পড়ে আছে,—সে মনে জানে, খোঁটাটি ছাড়লেই আমি পড়ে যাব। সংসারেও সেই রকম ভগবানের দিকে মন রেখে সকল কাজ কর, কিন্তু মন যেন সর্বদা তাঁর প্রতি থাকে ; তা হলে নিরাপদে থাকবে।

৩৭। বাউল যেমন দুহাতে দুরকম বাজনা বাজায় ও মুখে গান করে, তোমরাও তেমনি হাতে সমস্ত কাজ কর, কিন্তু মুখে সর্বদা ঈশ্বরের নাম জপ করতে ভুলো না।

৩৮। কচ্ছপ জলে চুষে বেড়ায়, কিন্তু তার মন কোথায় পড়ে আছে জান ? আড়ায় পড়ে আছে, যেখানে তার ডিম-গুলি আছে। সংসারের সব কৰ্ম করবে, কিন্তু ঈশ্বরে মন ফেলে রাখবে।

৩৯। তাঁকে জেনে,—এক হাত ঈশ্বরের পাদপদ্মে রেখে, আর এক হাতে সংসারের কার্য কর। যতক্ষণ তাঁকে না জানা যায়, ততক্ষণ সংসার মিথ্যা। তখন তাঁকে ভুলে, মানুষ “আমার” “আমার” করে। মায়ায় বদ্ধ হয়ে, কামিনী-কাঞ্ছনে মুগ্ধ হয়ে মানুষ আরও ডোবে। মায়াতে মানুষ এমনি অজ্ঞান হয় যে, পালাবার পথ থাকলেও পালাতে পারে না।

৪০। জনকাদি সংসারেও কৰ্ম করেছিলেন, ঈশ্বরকে মাথায় রেখে কাজ করতেন ; পশ্চিমের মেয়েদের দেখ নাঈ ? হিন্দুস্থানী মেয়েরা মাথায় করে চার পাঁচটি জলভরা কলসী নিয়ে যায়। পথে আত্মীয় লোকদের সঙ্গে গল্প করে, সুখদুঃখের

কথা কয়, কিন্তু তাদের মন থাকে মাথার কলসীর উপর, যেন সেটি পড়ে না যায়। ধর্মপথের পথিকদেরও সকল অবস্থায় ভেতরে ঐ রকম দৃষ্টি রাখতে হবে, মন যেন তাঁর উপর থেকে সরে না যায়।

৪১। যারা তাঁকে ধরে থাকে, তারা এই বিষম শোকেও একেবারে তলিয়ে যায় না ; একটু নাড়া চাড়া খেয়েই সামলে পড়ে। গঙ্গায় ষ্টীমারগুলো গেলে জেলে ডিঙ্গিগুলো কি করে ? মনে হয়, যেন একেবারে গেল, আর সামলাতে পারলে না : কোনও খানা বা উল্টেই গেল। আর বড় বড় হাজার মূণে কিস্তিগুলো ছু চার বার টালমাটাল হ'য়েই যেমন তেমনি স্থির হলো ; ছু চার বার নাড়া চাড়া কিন্তু খেতেই হবে। কয়-দিনের জন্মই বা সংসারের পুত্রাদির সঙ্গে সম্বন্ধ ? মানুষ সুখের আশায় সংসার করতে যায় ;—বিয়ে করলে, ছেলে হলো, সেই ছেলে আবার বড় হলো, তার বিয়ে দিলে—দিন কতক বেশ চললো। তার পর এটার অসুখ, ওটা মলো, এটা বয়ে গেল,—ভাবনা চিন্তায় একেবারে বাতিবাস্ত। যত রস মরে, তত একেবারে “দশডাক” ছাড়তে থাকে। জীব যেন ডাল : জঁতার ভিতর পড়েছে, পিষে যাবে। তবে যে কটি ডাল খুঁটি ধরে থাকে, তারা পিষে যায় না। তাই খুঁটি অর্থাৎ ঈশ্বরের শরণাগত হতে হয় ; তাঁকে ডাক ; তাঁর নাম কর : তবে মুক্তি। তা না হলে কালরূপ জঁতায় পিষে যাবে।

৪২। পাঁকাল মাছের মত থাক। সে পাঁকে থাকে, কিন্তু

গায়ে পাক নাহি । ঈশ্বরের উপর মন ফেলে রেখে সংসারের কাজ সব কর । কিন্তু বড় কঠিন । “যে ঘরে আচার, তেঁতুল আর জলের জালা, সেই ঘরে বিকারের রোগী ! কেমন কবে রোগ সারবে ?” আবার তেঁতুল মনে করলে মুখে জল সরে । পুরুষের পক্ষে স্ত্রীলোক আচার ও তেঁতুলের মত । আর বিষয় তৃষ্ণা সর্বদাই লেগে আছে ; ঐটেই জলের জালা । এ তৃষ্ণার শেষ নাহি । বিকারের রোগী বলে, “এক জালা জল খাব ।” বড় কঠিন । সংসারে নানা গোল ।

৪৩ । চৈতন্যলাভের পর সংসারে গিয়ে থাক । অনেক পরিশ্রম করে যদি কেউ সোনা পায়, সে মাটির ভিতর রাখতে পারে,—জলের ভিতরও রাখতে পারে—সোনার কিছুই হয় না । আমি বলি, অনাসক্ত হয়ে সংসার কর । হাতে তেল মেখে কাঁঠাল ভাঙ্গ—তাহলে হাতে আঠা লাগবে না । কাঁচা মনকে সংসারে রাখতে গেলে মন মলিন হয়ে যায় ; জ্ঞান লাভ করে তবে সংসারে থাকতে হয় । শুধু জলে দুধ রাখলে দুধ নষ্ট হয়ে যায় । মাখন তুলে জলের উপর রাখলে, আর কোনও গোল থাকে না । বিবেক বৈরাগ্য লাভ করে সংসার করতে হয় । সংসার সমুদ্রে কাম ক্রোধাদি কুমীর আছে । হলুদ গায়ে মেখে জলে নামলে কুমীরের ভয় থাকে না । বিবেক বৈরাগ্য—হলুদ । সদসৎ বিচারের নাম বিবেক । ঈশ্বরই সৎ, নিতা বস্তু । আর সব অসৎ, অনিতা, ছুদিনের জন্ম । এইটি বোধ ।

৪৪। সংসার কর না কেন? তাতে দোষ নাই; তবে ঈশ্বরেতে মন রেখে কর। জেনো যে, বাড়ী, ঘর, পরিবার আমার নয়; এ সব ঈশ্বরের; আমার ঘর ঈশ্বরের কাছে। আর বলি যে তাঁর পাদপদ্মে ভক্তির জন্ম ব্যাকুল হয়ে সর্বদা প্রার্থনা করবে।

৪৫। না গো, তোমাদের সব তাগ করতে হবে কেন? তোমরা রসেবশে বেশ আছ। নক্সা খেলা জান? আমি বেশী কাটিয়ে জ্বলে গেছি। তোমরা খুব সেয়ানা, কেউ দশে আছ, কেউ ছয়ে আছ, কেউ পাঁচে আছ। বেশী কাটাও নাই। তাই আমার মত জ্বলে যাও নাই। খেলা চলছে, এ ত বেশ! সত্য বলছি, তোমরা সংসার করছ, এতে দোষ নাই; তবে ঈশ্বরের দিকে মন রাখতে হবে। তা না হলে হবে না। এক হাতে কর্ম কর, আর এক হাতে ঈশ্বরকে ধরে থাক। কর্ম শেষ হলে, দুই হাতে ঈশ্বরকে ধরবে।

৪৬। সবাই সংসার তাগ করবে কেন? আর তাঁর কি ইচ্ছা যে, সকলেই শিয়াল কুকুরের মত কানিনী-কাধনে মুখ জুবুড়ে থাকে? আর কি কিছু ইচ্ছা তাঁর নয়? কোন্টা তাঁর ইচ্ছা, কোন্টা অনিচ্ছা, কি সব জেনেছো? তাঁর ইচ্ছা সংসার করা, তুমি বলছো। যখন স্ত্রী পুত্র মরে, তখন ভগবানের ইচ্ছা দেখতে পাও না কেন? যখন খেতে পাও না,—তখন ভগবানের ইচ্ছা দেখতে পাও না কেন? তাঁর কি ইচ্ছা, মায়াতে জানতে দেয় না। তাঁর মায়াতে অনিতাকে

নিতা বোধ হয়, আবার নিতাকে অনিতা বোধ হয়। সংসার অনিতা,—এই আছে, এই নাই, কিন্তু তাঁর মায়াতেই বোধ হয়, এই ঠিক। তাঁর মায়াতেই আমি কর্তা বোধ হয়, আর ‘আমার’ এই সব,—স্বীপুত্র, ভাই-ভগিনী, বাপমা, বাড়ীঘর—এই সব ‘আমার’ বোধ হয়। সংসারশ্রম ভোগের আশ্রম। আর কামিনী-কাঞ্চন ভোগ কি আর করবে? সন্দেশ গলা থেকে নেবে গেলে টুক্ কি মিষ্টি মনে থাকে না। তবে সকলে কেন তাগ করবে? সময় না হলে কি তাগ হয়? ভোগান্ত হয়ে গেলে তবে তাগের সময় হয়। জোর করে কি কেউ তাগ করতে পারে?

৪৭। সকলের পক্ষে সংসার তাগ নয়। যাদের ভোগান্ত হয় নাই, তাদের পক্ষে সংসার তাগ নয়। তারা নিষ্কাম কৰ্ম করবার চেষ্টা করবে। বিচার করতে করতে সংসারের কোনও বিষয়টা ভোগ করতে গেলেই যে মন ঐ বিষয় তাগ করবে, একথা নিশ্চিত। যেমন ধর,—রসগোল্লা খাবে বোলে মন ভারি ধবেছে, কিছুতেই আর বাগ মান্ছে না, যত বিচার কর্ছে, সব যেন ভেসে যাচ্ছে। তখন কতকগুলো রসগোল্লা এনে এ গাল ও গাল করে চিবিয়ে খেতে খেতে মনকে বলবি—“মন, এরই নাম রসগোল্লা; এও আলু পটোলের মত পঞ্চ ভূতের বিকারে তৈয়ারী হয়েছে; এও খেলে শরীরে গিয়ে রক্ত, মাংস, মল, মূত্র, হবে; যতক্ষণ গালে আছে, ততক্ষণই এটা মিষ্টি—গলার নীচে নামলে আর এ আশ্বাদের কথা মনে থাকবে না;

আবার বেশী খাও ত অসুখ হবে । এর জন্ম এত লালায়িত কেন ? ছি ! ছি !—এই খেলে, আর খেতে চেও না ।” সামান্য সামান্য বিষয়গুলি এই রকম করে বিচারবুদ্ধি নিয়ে ভোগ করে তাগ করা চলে ; কিন্তু বড় বড় গুলোতে ওরকম করা চলে না ; ভোগ করতে গেলেই বন্ধনে পড়ে যেতে হয় । সে জন্ম বড় বড় বাসনাগুলোকে বিচার করে তাতে দোষ দেখে, মন থেকে তাড়াতে হয় ।

৪৮ । জলে নৌকা থাকে ক্ষতি নাই, কিন্তু নৌকার ভিতর যেন জল না ঢোকে, তা হলে ডুবে যাবে । তোমরা সংসারে থাক ক্ষতি নাই, কিন্তু তোমাদের মনের ভিতর যেন সংসার-ভাব না থাকে ।

৪৯ । সংসার তাগ তোমাদের কেন করতে হবে ? যে কালে যুদ্ধ করতেই হবে, কেলা থেকেই যুদ্ধ ভাল । ইন্দ্রিয়ের সঙ্গে যুদ্ধ, ক্ষিদে, তৃষ্ণা, এসবের সঙ্গে যুদ্ধ করতে হবে । এ যুদ্ধ সংসার থেকেই ভাল । আবার কলিতে অন্নগত-প্রাণ, হয় ত খেতেই পেলো না ; তখন ঈশ্বর টিশ্বর সব ঘুরে যাবে । এক জন তার মাগ্কে বলেছিল, “আমি সংসার তাগ করে চল্লুম ।” মাগ্টি একটু জ্ঞানী ছিল । সে বললে, “কেন তুমি ঘুরে ঘুরে বেড়াবে ? যদি পেটের ভাতের জন্ম দশ ঘরে যেতে না হয়, তবে যাও । তা যদি হয়, এই এক ঘরই ভাল ।” তোমরা তাগ করবে কেন ? বাড়ীতে বরং সুবিধা ; আহারের জন্ম ভাবতে হবে না । সহবাস স্বদারার সঙ্গে, তাতে দোষ নাই ।

শরীরের যখন যেটি দরকার, কাছেই পাবে। রোগ হলে সেবা করবার লোক কাছেই পাবে। জনক, ব্যাস, বশিষ্ঠ, জ্ঞান লাভ করে সংসারে ছিলেন। এঁরা দুখানা তরবার ঘুরাতেন। এক খানা জ্ঞানের, একখানা কন্মের।

৫০। তোমরা সংসারী, তোমরা এও রাখ, অও রাখ। সংসারও রাখ, ধর্মও রাখ। আমি পঞ্চবটীর কাছে গঙ্গার ধারে “টাকা মাটি, মাটিই টাকা, টাকাই মাটি,” এই বিচাব করতে করতে যখন টাকা গঙ্গার জলে ফেলে দিলুম, তখন একটু ভয় হল! ভাবলুম, আমি কি লক্ষ্মীছাড়া হলুম! মা লক্ষ্মী যদি খাঁটি বন্ধ করে দেন, তা হলে কি হবে! তখন পাটোয়ারি করলুম। বললুম, “মা, তুমি যেন হৃদয়ে থেকে।” একজন তপস্যা করতে ভগবতী সন্তুষ্ট হয়ে বললেন, “তুমি বর লও।” সে বললে, “মা, যদি বর দিবে, তবে এই করো, যেন আঁনি নাতির সঙ্গে সোনার থালে ভাত খাই।” এক বরেতে, নাতি, ঐশ্বর্যা, সোনার থাল, সব হল।

৫১। শব সাধন করতে হলে পাশে ছোলা ও মদ রাখতে হয়। সাধনার কোনও সময় যদি ঐ শব জেগে হাঁ করে, তখন ঐ ছোলা ও মদ তার মুখে দিলে সে স্থির হবে; না পেলে তোমার সাধনার ব্যাঘাত করবে। সংসারের মধ্যে থেকে সাধনা করতে হলে, আগে সংসারের খরচপত্রের ঠিক করে বসতে হবে; না হলে তোমার সাধনার ব্যাঘাত করবে।

৫২। মন নিয়ে কথা; মনেতেই বন্ধ, মনেতেই মুক্ত।

মন যে রংয়ে ছোবাবে, সেই রংয়ে ছুববে। যেমম ধোপা-ঘরের কাপড় ; লালে ছোবাও, লাল ; নীলে ছোবাও, নীল ; সবুজ রংয়ে ছোবাও, সবুজ। যে রংয়ে ছোবাও, সেই রংয়ে ছুববে। দেখ না, যদি একটু ইংরাজী পড়, ত অমনি মুখে ইংরাজী কথা এসে পড়ে। আবার সেই সঙ্গে পায়ে বৃট জুতা, শিষ্ দিয়ে গান করা, এই সব এসে জুটবে। আবার যে পণ্ডিত সংস্কৃত পড়ে, সে সংস্কৃত শ্লোক ঝাড়বে। মনকে কু-সঙ্গে রাখলে সেইরকম কথাবার্তা, চিন্তা হয়ে যাবে। যদি ভক্তের সঙ্গে রাখ, তাহলে ঈশ্বর-চিন্তা, হরিকথা, এই সব হবে ; মন নিয়েই সব। এক পাশে পরিবার, একপাশে সন্তান ; পরিবারকে এক ভাবে, সন্তানকে আর এক ভাবে আদর করে। কিন্তু একই মন।

৫৩। সংসারের ভিতর—বিশেষ কর্মের মধ্যে থেকে প্রথমাবস্থায় মন স্থির করতে অনেক ব্যাঘাত হয়। যেমন ফুট পাথের গাছ। যখন চারাগাছ থাকে, তখন বেড়া না দিলে ছাগল গরুতে খেয়ে ফেলে। প্রথমাবস্থায় বেড়া দিতে হয় ; গুঁড়ি হলে আর বেড়ার দরকার থাকে না। তখন গুঁড়িতে হাতী বেঁধে দিলেও কিছু হয় না।

৫৪। ভগবদর্শন না হলে কাম একেবারে যায় না। ভগবানের দর্শন হলেও শরীর যতদিন থাকে, ততদিন একটু আধটু থাকে ; তবে মাথা তুলতে পারে না। তবে বলে, কলিতে মনের পাপ পাপ নয়। আর যদি কখনও এক আধবার

কৃ-ভাব এসে পড়ে, তো কেন এল বলে বসে বসে তাই ভাবতে থাকবি কেন ? ওগুলোকে শৌচ পেছাপের মত মনে করবি । আর তাঁর নিকটে খুব প্রার্থনা করবি ; হরিনাম করবি ও তাঁর কথাই ভাববি । ওভাবগুলো এল কি গেল, সে দিকে নজর দিবি না । এর পর ওগুলো বাঁধ মানবে ।

৫৫ । তোমরা যতদূর পার, স্ত্রীলোকের সঙ্গে অনাসক্ত হয়ে থাকবে । মাঝে মাঝে নির্জন স্থানে গিয়ে ঈশ্বর-চিন্তা করবে । সেখানে যেন ওরা কেউ না থাকে । তার পর ঈশ্বরে বিশ্বাস, ভক্তি এলে অনেকটা অনাসক্ত হয়ে থাকতে পারবে । দু একটি ছেলে হলে স্ত্রী পুরুষ দুই জনে ভাই বোনের মত থাকবে । আর ঈশ্বরকে সর্বদা প্রার্থনা করবে, যাতে ইন্দ্রিয় সুখেতে মন না যায় । ছেলে পুত্র আর না হয় ।

৫৬ । সংসারে থেকে সাধন করা বড় কঠিন । অনেক বাধাত,—তা আর তোমাদের বলতে হবে না,—রোগ, শোক, দারিদ্র্য, আবার স্ত্রীর সঙ্গে মিল নাই, ছেলে অবাধা, মৃগ, গৌয়ার, কুড়ি টাকা মাইনে, ছেলের অনুরোধ দিতে পারছে না, ছেলেকে পড়াতে পারছে না, বাড়ী ভাঙ্গা, ছাদ দিয়ে জল পড়ছে, মেরামত করবার টাকা নাই । তবে উপায় আছে । মাঝে মাঝে নির্জনে গিয়ে তাঁকে প্রার্থনা করতে হয়, তাঁকে লাভ করবার জন্য চেষ্টা করতে হয় । যখন অবসর পাবে, কোনও নির্জন স্থানে গিয়ে,—একদিন, দুদিন থাকবে,—যেন

সংসারের সঙ্গে কোনও সম্বন্ধ না থাকে,—যেন কোনও বিষয়ী লোকদের সঙ্গে সাংসারিক বিষয় লয়ে আলাপ না করতে হয়। হয় নির্জনে বাস, নয় সাধুসঙ্গ।

৫৭। সাধুসঙ্গ সর্বদা করা দরকার, সাধু ঈশ্বরের সহিত আলাপ করিয়ে দিতে পারে। একটু কষ্ট করে সংসঙ্গ করতে হয়। বাড়ীতে কেবল বিষয়ের কথা। রোগ লেগেই আছে।

৫৮। সাধুসঙ্গ কেমন জানি ?—যেমন চাল ধোয়ানি জল। যার অন্তঃকরণ নেশা হয়েছে, তাকে যদি চালের জল খাওয়ান যায়, তা হলে তার নেশা কেটে যায়। সেইরূপ এই সংসার-মদে যারা মত্ত রয়েছে, তাদের নেশা কাটবার একমাত্র উপায় সাধুসঙ্গ।

৫৯। বৈদ্যের কাছে না গেলে রোগ ভাল হয় না। সাধুসঙ্গ একদিন করলে হয় না; সর্বদাই দরকার। রোগ লেগেই আছে। আবার বৈদ্যের কাছে না থাকলে নাড়ীজ্ঞান হয় না; সঙ্গে সঙ্গে ঘুরতে হয়। তবে কোন্টি কফের নাড়ী, কোন্টি পিত্তের নাড়ী বোঝা যায়। সাধুসঙ্গে ঈশ্বরে অনুরাগ হয়; তাঁর উপরে ভালবাসা হয়। বাকুলতা না হলে কিছুই হয় না। সাধুসঙ্গ করতে করতে ঈশ্বরের জগ্য প্রাণ বাকুল হয়। যেমন বাড়ীতে কারুর অসুখ হলে, সর্বদাই মন বাকুল হয়ে থাকে,—কিসে রোগী ভাল হয়। সাধুসঙ্গ করলে তার একটি উপকার হয়। সদসং বিচার। সং নিত্য পদার্থ অর্থাৎ ঈশ্বর। অসং অর্থাৎ অনিত্য। অসং পথে মন গেলেই বিচার

করতে হয়। হাতী পরের কলাগাছ খেতে শুঁড় বাড়ালে, সেই সময় মাহুত ডাঙ্গস্ মারে।

৬০। সাধুর ছবি দেখলে মনে সাধুভাবের উদ্দীপন হয়; শোলার আতা দেখলে যেমন সতাকার আতার উদ্দীপন হয়, যুবতী জ্বীলোক দেখলে লোকের যেমন ভোগের উদ্দীপন হয়। তাই তোমাদের বলি, সর্বদাই সাধুসঙ্গ দরকার। সংসারের জ্বালা তো দেখছে! ভোগ নিতে গেলেই জ্বালা। সাধুসঙ্গে শান্তি হয়। তখন হাঁফ ছেড়ে বাঁচে।

৬১। এক চোর রাজার বাড়ী চুরি করতে গিয়ে শুন্লে যে, রাজা রাণীকে বলছেন যে, কাল সকালে গঙ্গাতীরে যে সকল সাধুরা এসেছেন, তাঁদের মধ্যে একজনকে ডেকে এনে রাজকন্যার সঙ্গে বিবাহ দিবেন। চোর এই কথা শুনে ভাবলে যে, তবে কেন আমিও সেইখানে সাধু সেজে বসে থাকিগে না, যদি ডাকে, তাহলে রাজকন্যাকে বিবাহ করতে পাব। সেই তাই করলে। পর দিন রাজার লোক গিয়ে সাধুদের আহ্বান করতে লাগল; কিন্তু বিবাহের কথা শুনে সাধুরা কেউ রাজী হলো না। তার পর রাজার লোকেরা সেই সাধুবেশধারী চোরকে আহ্বান করলে, চোর একেবারে সম্মত না হয়ে কিঞ্চিৎ চুপ করে থাকলো। রাজার লোকেরা রাজার নিকট এসে বললে যে, একটি যুবা সাধু আছেন, তিনি রাজী হ'লেও হতে পারেন, কিন্তু আর কোনও সাধু সম্মত নন। রাজা অগত্যা সেই সাধুবেশধারী যুবক চোরের নিকট এলেন

এবং নানারকমে তার সাধ্য সাধনা করতে লাগলেন। রাজাকে সম্মুখে দেখে চোরের মন বদলে গেল, সে ভাবলে যে, আমি কেবলমাত্র সাধুর বেশ পরেছি, তাতেই আমার নিকট রাজা এসে সাধা সাধনা করছেন, না জানি আমি প্রকৃত সাধু হলে আমার কি দশা হবে। এইরূপ ভাবতে ভাবতে তার মন একেবারে বদলে গেল এবং বিবাহ না করে যাতে প্রকৃত সাধু হওয়া যায়, তারই জন্ম সে যত্নবান্ হলো। তার আর বিবাহ করা হলো না। মুহূর্ত্তেক সাধুর বেশ পরে সাধুর নিকট বসে চোরের মন এমনই বদলে গেল। সৎসঙ্গের মহিমা কত, তাহা বলা যায় না।

৬২। একজন জেলে রাত্রে এক বাগানের পুকুরে জাল ফেলে মাছ চুরি করছিল। গৃহস্থ জানতে পেরে তাকে লোক-জন দিয়ে ঘিরে ফেললে। আর মশাল টশাল নিয়ে চোরকে খুঁজতে এল। এদিকে জেলেটা খানিকটা ছাই মেখে একটা গাছতলায় সাধু হয়ে বসে আছে। ওরা অনেক খুঁজে দেখে, জেলে টেলে কেউ নাই, কেবল গাছতলায় একটি সাধু ভস্মমাখা ধ্যানস্থ হয়ে রয়েছে। তার পরদিন পাড়ায় খবর হলো, একজন ভারি সাধু ওদের বাগানে এসেছে। যত লোক ফল, মূল, ফুল, সন্দেশ, আর আর মিষ্টান্ন দিয়ে সাধুকে প্রণাম করতে এলো। অনেক টাকা পয়সাও সাধুর সামনে পড়তে লাগলো। তখন জেলেটা ভাবলে, কি আশ্চর্য্য, আমি সত্যকার সাধু নই তবু আমার উপর লোকের এত ভক্তি!

তবে সত্যকার সাধু হলে আমি নিশ্চয়ই ভগবানকে পাব, সন্দেহ নাই।

৬৩। তা সংসারে হবে না কেন ? তবে কি জান, মন নিজের কাছে নাই। নিজের কাছে মন থাকলে তবে ত ভগবানকে দেবে ? মন বন্ধক দিয়েছ ; কামিনী-কাঞ্ছনে বন্ধক ! তাই সর্বদা সাধুসঙ্গ দরকার। মন নিজের কাছে এলে তবে সাধন ভজন হবে। সর্বদাই গুরুর সঙ্গ, গুরুর সেবা, সাধুসঙ্গ প্রয়োজন। হয় নিঃস্বপ্নে রাতদিন তাঁর চিন্তা, নয় সাধুসঙ্গ। মন একলা থাকলেই ক্রমে শুষ্ক হয়ে যায়। এক ভাঁড় জল যদি আলাদা রেখে দাও, ক্রমে শুকিয়ে যাবে। কিন্তু গঙ্গাজলের ভিতর যদি ঐ ভাঁড় ডুবিয়ে রাখ, তাহলে শুকোবে না। কামারশালার লোহা আগুনে বেশ লাল হয়ে গেল। আবার আলাদা করে রাখ, যেমন কাল, তেমনই কাল। তাই লোহাকে মধো মধো ছাপরে দিতে হয়। মন কেমন জান ? যেমন স্প্রিংয়ের গদী। যতক্ষণ গদীর উপরে বসে থাকা যায়, ততক্ষণই নীচু হয়ে থাকে ; আর ছেড়ে দিলেই তৎক্ষণাৎ উঠে পড়ে। তেমনি সৎ ও সাধুসঙ্গে ভগবানের ভাব যা কিছু লাভ করে, আবার সাধুসঙ্গ পরিত্যাগ কর্বামাত্র যে কে সেই—আপনার পূর্বভাব ধারণ করে। হাতীকে ছেড়ে দিলে চারিদিকের গাছপালা ভাঙতে ভাঙতে যায় ; কিন্তু তার মাথায় ডাঙ্গস্ মারলে ঠাণ্ডা হয়। মনকে ছেড়ে দিলে সে নানা-রকম ভাবে ; কিন্তু বিবেকরূপ ডাঙ্গস্ মারলে সে স্থির হয়।

৬৪। যাঁর নিকট যে কিছু শিক্ষা পাই, তাঁকে গুরু না বলে নির্দিষ্ট একজনকে গুরু বলবার প্রয়োজন কি? ব্যাকুলপ্রাণে যে তাঁকে ডাকে, তার কিছুই দরকার নাই। কিন্তু সচরাচর সে রকম ব্যাকুলতা দেখা যায় না বলেই গুরুর দরকার হয়। গুরু এক, কিন্তু উপগুরু অনেক হতে পারে। যাঁর কাছে কিছু শিক্ষা পাই—তিনিই উপগুরু। অবধূত এইরকম চব্বিশটি উপগুরু করেছিলেন। যেমন কোনও অচেনা জায়গায় যেতে হলে, যে জানে এমন একজনের কথা মত চলতে হয়, অনেককে জিজ্ঞাসা করলে পথ গোল হয়ে যায়; সেই রকম ঈশ্বরের নিকট যেতে গেলে গুরুর কথামত চলতে হয়। এই নিমিত্ত একজন গুরুর দরকার। সচ্চিদানন্দই গুরুরূপে আসেন। মানুষ-গুরুর কাছে যদি কেউ দীক্ষা লয়, তাঁকে মানুষ ভাবলে কিছু হবে না। তাঁকে সাক্ষাৎ ঈশ্বর ভাবতে হয়, তবে ত মনে বিশ্বাস হবে। বিশ্বাস হলেই সব হয়ে গেল। শূদ্র (একলবা) মাটির দ্রোণকে পূজা করত, সাক্ষাৎ দ্রোণাচার্য্য জানে; তাতেই বাণশিক্ষায় সিদ্ধ হলো।

৬৫। সকলেরই মুক্তি হবে, তবে গুরুর উপদেশ অনুসারে চলতে হয়। বাঁকা পথে গেলে ফিরে আসতে কষ্ট হবে, মুক্তি অনেক দেবীতে হয়। হয়ত এ জন্মেও হলো না, আবার হয়ত অনেক জন্মের পর হলো।

৬৬। মানুষের কি সাধা অপরকে সংসার-বন্ধন থেকে

মুক্ত করে। যাঁর এই ভুবনমোহিনী মায়া, তিনিই সেই মায়া থেকে মুক্ত করতে পারেন। সচ্চিদানন্দ গুরু বই আর গুরু নাই। যারা ঈশ্বর লাভ করে নাই, তাঁর আদেশ পায় নাই, যারা ঈশ্বরের শক্তিতে শক্তিমান্ হয় নাই, তাদের কি সাধ্য জীবের ভববন্ধন মোচন করে। আমি একদিন পঞ্চবটীর কাছ দিয়ে ঝাউতলায় বাহো যাচ্ছিলাম। শুন্তে পেলাম যে একটা কোলা ব্যাঙ খুব ডাক্ছে। বোধ হ'ল সাপে ধরেছে। অনেকক্ষণ পরে যখন ফিরে আসছি, তখনও দেখি, ব্যাঙটি খুব ডাক্ছে। একবার উঁকি মেরে দেখলাম কি হয়েছে। দেখি, একটা টোঁড়ায় ব্যাঙটিকে ধরেছে,—ছাড়তেও পার্ছে না, গিলতেও পার্ছে না, ব্যাঙটারও যন্ত্রণা ঘুচ্ছে না। তখন ভাবলাম, ওরে! যদি জাত সাপে ধরত, তিন ডাকের পর ব্যাঙটা চুপ হয়ে যেত। একটা টোঁড়ায় ধরেছে কি না, তাই সাপটারও যন্ত্রণা, ব্যাঙটারও যন্ত্রণা। যদি সদগুরু হয়, জীবের অহঙ্কার তিন ডাকে ঘোচে। গুরু কাঁচা হলে, গুরুরও যন্ত্রণা, শিষ্যেরও যন্ত্রণা। শিষ্যের অহঙ্কার আর ঘোচে না, সংসার বন্ধন আর কাটে না। কাঁচা গুরুর পাল্লায় পড়লে শিষ্য মুক্ত হয় না। সচ্চিদানন্দই গুরু; যদি মানুষ গুরুরূপে চৈতন্য করে, তো জানবে যে, সচ্চিদানন্দই ঐ রূপ ধারণ করেছেন। গুরু যেমন সেথো; হাত ধরে নিয়ে যান। ভগবান্ দর্শন হলে আর গুরু শিষ্য বোধ থাকে না। “সে বড় কঠিন ঠাই, গুরু শিষ্যে দেখা নাই!” তাই জনক শুকদেবকে

বল্লেন, “যদি ব্রহ্মজ্ঞান চাও, আগে দক্ষিণা দাও।” কেন না, ব্রহ্মজ্ঞান হলে আর গুরু শিষ্য ভেদবুদ্ধি থাকবে না। বতক্ষণ ঈশ্বরদর্শন না হয়, ততদিনই গুরুশিষ্য সম্বন্ধ।

৬৭। সংসার কৰ্মক্ষেত্র। কৰ্ম করতে করতে তবে জ্ঞান হয়। গুরু বলেছেন, এই সব কৰ্ম কর, আর এই সব কৰ্ম করো না। আবার তিনি নিষ্কাম কৰ্মের উপদেশ দেন। কৰ্ম করতে করতে মনের ময়লা কেটে যায়। ভাল ডাক্তারের হাতে পড়লে ঔষধ খেতে খেতে যেমন রোগ সেরে যায়। কেন তিনি সংসার থেকে ছাড়েন না? রোগ সারবে, তবে ছাড়বেন। কামিনীকাঞ্চন ভোগ করতে ইচ্ছা যখন চলে যাবে, তখন ছাড়বেন। হাঁসপাতালে নাম লিখালে পালিয়ে আসবার যো নাই। রোগের কসুর থাকলে ডাক্তার সাহেব ছাড়বে না।

৬৮। যদি কারও ঠিক ঠিক অনুরাগ আসে ও সাধন ভজনের প্রয়োজন মনে করে, তা হলে নিশ্চয়ই তিনি তার সদগুরু জুটিয়ে দেন; গুরুর জন্ম সাধকের চিন্তা করবার দরকার নাই।

৬৯। গুরু তিন প্রকার—উত্তম, মধ্যম ও অধম। যে গুরু ধর্মশিক্ষা দিয়ে শিষ্যের কোনও খোঁজ খবর না লয়, সে গুরু অধম; আর যিনি শিষ্যের মঙ্গলের জন্ম বার বার বুঝাতে থাকেন, যাতে তাঁর উপদেশ সব ধারণা করতে পারে, ও ভালবাসা দেখান, তিনি মধ্যম গুরু। আর শিষ্যেরা ঠিক ঠিক

শুন্ছে না বা পালন করছে না দেখে, যে গুরু খুব জোর জবর-
দস্তি পর্য্যন্ত করেন, তিনি উত্তম গুরু ।

৭০ । যারা শিষ্য করে বেড়ায়, তারা হালকা থাকের
লোক । আর যারা সিদ্ধাই অর্থাৎ নানারকম শক্তি চায়, তারাও
হালকা থাক । যেমন গঙ্গা হেটে পার হয়ে যাব, এই শক্তি ;
অন্য আর এক দেশে একজন কি কথা বলছে, তাই বলতে
পারা, এই এক শক্তি । ঈশ্বরে শুদ্ধা ভক্তি হওয়া এই সব
লোকের ভারি কঠিন । যারা হীনবুদ্ধি, তারাই সিদ্ধাই চায় ।
ব্যারাম ভাল করা, মকদ্দমা জেতান, জলে হেটে চলে যাওয়া,
এই সব । যারা শুদ্ধ ভক্ত, তারা ঈশ্বরের পাদপদ্ম ছাড়া আর
কিছু চায় না । যাদের একটু সিদ্ধাই থাকে, তাদের প্রতিষ্ঠা,
লোকমান্য, এই সব হয় । সিদ্ধাই থাকা এক মহাগোল ।
একজন সিদ্ধ সমুদ্রের ধারে বসে আছে, এমন সময় একটা ঝড়
এল । ঝড়ে তার কষ্ট হলো বলে সে বললে, “ঝড় থেমে যাক !”
তার বাক্য মিথ্যা হবার নয় । একখানা জাহাজ পাল ভরে
যাচ্ছিল । ঝড় হঠাৎ থামাও যা, আর জাহাজ টুক করে ডুবে
গেল । এক জাহাজ লোক সেই সঙ্গে ডুবে গেল । এখন
এতগুলি লোক মারা যাওয়াতে যে পাপ হলো, সব ওর হলো ।
সেই পাপে সিদ্ধাইও গেল, আবার নরকও হলো ।

৭১ । গুরুগিরি বেষ্টাগিরির মত । ছার টাকা কড়ি,
লোকমান্য হওয়া, শরীরের সেবা, এই সবের জন্ম আপনাকে
বিক্রী করা । যে শরীর, মন, আত্মা দ্বারা ঈশ্বরকে লাভ করা

যায়, সেই শরীর, মন, আত্মাকে সামান্য জিনিসের জন্ত
 একরূপ করে রাখা ভাল নয়। একজন বলেছিল, “সাবির এখন
 খুব সময়, এখন তার বেশ হয়েছে ;—একখানা ঘর ভাড়া
 নিয়েছে, ঘুঁটেরে, গোবররে, তক্তাপোষ, দুখানা বাসন
 হয়েছে, বিছানা, মাদুর, তাকিয়া, কত লোক বশীভূত, যাচ্ছে,
 আসছে ; তাই সুখ ধরে না।” সামান্য জিনিসের জন্ত নিজের
 সর্বনাশ ! অনেকের ইচ্ছা হয়, গুরুগিরি করি ; পাঁচজনে
 গণে, মানে, শিষ্য সেবক হয় ; লোকে বলবে গুরুচরণের
 ভাইয়ের আজকাল বেশ সময়, কত লোক আসছে, যাচ্ছে,
 শিষ্য সেবক অনেক হয়েছে, ঘরে জিনিসপত্র থৈ থৈ করছে,
 কত জিনিস কত লোক এনে দিচ্ছে, সে যদি মনে করে,—
 তার এমন শক্তি হয়েছে যে,—কত লোককে খাওয়াতে
 পারে !

৭২। গুরুগিরি করা ভাল নয়। ঈশ্বরের আদেশ না
 পেলে আচার্য্য হওয়া যায় না। যে নিজে বলে, “আমি গুরু,”
 সে হীনবুদ্ধি। দাঁড়িপাল্লা দেখ নাই ? হাল্কা দিকটা উচু
 হয়। যে ব্যক্তি নিজে উচু হয়, সে হাল্কা। সকলেই গুরু
 হতে যায় ! শিষ্য পাওয়া যায় না।

৭৩। সংসারে থাক ঝড়ের ঐঁটো পাতা হয়ে। ঝড়ের
 ঐঁটো পাতাকে কখন ঘরের ভেতর লয়ে যায়, কখন
 আঁস্তাকুড়ে। হাওয়া যে দিকে যায়, পাতাও সে দিকে যায়।
 কখন ভাল জায়গায়, কখন মন্দ জায়গায়। তোমাকে এখন

সংসারে ফেলেছেন ; ভাল, এখন সেই স্থানেই থাক, আবার যখন সেখান থেকে তুলে ওর চেয়ে ভাল জায়গায় ফেলবেন, তখন যা হয় হবে। তাঁকে আত্মসমর্পণ কর। তা হলে আর কোন গোল থাকবে না। তখন দেখবে, তিনিই সব করছেন। সবই রামের ইচ্ছা।

৭৪। কোনও একগ্রামে এক তাঁতি থাকে। বড় ধার্মিক, সকলেই তাকে বিশ্বাস করে আর ভালবাসে। তাঁতি হাটে গিয়ে কাপড় বিক্রী করে। খরিদার দাম জিজ্ঞাসা করলে বলে, “রামের ইচ্ছা, সূতার দাম একটাকা, রামের ইচ্ছা, মেহনতের দাম চার আনা, রামের ইচ্ছা, মুনফা দু আনা, কাপড়ের দাম রামের ইচ্ছায় একটাকা ছয় আনা।” লোকের এত বিশ্বাস যে, তৎক্ষণাৎ দাম ফেলে দিয়ে কাপড় নিত। লোকটি ভারি ভক্ত, রাত্রিতে খাওয়া দাওয়া করে অনেকক্ষণ চালায় বসে ঈশ্বরচিন্তা করে, তাঁর নাম গুণ কীর্তন করে। একদিন অনেক রাত পর্যন্ত লোকটির ঘুম হচ্ছে না, বসে আছে, এক একবার তামাক খাচ্ছে ; এমন সময় সেই স্থান দিয়ে একদল ডাকাত ডাকাতি করতে যাচ্ছে। তাদের মুঠের অভাব হওয়াতে তাকে বলে, “আমাদের সঙ্গে আয়।” এই বলে হাত ধরে টেনে নিয়ে চলো। তারপর একজনদের বাড়ী গিয়ে ডাকাতি করলে। কতকগুলো জিনিস তাঁতির মাথায় চাপিয়ে দিলে। এমন সময় পুলিশ এসে পড়ল। ডাকাতেরা পালাল। কেবল তাঁতিটি মাথায় মোট সমেত ধরা পড়ল।

সে রাত্রি তাকে হাজতে রাখা হলো। তার পরদিন হাকিমের কাছে বিচার। কিন্তু গ্রামের লোক জানতে পেরে সব এসে উপস্থিত। তারা সকলে বললে, “এ লোক কখনও ডাকাতি করতে পারে না।” হাকিম তখন তাঁতিকে জিজ্ঞাসা করলে, “কি গো, তুমি কি হয়েছে বল।” তাঁতি বললে, “হুজুর, রামের ইচ্ছা, আমি রাত্রিতে ভাত খেলুম। তারপর রামের ইচ্ছা, আমি চালায় বসে আছি, রামের ইচ্ছা, অনেক রাত হলো। আমি রামের ইচ্ছা, ভগবানের নাম করছিলাম। এমন সময় রামের ইচ্ছা, একদল ডাকাত সেই পথ দিয়ে যাচ্ছিল। রামের ইচ্ছা, তারা আমায় ধরে টেনে নিয়ে গেল। রামের ইচ্ছা, তারা একজনের বাড়ী ডাকাতি করে, রামের ইচ্ছা, আমার মাথায় মোট দিলে। এমন সময় রামের ইচ্ছা, পুলিশ এসে পড়ল। রামের ইচ্ছা, আমি ধরা পড়লাম। তখন রামের ইচ্ছা, পুলিশের লোকেরা হাজতে দিল। আজ সকালে, রামের ইচ্ছা, হুজুরের কাছে এনেছে।” এমন ধার্মিক লোক দেখে সাহেব তাঁতিকে ছেড়ে দিবার হুকুম দিলেন। তাঁতি রাস্তায় বন্ধুদের বললে, “রামের ইচ্ছা, আমাকে ছেড়ে দিয়েছে।” সংসার করা, সন্ন্যাস করা, সবই রামের ইচ্ছা। তাই তাঁর উপর সব ফেলে দিয়ে সংসারে কাজ কর।

৭৫। ছেলেবেলা থেকে কামিনীকাঞ্চন ত্যাগ—এটি খুব আশ্চর্য্য। খুব কম লোকের হয়। তা না হলে যেমন শিলে থেকে আম—ঠাকুরের সেবায় লাগে না, নিজে খেতেও ভয়

হয়। আগে অনেক পাপ করেছে, তারপর বুড়ো বয়সে হরি-
নাম করছে,—এ মন্দের ভাল।

৭৬। আমি ছেলেদের এত ভালবাসি কেন জান ? ছেলে-
বেলা তাদের মন যোল আনা নিজের কাছে থাকে, ক্রমে ভাগ
হয়ে পড়ে। বে হলে আট আনা স্ত্রীর উপর যায়, ছেলে হলে
আবার চার আনা তাদের প্রতি যায়, বাকী চার আনা মা,
বাপ, মান, সম্মম, বেশ ভূষা ইত্যাদিতে চলে যায়। এইজন্য
ছেলেবেলায় যারা ঈশ্বর লাভের চেষ্টা করে, তারা সহজে
তাঁকে লাভ করতে পারবে। বুড়োদের হওয়া বড় কঠিন।

৭৭। একসের ছুধে এক ছটাক জল থাকলে সহজে অল্প
জ্বাল দিয়ে ক্ষীর করা যায়, কিন্তু একসের ছুধে তিন পোয়া
জল থাকলে সহজে ক্ষীর হয় না, অনেক কাঠ খড় পুড়িয়ে জ্বাল
দিতে হয়, তবে হয় ; সেই রকম বালকের মনে বিষয়-বাসনা
খুব কম, এইরূপ একটুতে ঈশ্বরের দিকে যায় ; কিন্তু বুড়োদের
মনে বিষয়-বাসনা গজ্গজ্ করে, তাইতে তাদের মন সহজে
তাঁর দিকে যায় না।

৭৮। যেমন কচি বাঁশ অতি সহজে নোয়ান যায়, পাকা
বাঁশ নোয়াতে গেলে ভেঙ্গে যায় ; তেমনি ছেলেদের মন সহজে
ঈশ্বরে নিয়ে যাওয়া যায় ; কিন্তু বুড়োদের মন ঈশ্বরের দিকে
টান্তে গেলে ছেড়ে পালায়।

৭৯। মানুষের মন যেন সর্ষের পুঁটুলি। সর্ষের পুঁটুলি
একবার ছড়িয়ে গেলে যেমন কুড়ান ভার হয়ে উঠে, তেমনি

মানুষের মন একবার সংসারে ছড়িয়ে গেলে তখন স্থির করা বড় কঠিন হয়ে পড়ে। বালকের মন ছড়ায়নি, অল্পতেই স্থির হয়; কিন্তু বৃড়োদের যোল আনা মন সংসারে ছড়িয়ে রয়েছে, সংসার থেকে মন তুলে ঈশ্বরে স্থির করা বড় শক্ত।

৮০। সূর্যোদয়ের পূর্বে দধি মশ্নন করলে যেমন উত্তম মাখন উঠে থাকে, বেলা হলে কিন্তু আর ভাল মাখন তোলা যায় না; সেইরূপ বাল্যকালে যারা ঈশ্বরানুরাগী হয় ও সাধন ভজন করে, তাদেরই ঈশ্বর লাভ হয়ে থাকে।

৮১। বয়স হলে সংসার থেকে চলে গিয়ে ঈশ্বর চিন্তা করা ভাল।

৮২। সংসারে থাকতে গেলেই সুখ দুঃখ আছে,—একটু আধটু অশান্তি আছে। কালির ঘরে থাকলে গায়ে একটু কালি লাগেই। হাততালি দিয়ে সকালে বিকালে হরিনাম করবে—‘হরিবোল’ ‘হরিবোল’ বলে।

৮৩। নামের খুব মাহাত্ম্য আছে বটে, তবে অনুরাগ না থাকলে কি হয়? ঈশ্বরের জন্য প্রাণ ব্যাকুল হওয়া দরকার। তা না হলে শুধু নাম করে যাচ্ছি, কিন্তু কামিনীকাঞ্চে মন রয়েছে, তাতে কি হয়? বিছে বা ডাকুর (বড় মাকড়সা) কামড় অমনি মস্ত্রে সারে না, ঘুঁটের ভাব্রা দিতে হয়।

৮৪। নামও কর, সঙ্গে সঙ্গে প্রার্থনা কর, যাতে ঈশ্বরেতে অনুরাগ হয়; আর যে সব জিনিস দুদিনের জন্য—যেমন

টাকা, মন, দেহের সুখ,—তাদের উপর যাতে ভালবাসা কমে যায়, প্রার্থনা কর।

৮৫। তাঁর নাম করলে সব পাপ কেটে যায়। কাম, ক্রোধ, শরীরের সুখ-ইচ্ছা, এ সব পালিয়ে যায়।

৮৬। “তন্নামে অরুচি!” বিকারে যদি অরুচি হলো, তা হলে আর বাঁচবার পথ থাকে না; যদি একটু রুচি থাকে, তবে বাঁচবার খুব আশা। তাই নামে রুচি। ঈশ্বরের নাম করতে হয়। দুর্গানাম, কৃষ্ণনাম, শিবনাম, যে নাম বলে ঈশ্বরকে ডাক না কেন। যদি নাম করতে অনুরাগ দিন দিন বাড়ে, যদি আনন্দ হয়, তাহলে আর কোনও ভয় নাই। বিকার কাটবেই কাটবে; তাঁর কৃপা হবেই হবে।

৮৭। নিতাই কোনও রকমে হরিনাম করিয়ে নিতেন। চৈতন্যদেব বলেছিলেন, “ঈশ্বরের নামের ভারি মাহাত্ম্য, শীঘ্র ফল না হতে পারে, কিন্তু কখনও না কখনও এর ফল হবেই হবে।” যেমন কেউ বাড়ীর কাণিশের উপর বীজ রেখে গিয়েছিল। অনেক দিন পরে বাড়ী ভুমিসাৎ হয়ে গেল; তখনও সেই বীজ মাটিতে পড়ে গাছ হলো, তার ফলও হলো। কেন? নাম কি কম? তিনি আর তাঁর নাম তফাৎ নয়। সত্যভামা যখন তুলাযন্ত্রে স্বর্ণমণিমাণিক্য দিয়ে ঠাকুরকে ওজন করছিলেন, তখন হলো না। যখন রুষ্ণিণী তুলসী আর কৃষ্ণনাম একদিকে লিখে দিলেন, তখন ঠিক ওজন হলো।

৮৮। সংসারী লোকদের যদি বল, “সব ত্যাগ করে

ঈশ্বরের পাদপদ্মে মগ্ন হও”, তা তারা কখনও শুনবে না। তাই বিষয়ী লোকদের টানবার জন্য গৌর নিতাই দুভাই মিলে পরামর্শ করে এই ব্যবস্থা করেছিলেন ;—“মাগুর মাছের ঝোল, যুবতী মেয়ের কোল, বল্ হরিবোল্।” প্রথম দুইটির লোভে অনেকে হরিবোল্ বলতে যেতো। হরিণাম সুধার একটু আশ্বাদ পেলে তারা বুঝতে পারতো যে, ‘মাগুর মাছের ঝোল’ আর কিছু নয়, কেবল হরিপ্রেমে যে অশ্রু পড়ে তাই ; আর যুবতী মেয়ে কি না—পৃথিবী। ‘যুবতী মেয়ের কোল’—কি না, ধূলায় হরিপ্রেমে গড়াগড়ি।

৮৯। ঈশ্বরের নামে এমন বিশ্বাস হওয়া চাই—“কি, আমি তাঁর নাম করেছি, আমার এখনও পাপ থাকবে? আমার আবার পাপ কি? আমার আবার বন্ধন কি?” ভগবানের নাম করলে মানুষের দেহ, মন, সব শুদ্ধ হয়ে যায়। কেবল “পাপ” আর “নরক” এই সব কথা কেন? একবার বল যে, অশ্রায় কৰ্ম্ম যা করেছি, আর করব না; আর তাঁর নামে বিশ্বাস কর।

৯০। মনকে একাগ্র করবার জন্য ধ্যান করবার আগে হাততালি দিয়ে খানিকক্ষণ “হরিবোল” “হরিবোল” বলবি। গাছতলায় হাততালি দিলে যেমন গাছের পাখী উড়ে যায়, তেমনি “হরিবোল” “হরিবোল” বললে কুচিন্তা মন থেকে চলে যায়।

৯১। সংসারী লোক যদি হরিণাম করে, তাহলে বাহাতুরী

আছে। দেখ, জনক রাজা খুব বাহাদুর ; সে দুখানি তরোয়াল ঘুরাত, একখানা জ্ঞান ও একখানা কৰ্ম্ম। একদিকে পূর্ণ ব্রহ্মজ্ঞান, আর এক দিকে সংসারের কৰ্ম্ম করছে।

৯২। তোমাদের ধন, ঐশ্বর্য্য আছে, অথচ ঈশ্বরকে ডাক্ছে—এ খুব ভাল। গীতায় আছে, যারা যোগভ্রষ্ট, তারাই ভক্ত হয়ে ধনীর ঘরে জন্মায়।

৯৩। বন্ধন আর মুক্তি,—দুয়ের কর্তাই তিনি। তাঁর মায়াতে সংসারী জীব কামিনী ও কাঞ্চনে বদ্ধ, আবার তাঁর দয়া হলেই মুক্ত হয়ে যায়। তিনি “ভববন্ধনের বন্ধনহারিণী তারিণী।” তাঁর ইচ্ছা যে, তিনি এই সব নিয়ে খেলা করেন। বুড়ীকে আগে থাকতে ছুঁলে আর দৌড়াদৌড়ি করতে হয় না। সকলেই যদি ছুঁয়ে ফেলে, তা হলে খেলা হয় কেমন করে? সকলেই ছুঁয়ে ফেললে বুড়ী অসন্তুষ্ট হয় ; খেলা চললে বুড়ীর আহ্লাদ হয়। তিনি লীলাময়ী, এ সংসার তাঁর লীলা। তিনি ইচ্ছাময়ী,—আনন্দময়ী। তাই লক্ষের মধ্যে একজনকে মুক্তি দেন। তিনি যদি আবার দয়া করে মনকে ফিরিয়ে দেন, তা হলে বিষয়বুদ্ধির হাত থেকে মুক্তি হয়। তখন আবার তাঁর পাদপদ্মে মন হয়।

৯৪। তাঁকে যদি লাভ করতে পার, সংসার অসার বলে বোধ হবে না। যে তাঁকে জেনেছে, সে দেখে যে জীবজগৎ সে তিনিই হয়েছেন। ছেলেদের খাওয়াবে, যেন গোপালকে খাওয়াচ্ছ। পিতামাতাকে ঈশ্বর ঈশ্বরী দেখবে ও সেবা

করবে। তাঁকে জেনে সংসার করলে বিবাহিতা স্ত্রীর সঙ্গে প্রায় ঐহিক সম্বন্ধ থাকে না। দুজনেই ভক্ত; কেবল ঈশ্বরের কথা কয়; ঈশ্বরের প্রসঙ্গ লয়ে থাকে। ভক্তের সেবা করে। তবে এমনটি হতে গেলে দুজনেরই ভাল হওয়া চাই। দুজনে যদি সেই ঈশ্বরানন্দ পেয়ে থাকে, তা হলে এটি সম্ভব হয়। ভগবানের বিশেষ কৃপা চাই; না হলে সর্বদা অমিল হয়। একজনকে তফাতে যেতে হয়। যদি না মিল হয়, তা হলে বড় যন্ত্রণা। স্ত্রী হয়ত রাতদিন বলে, “কেন বাবা এখানে বিয়ে দিলে? এমন লোকের হাতে পড়েছি, একদিনের জন্ম সুখ হলো না! না খেতে পেলুম, না বাছাদের খাওয়াতে পারলুম, না পরতে পেলুম, না বাছাদের পরাতে পারলুম, না একখানা গয়না!—তুমি আমার কি সুখে রেখেছ, কেবল চোখ বুজে ঈশ্বর ঈশ্বর করছো, ওসব পাগলামি ছাড়।”

৯৫। যোগী ছুরকম—বালু যোগী তার গুপ্ত যোগী। সংসারে গুপ্ত যোগী। কেউ তাকে টের পায় না। সংসারীর পক্ষে মনে ত্যাগ, বাহিরে ত্যাগ নয়। জোর করে সংসার থেকে চলে আসা ভাল নয়।

৯৬। লোকের সঙ্গে বাস করতে গেলেই ছুঁ লোকের হাত থেকে আপনাকে রক্ষা করবার জন্য একটু তমোগুণ দেখান দরকার। কিন্তু সে অনিষ্ট করবে বলে, উন্টে তার অনিষ্ট করা উচিত নয়। এক মাঠে রাখাল গরু চরাত। সেই মাঠে একটা ভয়ানক বিষাক্ত সাপ ছিল। সকলেই সেই

সাপের উয়ে অত্যন্ত সাবধানে থাকতো। একদিন একটি ব্রহ্মচারী সেই মাঠের পথ দিয়ে আসছিল। রাখালেরা দৌড়ে এসে বললে, “ঠাকুর মহাশয়, ওদিক দিয়ে যাবেন না। ওদিকে একটা ভয়ানক বিষাক্ত সাপ আছে।” ব্রহ্মচারী বললে, “বাবা, তা হোক, আমার তাতে ভয় নাই, আমি মন্ত্র জানি।” এই কথা বলে ব্রহ্মচারী সেই দিকে চলে গেল। রাখালেরা ভয়ে কেউ সঙ্গে গেল না। এ দিকে সাপটা ফণা তুলে দৌড়ে আসছে। কিন্তু কাছে না আসতে আসতে ব্রহ্মচারী যেই একটি মন্ত্র পড়লে, অমনি সাপটা কেঁচোর মত পায়ের কাছে পড়ে রইল। ব্রহ্মচারী বললে, “ওরে তুই কেন পরের হিংসা করে করে বেড়াস, আয়, তোকে মন্ত্র দিব। এই মন্ত্র জপলে, তোর ভগবানে ভক্তি হবে, ভগবান্ লাভ হবে, আর হিংসা প্রবৃত্তি থাকবে না।” এই বলে সে সাপটাকে মন্ত্র দিলে। সাপটা মন্ত্র পেয়ে গুরুকে প্রণাম করলে, আর জিজ্ঞাসা করলে, “ঠাকুর, কি করে সাধনা করব, বলুন।” গুরু বললেন, “এই মন্ত্র জপ কর, আর কারও হিংসা করো না।” ব্রহ্মচারী যাবার সময় বললে, “আমি আবার আসব।” এই রকম কিছু দিন যায়। রাখালেরা দেখে যে, সাপটা আর কামড়াতে আসে না। ঢালা মারে, তবুও রাগ হয় না, যেন কেঁচোর মত হয়ে গেছে। একদিন একজন রাখাল কাছে গিয়ে লাজ ধরে খুব ঘুরপাক দিয়ে তাকে আছড়ে আছড়ে ফেলে দিলে। সাপটার মুখ দিয়ে রক্ত উঠতে লাগলো,

আর সে অচেতন হয়ে পড়ল,—নড়ে না, চড়ে না। রাখালেরা মনে করলে, সাপটা মরে গেছে। এই মনে করে তারা চলে গেল। অনেক রাত্রে সাপের চেতনা হল। তখন সে আশ্বে আশ্বে অতি কষ্টে তার গর্তের ভিতর চলে গেল। নড়বার শক্তি নাই। অনেক দিন পরে যখন অস্থি-চর্ম্ম-সার হয়ে গেছে, তখন বাহিরে খাবার চেষ্ঠায় রোজ রাত্রে এক একবার চ’রতে আসতো। ভয়ে দিনের বেলা আসতো না। মন্ত্র লওয়া অবধি আর হিংসা করে না। মাটি, পাতা, গাছ থেকে পড়ে গেছে এমন ফল খেয়ে প্রাণ ধারণ করতো। প্রায় এক বৎসর পরে ব্রহ্মচারী সেই পথে আবার এলো। এসেই তার দেওয়া নাম ধরে সাপটাকে ডাকতো লাগলো। সে গুরুদেবের আওয়াজ শুনে গর্ত থেকে বেড়িয়ে এলো, ও খুব ভক্তিভাবে প্রণাম করলে। ব্রহ্মচারী জিজ্ঞাসা করলে, “তুই কেমন আছিস্।” সে বললে, “আজ্ঞে, ভাল আছি।” ব্রহ্মচারী বললে, “তবে তুই এত রোগা হয়ে গেছিস্ কেন?” সাপ বললে, “ঠাকুর, আপনি আদেশ করেছেন—কারও হিংসা করো না। তাই পাতাটা ফলটা খাই বলে বোধ হয় রোগা হয়ে গেছি।” সে ভুলেই গিছিল যে রাখালেরা তাকে মেরে ফেলবার যোগাড় করেছিল। ব্রহ্মচারী বললে, “শুধু না খাওয়ার দরুণ এরূপ অবস্থা হয় না, অবশ্য আরও কোনও কারণ আছে; তুই ভেবে ছাখ্।” সাপটার তখন মনে পড়লো যে রাখালেরা তাকে আছাড় মেরেছিল। তখন সে বললে,

“ঠাকুর, এখন মনে পড়েছে বটে, রাখালেরা একদিন আমায় আছাড় মেরেছিল। তাহারা অজ্ঞান, তারা ত জানে না যে আমার মনের কি অবস্থা। আমি যে কাহাকেও কামড়াব না বা কোনও রূপ অনিষ্ট করবো না, তারা কেমন করে জানবে?” ব্রহ্মচারী বললে, “ছি! তুই এত বোকা! আপনাকে রক্ষা করতে জানিস্ না? আমি কামড়াতেই বারণ করেছি, ফৌস করতে নয়। ফৌস করে তাদের ভয় দেখাস্ নাই কেন? ছুঁ লোকের কাছে ফৌস করতে হয়। ভয় দেখাতে হয়, পাছে অনিষ্ট করে। তাদের গায়ে বিষ ঢালতে নাই, উল্টে অনিষ্ট করতে নাই।”

৯৭। অসৎ লোকে তোমাকে কত কি বলবে, নিন্দা করবে। তুমি যদি আন্তরিক ভগবানকে চাও, তুমি সব সহ্য করবে। ছুঁলোকের মধ্যে থেকে কি আর ঈশ্বর-চিন্তা হয় না? দেখনা, ঋষিরা বনের মধ্যে ঈশ্বরকে চিন্তা করতো। চারিদিকে বাঘ, ভালুক, নানা হিংস্র জন্তু। অসৎ লোকের বাঘ, ভালুকের স্বভাব,—তেড়ে এসে অনিষ্ট করে। কেউ কেউ সাপের স্বভাব। তুমি জান না, তোমায় ছোবল দেবে। ছোবল সামলাতে অনেক বিচার আন্তে হয়। তা না হলে হয়ত তোমার এমন রাগ হয়ে গেল যে তার আবার উল্টে অনিষ্ট করতে ইচ্ছা হয়। সংসারী লোকেরা কত কি বলে। কিন্তু ঘাখু, হাতী যখন চলে যায়, পেছনে কত জানোয়ার কত রকম চীৎকার করে; কিন্তু হাতী ফিরেও চায় না।

৯৮। সহ্যগুণের চেয়ে আর গুণ নাই। যে সয়, সেই রয় ; যে না সয়, সে নাশ হয়। সকল বর্ণের মধ্যে ‘স’ তিনটে, —শ, ষ, স। সকলেরই সহ্যগুণ থাকা চাই। যেমন কামার বাড়ীর লাইয়ের উপর কত জোর করে বড় হাতুড়ী পেটে, তবুও কিছুমাত্র বিচলিত হয় না। যে যাই বলুক ও যাই করুক না কেন, সব সহ্য করে নেবে।

৯৯। ঈশ্বর সর্বভূতে আছেন। তবে ভাল লোকের সঙ্গে মাখামাখি চলে, মন্দলোকের কাছ থেকে তফাৎ থাকতে হয়। বাঘের ভিতরও নারায়ণ আছেন ; তা বলে বাঘকে আলিঙ্গন করা চলে না। যদি বল, বাঘ ত নারায়ণ, তবে কেন পালাব ? তার উত্তর এই যে, যারা বলছে, পালিয়ে এস, তারাও নারায়ণ। তাদের কথা কেন না শুনি ? একটা গল্প শোন। কোনও এক বনে একটি সাধু থাকে। তাঁর অনেকগুলি শিষ্য। তিনি একদিন শিষ্যদের উপদেশ দিলেন যে, সর্বভূতে নারায়ণ আছেন, এইটি জেনে সকলকে নমস্কার করবে। একদিন একটি শিষ্য বনের মধ্যে কাঠ আনতে গিচ্ছিলো। এমন সময় একটা রব উঠলো, কে কোথা আছ পালাও,—একটা পাগ্লা হাতী যাচ্ছে ; সবাই পালিয়ে গেল, কিন্তু শিষ্যটি পালাল না। সে জানে হাতীও যে নারায়ণ, তবে কেন পালাব ? এই বলে নমস্কার করে স্তব স্তুতি করতে লাগলো ; এদিকে মাহুত চেষ্টা করে বলছে, “পালাও, পালাও।” শিষ্যটি তবুও নড়লো না। শেষে হাতীটা গুঁড়ে করে তুলে নিয়ে তাকে একধারে ছুড়ে

ফেলে দিয়ে চলে গেল। শিষ্য অচৈতন্য হয়ে পড়ে রইল। এই সংবাদ পেয়ে গুরু ও অন্যান্য শিষ্যেরা তাকে আশ্রমে নিয়ে এল। খানিকক্ষণ পরে চেতনা হলে তাকে কেউ জিজ্ঞাসা করলে, “তুমি হাতী আস্ছে শুনে কেন চলে গেলে না?” সে বললে, “গুরুদেব যে আমায় বলেছিলেন, নারায়ণই মানুষ, জীব, জন্তু সব হয়েছেন। তাই আমি হাতীনারায়ণ আস্ছে দেখে সেখান থেকে সরে যাই নাই।” গুরু বললেন, “বাবা, হাতীনারায়ণ আস্ছিলেন বটে, সত্য, কিন্তু বাবা, মাহুতনারায়ণ ত তোমায় বারণ করেছিলেন। যদি সবই নারায়ণ, তবে তার কথা বিশ্বাস করলে না কেন? মাহুতনারায়ণের কথাও শুনতে হয়।”

১০০। শাস্ত্রে আছে, “আপো নারায়ণঃ”—জল নারায়ণ। কিন্তু কোন জল ঠাকুর সেবায় চলে; আবার কোন জলে আঁচান, বাসন মাজা, কাপড় কাটা কেবল চলে, কিন্তু খাওয়া বা ঠাকুর সেবা চলে না। তেমনি সাধু, অসাধু, ভক্ত, অভক্ত, সকলেরই হৃদয়ে নারায়ণ আছেন। কিন্তু অসাধু, অভক্ত, ছুঁলোকের সঙ্গে ব্যবহার চলে না, মাখামাখি চলে না। কারও সঙ্গে কেবল মুখের আলাপ পর্য্যন্ত চলে, আবার কারও সঙ্গে তাও চলে না। ঐরূপ লোকের কাছ থেকে তফাতে থাকতে হয়। যে সকল লোক নিজে কখন ধর্মচর্চা করে না, অন্যকেও ধ্যান পূজা করতে দেখলে ঠাট্টা বিদ্রূপ করে, ধর্ম ও ধার্মিকের নিন্দা করে, সাধন অবস্থায় কখনও ঐরূপ

লোকের সঙ্গে করবে না। তাদের কাছ থেকে একেবারে দূরে থাকবে।

১০১। যখন বাহিরের লোকের সঙ্গে মিশবে, তখন সকলকে ভালবাসবে; মিশে যেন এক হয়ে যাবে,—বিদ্বেষ-ভাব আর রাখবে না। “ও ব্যক্তি সাকার মানে, নিরাকার মানে না; ও নিরাকার মানে, সাকার মানে না; ও হিন্দু, ও মুসলমান, ও খৃষ্টান” এই বলে নাক সিটকে ঘণা করো না। তিনি যাকে যেমন বুঝিয়েছেন। সকলের ভিন্ন ভিন্ন প্রকৃতি জানবে, জেনে তাদের সঙ্গে মিশবে, যতদূর পার। তার পর নিজের ঘরে গিয়ে শান্তি, আনন্দ ভোগ করবে। রাখাল যখন গরু চরাতে যায়, তখন গরু সব মাঠে গিয়ে এক হয়ে যায়। একপালের গরু। আবার যখন সন্ধ্যার সময় নিজের ঘরে যায়, তখন আবার পৃথক হয়ে যায়।

১০২। কারও নিন্দা করো না; পোকাটিরও নয়। প্রার্থনা করবে, যেন কারু নিন্দা না করি।

১০৩। তুমি খোসামুদে কথায় ভুলো না। বিষয়ী লোক দেখলেই খোসামুদে এসে জোটে। মরা গরু একটা পেলে যত শকুনি সেখানে এসে পড়ে। বিষয়ী লোকগুলোর পদার্থ নাই, যেন গোবরের ঝোড়া। খোসামুদেরা এসে বলবে, “আপনি দানী, জ্ঞানী, ধ্যানী।” বলা ত নয়, অমনি বাঁশ।

১০৪। মোসাহেবরা মনে করে, বাবু তাদের টাকা চেলে দেবে। কিন্তু বাবুর কাছে আদায় করা বড় কঠিন। একটা

শৃগাল একটা বলদকে দেখে তার সঙ্গে আর ছাড়ে না। সে চলে বেড়ায়, ওটাও সঙ্গে সঙ্গে বেড়ায়। শৃগালটা মনে করেছে, “ওর অণ্ডের কোষ ঝুলছে, সেইটে কখন না কখন পড়ে যাবে, আর আমি খাব।” বলদটা যখন ঘুমোয়, সেও কাছে শুয়ে ঘুমোয়, আর যখন উঠে চরে বেড়ায়, সেও সঙ্গে সঙ্গে থাকে। কত দিন এই রকমে যায়, কিন্তু কোষটা পড়ল না ; তখন সে নিরাশ হয়ে চলে গেল। মোসাহেবদের এইরূপ অবস্থা।

১০৫। সংসারীদের যা কর্তব্য, চৈতন্যদেব বলেছিলেন—
জীবে দয়া, বৈষ্ণব সেবা, নাম সংকীৰ্ত্তন।

১০৬। পরিবারদের উপর কর্তব্য,—যতদিন তাদের খাওয়া পরার কষ্ট থাকে ; কিন্তু সন্তান নিজে সমর্থ হলে আর তাদের ভার লওয়ার দরকার নাই। পাখীর ছানা খুঁটে খেতে শিখলে পর, আবার মার কাছে খেতে এলে, মা ঠোঁকর মারে।

১০৭। লোককে খাওয়ান এক রকম তাঁরই সেবা করা। সব জীবের ভেতর তিনি অগ্নিরূপে রয়েছেন। খাওয়ান কি না তাঁকে আছতি দেওয়া। কিন্তু তা বলে অসৎ লোককে খাওয়াতে নাই। যারা ব্যভিচারাদি মহাপাতক করেছে, ঘোর বিষয়া-সক্ত লোক,—এরা যেখানে বসে খায়, সে জায়গার—সাত হাত মাটি অপবিত্র হয়। ব্যক্তিবিশেষে দান করলে পুণ্য হয়, ব্যক্তিবিশেষে দান করলে পাপ হয়। এক কসাই একটি গরুকে হত্যা করবার জন্তু নিয়ে যাচ্ছিল। গরুটি তা জানতে পেরে প্রাণপণে পালাবার চেষ্টা করছিল ; কসাই তাকে নিয়ে যেতে

পারছিল না ; এমন সময় রাস্তায় একটি অতিথিশালা দেখে গরুটিকে একটি গাছে বেঁধে সেই অতিথিশালায় গিয়ে খেয়ে এসে গায়ে বেশ জোর হলো ; তার পর সে গরুটাকে জোর করে নিয়ে গেল । পরে সে গরু মারার পাপ চার আনা আন্দাজ কসাইয়ের, আর বারো আনা রকম যার অতিথিশালা তার হলো !—কেন না, তার অন্ন না পেলে সে কসাই সেদিন গরুটাকে নিয়ে যেতে পারতো না ।

১০৮ । বাপ কত বড় বস্তু ! যে বাপ মাকে ফাঁকি দিয়ে ধর্ম্য করবে, তার ছাতি হবে । মানুষের অনেকগুলি ঋণ আছে, —পিতৃঋণ, দেবঋণ, ঋষিঋণ । এ ছাড়া আবার মাতৃঋণ আছে । আবার পরিবারের সম্বন্ধেও ঋণ আছে—প্রতিপালন করতে হবে ! সতী হলে মরবার পরও তার জন্ম কিছু সংস্থান করে যেতে হবে ।

১০৯ । যতক্ষণ মা আছে, মাকে দেখতে হবে । যতক্ষণ নিজের শরীরের খবর আছে, ততক্ষণ মার খবর নিতে হবে । তবে যখন নিজের শরীরের খবর নিতে পারছি না,—তখন অন্য কথা : তখন ঈশ্বরই সব ভার লন ।

১১০ । জ্ঞানোন্মাদ হলে আর কর্তব্য থাকে না । তখন কালকার জন্ম তুমি না ভাবলে ঈশ্বর ভাবেন । জ্ঞানোন্মাদ হলে তিনি তোমার পরিবারদের জন্ম ভাববেন । যখন জমিদার নাবালক ছেলে রেখে মরে যায়, তখন অছী সেই নাবালকের ভার লয় ।

১১১। . প্রেমোন্মাদ হলে কে বা বাপ, কে বা মা, কে বা স্ত্রী ! ঈশ্বরকে এত ভালবাসা যে পাগলের মত হয়ে গেছে ! তার কিছু কর্তব্য নাই। সব ঋণ থেকে মুক্ত। প্রেমোন্মাদ কি রকম ? সে অবস্থা হলে জগৎ ভুল হয়ে যায়, নিজের দেহ যে এত প্রিয় জিনিস, তাও ভুল হয়ে যায়। চৈতন্যদেবের প্রেমোন্মাদ হয়েছিল।

১১২। যে মা ঈশ্বরলাভের পথে বিপন্ন দেয়, সে মার কথা না শুনলে কোনও দোষ নাই ; সে মা নয়, সে অবিচারুপিণী। ঈশ্বরের জন্ম গুরুজনের বাক্য লঙ্ঘনে দোষ নাই। ভরত রামের জন্ম কৈকেয়ীর কথা শুনে নাই। গোপীরা কৃষ্ণদর্শনের জন্ম পতিদের মানা শুনে নাই। প্রহ্লাদ ঈশ্বরের জন্ম বাপের কথা শুনে নাই। বলি ভগবানের প্রীতির জন্ম গুরু শুক্ৰাচার্যের কথা শুনে নাই। বিভীষণ রামকে পাবার জন্ম জ্যেষ্ঠ ভাই রাবণের কথা শুনে নাই। তবে “ঈশ্বরের পথে যেও না,” একথা ছাড়া আর সব কথা শুনবি।

১১৩। মা দ্বিচারিণী হলেও তাগ করবে না। মা, বাপ কি কম জিনিস গো ? তাঁরা প্রসন্ন না হলে ধর্ম টর্ম কিছুই হয় না। চৈতন্যদেব ত প্রেমে উন্মত্ত ; তবু সন্ন্যাসের আগে কতদিন ধরে মাকে বোঝান। বললেন, “মা, আমি মাঝে মাঝে এসে তোমাকে দেখা দিব।”

১১৪। (বধুদিগের প্রতি) দেখ, তোমরা শিবপূজা করো। কি করে পূজা করতে হয়, “নিত্যকর্ম” বলে বই আছে, সেই

বই পাড়ে দেখে নেবে। ঠাকুর পূজা করতে হলে ঠাকুরের কাজ অনেকক্ষণ ধরে করতে পাবে। ফুলতোলা, চন্দন ঘসা, ঠাকুরের বাসন মাজা, ঠাকুরের জলখাবার সাজান, এই সকল করতে হলে, ঐ দিকেই মন থাকবে। হীনবুদ্ধি, রাগ, হিংসা, এ সব চলে যাবে। একটা ইটকে বা পাথরকে ঈশ্বর বলে যদি ভক্তিভাবে পূজা কর, তাতেও তাঁর কৃপায় ঈশ্বর দর্শন হতে পারে। যা আগে বল্লুম,—শিব পূজা—এই সব পূজা করতে হয়। তার পর পাকা হয়ে গেলে বেশী দিন পূজা করতে হয় না। তখন সর্বদাই মনের যোগ হয়ে থাকে, যেমন তেলের ধারা—তার ভিতর ফাঁক নাই। সর্বদাই স্মরণ মনন থাকে।

১১৫। ভাল ছেলে হওয়া পিতার পুণ্যের চিহ্ন। যদি পুষ্করিণীতে ভাল জল হয়, সেটি পুষ্করিণীর মালিকের পুণ্যের চিহ্ন।

১১৬। সাধু ভক্তদের কিছু দিতে হয়। যাদের টাকা আছে, তাদের ওরূপ লোক সামনে পড়লে কিছু দিতে হয়। কৃপণের ধন এই কয় রকমে উড়ে যায়—১ম, মামলা মোকদ্দমায়, ২য়, চোর ডাকাতে, ৩য়, ডাক্তার খরচে, ৪র্থ, আবার বদ্‌ ছেলেরা এই সব টাকা উড়িয়ে দেয়। যাদের টাকা আছে, তাদের দান করা উচিত। কৃপণের ধন উড়ে যায়, দাতার ধন রক্ষা হয়, সংকাজে যায়। ওদেশে চাষারা খানা কেটে ক্ষেতে জল আনে। কখনও কখনও জলের এত তোড় হয় যে ক্ষেতের আল ভেঙ্গে যায়, আর জল বেরিয়ে যায় ও ফসল নষ্ট হয়। তাই চাষারা

আলের মাঝে মাঝে ছেঁদা করে রাখে ; তাকে ঘোগ বলে ।
জল ঘোগ দিয়ে একটু একটু বেরিয়ে যায়, তখন জলের তোড়ে
আল ভাঙ্গে না, আর ক্ষেতের উপর পলি পড়ে, সেই পলিতে
ক্ষেত উর্বরা হয় আর খুব ফসল হয় । যে দান ধ্যান করে,
সে অনেক ফল লাভ করে,—চতুর্বর্গ ফল ।

১১৭ । যেখানে অনেক লোক অনেক দিন ধরে ঈশ্বরকে
দর্শন করবে বলে তপ, জপ, ধ্যান, ধারণা, প্রার্থনা, উপাসনা
করেছে, সেখানে (তীর্থে) তাঁর প্রকাশ নিশ্চয় আছে জান্‌বি ।
তাদের ভক্তিতে সেখানে ঈশ্বরীয় ভাবের একটা জমাট বেঁধে
গেছে ; তাই সেখানে সহজেই ঈশ্বরীয় ভাবের উদ্দীপন ও তাঁর
দর্শন হয় । যুগযুগান্তর থেকে কত সাধু, ভক্ত, সিদ্ধপুরুষেরা
এই সব তীর্থে ঈশ্বরকে দেখবে বলে এসেছে, অন্য সব বাসনা
ছেড়ে তাঁকে প্রাণ ঢেলে ডেকেছে, সে জন্য ঈশ্বর সব জায়গায়
সমান ভাবে থাকলেও এই সব স্থানে (তীর্থে) তাঁর বিশেষ
প্রকাশ ; যেমন মাটি খুঁড়লে সব জায়গাতেই জল পাওয়া যায়,
কিন্তু যেখানে পাত্‌কো, ডোবা, পুকুর বা হুদ আছে, সেখানে
আর জলের জন্য খুঁড়তে হয় না,—যখনই ইচ্ছা জল পাওয়া
যায়, সেই রকম ।

১১৮ । মন্দির দেখলে তাঁকেই মনে পড়ে,—উদ্দীপন হয় ।
যেখানে তাঁর কথা হয়, সেইখানে তাঁর আবির্ভাব হয়,—আর
সকল তীর্থ উপস্থিত হয় । এ সব জায়গা দেখলে ভগবান্‌কেই
মনে পড়ে ।

১১৯। যদি ঘরে বসে ভক্তিলাভ করতে পার, তা হলে তীর্থে যাবার কি দরকার? কাশী গিয়ে দেখলাম, সেই গাছ, সেই তেঁতুল পাতা। তীর্থে গিয়ে যদি ভক্তিলাভ না হলো, তাহলে তীর্থে যাওয়ার আর ফল হলো না।

১২০। গরু যেমন পেট ভরে জাব খেয়ে নিশ্চিন্ত হয়ে এক জায়গায় বসে সেই সব খাবার উগ্রে ভাল করে চিবাতে বা জাবর কাটতে থাকে, সেই রকম দেবস্থান, তীর্থস্থান দেখবার পর, সেখানে যে সব পবিত্র ঈশ্বরীয় ভাব মনে উঠে, সেই সব নিয়ে নির্জনে বসে ভাবতে হয় ও তাহাতে ডুবে যেতে হয়; দেখে এসেই সে সব মন থেকে তাড়িয়ে, বিষয়ে, রূপরসে মন দিতে নাই; তাহলে ঐ ঈশ্বরীয় ভাবগুলি মনে স্থায়ী ফল আনে না। দেবস্থান, তীর্থস্থান দর্শনাদি করে এসে সেই সব ভাব নিয়ে থাকতে হয়,—জাবর কাটতে হয়। তা নইলে ও সব ঈশ্বরীয় ভাব প্রাণে দাঁড়াবে কেন? যার প্রাণে ভক্তিভাব আছে, তীর্থে উদ্দীপনা হয়ে তার সেই ভাব আরও বেড়ে যায়। আর যার প্রাণে ঐ ভাব নাই, তার বিশেষ আর কি হবে?

১২১। কাশীতে মণিকর্ণিকার ঘাটে দেখলাম—সাদা রংয়ের দীর্ঘাকৃতি একটি পুরুষ—মাথায় তাঁর পিঙ্গলবর্ণের জটা—শ্মশানে প্রত্যেক চিতার কাছে আস্তে আস্তে আসছেন, আর প্রত্যেক দেহীকে যত্ন করে তুলে নিয়ে তার কানে পরমব্রহ্ম মন্ত্র দিচ্ছেন!—শ্রীশ্রীজগদম্বাও স্বয়ং মহাকালী রূপে দেহীর অপর পাশে সেই চিতার উপর বসে তার স্কুল, স্কুল, কারণ, এ

সব সংস্কারের বাঁধন খুলে দিচ্ছেন, আর স্বহস্তে জীবকে মুক্ত করে দিচ্ছেন। বহুকাল যোগতপস্যা করে জীবের যে অনুভূতি ও আনন্দ হয়, সেই আনন্দ ও অনুভূতি শ্রীবিশ্বনাথের কৃপায় বিনা সাধনায় সত্ত্বঃ সত্ত্বঃ লাভ হয়।

১২২। দিনের বেলায় বারুদ ঠাসা করে খাবি, রাত্রে অল্প স্বপ্ন। রাত্রে সাধকের অধিক খেলে কাম ইত্যাদি হতে পারে।

১২৩। বেশী খেও না। আর শুচিবাই ছেড়ে দাও। যাদের শুচিবাই, তাদের জ্ঞান হয় না। আচার যতটুকু দরকার, ততটুকু করবে। বেশী বাড়াবাড়ি করো না। বেশী আচার করো না। একজন সাধুর বড় জলতৃষ্ণা পেয়েছে। ভিস্তি জল নিয়ে যাচ্ছিল ; সাধুকে জল দিতে চাইলে। সাধু বলে, “তোমার চামড়ার মোশক পরিষ্কার ?” ভিস্তি বলে, “মহারাজ, আমার মোশক খুব পরিষ্কার, কিন্তু তোমার মোশকের ভিতর মলমূত্র অনেক রকম ময়লা আছে। তাই বলছি, আমার মোশক থেকে জল খাও ; এতে দোষ হবে না।”

১২৪। শূকর-মাংস খেয়ে যদি ঈশ্বরে টান থাকে, সে লোক ধন্য ; আর হবিষ্য করে যদি কামিনী-কাঞ্চনে মন থাকে, তাহলে সে ধিক্ ! আমি জানি, যদি কেউ পর্বতের গুহায় বাস করে গায়ে ছাই মেখে উপবাস করে, নানা কঠোর করে, কিন্তু ভিতরে ভিতরে বিষয়ে মন—কামিনী-কাঞ্চনে মন,—সে লোককে আমি বলি, ধিক্ ! আর যার কামিনী-কাঞ্চনে মন নাই—খায়, দায়, বেড়ায়,—তাকে বলি ধন্য।

১২৫। একাদশী করা ভাল। ওতে মন বড় পবিত্র হয়, আর ঈশ্বরেতে ভক্তি হয়। একাদশীতে খই দুধ খাবে।

১২৬। সন্ন্যাসীর হচ্ছে নির্জলা একাদশী। আর ছরকম একাদশী আছে; ফল মূল খেয়ে, আর লুচি ছকা খেয়ে। লুচি ছকার সঙ্গে হলো দুখানা রুটী দুধে ভিজছে। তোমরা নির্জলা একাদশী পারবে না।

১২৭। সাধু সন্ন্যাসী গেরস্তের বাড়ী থেকে অভুক্ত ফিরে গেলে গেরস্তের বড় অকলাণ হয়।

১২৮। ছাখ, এখানকার জন্তে যখন কিছু আন্বে, তার আগ্ ভাগ্ তুলে কাউকে দিও না; দিলে উচ্ছিষ্ট হয়; ভগবানের ভোগে তা আর দেওয়া যায় না।

১২৯। নানকের গল্পে আছে যে, “অসাধুর দ্রব্য ভোজন করতে গিয়ে দেখলুম যে, সে সব রক্ত মাখা হয়ে গেছে।” সাধুদের শুদ্ধ জিনিস দিতে হয়। মিথ্যা উপায়ে রোজগার করা জিনিস দিতে নাই।

১৩০। গাড়ীতে বা নৌকায় যাবার সময় আগে গিয়ে উঠবে, আর নাম্বার সময় কোনও জিনিসটা নিতে ভুল হয়েছে কি না, দেখে শুনে সকলের শেষে নাম্বে।

১৩১। ভাল লোক,—লক্ষ্মীমন্ত লোক—বাড়ীতে এলে সকল বিষয়ে কেমন সুসার হয়ে যায়। কাকেও কিছুতে বেগ পেতে হয় না। আর হাবাতে হতচ্ছাড়া গুলো এলে সকল বিষয়ে বেগ পেতে হয়; যে দিন ঘরে কিছু নেই, তার জন্ত

গেরস্তকে বিশেষ কষ্ট পেতে হবে, ঠিক সেই দিনই সে এসে উপস্থিত হয়।

১৩২। বিশেষ বিশেষ অবস্থায়, শাস্ত্রে আছে,—বলি দেওয়া যেতে পারে। “বিধিবাদী” বলিতে দোষ নাই। যেমন অষ্টমীতে একটি পাঁঠা। কিন্তু সকল অবস্থাতে হয় না।

১৩৩। উপবাস সম্বন্ধে ঠাকুর বলতেন, “মায়ের পায়ের বিন্ধপত্র খেয়ে কিংবা মায়ের প্রসাদ খেয়ে কিছু খেলে দোষ থাকে না। যদি ঠিক ঠিক বোধ হয় তবে ত ফল হবে। আবার পেট চুঁই চুঁই করছে, তাতে কি আর ধর্ম্য কর্ম্য চলে? একে কলিকাল, অন্নগত প্রাণ, অন্ন আয়ু। উপবাস করে ও সব করা চলে না। তাতে ঠিক ঠিক মন বসে না। তাই আগে কিছু খেয়ে নিতে হয়।”

১৩৪। যখন কোনও খারাপ জায়গায় যাবে, তখন মা আনন্দময়ীকে সঙ্গে নিয়ে যেও। মা সঙ্গে থাকলে অনেক মন্দ কাজের হাত থেকে নিস্তার পাবে। মার কাছে থাকলে লজ্জায় মন্দ কাজ করতে পারবে না।

১৩৫। জিনিসটা আন্লি, তা দেখে আন্লি না? দোকানী বাবসা করতে বসেছে,—সে ত আর ধর্ম্য করতে বসে নাই? তার কথায় বিশ্বাস করে ঠকে এলি? ভক্ত হবি; তা বলে বোকা হবি? লোকে তোকে ঠকিয়ে নেবে? ঠিক ঠিক জিনিস দিলে কি না, দেখে তবে দাম দিবি, ওজনে কম দিলে কি না দেখে নিবি; আবার যে সকল জিনিসের ফাউ পাওয়া

যায়, সে সব জিনিস কিন্তে গিয়ে ফাউটি পর্যন্ত, ছেড়ে আসবি না।

১৩৬। ‘ধূমাবতী’, ‘ষোড়শী’, ‘ভুবনেশ্বরী’, ‘তারা’, ‘কালী’, এ সব উগ্র মূর্তি। এ সব মূর্তি বাড়ীতে রাখতে নাই। এ মূর্তি বাড়ীতে রাখলে পূজা দিতে হয়।

১৩৭। সালিসি, মোড়লী, এ সবে আর কাজ কি? দয়া, পরোপকার,—এ সব ত অনেক হলো। ওসব যারা করবে, তাদের থাক্ আলাদা। তাঁকে পেলে সব পাওয়া যায়। আগে তিনি, তার পর দয়া, পরোপকার,—জগতের উপকার,—জীব উদ্ধার। তোমার ও ভাবনায় কাজ কি?

১৩৮। বেশ্যাদেরও উদ্ধার হবে, যদি আন্তরিক ব্যাকুল হয়ে কাঁদে, আর বলে, “আর করবো না।” শুধু হরিনাম করলে কি হবে? আন্তরিক কাঁদতে হয়।

১৩৯। মানুষ নিজে ঐশ্বর্যের আদর করে বলে ভাবে,—ঈশ্বরও ঐশ্বর্যের আদর করেন। ভাবে যে তাঁর ঐশ্বর্যের প্রশংসা করলে তিনি খুসী হবেন। তাঁর পক্ষে এ গুলো কাঠ, মাটি। যখন বিষ্ণুঘরের গহনা সব চুরি গেল, তখন সেজো বাবু আর আমি ঠাকুরকে দেখতে গেলাম। সেজোবাবু বলে, “দূর্ ঠাকুর, তোমার কোনও যোগ্যতা নাই। তোমার গা থেকে সব গয়না নিয়ে গেল, আর তুমি কিছু করতে পারলে না!” আমি তাঁকে বল্লাম, “এ তোমার কি কথা? তুমি ষাঁর গয়না গয়না করছো, তাঁর পক্ষে এ গুলো মাটির ঢালা। লক্ষ্মী ষাঁর

শক্তি, তিনি তোমার গুটিকতক টাকা চুরি গেল কি না, এই নিয়ে কি হাঁ করে আছেন ? এ রকম কথা বলতে নাই । ঈশ্বর কি ঐশ্বর্যের বশ ? তিনি ভক্তির বশ । তিনি কি চান ? টাকা নয় । ভাব, প্রেম, ভক্তি, বিবেক, বৈরাগ্য, এই সব তিনি চান । যার যেমন ভাব, ঈশ্বরকে সে তেমনই দেখে । তমোগুণী ভক্ত ; সে দেখে, মা পাঁচা খায়, আর বলিদান দেয় ; রজোগুণী ভক্ত নানা ব্যঞ্জন ভাত করে দেয় । সত্ত্বগুণী ভক্তের পূজার আড়ম্বর নাই । তার পূজা লোকে জানতে পারে না । ফুল নাই, ত বিল্বপত্র, গঙ্গাজল দিয়ে পূজা করে । ছুটি মুড়কি দিয়ে কি বাতাসা দিয়ে শীতল দেয় । কখনও বা ঠাকুরকে একটু পায়স রেঁধে দেয় । আর আছে ত্রিগুণাতীত ভক্ত । তাঁর বালকের স্বভাব । ঈশ্বরের নাম করাই তাঁর পূজা । শুদ্ধ তাঁর নাম ।”

১৪০ । যেমন সংসারীদের মধ্যে সত্ত্ব, রজঃ, তমঃ, এই তিন গুণ আছে, তেমনই ভক্তিরও সত্ত্ব, রজঃ, তমঃ, তিন গুণ আছে । সংসারীর সত্ত্বগুণ কি রকম জান ?—বাড়ীটা এখানে ভাঙ্গা, ওখানে ভাঙ্গা, মেরামত করে না । ঠাকুরদালানে পায়রাগুলো হাগ্ছে । উঠানে এখানে শেওলা পড়েছে, ওখানে শেওলা পড়েছে, ভঁস্ নাই । আস্বাব গুলো পুরাণো, ফিট্ফাট্ করবার চেষ্টা নাই ; কাপড় যা তা একখানা হ’লেই হলো ; লোকটি খুব শান্ত, শিষ্ট, দয়ালু, অমায়িক, কারু কোনও অনিষ্ট করে না । সংসারীর রজোগুণের লক্ষণ আবার আছে ;—ঘড়ি,

ঘড়ির চেন, হাতে দুই তিনটি আংটি, বাড়ীর আসবাব খুব ফিটফাঁট, দেওয়ালে কুইনের ছবি, রাজপুত্রের ছবি, কোনও বড় মানুষের ছবি ; বাড়ীটি চুণকাম করা, যেন কোনও খানে একটু দাগ নাই ; নানা রকমের ভাল পোষাক, চাকরদেরও পোষাক ; এমনি এমনি সব । সংসারীর তমোগুণের লক্ষণ, —নিদ্রা, কাম, ক্রোধ, অহঙ্কার এই সব । আর ভক্তির সত্ত্ব আছে । যে ভক্তের এইরূপ সত্ত্বগুণ আছে, সে ধ্যান করে অতি গোপনে । সে হয়ত মশারির ভিতর ধ্যান করে । সবাই জানছে, ইনি শুয়ে আছেন, বুঝি রাত্রে ঘুম হয় নাই ; তাই উঠতে এত দেবী হচ্ছে । এ দিকে শরীরের উপর আদর কেবল পেট চলা পর্য্যন্ত, শাকান্ন পেলেই হলো ; খাবার ঘটা নাই ; পোষাকের আড়ম্বর নাই ; বাড়ীর আসবাবের জাঁক-জমক নাই । আর সত্ত্বগুণী ভক্ত কখনও তোষামোদ করে ধন লয় না । ভক্তির রজঃ থাকলে সে ভক্তের হয়ত তিলক আছে, রুদ্রাক্ষের মালা আছে, সেই মালার মধ্যে মধ্যে আবার এক একটি সোণার দানা ; যখন পূজা করে, তখন গরদের কাপড় পরে পূজা করে । ভক্তির তমঃ যার হয়, তার বিশ্বাস জ্বলন্ত, ঈশ্বরের কাছে সেরূপ ভক্ত জোর করে ; যেন ডাকাতি করে ধন কেড়ে লওয়া ; মারো, কাটো, বাঁধো—এইরূপ ডাকাত-পড়া ভাব ।

১৪১ । তমোগুণের আর একটি লক্ষণ,—কাম । পাথুরে-ঘাটার গিরীন্দ্র ঘোষ বলেছিল, কাম-ক্রোধাদি রিপু, এরা ত

যাবে না, এদের মোড় ফিরিয়ে দাও, ঈশ্বরের কামনা কর। সচ্চিদানন্দের সহিত রমণ কর। আর ক্রোধ যদি না যায়, তবে ভক্তির তমঃ আন। কি ! আমি দুর্গানাশ করেছি, উদ্ধার হবো না ? আমার আবার পাপ কি ? আমার আবার বন্ধন কি ? তার পর ঈশ্বর লাভ করবার লোভ কর। ঈশ্বরের রূপে মুগ্ধ হও। আমি ঈশ্বরের দাস, আমি ঈশ্বরের ছেলে। যদি অহঙ্কার করতে হয়, ত এই অহঙ্কার কর। এই রকমে ছয় রিপূর মোড় ফিরিয়ে দিতে হয়। তাঁর যদি একবার কৃপা হয়, ঈশ্বরের যদি একবার দর্শন লাভ হয়, আত্মার যদি একবার সাক্ষাৎকার হয়, তা হলে আর কোনও ভয় নাই,—তখন ছয় রিপূ আর কিছু করতে পারবে না।

১৪২। আবার ভক্তিপথেও তাঁকে পাওয়া যায়। যদি ঈশ্বরের পাদপদ্মে একবার ভক্তি হয়, যদি তাঁর নামগুণগান করতে ভাল লাগে, তা হলে ইন্দ্রিয়সংযম আর চেষ্টা করে করতে হয় না। রিপুবশ আপনাআপনি হয়ে যায়। যদি কারও পুত্রশোক হয়, সেদিন সে কি আর লোকের সঙ্গে ঝগড়া করতে পারে, না নিমন্ত্রণে গিয়ে খেতে পারে ? সে কি লোকের সামনে অহঙ্কার করে বেড়াতে পারে, না সুখ সন্তোষ করতে পারে ?

১৪৩। বাঘ যেমন কপ্ কপ্ ক'রে জানোয়ার খেয়ে ফেলে, তেমনই 'অনুরাগ-বাঘ' কাম, ক্রোধ, এই সব রিপুদের খেয়ে ফেলে। ঈশ্বরে একবার অনুরাগ হ'লে কাম-ক্রোধাদি থাকে না।

১৪৪। ভক্তিপথেও অন্তরিন্দ্রিয় নিগ্রহ আপর্নি হয়, আর সহজে হয়। ঈশ্বরের উপর যত ভালবাসা আসবে, ততই ইন্দ্রিয়সুখ আলুনি লাগবে। জিতেন্দ্রিয় হওয়া যায় কি রকম করে? আপনাতে মেয়ে মানুষের ভাব আরোপ করতে হয়। আমি অনেকদিন সখীভাবে ছিলাম। মেয়ে মানুষের কাপড় পরতুম, গয়না পরতুম, ওড়না গায়ে দিতুম। ওড়না গায়ে দিয়ে আরতি করতুম।

১৪৫। ‘মুখ হলসা, ভেতর বুঁদে, কান তুলসে, দীঘল ঘোমটা নারী! পানা পুকুরের শীতল জল, বড় মন্দকারী!!’ অর্থাৎ এই কয়টি লোকের নিকট হতে সাবধান হবে। ‘মুখ হলসা’—হল্ হল্ করে কথা কয়; তার পর ‘ভেতর বুঁদে’ কিনা, মনের ভিতর ডুবুরি নামলেও অন্ত পায় না; তার পর, ‘কান তুলসে’, যারা কানে তুলসী দেয় (ভক্তি জানাবার জন্য); ‘দীঘল ঘোমটা নারী’, লম্বা ঘোমটা, লোকে মনে করে ভারি সতী, তা নয়; আর ‘পানা পুকুরের জল’, নাইলেই সান্নিপাতিক হয়।

১৪৬। অনেকে আঙ্গিক করবার সময় যত রাজ্যের কথা কয়; কিন্তু কথা কইতে নাই, তাই ঠোঁট বুজে যত রকম ইঙ্গিত করতে থাকে। এটা নিয়ে এস, ওটা নিয়ে এস,—হুঁ, উঁহু, এই সব করে। আবার কেউ মালা জপ করছে, তার ভিতর থেকেই মাছ দর করে। জপ করতে করতে হয় ত আঙ্গুল দিয়ে দেখিয়ে দেয়,—ঐ মাছটা। যত হিসাব সেই সময়।

কেউ হয় ত গঙ্গা স্নান করতে এসেছে, সে সময় কোথা ভগবান্ চিন্তা করবে,—গল্প করতে বসে গেল। যত রাজ্যের গল্প।—‘তোরা ছেলের বিয়ে হলো, কি গয়না দিলে?’—‘অমুকের বড় ব্যামো’;—‘অমুক স্বশুরবাড়ী থেকে এসেছে কি না;’—‘অমুক ক’নে দেখতে গিছিলো, তা দেওয়া থোওয়া সাধ আহ্লাদ খুব করবে’;—‘হরিশ আমার বড় ঝাওটা, আমায় ছেড়ে একদণ্ডও থাকতে পারে না’;—‘এতদিন আসতে পারি নি মা,—অমুকের মেয়ের পাকা দেখা, বড় বাস্ত ছিলাম।’ বিধবা পিসী বলছে,—‘মা, দুর্গাপূজা আমি না হলে হয় না, শ্রীটী গড়া পর্যন্ত! বাড়ীতে বিয়ে থাওয়া হলে, সব আমায় করতে হবে মা, তবে হবে! এই ফুলশস্যার যোগাড়,—খয়েরের বাগানটি পর্যন্ত!’ দেখ দেখি, কোথায় গঙ্গাস্নান করতে এসেছে, যত সংসারের কথা! বিশ্বাস নাই, অথচ পূজা, জপ, সন্ধ্যাদি করছে, তাতে কিছু হয় না।

১৪৭। যেমন কোনও বাড়ীতে বাস করলে, তার টেক্স দিতে হয়, সেইরূপ দেহটার ভিতর বাস করতে হলে এরও টেক্স দিতে হয়। রোগ, শোক, সেই টেক্স আদায় করা।

১৪৮। জন্ম, মৃত্যু, এ সব ভেঙ্কির মত; এই আছে, এই নাই। ঈশ্বরই সত্য, আর সব অনিত্য। জলই সত্য, জলের ভূর্ভুরি,—এই আছে, এই নাই; ভূর্ভুরি জলে মিশিয়ে যায়। যে জলে উৎপত্তি, সেই জলেই লয়। ঈশ্বর যেন মহা-সমুদ্র; জীবেরা যেন ভূর্ভুরি; তাঁতেই জন্ম, তাঁতেই লয়।

ছেলে মেয়ে যেন একটা বড় ভূর্ভুরির সঙ্গে পাঁচ ছটা ছোট ভূর্ভুরি। শোক করে কি হবে ?

১৪৯। ঈশ্বরই সত্য, আর সব অনিত্য। জীব, জগৎ, বাড়ী ঘর দ্বার, ছেলে পিলে, এ সব বাজীকরের ভেঙ্কি। বাজীকর কাঠি দিয়ে বাজনা বাজাচ্ছে, আর বলছে, “লাগ্, লাগ্, লাগ্।” ঢাকা খুলে দেখ, কতকগুলো পাখী আকাশে উড়ে গেল। কিন্তু বাজীকরই সত্য, আর সব অনিত্য, এই আছে, এই নাই।

১৫০। বাড়ীর ভিতরে অত থেকে না। মেয়ে ছেলেদের মধ্যে থাকলে আরও ডুববে। ঈশ্বরের কথা হলে আরও ভাল থাকবে।

১৫১। তাঁকে প্রার্থনা করতে হয়, যাতে ভোগাসক্তি চলে গিয়ে তাঁর পাদপদ্মে শুদ্ধা ভক্তি হয়। হাতীর বাহিরের দাঁত আছে—আবার ভিতরের দাঁতও আছে। বাহিরের দাঁতে শোভা, কিন্তু ভিতরের দাঁতে খায়। তেমনি কামিনী-কাঞ্চন ভোগ করলে ভক্তির হানি হয়। বাহিরে লেক্চার ইত্যাদি দিলে কি হবে ? শকুনি উপরে উঠে, কিন্তু ভাগাড়ের দিকে নজর। হাওয়াই হুস্ করে প্রথমে আকাশে উঠে যায়, কিন্তু পরক্ষণেই মাটিতে পড়ে যায়। ভোগাসক্তি ত্যাগ হলে শরীর যাবার সময় ঈশ্বরকেই মনে পড়বে। তা না হলে এই সংসারের জিনিসই সব মনে পড়বে,—স্ত্রী, পুত্র, গৃহ, ধন, মান, সম্ভ্রম, ইত্যাদি। তাঁর নাম-গুণ কীর্তন, তাঁর ধ্যান, চিন্তা,

আর প্রার্থনা সর্বদা অভ্যাস করা দরকার। সর্বদা প্রার্থনা কর, যেন ভোগাসক্তি যায়, আর তাঁর পাদপদ্মে মন হয়।

১৫২। ভগবান্ কল্পতরুঃ। কল্পতরুর কাছে বসে যে যা চাইবে, সে তাই পাবে। এই জন্তে সাধন ভজনের দ্বারা যখন মন শুদ্ধ হয়, তখন খুব সাবধানে কামনা ত্যাগ করতে হয়। কেমন জানি ?—একজন লোক কোনও সময়ে বেড়াতে বেড়াতে একটা বিস্তীর্ণ মাঠে গিয়ে উপস্থিত হলো। পথে রৌদ্রের তাপে অত্যন্ত ক্লান্ত হলো, আর গা দিয়ে ঘাম বেরুতে লাগলো। সে তখন একটু বিশ্রামের জন্তে একটা গাছের তলায় বসলো, আর মনে মনে ভাবতে লাগলো যে, এই সময় যদি একটা ভাল বিছানা পাই, তা হলে তাতে সুখে নিদ্রা যাই। সে যে কল্পতরুর নীচে বসেছিল, তা সে জানতো না। মনে মনে যেই এই বাসনা হলো, তখনই একটা উত্তম বিছানা এসে পড়লো। তখন সে খুব আশ্চর্য হয়ে তাতে শুলো, আর মনে মনে ভাবতে লাগলো যে, এই সময় যদি একটা স্ত্রীলোক এসে আমার পদসেবা করে, তা হলে খুব সুখে ঘুমুই। এই মনে হওয়াও যেমন, অমনি তখনি এক যুবতী এসে তার পদসেবা করতে লাগলো। তখন তার—
আর আনন্দের সীমা রহিল না। তার পর তার খুব ক্ষুধা পেলো। তখন সে মনে ভাবলে, যা চাইলুম, তাই ত পেলুম, তবে কিছু খাবার পাব না? বলতে না বলতে তার কাছে অমনি নানা রকম খাবার এল। সে সেইগুলো খেয়ে

বিছানায় শুয়ে শুয়ে ভাবতে লাগলো, এই সময় যদি একটা বাঘ এসে পড়ে, তা হলে কি হয়? যেমন এই মনে হওয়া, অমনি একটি প্রকাণ্ড বাঘ লাফ দিয়ে এসে তাকে ধরলে ও তাকে মেরে ফেললে। এই সংসারে জীবেরও ঠিক এইরূপ দশা ঘটে থাকে। ঈশ্বর-সাধন করতে গিয়ে বিষয়, ধন, জন, অথবা মান, যশ, এই সব কামনা করলে, তা কিছু কিছু লাভ হয় বটে, কিন্তু শেষে বাঘেরও ভয় থাকে, অর্থাৎ রোগ, শোক, তাপ, অপমান ও বিষয়নাশ-রূপ বাঘ স্বাভাবিক বাঘ চেয়েও লক্ষণে কষ্টদায়ক।

১৫৩। কেউ কেউ মনে করে,—“আমার বুঝি জ্ঞান, ভক্তি হবে না, আমি বুঝি বদ্ধ জীব।” গুরুর কৃপা হলে কিছুই ভয় নাই। একটা ছাগলের পালে একটা বাঘ পড়েছিল; এমন সময় লাফ দিতে গিয়ে তার প্রসব হয়ে ছানা হয়ে গেল। বাঘটা মরে গেল। কিন্তু ছানাটা ছাগলের সঙ্গে মানুষ হতে লাগলো। তারাও ঘাস খায়, বাঘের ছানাও ঘাস খায়; তারাও ভ্যা—ভ্যা করে, বাঘের ছানাটাও ভ্যা—ভ্যা করে। ক্রমে ছানাটা খুব বড় হলো। একদিন ঐ ছাগলের পালে আর একটা বড় বাঘ এসে পড়লো। সে ঘাসথেকে বাঘটাকে দেখে অবাক! তখন দৌড়ে এসে তাকে ধরলে। সেটাও ভ্যা ভ্যা করতে লাগলো। তাকে টেনে হিঁচড়ে জলের কাছে নিয়ে গেল; বললে,—“ছাখ্, জলের ভিতর তোর মুখ ছাখ্; ঠিক আমার মত ছাখ্। আর এই নে খানিকটা মাংস; এইটে

খা।” এই বলে তাকে জোর করে খাওয়াতে লাগলো। সে কোনও মতে খাবে না; ভ্যা ভ্যা করছে। কিন্তু রক্তের আশ্বাদ পেয়ে তখন খেতে আরম্ভ করলে। নূতন বাঘটা বললে, “এখন বুঝেছিস্, আমিও যা, তুইও তা, এখন আয়্, আমার সঙ্গে বনে চলে আয়।” ঘাস খাওয়া কি না কামিনী-কাঞ্চন নিয়ে থাকা। ছাগলের মত ভ্যা ভ্যা করে ডাকা আর পালান, —সামান্য জীবের মত আচরণ করা। বাঘের সঙ্গে চলে যাওয়া কি না,—গুরু যিনি চৈতন্য করলেন, তাঁর শরণাগত হওয়া, তাঁকেই আশ্রয় বলে জানা। নিজের ঠিক মুখ দেখা কি না স্ব-স্বরূপকে চেনা। তাই গুরুর কৃপা হলে আর কোনও ভয় নাই। তিনিই জানিয়ে দেবেন, ‘তুমি কে,’ ‘তোমার স্বরূপ কি?’

১৫৪। আপনার হতেও আপনার ভেবে তাঁকে ডাক, নিশ্চয় বলছি, তিনি ভক্তবৎসল, দেখা না দিয়ে থাকতে পারবেন না। মানুষ তাঁকে ডাকবার আগে তিনি এগিয়ে আসেন; মানুষ যদি এক পা ঈশ্বরের দিকে এগোয়, তিনি দশ পা এগিয়ে আসেন। তাঁর চেয়ে আপনার জন আর কেউ নাই।

কামিনী-কাঞ্চন

১। তাঁকে পেতে গেলে বীর্যধারণ করতে হয়। শুক-
দেবাদি উর্দ্ধরেতাঃ ; এঁদের রেতঃপাত কখনও হয় নাই। আর
এক আছে ধৈর্য্যরেতাঃ ;—আগে রেতঃপাত হয়েছে, কিন্তু
তারপর বীর্যধারণ। বার বৎসর ধৈর্য্যরেতা হলে বিশেষ
শক্তি জন্মায়। ভিতরে একটি নূতন নাড়ী হয়, তার নাম
মেধানাড়ী। 'সে নাড়ী হলে সব স্মরণ থাকে, সব জানতে
পারে। বীর্য্যপাতে বলক্ষয় হয়। স্বপ্নদোষে যা বেরিয়ে যায়,
তাতে দোষ নাই। ও ভাতের গুণে হয়। ওসব বেরিয়ে
গিয়েও যা থাকে, তাতেই কাজ হয়। তবু স্ত্রীসঙ্গ করা উচিত
নয়। শেষে যা থাকে, তা খুব রিফাইন্ (Refine) হয়ে
থাকে। লাহাদের ওখানে গুড়ের নাগুরি সব রেখেছিল,—
নাগুরির একটি একটি ফুটে। করে, তারপর এক বৎসর পরে
দেখলে, সব দানা বেঁধে রয়েছে—মিছুরীর মত। রস যা
বেরিয়ে যাবার ফুটে। দিয়ে তা বেরিয়ে গেছে।

২। সাধু সাবধান ! কামিনী-কাঞ্চন থেকে সাবধান।
মেয়ে মানুষের মায়াতে একবার ডুবলে আর উঠবার জো
নাই। বিশালাক্ষীর দ—যে একবার পড়েছে, সে আর উঠতে

পারে না। ফুটো কলসীতে জল রাখলে জল ক্রমে ক্রমে বেরিয়ে যায়। তাই বলছি, এখনও সাবধান হও! আষাঢ় মাসের জল রোধ করা শক্ত বটে। কিন্তু জল অনেক তো বেরিয়ে গেছে!—এখনও বাঁধ দিলে থাকবে।

৩। মেয়ে মানুষ থেকে অনেক দূরে থাকতে হয়, তবে যদি ভগবান্ লাভ হয়। যাদের মতলব খারাপ, সে সব মেয়ে মানুষের কাছে আনাগোনা করা, কি তাদের হাতে কিছু খাওয়া বড় খারাপ। এরা সত্ত্বা হরণ করে। অনেক সাবধানে থাকলে তবে ভক্তি বজায় থাকে।

৪। কি ভোগ সংসারে করবে? কামিনী-কাঞ্চন ভোগ? সে ত ক্লমিক আনন্দ,—এই আছে, এই নাই। প্রায় মেঘ ও বর্ষা লেগে আছে; সূর্য্য দেখা যায় না। ছুঃখের ভাগই বেশী। আর কামিনী-কাঞ্চন-মেঘ সূর্য্যকে দেখতে দেয় না।

৫। কামিনী-কাঞ্চনে জীবকে বদ্ধ করে। জীবের স্বাধীনতা যায়। কামিনী থেকেই কাঞ্চনের দরকার। তার জন্ম পূর্বের দাসত্ব করতে হয়,—স্বাধীনতা চলে যায়। তোমার মনের মত কাজ করতে পার না।

৬। পাশকরা কত ইংরাজী-পড়া পণ্ডিত সাহেবের চাকরী স্বীকার করে তাদের বুটজুতার গুঁতা ছুবেলা খায়। এর কারণ কেবল কামিনী; বিয়ে করে নদের হাট বসিয়ে, এখন আর হাট তোলবার জো নাই। তাই অত অপমান বোধ, অত দাসত্বের যন্ত্রণা!

৭। মেয়ে মানুষের সঙ্গে থাকলেই তাদের বশ হয়ে যেতে হয়। সংসারীরা মেয়েদের কথায় উঠতে বললে ওঠে, বসতে বললে বসে। সকলেই আপনার পরিবারদের সুখ্যাতি করে। আমি এক জায়গায় যেতে চেয়েছিলাম। রামলালের খুড়ীকে জিজ্ঞাসা করাতে বারণ করলে; আর যাওয়া হলো না। খানিক পরে ভাবলুম, উঃ! আমি সংসার করি নাই, কামিনী-কাঞ্চন ত্যাগী, তাতেই এই, সংসারীরা না জানি পরিবারদের কি রকম বশ!

৮। কামিনী-কাঞ্চনই মায়া। ওর ভিতর অনেক দিন থাকলে হুঁস্ চলে যায়; মনে হয় বেশ আছি। মেথর গুয়ের ভার বয়; বইতে বইতে আর ঘেন্না থাকে না।

৯। কামিনী-কাঞ্চন এক প্রকার মদ। অনেক মদ খেলে খুড়া জেঠা বোধ থাকে না; তাদেরই বলে ফেলে, “তোরা গুস্তীর—;” মাতালের গুরু লঘু বোধ থাকে না।

১০। বিষয়ীরা মাতাল হয়ে আছে। কামিনী-কাঞ্চনে মত্ত; হুঁস্ নাই। তাই ত ছোকরাদের ভালবাসি। তাদের ভিতর কামিনী-কাঞ্চন এখনও ঢোকে নাই। আধার ভাল, ঈশ্বরের কাজে আসতে পারে।

১১। স্ত্রীলোক সম্বন্ধে সহজেই আসক্তি হয়। স্ত্রীলোক স্বভাবতঃই পুরুষকে ভালবাসে; পুরুষ স্বভাবতঃই স্ত্রীলোক ভালবাসে। তাই দুজনেই শিগ্গির পড়ে যায়।

১২। কামিনী-কাঞ্চনই ঈশ্বর থেকে মানুষকে বিমুখ

করে। সেদিকে যেতে দেয় না। এই দেখ না, সকলেই নিজের পরিবারকে সুখ্যাৎ করে। তা ভালই হোক আর মন্দই হোক। যদি জিজ্ঞাসা কর, তোমার পরিবারটি কেমন গো? অমনি বলে, “আজ্ঞে, খুব ভাল।” তা স্ত্রীর উপর ভালবাসা হবে না? এটি জগৎমাতার ভুবনমোহিনী মায়া। স্ত্রীকে বোধ হয় যে পৃথিবীতে অমন আপনার লোক আর হবে না,—আপনার লোক, জীবনে মরণে, ইহকালে পরকালে। এই স্ত্রী নিয়ে মানুষ কি না দুঃখ ভোগ করছে! তবু মনে করে যে এমন আত্মীয় আর কেউ নাই।

১৩। জমি, টাকা, স্ত্রী, এই তিনটি জিনিসের উপর মন রাখতে গেলে ভগবানের উপর মনের যোগ হয় না। কামিনী-কাঞ্চনের উপর থেকে যদি মন চলে যায়, তা হলে আর ভাবনা কি?

১৪। কামিনী ও কাঞ্চন, এই দুটি বিঘ্ন। মেয়ে মানুষে আসক্তি ঈশ্বরের পথ থেকে বিমুখ করে দেয়,—কিসে পতন হয়, পুরুষ জানতে পারে না! যখন কেলায় যাচ্ছি, একটুও বুঝতে পারি নাই যে, গড়ানে রাস্তা দিয়ে যাচ্ছি। কেলায় ভিতর গাড়ি পৌঁছলে দেখতে পেলাম, কত নীচে এসেছি। আহা, পুরুষদের বুঝতে দেয় না! ভূতে যাকে পায়, সে জানে না যে, ভূতে পেয়েছে; সে বলে, “বেশ আছি।” সংসারে শুধু যে কামের ভয়, তা নয়; আবার ক্রোধ আছে। কামনার পথে কাঁটা পড়লেই ক্রোধ।

১৫। যতক্ষণ মায়ার ঘরের ভিতরে আছ, ততক্ষণ মায়া মেঘ রয়েছে, ততক্ষণ জ্ঞান-সূর্য্য কাজ করে না। মায়া-ঘর ছেড়ে বাহিরে এসে দাঁড়ালে (কামিনী-কাঞ্চন ত্যাগের পর) তবে জ্ঞান-সূর্য্য অবিচ্ছিন্ন নাশ করে। ঘরের ভিতরে আনলে আতম কাছে কাগজ পুড়ে না। ঘরের বাইরে এসে দাঁড়ালে রোদটি কাগজে পড়ে,—তখন কাগজ পুড়ে যায়। আবার মেঘ থাকলে আতম কাছে কাগজ পুড়ে না। মেঘটি সরে গেলে তবে হয়। কামিনী-কাঞ্চন-ঘর থেকে সরে দাঁড়ালে,—সরে দাঁড়িয়ে একটু সাধনা তপস্যা করলে—তবে মনের অন্ধকার নাশ হয়,—অবিচ্ছিন্ন, অহঙ্কার মেঘ দূরে যায়,—জ্ঞানলাভ হয়। কামিনী-কাঞ্চনই মেঘ।

১৬। স্বীলোক সম্বন্ধে খুব সাবধান না থাকলে ব্রহ্মজ্ঞান হয় না। কিন্তু সংসার বড় কঠিন স্থান। যুবতীর সঙ্গে নিকামেরও কাম হয়। তবে জ্ঞানীর পক্ষে স্বদারায় কখনও কখনও গমন দোষের নয় ; যেমন মলমূত্র ত্যাগ, তেমনি রেতঃ-ত্যাগ।

১৭। সে কি রে ? পান মাছে কি হয়েছে ? ওতে কিছু দোষ হয় না। কামিনী-কাঞ্চন ত্যাগই ত্যাগ।

১৮। যে নাগসুখ ত্যাগ করেছে, সে ত জগৎসুখ ত্যাগ করেছে ; ঈশ্বর তার অতি নিকট।

১৯। দ্বীর সঙ্গে সঙ্গ হোক্ তার নাই হোক্, একসঙ্গে শোয়াও খারাপ। গায়ের ঘর্ষণ, গায়ের গরম !

২০। খুব বীরপুরুষ হবি। ঘোমটা দিয়ে কান্নাতে ভুলিস্
না। সিক্‌নি ফেলতে ফেলতে কান্না! ভগবানেতে মন ঠিক
রাখবি। যে বীরপুরুষ, সে “রমণীর সঙ্গে থাকে, না করে
রমণ।” পরিবারের সঙ্গে কেবল ঈশ্বরীয় কথা কবি।

২১। রমণ আট প্রকার; মেয়েদের সঙ্গে বসা, কি বেশীক্ষণ
আলাপ করা, তাকেও রমণ বলেছে। মেয়েদের কথা শুন্ছি,
শুন্তে শুন্তে আনন্দ হচ্ছে, ও একরকম রমণ। মেয়েদের কথা
বলছি (কীর্তনম্), ও একরকম রমণ। মেয়েদের সঙ্গে নিৰ্জ্জনে
চুপি চুপি কথা কচ্ছি, ও একরকম রমণ। মেয়েদের কোনও
জিনিস কাছে রেখে দিয়েছি, আনন্দ হচ্ছে, ও একরকম রমণ।
স্পর্শ করা একরকম রমণ। তাই গুরুপত্নী যুবতী হলে পাদ-
স্পর্শ করতে নাই। সন্ন্যাসীদের এই সব নিয়ম। সংসারীদের
আলাদা কথা; তাদের এই সাত রকম রমণে তত দোষ নাই।

২২। যে মন ভগবান্‌কে দিতে হবে, সেই মনের বার
আনা মেয়ে মানুষে নিয়ে ফেলে। তার পর তার ছেলে হলে
প্রায় সব মনটাই খরচ হয়ে যায়। তা হলে ভগবান্‌কে আর
কি দিবে? আবার কারু কারু তাকে আগ্‌লাতে আগ্‌লাতে
প্রাণ বেরিয়ে যায়।

২৩। ভগবান্‌ লাভ করতে গেলে তীব্র বৈরাগ্য দরকার।
যা ঈশ্বরের পথের বিরুদ্ধ বলে বোধ হবে, তা তৎক্ষণাৎ
ত্যাগ করতে হয়। পরে হবে বলে ফেলে রাখা উচিত নয়।
কামিনী-কাঞ্চন ঈশ্বরের পথের বিরোধী। ও থেকে মন সরিয়ে

নিতে হবে। টিমে তেতাল্লা হলে হবে না। যে ত্যাগ করবে, তার খুব মনের বল চাই।

২৪। যদি একবার এইরূপ তীব্র বৈরাগ্য হয়ে ঈশ্বর লাভ হয়, তা হলে আর মেয়ে মানুষে আসক্তি থাকে না। ঘরে থাকলেও মেয়ে মানুষে আসক্তি থাকে না; তাদের ভয় থাকে না। যদি একটা চুম্বক পাথর খুব বড় হয়, আর একটা সামান্য হয়, তা হলে লোহাকে কোন্টা টেনে নেবে? বড়টাই টেনে নেবে। ঈশ্বর বড় চুম্বক পাথর; তাঁর কাছে কামিনী ছোট চুম্বক পাথর। কামিনী কি করবে?

২৫। যে স্ত্রী ঈশ্বরের পথে বিঘ্ন করে, আত্মহত্যা করুক, আর যাই করুক, অমন স্ত্রী ত্যাগ করবে। যে ঈশ্বরের পথে বিঘ্ন দেয়, সে অবিद्या স্ত্রী; কিন্তু যার আন্তরিক ভক্তি আছে, তাঁর বশে সকলেই আসে,—রাজা, ছুঁষ্টলোক, স্ত্রী। নিজের আন্তরিক ভক্তি থাকলে স্ত্রীও ক্রমে ঈশ্বরের পথে যেতে পারে। নিজে ভাল হলে ঈশ্বরের ইচ্ছাতে সেও ভাল হতে পারে।

২৬। সব দেখছি কলাইয়ের ডালের খদের। কামিনী-কাঞ্চন ছাড়তে চায় না। লোকে মেয়ে মানুষের রূপে ভুলে যায়; টাকা, ঐশ্বর্য দেখলে ভুলে যায়; কিন্তু ঈশ্বরের রূপ দর্শন করলে ব্রহ্মপদ তুচ্ছ হয়। রাবণকে একজন বলেছিল, “তুমি সব রূপ ধরে সীতার কাছে যাও, রাম রূপ ধর না কেন?” রাবণ বললে, “রাম রূপ হৃদয়ে একবার দেখলে, রম্ভা, তিলোত্তমা, এদের চিতার ভস্ম বলে বোধ হয়; ব্রহ্মপদ তুচ্ছ

হয়, পরস্পরীর কথা তঁ দূরে থাক্ ।” সব কলাইয়ের ডালের খদের । শুদ্ধ আধার না হলে ঈশ্বরে শুদ্ধা ভক্তি হয় না ; এক লক্ষ্য হয় না, নানাদিকে মন থাকে ।

২৭। কাগজে তেল লাগলে, তাতে আর লেখা চলে না ; তেমনি জীবে কাম-কাঞ্চন রূপ তেল লাগলে, তাতে আর সাধন চলে না । সে তেল-মাখা কাগজ, খড়ি দিয়ে ঘসে নিলে তাতে লেখা যায় ; তেমনি জীবে কাম-কাঞ্চন রূপ তেল লাগলে, তাগরূপ খড়ি দিয়ে ঘসে নিলে তবে সাধন চলে ।

২৮। কেশবকে একদিন রাত্রে থাকতে বলায়, সে বললে, “না, কাজ আছে, যেতে হবে ।” তখন আমি হেসে বললাম, “আঁশ চুপড়ির গন্ধ না হলে কি ঘুম হবে না,?” একজন মেছুনী মালির বাড়ীতে অতিথি হয়েছিল ; মাছ বিক্রী করে আসছে, চুপড়ী হাতে আছে । তাকে ফুলের ঘরে শুতে দেওয়া হলো । অনেক রাত পর্যন্ত ফুলের গন্ধে ঘুম হচ্ছে না । বাড়ীর গিন্নী সেই অবস্থা দেখে বললে, “কি গো, তুই ছটফট করছিস্ কেন ?” সে বললে, “কে জানে বাপু, বুঝি এই ফুলের গন্ধে ঘুম হচ্ছে না । আমার আঁশ চুপড়িটা আনিয়ে দিতে পার ? তা হলে বোধ হয় ঘুম হতে পারে ।” শেষে আঁশ চুপড়ি আনাতে, জল ছিটে দিয়ে নাকের কাছে রেখে ভেঁস্ ভেঁস্ করে ঘুমুতে লাগলো । কামিনী-কাঞ্চন আঁশ চুপড়ি ; সাধুসঙ্গ ফুলের গন্ধ ।

২৯। জয়পুরের গোবিন্দজীর পূজারীরা প্রথম প্রথম বিবাহ করতো না, তখন তাদের খুব তেজস্বী ভাব ছিল । রাজা

একবার ডেকে পাঠিয়েছিলেন ; কিন্তু তারা যায় নাই ; বলেছিল, “রাজাকো আনে বোলো।” তার পর রাজা ও অন্যান্য লোকেরা তাদের বিবাহ দিয়েছিলেন। তখন রাজার সঙ্গে দেখা করবার জন্য আর কাকেও ডাকতে হতো না। তারা নিজেই রাজার কাছে গিয়ে বলতো, “মহারাজ, আশীর্বাদ করতে এসেছি, এই নিশ্চাল্য এনেছি, ধারণ করুন।” কাজে কাজেই তাদের ঐরূপ করতে হতো। কেন না, আজ তাদের ঘর তুলতে হবে, কাল তাদের ছেলের অন্তপ্রাশন, পরশু তাদের হাতে খড়ি, এই সব নানা কারণে পয়সার দরকার।

৩০। যেমন সাপ দেখলে লোকে বলে থাকে, “মা মনসা, মুখটি লুকিয়ে রেখো, আর ল্যাজটি দেখিও ;” তেমনি যুবতী স্ত্রীলোক দেখলে, ‘মা’ বলে নমস্কার করবে, আর তাদের মুখের দিকে না চেয়ে, পায়ের দিকে চাইবে ; তা হলে আর পতনের ভয় থাকবে না।

৩১। মেয়েদের গান শিখিও না। আপনা আপনি গায়, সে এক। যার তার কাছে গাইলে লজ্জা ভেঙ্গে যাবে। লজ্জা মেয়েদের বড় দরকার।

৩২। কামিনী-কাঞ্চনই ঈশ্বরকে ভুলিয়ে দেয়। তোমরা তাঁকে জেনে সংসার কর। এরই নাম ‘বিচার সংসার’। দেখ না, মেয়ে মানুষের কি মোহিনী শক্তি! অবিচারুপিণী মেয়েদের ; তারা পুরুষগুলোকে যেন বোকা, অপদার্থ করে রেখে দেয়।

৩৩। বিদ্যারূপিণী স্ত্রীও আছে। বিদ্যারূপিণী স্ত্রী ভগবানের দিকে লয়ে যায়; আর অবিদ্যারূপিণী ঈশ্বরকে ভুলিয়ে দেয়, —সংসারে ভুলিয়ে দেয়। তাঁর মহামায়াতে এই জগৎ সংসার। এই মায়ার ভিতর বিদ্যা-মায়া, অবিদ্যা-মায়া দুইই আছে। বিদ্যামায়া আশ্রয় করলে সাধুসঙ্গ, জ্ঞান, ভক্তি, প্রেম, বৈরাগ্য, এই সব হয়। অবিদ্যা-মায়া,—পঞ্চভূত আর ইন্দ্রিয়ের বিষয়, —রূপ, রস, গন্ধ, স্পর্শ, শব্দ,—যত ইন্দ্রিয়ের ভোগের জিনিস! এরা ঈশ্বরকে ভুলিয়ে দেয়।

৩৪। সংসারীরা বুঝতে পারে না, কে ভাল স্ত্রী, কে মন্দ স্ত্রী,—কে বিদ্যাশক্তি, কে অবিদ্যাশক্তি। যে ভাল স্ত্রী, বিদ্যা-শক্তি, তার কাম, ক্রোধ, এ সব কম, ঘুম কম, স্বামীর মাথা ঠেলে দেয়। যে বিদ্যাশক্তি, তার মেহ, দয়া, ভক্তি, লজ্জা, এই সব থাকে। সে সকলেরই সেবা করে, বাৎসল্যভাবে। আর স্বামীর যাতে ভগবানে ভক্তি হয়, তার সাহায্য করে। বেশী খরচ করে না; পাছে স্বামীর বেশী খাটতে হয়, পাছে ঈশ্বর-চিন্তার অবসর না থাকে।

৩৫। কামিনী-কাঞ্চনই সংসার। অনেকে টাকা গায়ের রক্ত মনে করে; কিন্তু টাকাকে বেশী যত্ন করলে একদিন হয় ত সব বেরিয়ে যায়। আমাদের দেশে মাঠে আল বাঁধে। আল জান? যারা খুব যত্ন করে চারিদিকে আল দেয়, তাদের আল জলের তোড়ে ভেঙ্গে যায়। যারা একদিক খুলে ঘাসের চাপড়া দিয়ে রাখে, তাদের কেমন পলি পড়ে কত

ধান হয়। যারা টাকার সদ্যবহার করে,—ঠাকুরসেবা, সাধু-ভক্তের সেবা করে, দান করে, তাদেরই কাজ হয়; তাদেরই ফসল হয়।

৩৬। টাকায় খাওয়া দাওয়া হয়, একটা থাকুবার জায়গা হয়, ঠাকুরের সেবা হয়, সাধুভক্তের সেবা হয়, সম্মুখে কেউ গরীব প'ড়লো, তার উপকার হয়। এই সব টাকার সদ্যবহার। ঐশ্বর্যভোগের জন্য টাকা নয়, দেহের সুখের জন্য টাকা নয়, লোকমাণ্ডের জন্য টাকা নয়।

৩৭। দেখ, অর্থ যার দাস, সেই মানুষ। যারা অর্থের ব্যবহার জানে না, তারা মানুষ হয়ে মানুষ নয়। মানুষের আকৃতি, কিন্তু পশুর ব্যবহার।

৩৮। 'বিচার সংসারের' জন্য বেশী অর্থ উপায়ে চেষ্টা করবে,—কিন্তু সতুপায়ে। উপার্জন করা উদ্দেশ্য নয়; ঈশ্বরের সেবা করাই উদ্দেশ্য। টাকাতে যদি ঈশ্বরের সেবা হয়, তো সে টাকায় দোষ নাই।

৩৯। সঙ্গে সঙ্গে বিচার করা খুব দরকার। কামিনী-কাঞ্চন অনিত্য। ঈশ্বরই একমাত্র নিত্যবস্তু। তাই টাকা কখনও জীবনের উদ্দেশ্য হ'তে পারে না। এর নাম বিচার। আর সুন্দর দেহেই বা কি আছে? বিচার কর। সুন্দরীর দেহেতেও কেবল হাড়, মাংস, চর্বি, মল, মূত্র, এই সব আছে। এই সব বস্তুতে মানুষ ঈশ্বরকে ছেড়ে কেন মন দেয়? কেন ঈশ্বরকে ভুলে যায়?

৪০। টাকাতে যদি কেউ ‘বিদ্যার সংসার’ করে, ঈশ্বরের সেবা, সাধু-ভক্তের সেবা করে, তাতে দোষ নাই। স্ত্রীলোক নিয়ে মায়ার সংসার করা,—তাতে ঈশ্বরকে ভুলে যায়। যিনি জগতের মা, তিনিই এই মায়ার রূপ,—স্ত্রীলোকের রূপ ধরেছেন। এটি ঠিক জানলে আর মায়ার সংসার করতে ইচ্ছা হয় না। সব স্ত্রীলোককে ঠিক ‘মা’ বোধ হ’লে, তবে ‘বিদ্যার সংসার,’ করতে পারে। ঈশ্বর-দর্শন না হলে, স্ত্রীলোক কি বস্তু বোঝা যায় না।

৪১। কামিনী-কাঞ্চনের ভিতরে থেকে কেমন ক’রে হবে ? অনাসক্ত হওয়া বড় কঠিন। একজন ফকীর আকবর সার কাছে কিছু টাকা আন্তে গিয়েছিলো। বাদসা তখন নমাজ পড়ছে আর বলছে, “হে খোদা, আমায় ধন’ দাও, দৌলত দাও।” ফকীর তখন চলে আসবার উপক্রম করলে। কিন্তু আকবর সা তাকে বসতে ইসারা করলেন ; নমাজের পর জিজ্ঞাসা করলেন, “তুমি কেন চলে যাচ্ছিলে ?” সে বললে, “আপনিই বলছিলেন ‘ধন দাও, দৌলত দাও’ ; যখন দেখলুম, আপনিও ধন দৌলতের ভিখারী, তখন মনে করলুম যে ভিখারীর কাছে চেয়ে আর কি হবে ? যদি চাইতে হয়, ত আল্লার কাছে চাইব।”

৪২। টাকার অহঙ্কার করতে নাই। যদি বল আমি ধনী ; ধনীর আবার তারে বাড়া, তারে বাড়া আছে। সন্সার পর যখন জোনাকি পোকা উঠে, সে মনে করে,—আমি এই

জগৎকে আলো দিচ্ছি। কিন্তু যেই নক্ষত্র উঠলো, অমনি তার অভিমান চলে গেল। তখন নক্ষত্রেরা মনে করে,—আমরা জগৎকে আলো দিচ্ছি। কিন্তু পরে যখন চন্দ্র উঠলো, তখন নক্ষত্রেরা লজ্জায় মলিন হয়ে গেল। চন্দ্র মনে করলে আমার আলোয় জগৎ হাসছে। দেখতে দেখতে অরুণোদয় হলো, তখন চন্দ্র মলিন হয়ে গেল; খানিক পরে আর দেখা গেল না। ধনীরা যদি এগুলি ভাবে, তাহলে আর তাদের ধনের অহঙ্কার থাকে না।

৪৩। বড় বড় দোকানে চালের বড় বড় ঠেক থাকে। ঘরের চাল পর্য্যন্ত উঁচু। চাল থাকে, ডালও থাকে। কিন্তু পাছে ইঁদুরে খায়, তাই দোকানদার কুলোয় করে খই মুড়কি রেখে দেয়। মিষ্ট লাগে আর সোঁদা সোঁদা গন্ধ,—তাই যত ইঁদুর সেই কুলোতে গিয়ে পড়ে, বড় বড় ঠেকের সন্ধান পায় না। জীব কামিনী-কাঞ্চনে মুগ্ধ হয়। ঈশ্বরের খবর পায় না।

সন্ন্যাস-আশ্রম ।

১। যাঁর মন, প্রাণ, অন্তরাত্মা ঈশ্বরে গত হয়েছে, তিনি সাধু। যিনি কামিনী-কাঞ্চন-ত্যাগী, তিনিই সাধু। যিনি সাধু, তিনি স্ত্রীলোককে ঐহিক চক্ষে দেখেন না ; সর্বদাই তাদের অন্তরে থাকেন ; যদি স্ত্রীলোকের কাছে আসেন, তাঁকে মাতৃবৎ দেখেন ও পূজা করেন। সাধু সর্বদা ঈশ্বর-চিন্তা করেন। ভগবৎ কথা ছাড়া অন্য কথা কন্ না ; আর সর্বভূতে ঈশ্বর আছেন জেনে তাদের সেবা করেন। মোটামুটি এইগুলি সাধুর লক্ষণ।

২। যেমন একজন কাঠ ইত্যাদি সংগ্রহ করে আগুন জ্বলে বসে থাকে, আর পাঁচ জনে এসে আগুন পোয়ায়, তেমনি সাধু সন্ন্যাসীরা কঠোর তপস্যা করে ভগবান্কে জানেন ; আর পাঁচজন এসে তাঁদের সঙ্গ করে, তাঁদের উপদেশ শুনে ভগবানে চিত্ত স্থির করে।

৩। সাধুরা তিন শ্রেণীর ;—উত্তম, মধ্যম, অধম। উত্তম যাঁরা, তাঁরা খাবার জন্ম চেষ্টা করেন না। মধ্যম ও অধম, যেমন দণ্ডী ফণ্ডী। যারা মধ্যম, তারা ‘নমো নারায়ণ’ বলে

দাঁড়ায়। যারা অধম, তারা না দিলে ঝগড়া করে। উত্তম শ্রেণীর সাধুর অজগর বৃত্তি। বসে খাওয়া পাবে। অজগর নাড়েনা। একটি সাধু বাল-ব্রহ্মচারী; ভিক্ষা করতে গিয়েছিলো; একটি মেয়ে এসে ভিক্ষা দিলে। তার বক্ষে স্তন দেখে মনে করলে,—ওর বুকে ফোড়া হয়েছে; তাই জিজ্ঞাসা করলে। পরে বাড়ীর গিন্নীরা বুঝিয়ে দিলে যে, ওর গর্ভে ছেলে হবে বলে ঈশ্বর স্তনেতে দুধ দেবেন; তাই ঈশ্বর আগে থাকতে তার বন্দোবস্ত করেছেন। এই কথা শুনে ছোকরা সাধুটি অবাক হয়ে গেল। তখন সে বললে, “তবে আমার ভিক্ষা করবার দরকার নাই; আমার জন্মও খাবার আছে।” যার মনে আছে, চেষ্টা দরকার, তার চেষ্টা করতেই হবে। আলো জ্বাললে বাতুলে পোকাকার অভাব হয় না। তাঁকে লাভ করলে তিনি সব যোগাড় করে দেন,—কোনও অভাব রাখেন না। তিনি হৃদয়মধ্যে এলে, সেবা করবার লোক অনেক এসে জোটে।

৪। যে সাধু ঔষধ দেয়, যে সাধু ঝাড় ফুঁক করে, যে সাধু টাকা নেয়, যে সাধু বিভূতি তিলকের বিশেষ আড়ম্বর করে, খড়ম পায়ে দিয়ে যেন সাইনবোর্ড মেরে নিজেকে বড় সাধু বলে অপরকে জানায়, তাদের কদাচ বিশ্বাস করো না। আর সাধুর সঙ্গে যদি পুটলী পাটলা থাকে, পনেরটা গাঁটওয়ালা যদি কাপড় বুচ্‌কি থাকে, তাহলে তাদের বিশ্বাস করো না।

৫। মিথ্যা কিছুই ভাল নয়। মিথ্যা ভেক ভাল নয়। ভেকের মত যদি মনটা না হয়, তাহলে ক্রমে সর্বনাশ হয়।

মিথ্যা বলতে বা করতে ক্রমে ভয় ভেঙ্গে যায়। তার চেয়ে সাদা কাপড় ভাল। মনে আসক্তি, মাঝে মাঝে পতনও হচ্ছে, আর বাহিরে গেরুয়া, বড় ভয়ঙ্কর।

৬। কি জান ? সংসার করলে মনের বাজে খরচ হয়ে যায়। এই বাজে খরচ হওয়ার দরুণ মনের যা ক্ষতি হয়, সে ক্ষতি আবার পূরণ হয়,—যদি কেউ সন্ন্যাস করে। বাপ প্রথম জন্ম দেন, তার পরে দ্বিতীয় জন্ম উপনয়নের সময়। আর একবার জন্ম হয় সন্ন্যাসের সময়।

৭। বৈরাগ্য দুই প্রকার ;—তীব্র বৈরাগ্য আর মন্দা বৈরাগ্য। মন্দা বৈরাগ্য—হচ্ছে হবে,—টিমে তেতাল। তীব্র বৈরাগ্য—শাণিত ক্ষুরের ধার—মায়া পাশ কচকুচ্ করে কেটে দেয়। কোনও চাষা কত দিন ধরে খাটছে,—পুষ্করিণীর জল ক্ষেতে আর আসছে না, মনে রোখ্ নাই। আবার কেউ দু চার দিন পরেই, “আজ জল আনবো ত ছাড়বো” প্রতিজ্ঞা করে। নাওয়া, খাওয়া, সব বন্ধ ; সমস্ত দিন খেটে সন্ধ্যার সময় যখন জল কুলকুল করে আসতে লাগলো, তখন আনন্দ ! তার পর বাড়ীতে গিয়ে পরিবারকে বলে, “দে, এখন তেল দে, নাইব।” নেয়ে, খেয়ে নিশ্চিন্ত হয়ে নিদ্রা।

৮। একজনের স্ত্রী একদিন তার স্বামীকে বলে, “দাদা আজ কদিন থেকে সংসার ত্যাগ করে সন্ন্যাসী হবার চেষ্টা করছে। খাওয়া কমিয়েছে, মাটিতে শোয়, বউএর সঙ্গে ভাল করে কথা কয় না। তাই বড় ভাবনা হয়েছে, পাছে সন্ন্যাসী

হয়ে বেরিয়ে যায়।” তার স্বামী বললে, “দূর, ক্ষেপী, সে যেতে পারবে না। সন্ন্যাসী কি অমন করে হয়?” স্ত্রী বললে, “ও গো, না, সে যে কাপড় ছুবিয়েছে, সব ঠিক করেছে, নিশ্চয় যাবে। তোমার যেমন কথা! অমন করে হয় না ত কেমন করে হয়?” তার স্বামী বললে, “কেমন করে হয় দেখবি? এই এমনি করে হয়।”—বলে নিজের পরা কাপড়খানি ছিঁড়ে কপ্ণী করে প’রে বেরিয়ে গেল, আর এল না। এর নাম তীব্র বৈরাগ্য। সন্ন্যাসী হওয়ার কথা শুনেই অমনি চৈতন্য হলো; অমনি সব ত্যাগ করে চলে গেল। আর এক রকম বৈরাগ্য, —তাকে বলে মর্কট বৈরাগ্য। সংসারের জ্বালায় জ্বলে গেরুয়া বসন প’রে কাশী গেল। অনেক দিন সংবাদ নাই। তারপর একখানা চিঠি এল, “তোমরা ভাবিও না; আমার এখানে একটি কর্ম হইয়াছে।”

৯। একজনের পরিবার বললে, “অমুক লোকের ভারি বৈরাগ্য হয়েছে,—তোমার কিছু হলো না? যার বৈরাগ্য হয়েছে, সে লোকটির ষোল জন স্ত্রী, এক এক জন করে তাদের ত্যাগ করছে।” স্বামী নাইতে যাচ্ছিল,—কাঁধে গামছা, —বলে, “ক্ষেপী, সে লোক ত্যাগ করতে পারবে না,—একটু একটু করে কি ত্যাগ হয়? আমি ত্যাগ করতে পারবো। এই ছাখ্—আমি চল্লুম।” সে বাড়ীর গোছ্ গাছ্ না করে, সেই অবস্থায়, বাড়ী ত্যাগ করে চলে গেল। এরই নাম তীব্র বৈরাগ্য। এতে বোধ হয়, সংসার দাবানল; মাগ-ছেলে যেন পাতুকুয়া!

১০। যাদের কৌমার বৈরাগ্য, যারা ছেলেবেলা থেকে ভগবানের জন্ম ব্যাকুল হয়ে বেড়ায়, সংসারে ঢোকে না, তারা একটি আলাদা থাকে। তারা নৈকশ্য কুলীন। ঠিক ঠিক বৈরাগ্য হলে, তারা মেয়ে মানুষ থেকে পঞ্চাশ হাত তফাতে থাকে; পাছে তাদের ভাব ভঙ্গ হয়। তারা যদি মেয়ে মানুষের পাল্লায় পড়ে, তাহলে আর নৈকশ্য কুলীন থাকে না। ভঙ্গভাব হয়ে যায়; তাদের ঘর নীচু হয়ে যায়। যাদের ঠিক কৌমার বৈরাগ্য, তাদের উঁচু ঘর, অতি শুদ্ধ ভাব। গায়ে দাগটি পর্য্যন্ত লাগে না।

১১। ছোকরাদের সাধনার অবস্থা। এখন কেবল ত্যাগ। সন্ন্যাসী স্ত্রীলোকের চিত্রপট পর্য্যন্ত দেখবে না। আমি ওদের বলি, “মেয়ে মানুষ ভক্ত হলেও, তাদের সঙ্গে বসে কথা কবে না—দাঁড়িয়ে একটু কথা কবে। সিদ্ধ হলেও এইরূপ করতে হয়,—নিজের সাবধানের জন্ম, আর লোকশিক্ষার জন্ম। আমিও, মেয়েরা এলে, একটু পরে বলি, ‘তোমরা এখন ঠাকুর দেখ গে।’ তাতে যদি না উঠে, নিজে, উঠে পড়ি। আমার দেখে আবার সবাই শিখবে। সন্ন্যাসীর দেহ-ধারণ লোক-শিক্ষার জন্ম।”

১২। সন্ন্যাসীর পক্ষে স্ত্রীলোক একেবারে ত্যাগ। সন্ন্যাসীর পক্ষে বীৰ্য্যপাত বড়ই খারাপ। তাই তাদের সাবধানে থাকতে হয়, স্ত্রীরূপ দর্শন যাতে না হয়। ভক্ত স্ত্রীলোক হলেও, সেখান থেকে সরে যাবে। স্ত্রীরূপ দেখাও খারাপ। জাগ্রত অবস্থায়,

না হয় স্বপ্নে, বীৰ্য্যপাত হয় । নিজে জিতেন্দ্রিয় হলেও, লোক-শিক্ষার জন্য মেয়েদের সঙ্গে আলাপ করবে না ।

১৩ । সন্ন্যাসীর পক্ষে কামিনী আর কাঞ্চন,—যেমন সুন্দরীর পক্ষে তার গায়ের বোটকা গন্ধ ! ও গন্ধ থাকলে বৃথা সৌন্দর্য্য । সন্ন্যাসীর ভারি কঠিন নিয়ম । যখন সাধু সন্ন্যাসী সেজেছে,—তখন ঠিক সাধু সন্ন্যাসীর মত কাজ করতে হবে । থিয়েটারে দেখ নাই, যে রাজা সাজে, সে রাজাই সাজে, যে মন্ত্রী সাজে, সে মন্ত্রীই সাজে । একজন বহুরূপী ত্যাগী সাধু সেজেছিলো । বাবুরা তাকে এক তোড়া টাকা দিতে গেল । সে উত্তর করে চলে গেল,—টাকা ছুঁলেও না ! কিন্তু খানিক পরে, গা, হাত, পা ধুয়ে, নিজের কাপড় পরে এল । বললে, “কি দিচ্ছিলে এখন দাও ।” যখন সাধু সেজেছিলো, তখন টাকা ছুঁতে পারে নাই ; এখন চার আনা দিলেও হয় । কিন্তু পরমহংস অবস্থায় বালক হয়ে যায় । পাঁচ বছরের বালকের স্ত্রী পুরুষ জ্ঞান নাই । তবু লোকশিক্ষার জন্য সাবধান হতে হয় । চৈতন্যদেব লোকশিক্ষার জন্য সংসার ত্যাগ করলেন । সাধু সন্ন্যাসী নিজের মঙ্গলের জন্য কামিনী-কাঞ্চন ত্যাগ করবে । আবার নির্লিপ্ত হলেও, লোক শিক্ষার জন্য কাছে কামিনী-কাঞ্চন রাখবে না । শ্যাসী—সন্ন্যাসী—জগদগুরু !—তাকে দেখে তবে ত লোকের চৈতন্য হবে ?

১৪ । ঠিক ঠিক ত্যাগী ভক্ত, আর সংসারী ভক্ত, অনেক তফাৎ । ঠিক ঠিক সন্ন্যাসী—ঠিক ঠিক ত্যাগী ভক্ত—মৌমাছির

মত । মৌমাছি ফুলে বৈ আর কিছুতে বসবে না । মধুপান বৈ আর কিছু পান করবে না । সংসারী ভক্ত অণু মাছির মত ; —সন্দেশেও বস্ছে, আবার পচা ঘায়েও বস্ছে । বেশ ঈশ্বরের ভাবেতে রয়েছে, আবার কামিনী-কাঞ্চন লয়ে মত্ত হয় । ঠিক ঠিক ত্যাগী ভক্ত চাতকের মত । চাতক স্বাতী নক্ষত্রের মেঘের জল বৈ আর কিছু খাবে না !—সাত সমুদ্র, নদী ভরপুর ! সে অণু জল খাবে না ! কামিনী-কাঞ্চন স্পর্শ করবে না । কামিনী-কাঞ্চন কাছে রাখবে না ; পাছে আসক্তি হয় ।

১৫ । সন্ন্যাসীর পক্ষে স্ত্রীলোক,—থুথু ফেলে থুথু খাওয়া । সন্ন্যাসী কামিনী-কাঞ্চন ছুইই ত্যাগ করবে । যেমন মেয়ের পট পর্যন্ত দেখবে না, তেমনি কাঞ্চন—টাকা—স্পর্শ করবে না । টাকা কাছে থাকলেও খারাপ । হিসাব, দুশ্চিন্তা, টাকার অহঙ্কার, লোকের উপর ক্রোধ, কাছে থাকলে এই সব এসে পড়ে । সূর্য্য দেখা যাচ্ছিল, মেঘ এসে সব ঢেকে দিলে । সন্ন্যাসীর এ কঠিন নিয়ম কেন ? তার নিজের মঙ্গলের জন্তুও বটে, আর লোকশিক্ষার জন্তুও বটে । সন্ন্যাসীর ষোল আনা ত্যাগ দেখলে, তবে ত লোকের সাহস হবে,—তবেই ত তারা কামিনী-কাঞ্চন ত্যাগ করতে চেষ্টা করবে । এ ত্যাগ শিক্ষা যদি সন্ন্যাসী না দেয়, তবে কে দিবে ?

১৬ । সন্ন্যাসীর পক্ষে ত্যাগ । মেয়ে মানুষ তাদের পক্ষে বিষবৎ । সন্ন্যাসীর এরূপ স্থানে থাকা উচিত, যেখানে স্ত্রী-লোকের মুখ দেখা যায় না, বা অনেক কাল পরে দেখা যায় ।

১৭। সাধনের অবস্থায় কামিনী দাবানল-স্বরূপ,—কাল সাঁপের স্বরূপ ! সিদ্ধ অবস্থায়, ভগবান্ দর্শনের পর, তবে মা আনন্দময়ী ! তবে মার এক একটি রূপ ব'লে দেখবে । মেয়ে মানুষের গায়ের হাওয়া লাগবে না ; মোটা কাপড় গায়ে দিয়ে থাকবে, পাছে তাদের হাওয়া গায়ে লাগে ;—আর আট হাত, নয় দু হাত, নয় অন্ততঃ এক হাত, মা ছাড়া সকলের সঙ্গে সর্বদা তফাৎ থাকবে ।

১৮। ওরে সাধু, সাবধান ! এক আধবার যাবি ; বেশী যাস্ নে, পড়ে যাবি ! কামিনী-কাঞ্চন মায়া । সাধুর মেয়ে-মানুষ থেকে অনেক দূরে থাকতে হয় । ওখানে সকলে ডুবে যায় । ওখানে ব্রহ্মা বিষ্ণু পড়ে খাচ্ছে খাবি ।

১৯। সাধুরা ঈশ্বরের উপর ষোল আনা নির্ভর করবে । তাদের সঞ্চয় করতে নাহি । পন্থী (পাখী) আউর দরবেশ (সাধু) সঞ্চয় করে না । অবধূতের আর একটি গুরু ছিল মৌমাছি । মৌমাছি কষ্ট করে মধু সঞ্চয় করলে । আর একজন এসে চাক ভেঙ্গে তার মধু খেয়ে গেল । তার সঞ্চয়ের ধন সে ভোগ করতে পেলে না । অবধূত তা দেখে মৌমাছিকে নমস্কার করে বললে, “ঠাকুর, তুমি আমার গুরু । সঞ্চয় করলে পরিণাম কি হয়, আমি তা তোমার কাছে শিখলাম ।” এটি সংসারীর পক্ষে নয় । সংসারীর সংসার প্রতিপালন করতে হয়, তাই সঞ্চয়ের দরকার হয় ।

২০। সন্ন্যাসীর পক্ষে টাকা লওয়া বা লোভে আসক্ত

হওয়া 'কিরূপ জান ?—যেমন ব্রাহ্মণের বিধবা অনেককাল হবিষ্ণু খেয়ে ব্রহ্মচর্য্য করে বাগ্দি উপপতি করেছিলো ।

২১ । সাধুর মন ঈশ্বরে বার আনা, আর কাজে চার আনা । সাধুর ঈশ্বরের কথাতেই বেশ হুঁস্ । সাপের ল্যাজ্ মারালে আর রক্ষা নাই ! ল্যাজে যেন বেশী লাগে ।

২২ । ওদেশেতে লোকে যখন ধান মাপে, একজন মাপ্তে থাকে, আর একজন পেছনে দাঁড়িয়ে থাকে । যেই কম প'ড়ে আসে, পেছনে যে গাদা করা থাকে, তা থেকে ঠেলে দিয়ে তার সামনে যুগিয়ে দেয় । তেমনি যারা ঠিক ঠিক সাধু, ভক্ত, ঈশ্বরীয় কথা বলা ফুরাতে না ফুরাতে তাদের ভেতর থেকে ভাব যুগিয়ে আসে । তাদের ভাব আর ফুরায় না ।

২৩ । সাধুরা যদি তাঁর নামগুণানুকীর্্তন না করে, তাহলে কেমন করে লোকের ঈশ্বরে শ্রদ্ধা, বিশ্বাস ও ভক্তি হবে ? তিন পুরুষে আমীর জান্লে তবে ত লোকে মান্বে ?

২৪ । মনে ত্যাগ হলেই হলো । তা হলেও সন্ন্যাসী । কিন্তু বাসনায় আগুন দিতে হয়, তবে তো !

২৫ । যাদের দ্বারা তিনি লোকশিক্ষা দেবেন, তাদের সংসার ত্যাগ করা দরকার । যিনি আচার্য্য, তাঁর কামিনী-কাঞ্চন ত্যাগ করা দরকার । তা না হলে উপদেশ গ্রাহ্য হয় না । শুধু ভিতরে ত্যাগ হলে হবে না । বাহিরে ত্যাগও চাই, তবে লোকশিক্ষা হয় । তা না হলে লোকে মনে করে, ইনি যদিও কামিনী-কাঞ্চন ত্যাগ করতে বল্ছেন, ইনি নিজে

ভিতরে ভিতরে ঐ সব ভোগ করেন। সন্ন্যাসীও যদি মনে ত্যাগ করে, বাহিরে কামিনী-কাঞ্চন লয়ে থাকে,—তার দ্বারা লোকশিক্ষা হয় না। লোকে বলবে, লুকিয়ে লুকিয়ে গুড় খায়।

২৬। একজন কবিরাজ ঔষধ দিয়ে রোগীকে বললে, “তুমি আর একদিন এস, খাওয়া দাওয়ার কথা বলে দিব।” সে দিন তার ঘরে অনেকগুলি গুড়ের নাগুরি ছিল। রোগীর বাড়ী অনেক দূরে। সে আর একদিন এসে দেখা করলে। কবিরাজ বললেন, “খাওয়া দাওয়া সাবধানে করবে, গুড় খাওয়া ভাল নয়।” রোগী চলে গেলে একজন বৈদ্যকে বললে, “ওকে এত কষ্ট দিয়ে আনা কেন? সেই দিন বললেই ত হতো।” বৈদ্য হেসে বললেন, “ওর মানে আছে। সে দিন ঘরে অনেকগুলি গুড়ের নাগুরী ছিল। সেদিন যদি বলি, রোগীর বিশ্বাস হতো না। সে মনে করতো ওঁর ঘরে যখন এত গুড়ের নাগুরি, উনি নিশ্চয় কিছু কিছু খান। তাহলে গুড় জিনিসটা এত খারাপ নয়। আজ আমি গুড়ের নাগুরি লুকিয়ে ফেলেছি, এখন বিশ্বাস হবে।”

২৭। পরমহংস দুই প্রকার ;—জ্ঞানী পরমহংস, আর প্রেমী পরমহংস। যিনি জ্ঞানী, তিনি আপ্তসার,—“আমার হলেই হলো।” যিনি প্রেমী, যেমন শুকদেবাদি, তিনি ঈশ্বরকে লাভ করে আবার লোকশিক্ষা দেন। কেউ আম খেয়ে মুখটি মুছে ফেলে, আর কেউ পাঁচজনকে দেয়। কেউ

পাতকুয়া খোঁড়বার সময় বুড়ি, কোদাল আনে ; খোঁড়া শেষ হয়ে গেলে বুড়ি, কোদাল ঐ পাতকুয়াতে ফেলে দেয় । আবার কেউ বুড়ি, কোদাল রেখে দেয়, যদি পাড়ার লোকের কারুর দরকার হয় । শুকদেবাদি পরের জন্ত বুড়ি, কোদাল তুলে রেখেছিলেন ।

১৮ । রসুনের বাটী যত ধোও না কেন, গন্ধ একটু থাকবেই । ছোকরারা শুদ্ধ আধার, কামিনী-কাঞ্চন স্পর্শ করে নাই । অনেকদিন ধরে কামিনী-কাঞ্চন ঘাঁটলে রসুনের গন্ধ হয় । রসুনের বাটী পুড়িয়ে নিলে, আর গন্ধ থাকে না, নূতন হাঁড়ি হয়ে যায় । যেমন কাকে ঠোকরান আম, ঠাকুরদের দেওয়া যায় না, নিজেরও সন্দেহ । নূতন হাঁড়ি আর দৈপাতা হাঁড়ি ; দৈপাতা হাঁড়িতে দুধ রাখতে ভয় হয়, প্রায় দুধ নষ্ট হয়ে যায় । একটা দাম্ড়া গাইগরুর কাছে যেতে দেখে আমি জিজ্ঞাসা করলুম, “একি হলো ? এ ত দাম্ড়া ।” তখন গাড়েয়ান বললে, “মশায়, এ বেশী বয়সে দাম্ড়া হয়েছিল । তাই আগেকার সংস্কার যায় নাই ।” এক জায়গায় সন্ন্যাসীরা বসে আছে,—একটি স্ত্রীলোক সেইখান দিয়ে চলে যাচ্ছে । সকলেই ঈশ্বরচিন্তা কচ্ছে, একজন আড়চোখে চেয়ে দেখলে । সে তিনটি ছেলে হবার পর সন্ন্যাসী হয়েছিল ।

ত্যাগ ।

১। ত্যাগ দরকার । একটা জিনিসের পর যদি আর একটা জিনিস থাকে, প্রথম জিনিসটা পেতে গেলে ও জিনিসটাকে সরাতে হবে না ? একটা না সরালে আর একটা কি পাওয়া যায় ? ত্যাগ না হলে ঈশ্বরকে পাওয়া যায় না ।

২। খুব জনশূন্য স্থানে যুবতী স্ত্রীলোককে দেখে যে মা ব'লে চলে যেতে পারে, তাকেই ঠিক ঠিক ত্যাগী বলা যায় । আর, যে লোক সন্টার মাঝখানে ত্যাগী মেজে থাকে, তাকে প্রকৃত ত্যাগী বলা যায় না ।

৩। ঠিক ঠিক ত্যাগ, বিশ্বাস, ভাবসমাপ্তির চেয়ে ঢের বড় জিনিস জান্‌বি । নরেন্দ্র ত ও সব বড় একটা হয় না । কিন্তু দেখ্‌ দেখি, তার কি ত্যাগ, কি বিশ্বাস, কি মনের তেজ ও নিষ্ঠা !

৪। এদিককার বাসনা-কামনাগুলো সব এক এক করে ছাড়, তবে ত হবে ! কোথা ওগুলোকে সব এক এক করে ছাড়বে, না আরও বাড়তে চলে ! তাহলে কেমন করে হবে ?

৫। মনে ত্যাগ করলেই ত্যাগ করা যায় না । প্রারন্ধ, সংস্কার, এ সব আবার আছে । এক রাজাকে একজন

যোগী বললে, “তুমি আমার কাছে বসে থেকে ভগবানের চিন্তা কর।” রাজা বললে, “ঠাকুর, সে বড় হবে না। আমি থাকতে পারি, কিন্তু আমার এখনও ভোগ আছে। এ বনে যদি থাকি, হয় ত বনেতে একটা রাজ্য হয়ে যাবে। আমার এখনও ভোগ আছে।”

৬। সংসারী লোকেরা যখন সুখের জগু চারিদিকে ঘুরে ঘুরে বেড়ায়, আর পায় না, আর শেষে পরিশ্রান্ত হয়, যখন কামিনী-কাঞ্চনে আসক্ত হয়ে কেবল দুঃখ পায়, তখনি বৈরাগ্য আসে, ত্যাগ আসে। অনেকের ভোগ না করলে ত্যাগ হয় না। একটা পাখী জাহাজের মাস্তুলে অন্তমনস্ক হয়ে বসেছিল। জাহাজ গঙ্গার ভিতরে ছিল। ক্রমে মহাসমুদ্রে এসে পড়লো। তখন পাখীর চট্কা ভাঙ্গলো। সে দেখলে, চতুর্দিকে কূল কিনারা নাই। তখন ড্যাঙ্গায় ফিরে যাবার জগু উত্তর দিকে উড়ে গেল। অনেক দূর গিয়ে শ্রান্ত হয়ে গেল, তবু কূল-কিনারা দেখতে পেল না। তখন কি করে,—ফিরে এসে আবার মাস্তুলে এসে বসলো। অনেকক্ষণ পরে পাখীটা আবার উড়ে গেল ;—এবার পূর্বদিকে গেল। সে দিকে কিছুই দেখতে পেল না ; চারিদিকে কেবল অকূল পাথার ! তখন ভারি পরিশ্রান্ত হয়ে, আবার জাহাজে ফিরে এসে মাস্তুলের উপর বসলো। অনেকক্ষণ জিরিয়ে এইবার দক্ষিণ দিকে : এইরূপে আবার পশ্চিম দিকে গেল। যখন দেখলে, কোথাও কূল-কিনারা নাই, তখন সেই যে মাস্তুলের উপর বসলো, আর

উঠলো না। নিশ্চেষ্ট হয়ে বসে রইল। তখন মনে আর কোনও ব্যস্তভাব বা অশান্তি রইল না। নিশ্চিত হয়ে, আর কোন চেষ্টাও নাই। সাধকের ভিতরও কেউ কেউ অনেক তীর্থে ঘোরে। এক জায়গায় স্থির হয়ে বসতে পারে না; অনেক তীর্থের উদক—কি না, জল খায়। যখন ঘুরে ঘুরে ক্ষোভ মিটে যায়, তখন এক জায়গায় কুটির বেঁধে বসে। আর নিশ্চিত ও চেষ্টা-শূন্য হয়ে ভগবান্কে চিন্তা করে। তাই সাধুদের ভিতর, —কুটিচরক আর বহুদক।

৭। যা কিছু দেখ্ছো, শুন্ছো, চিন্তা কর্ছো, সবই মায়া। এক কথায় বলতে গেলে, কামিনী-কাঞ্চনই মায়ার আবরণ। পান খাওয়া, মাছ খাওয়া, তামাক খাওয়া, তেল মাখা, এ সব তাতে দোষ নাই। এ সব শুধু ত্যাগ করলে কি হবে? কামিনী-কাঞ্চন-ত্যাগই দরকার। সেই ত্যাগই ত্যাগ। গৃহীরা মাঝে মাঝে নির্জনে গিয়ে সাধন ভজন ক'বে, ভক্তিলাভ ক'রে মনে ত্যাগ করবে। সন্ন্যাসীরা বাহিরের ত্যাগ, আর মনের ত্যাগ, ছুইট করবে।

৮। ত্যাগীদের আলাদা কথা। তারা কামিনী-কাঞ্চন থেকে মন সরিয়ে এনে, কেবল ঈশ্বরকে দিতে পারে,—কেবল হরিরস পান করতে পারে। ঠিক ঠিক ত্যাগী হলে, ঈশ্বর বৈ তাদের আর কিছু ভাল লাগে না। বিষয় কথা হলে উঠে যায়, ঈশ্বরীয় কথা হলে শুনে। ঠিক ঠিক ত্যাগী হলে, নিজেরা ঈশ্বর কথা বৈ আর অন্য কথা মুখে আনে না। মৌমাছি কেবল

ফুলে বসে; মধু খাবে ব'লে । অণ্ড কোনও জিনিস মৌমাছির
ভাল লাগে না ।

৯ । কামিনী-কাঞ্চনের ভিতর থাকলে মন বড় টেনে লয় ।
সাবধানে থাকতে হয় । ত্যাগীদের অত ভয় নাই । ঠিক ঠিক
ত্যাগী কামিনী-কাঞ্চন থেকে তফাতে থাকে । তাই সাধন
থাকলে ঈশ্বরে সর্বদা মন রাখতে পারে । যারা সর্বদা ঈশ্বরে
মন দিতে পারে, তারা মৌমাছির মত । কেবল ফুলে বসে ;
ফুলে ব'সে মধু পান করে । সংসারে কামিনী-কাঞ্চনের ভিতরে
যে আছে, তার ঈশ্বরে মন হতে পারে, আবার কখনও কখনও
কামিনী-কাঞ্চনেও মন হয় । ঈশ্বরেতে সর্বদা মন রাখবে ।
প্রথম একটু খেটে নিতে হয় ; তার পর পেন্সন ভোগ করবে ।

১০ । 'গীতা' পড়লে কি হয় ? দশবার 'গীতা' 'গীতা'
বলে যা হয় । 'গীতা' 'গীতা' বলতে বলতে 'ত্যাগী' 'ত্যাগী'
হয়ে যায় । সংসারে কামিনী-কাঞ্চনে আসক্তি যার ত্যাগ হয়ে
গেছে, আর ঈশ্বরেতে ষোল আনা ভক্তি দিতে পেরেছে,
সেই গীতার মর্ম বুঝেছে । গীতার সব বইটা পড়বার দরকার
নাই ; 'ত্যাগী' 'ত্যাগী' বলতে পারলেই হ'লো ।

জ্ঞানযোগ ।

১। দেখ অমৃতসাগরে যাবার অনন্ত পথ । যে কোনও প্রকারে হোক, এ সাগরে পড়তে পারলেই হলো । মনে কর, অমৃতের একটি কুণ্ড আছে । কোনও রকমে এই অমৃত একটু মুখে পড়লেই অমর হবে ; তা তুমি নিজে ঝাঁপ দিয়েই পড়, বা সিঁড়িতে আস্তে আস্তে নেমে একটু খাও, বা কেউ তোমায় ধাক্কা মেরে ফেলেই দিক্,—একই ফল । একটু অমৃত আশ্বাদন করলেই তুমি অমর হবে । অনন্ত পথ । তার মধ্যে জ্ঞান, কৰ্ম, ভক্তি,—যে পথ দিয়ে যাও,—আন্তরিক হ'লে ঈশ্বরকে পাবে ।

২। জ্ঞান কাকে বলে ? আর আমি কে ? ঈশ্বরই কর্তা, আর সব অকর্তা, এর নাম জ্ঞান । আমি অকর্তা ; তাঁর হাতের যন্ত্র । তাই আমি বলি, “মা তুমি যন্ত্রী, আমি যন্ত্র ; তুমি ঘরনী, আমি ঘর ; আমি গাড়ী, তুমি ইঞ্জিনিয়ার ; যেমন চালাও, তেমনি চলি ; যেমন করাও, তেমনি করি ; যেমন বলাও, তেমনি বলি ; নাহং নাহং, তুঁহু তুঁহু । “ঈশ্বর সং, আর সমস্ত অসং”, এইটি জানার নাম জ্ঞান । যিনি সং, তাঁর একটি নাম ব্রহ্ম, আর একটি নাম কাল (মহাকাল) ।

তাই বলে; “কালে কত গেল—কত হ’লো রে ভাই।” ‘আমি’ আর ‘আমার’—এ দুটি অজ্ঞান। ‘হে ঈশ্বর, তুমি কর্তা, আর তোমার এই সব’,—এর নাম জ্ঞান। আর ‘আমার’ কেমন করে বলবে ?

৩। দেখ, ঈশ্বর সব করছেন ; তিনি যন্ত্রী, আমি যন্ত্র,—এ বিশ্বাস যদি কারও হয়, সে ত জীবনমুক্ত। “তোমার কৰ্ম তুমি কর, লোকে বলে করি আমি।” কি রকম জান ? বেদান্তের একটা উপমা আছে।—একটা হাঁড়িতে ভাত চড়িয়েছো, আলু, বেগুন, সব ভাতে দিয়েছো, খানিক পরে আলু, বেগুন, চাল, লাফাতে থাকে, যেন অভিমান করছে ; “আমি নড়ছি,” “আমি লাফাচ্ছি” ; ছোট ছেলেরা দেখলে ভাবে, আলু, পটোল, বেগুন, ওরা বুঝি জীয়ন্ত, তাই লাফাচ্ছে। যাদের জ্ঞান হয়েছে, তারা কিন্তু বুঝিয়ে দেয় যে, এই সব আলু, বেগুন, পটোল, এরা জীয়ন্ত নয়। নিজে নিজে লাফাচ্ছে না। হাঁড়ির নীচে আগুন জ্বলছে, তাই ওরা লাফাচ্ছে। যদি কাঠ টেনে লওয়া যায়, তাহলে আর নড়ে না। জীবের “আমি কর্তা”, এই অভিমান অজ্ঞান থেকে হয়। ঈশ্বরের শক্তিতে সব শক্তিমান্। জ্বাল ও কাঠ টেনে নিলে সব চুপ। পুতুল-নাচের পুতুল, বাজীকরের হাতে বেশ নাচে। হাত থেকে পড়ে গেলে আর নড়ে না, চড়ে না।

৪। যতক্ষণ অহঙ্কার, ততক্ষণ অজ্ঞান। অহঙ্কার থাকতে মুক্তি নাই। গরুগুলো ‘হান্মা’, ‘হান্মা’ করে, আর ছাগলগুলো

‘ম্যা’ ‘ম্যা’ করে। তাই ব’লে ওদের কত যন্ত্রণা! কসাইয়ে কাটে; জুতো, ঢোলের চামড়া, এই সব তৈয়ার করে। যন্ত্রণার শেষ নাই। হিন্দিতে ‘হাম্’ মানে ‘আমি’, আর ‘ম্যায়্’ মানেও ‘আমি’। ‘আমি’ ‘আমি’ করে ব’লে কত কৰ্মভোগ! শেষে নাড়ীভুঁড়ি থেকে ধুনুরীর তাঁত তৈয়ার করে। তখন ধুনুরীর হাতে “তুঁছ” “তুঁছ” বলে, অর্থাৎ ‘তুমি’ ‘তুমি’। ‘তুমি’ ‘তুমি’ বলার পর তবে নিস্তার; আর ভুগতে হয় না।

৫। “আমি” আর “আমার”,—অজ্ঞান। বিচার করতে গেলে, যাকে ‘আমি’ ‘আমি’ কর্ছো, দেখবে তিনি আত্মা বৈ আর কেউ নয়। বিচার কর—তুমি শরীর, না হাড়, না মাংস, না আর কিছু? তখন দেখবে, তুমি কিছু নও। তোমার কোনও উপাধি নাই। এটা সোনা, এটা পিতল, এর নাম অজ্ঞান; আর, সব সোনা, এর নাম জ্ঞান। ঈশ্বর দর্শন হলে বিচার বন্ধ হয়ে যায়। ঈশ্বরলাভ করেছে, অথচ বিচার কর্ছে, তাও আছে। কি কেউ ভক্তি নিয়ে তাঁর নামগুণগান কর্ছে। ছেলে কাঁদে কতক্ষণ? যতক্ষণ না স্তন পান করতে পায়; তারপরই কান্না বন্ধ হয়ে যায়। কেবল আনন্দ! আনন্দে মা’র দুধ খায়। তবে একটি কথা আছে। খেতে খেতে মাঝে মাঝে খেলা করে, আবার হাসে।

৬। ‘তত্ত্বজ্ঞান’ মানে ‘আত্মজ্ঞান’। ‘তৎ’ মানে ‘পরমাত্মা’, ‘হম্’ মানে ‘জীবাত্মা’; জীবাত্মা আর পরমাত্মা এক জ্ঞান হলে, তত্ত্বজ্ঞান হয়।

৭। কুঁড়ে ঘরে হাতী প্রবেশ করলে, ঘর তোলপাড় ক'রে ভেঙ্গে চুরে দেয়। ভাব-হস্তী দেহ-ঘরে প্রবেশ করে, আর তোলপাড় করে। হয় কি জান? আগুন লাগলে কতকগুলো জিনিস পুড়িয়ে টুড়িয়ে ফেলে, আর একটা হৈ হৈ কাণ্ড আরম্ভ করে দেয়। জ্ঞানাগ্নি প্রথমে কাম, ক্রোধ, এই সব রিপু নাশ করে; তার পর অহং বুদ্ধি নাশ করে। তার পর একটা তোলপাড় আরম্ভ করে।

৮। যেমন কারও পায়ে একটি কাঁটা ফুটেছে; সে ঐ কাঁটাটি তোলবার জন্য আর একটি কাঁটা যোগাড় করে আনে। তার পর কাঁটা দিয়ে কাঁটাটি তোলবার পর, দুটি কাঁটাই ফেলে দেয়। তেমনি অজ্ঞান-কাঁটা তোলবার জন্য জ্ঞান-কাঁটা আহরণ করতে হয়। তার পর জ্ঞান-অজ্ঞান দুই কাঁটা ফেলে দিলে হয় বিজ্ঞান। ঈশ্বর আছেন, এইটি বোধে বোধ ক'রে তাঁকে বিশেষরূপে জানতে হয়, তাঁর সঙ্গে বিশেষরূপে আলাপ করতে হয়,—এরই নাম বিজ্ঞান।

৯। 'বিজ্ঞান', কি না 'বিশেষরূপে জানা।' কেউ দুধ শুনেছে, কেউ দুধ দেখেছে, কেউ দুধ খেয়েছে। যে কেবল শুনেছে, সে অজ্ঞান। যে দেখেছে, সে জ্ঞানী। যে খেয়েছে, তারই বিজ্ঞান, অর্থাৎ বিশেষরূপে জানা হয়েছে। ঈশ্বর দর্শন ক'রে তাঁর সহিত আলাপ, যেন তিনি পরমাত্মীয়, এরই নাম বিজ্ঞান।

১০। এই বিজ্ঞান লাভ করবার জন্য বিদ্যা-মায়া আশ্রয়

করতে হয়। ঈশ্বর সত্য, জগৎ অনিত্য, এই বিচার, অর্থাৎ বিবেক বৈরাগ্য। আবার তাঁর নাম গুণ কীর্তন, ধ্যান, সাধুসঙ্গ, প্রার্থনা, এ সব বিদ্যা-মায়ার ভিতর। বিদ্যা-মায়া যেন ছাদে উঠবার শেষ কয় ধাপ্। আর এক ধাপ্ উঠলেই ছাদ।

১১। বিজ্ঞান হলে সংসারেও থাকা যায়। তখন বেশ অনুভব হয় যে, তিনিই জীব জগৎ হয়েছেন,—তিনি সংসার ছাড়া নন।

১২। তিনিই সব হয়েছেন ;—তাই বিজ্ঞানীর এই সংসার ‘মজার কুটী’, জ্ঞানীর পক্ষে এ সংসার ‘ধোঁকার টাটী’।

১৩। তাই নিত্যকে মানতে গেলেই লীলাকে মানতে হয়। অনুলোম বিলোম। সাকার নিরাকার সাক্ষাতের পর এই অবস্থা। সাকার চিন্ময়রূপ ; নিরাকার অখণ্ড সচ্চিদানন্দ।

১৪। ব্রহ্মজ্ঞান লাভ ক’রে, তার পর লীলা আশ্বাদন ক’রে বেড়াও। এক সাধু একটি সহরে এসে রং দেখে বেড়াচ্ছে। এমন সময় তার এক আলাপী সাধুর সঙ্গে দেখা হলো। সে বললে, “তুমি যে ঘুরে ঘুরে আমোদ করে বেড়াচ্ছ, তল্লিতল্লা কই ? সেগুলো ত চুরি করে লয়ে যায় নাই ?” প্রথম সাধু বলে, “না মহারাজ, আগে বাসা পাক্ড়ে, গাঁটরি উটরি ঠিকঠাক্ করে ঘরে রেখে, তালা লাগিয়ে, তবে রং দেখে বেড়াচ্ছি।” ব্রহ্মজ্ঞান কি সহজে হয় গো ? মনের নাশ না হলে হয় না।

১৫। বিজ্ঞানী দেখে ব্রহ্ম অটল, নিষ্ক্রিয় ; সুমেরুবৎ।

এই জগৎ সংসার তাঁর সত্ত্ব, রজঃ, তমঃ তিনগুণে হয়েছে। কিন্তু তিনি নির্লিপ্ত। বিজ্ঞানী দেখে, যিনি ব্রহ্ম, তিনিই ভগবান্ ; যিনি গুণাতীত, তিনিই ষড়ৈশ্বর্যপূর্ণ ভগবান্। এই জীব, জগৎ, মন, বুদ্ধি, ভক্তি, বৈরাগ্য, জ্ঞান, এ সব তাঁর ঐশ্বর্য। যে বাবুর ঘর দ্বার নাই, হয়ত বিকিয়ে গেল, সে বাবু কিসের বাবু? ঈশ্বর ষড়ৈশ্বর্যপূর্ণ। সে ব্যক্তির যদি ঐশ্বর্য না থাকতো, তাহলে কে মানতো? দেখ না, এই জগৎ কি চমৎকার! কত রকম জিনিস—চন্দ্র, সূর্য্য, নক্ষত্র, কত রকম জীব, বড়, ছোট, ভাল, মন্দ, কারু বেশী শক্তি, কারু কম শক্তি।

১৬। ঈশ্বরীয় কথা জিজ্ঞাসা না করলে, জ্ঞানীরা সে সব কথা কয় না। আগে জিজ্ঞাসা করবে—এখন তুমি কেমন আছ?—বাড়ীর সব কেমন আছে? কিন্তু বিজ্ঞানীর স্বভাব আলাদা; তার এলানো স্বভাব; হয়ত কাপড় খানা আল্গা, কি বগলের ভিতর, ছেলেদের মত। বিজ্ঞানী সর্বদা ঈশ্বর দর্শন করে,—তাই ত এরূপ এলানো ভাব। চক্ষু চেয়েও দর্শন করে। কখনও নিত্য হতে লীলাতে থাকে; কখনও লীলা হতে নিত্যতে যায়।

১৭। ব্রহ্মজ্ঞান হলে কতকগুলি লক্ষণে বুঝা যায়। শ্রীমদ্ভাগবতে জ্ঞানীর চারটি অবস্থার কথা আছে:—(১) বালকবৎ, (২) জড়বৎ, (৩) উন্মাদবৎ, (৪) পিশাচবৎ। পাঁচ বছরের বালকের অবস্থা হয়। আবার কখনও পাগলের

মত ব্যবহার করে। কখনও জড়ের গায় থাকে। এ অবস্থায় কর্ম করতে পারে না ; কর্মত্যাগ হয়।

১৮। পরমহংসের সর্বদা এই বোধ, ঈশ্বরই সত্য, আর সব অনিত্য। হাঁসেরই শক্তি আছে, দুধকে জল থেকে তফাৎ করা। দুধে জলে মিশিয়ে থাকে, তাদের জিহ্বাতে এক রকম টক রস আছে, সেই রসের দ্বারা দুধ আলাদা, জল আলাদা হয়ে যায়। পরমহংসের মুখেও সেই টকরস আছে,— প্রেমাভক্তি। প্রেমাভক্তি থাকলেই নিত্য অনিত্য বিবেক হয়, ঈশ্বরের অনুভূতি হয়, ঈশ্বর দর্শন হয়।

১৯। নেতি নেতি করে আত্মাকে ধরার নাম জ্ঞান। নেতি নেতি বিচার করে সমাধিস্থ হলে, আত্মাকে ধরা যায়।

২০। যে জ্ঞানী, জ্ঞান যোগ ধরে আছে, সে নেতি নেতি এই বিচার করে। ব্রহ্ম এ নয়, ও নয়, জীব নয়, জগৎ নয়। এইরূপ বিচার করতে করতে যখন মন স্থির হয়, মনের লয় হয়, আর সমাধি হয়, তখন ব্রহ্মজ্ঞান হয়। ব্রহ্মজ্ঞানীর ঠিক ধারণা,—ব্রহ্ম সত্য, জগৎ মিথ্যা ; নাম, রূপ, এসব স্বপ্নবৎ ; ব্রহ্ম যে কি, তা মুখে বলা যায় না, তিনি যে একজন ব্যক্তি তাও বলবার যো নাই।

২১। ব্রহ্ম যে কি, তা মুখে বলা যায় না। সব জিনিস উচ্ছিষ্ট হয়ে গেছে ; বেদ, পুরাণ, তন্ত্র, ষড়্‌দর্শন,—সব এঁটো হয়ে গেছে, মুখে পড়া হয়েছে, মুখে উচ্চারণ হয়েছে ; তাই এঁটো হয়েছে। কিন্তু একটি জিনিস কেবল উচ্ছিষ্ট হয় নাই !

সে জিনিসটি ব্রহ্ম । ব্রহ্ম যে কি, আজ পর্য্যন্ত কেহ মুখে বলতে পারে নাই ! এক বাপের ছুটি ছেলে । ব্রহ্মবিজ্ঞা শিখবার জন্ত ছেলে দুটিকে বাপ আচার্য্যের হাতে দিলেন । কয়েক বৎসর পরে তারা গুরুগৃহ হতে ফিরে এল, এসে বাপকে প্রণাম করলে । বাপের ইচ্ছা, দেখেন ব্রহ্মজ্ঞান কিরূপ হয়েছে । বড় ছেলেকে জিজ্ঞাসা করলেন, “বাপু, তুমি ত সব পড়েছ, ব্রহ্ম কিরূপ বল দেখি ?” বড় ছেলেটি বেদ থেকে নানা শ্লোক ব’লে ব’লে ব্রহ্মের স্বরূপ বুঝাতে লাগলো । বাপ চুপ করে রইলেন । যখন ছোট ছেলেকে জিজ্ঞাসা করলেন, সে হেঁট মুখে চুপ করে রইল ; মুখে কোনও কথা নাই । বাপ তখন প্রসন্ন হয়ে ছোট ছেলেটিকে বললেন, “বাপু, তুমিই একটু বুঝেছ ।” ব্রহ্ম যে কি, মুখে বলা যায় না ।

২২ । মানুষে মনে করে, আমরা তাঁকে জেনে ফেলেছি । একটা পিঁপ্ড়ে চিনির পাহাড়ে গিয়েছিলো । একদানা খেয়ে পেট ভরে গেল । আর একদানা মুখে করে বাসায় যেতে লাগলো । যাবার সময় ভাবছে, এবার এসে সব পাহাড়টি ল’য়ে যাব । ক্ষুদ্র জীবেরা এই সব মনে করে । জানে না, ব্রহ্ম বাক্য-মনের অতীত । যে যত বড়ই হোক না কেন, তাঁকে কি জানবে ? শুকদেবাদি না হয় ডেঁও পিঁপ্ড়ে,— চিনির আঁট দশটা দানা না হয় মুখে করুক । আবার আছে, ব্রহ্ম অবাঙ্মনসোগোচরঃ । জ্ঞান-সূর্য্যের তাপে সাকার বরফ গ’লে যায় ; ব্রহ্মজ্ঞানের পর,—নির্বিবকল্প সমাধির

পর,—আবার সেই অনন্ত, বাক্য-মনের অতীত, অরূপ নিরাকার ব্রহ্ম। ব্রহ্মের স্বরূপ মুখে বলা যায় না, চুপ হয়ে যায়। অনন্তকে কে মুখে বুঝাবে? পাখী যত উপরে উঠে, তার উপর আরও আছে।

২৩। সমাধিস্থ হলে ব্রহ্মজ্ঞান হয়, ব্রহ্মদর্শন হয়। সে অবস্থায় বিচার একেবারে বন্ধ হয়ে যায়। মানুষ চুপ হয়ে যায়। ব্রহ্ম কি বস্তু, মুখে বলবার শক্তি থাকে না। হুনের ছবি সমুদ্রে মাপতে গিয়েছিলো। কত গভীর জল তাই খবর দেবে! খবর দেওয়া আর হলো না। যেই নামা, অমনি গলে যাওয়া! কে আর খবর দেবে!

২৪। সাধনের সময় নেতি নেতি করে ত্যাগ করতে হয়। তাঁকে লাভ করার পর বুঝা যায়, তিনিই সব হয়েছেন। যখন রামচন্দ্রের বৈরাগ্য হলো, দশরথ বড় ভাবিত হয়ে বশিষ্ঠদেবের শরণাপন্ন হলেন—যাতে রাম সংসার ত্যাগ না করেন। বশিষ্ঠ রামচন্দ্রের কাছে গিয়ে ডাখেন, তিনি বিমনা হয়ে বসে আছেন,—অন্তরে তীব্র বৈরাগ্য। বশিষ্ঠ বল্লেন, “রাম, তুমি সংসার ত্যাগ করবে কেন? সংসার কি তিনি ছাড়া? আমার সঙ্গে বিচার কর।” রাম দেখলেন,—সংসার সেই পরমব্রহ্ম থেকেই হয়েছে,—তাই চুপ করে রইলেন। যেমন, যে জিনিস থেকে ঘোল, সেই জিনিস থেকে মাখন। তখন ঘোলেরই মাখন, মাখনেরই ঘোল। অনেক কষ্টে মাখন তুললে (অর্থাৎ ব্রহ্মজ্ঞান হ’লো); তখন দেখছে।

যে মাখন থাকলেই ঘোল আছে,—যেখানে মাখন, সেইখানেই ঘোল। ‘ব্রহ্ম আছেন’ বোধ থাকলেই,—জীব জগৎ— চতুর্বিংশতি তত্ত্বও আছে।

২৫। প্রথমে নেতি নেতি করতে হয়,—তিনি পঞ্চভূত নন, ইন্দ্রিয় নন, মন, বুদ্ধি, অহঙ্কার নন। তিনি সকল তত্ত্বের অতীত। ছাদে উঠতে হবে,—সব সিঁড়ি একে একে ত্যাগ করে যেতে হবে। সিঁড়ি কিন্তু ছাদ নয়; কিন্তু ছাদের উপরে পৌঁছে দেখা যায় যে, যে জিনিসে ছাদ তৈয়ারী,—ইট, চূণ, শুড়্কি,—সেই জিনিসেই সিঁড়িও তৈরী। যিনি পরব্রহ্ম, তিনিই এই জীব জগৎ হয়েছেন, চতুর্বিংশতি তত্ত্ব হয়েছেন। যিনি আত্মা, তিনিই পঞ্চভূত হয়েছেন। মাটি এত শক্ত কেন, যদি আত্মা থেকেই হয়েছে? তাঁর ইচ্ছাতে সব হতে পারে। শোণিত শুক্র থেকে যে হাড়, মাস হচ্ছে; সমুদ্রের ফেণা কত শক্ত হয়!

২৬। নেতি নেতি বিচার করে সেই নিত্য অখণ্ড সচ্চিদানন্দে পৌঁছোয়। তারা এই বিচার করে,—তিনি জীব নন, জগৎ নন, চতুর্বিংশতি তত্ত্ব নন। নিত্যে পৌঁছে আবার দ্বাখে, তিনি এই সব হয়েছেন,—জীব, জগৎ, চতুর্বিংশতি তত্ত্ব।

২৭। হাঁড়ির ভাত ফুটছে; চালগুলি সুসিদ্ধ হয়েছে কিনা, জানতে তুই তার ভিতর থেকে একটা ভাত তুলে টিপে দেখলি যে হয়েছে,—আর অমনি বুঝতে পারলি যে, সব

চালগুলি সিদ্ধ হয়েছে। কেন? তুই ত ভাতগুলির 'সব এক একটি করে টিপে টিপে দেখলি না; তবে কি করে বুঝলি? ঐ কথা যেমন বুঝা যায়, তেমনি জগৎ সংসারটা নিত্য কি অনিত্য, সৎ কি অসৎ, একথাও সংসারে ছুটে চারটে জিনিস পরীক্ষা করে দেখলেই বুঝা যায়। মানুষটা জন্মাল, কিছুদিন বেঁচে রইল, তারপর মলো; গরুটাও তাই গাছটাও তাই; এইরূপে দেখে দেখে বুঝলি যে, যে জিনিসেরই নাম আছে, রূপ আছে, সে গুলোরই এই ধারা। পৃথিবী, সূর্যালোক, চন্দ্রলোক, সকলের নাম রূপ আছে; অতএব তাদেরও এই ধারা। এইরূপে জানতে পারলি, সমস্ত জগৎ সংসারটারই এই স্বভাব। তখন জগতের ভিতরের সব জিনিসেরই স্বভাবটা জানলি কি না? এইরূপে যখনই সংসারটাকে ঠিক ঠিক অনিত্য, অসৎ বলে বুঝবি, অমনি সেটাকে আর ভালবাসতে পারবি না,—মন থেকে ত্যাগ করে নির্বাসনা হবি। আর যখনই ত্যাগ করবি, তখনই জগৎ-কারণ ঈশ্বরের দেখা পাবি। এইরূপে যার ঈশ্বর দর্শন হলো, সে সর্ব্বজ্ঞ হলো না ত কি হ'লো বল?

২৮। 'আমি কি?' এটা খোঁজ দেখি। আমি কি হাড়, না মাংস, না রক্ত, না নাড়ীভূঁড়ি? 'আমি' খুঁজতে খুঁজতে 'তুমি' এসে পড়ে, অর্থাৎ অন্তরে সেই ঈশ্বরের শক্তি বৈ আর কিছুই নাই। "আমি" নাই!—"তিনি"। বিচার করতে করতে আমি টামি আর কিছুই থাকে না। যেমন পঁয়াজের প্রথমে লাল লাল খোসা তুমি ছাড়ালে, তার

পর সাদা পুরু খোসা ছাড়ালে ; এইরূপ বরাবর ছাড়াতে ছাড়াতে ভিতরে কিন্তু কিছু খুঁজে পাওয়া যায় না । যেখানে নিজের 'আমি' খুঁজে পাওয়া যায় না,—আর খোঁজেই বা কে,—সেখানে ব্রহ্মের স্বরূপ বোধে বোধ বিরূপ হয়, সে কথা কে ব'লবে ?

২৯ । যদি বল সংসার-আশ্রমের জ্ঞানী, আর সন্ন্যাস-আশ্রমের জ্ঞানী,—এ দুয়ের তফাৎ আছে কি না ? তার উত্তর এই যে, দুইই এক জিনিস । এটিও জ্ঞান, ওটিও জ্ঞান,—এক জিনিস । তবে সংসারে জ্ঞানীরও ভয় আছে । কামিনী-কাঞ্চনের ভিতর থাকতে গেলেই একটু না একটু ভয় আছে । মাখন তুলে যদি নূতন হাঁড়িতে রাখ, মাখন নষ্ট হবার সম্ভাবনা থাকে না । যদি ঘোলীর হাঁড়িতে রাখ, তাহলে সন্দেহ হয় । খই যখন ভাজা হয়, দু চারটে খই খোলা থেকে টপ্ টপ্ করে লাফিয়ে পড়ে । সেগুলি যেন মল্লিকা ফুলের মত, গায়ে একটু দাগ থাকে না । খোলার উপর যে সব খই থাকে, সেও বেশ খই, তবে অত ফুলের মত হয় না, একটু গায়ে দাগ থাকে । সংসার-ত্যাগী সন্ন্যাসী যদি জ্ঞান-লাভ করে, তবে ঠিক এই মল্লিকা ফুলের মত দাগশূন্য হয় । আর জ্ঞানের পর সংসার-খোলায় থাকলে, একটু গায়ে লালচে দাগ হতে পারে । যাই হোক, যদিও সংসারের জ্ঞানীর গায়ে দাগ থাকতে পারে, সে দাগে কোনও ক্ষতি হয় না । চন্দ্রে কলঙ্ক আছে বটে, কিন্তু আলোর ব্যাঘাত হয় না ।

৩০। দুটি জ্ঞানের লক্ষণ। প্রথম, কূটস্থ-বুদ্ধি। হাজার দুঃখ, কষ্ট, বিপদ, বিঘ্ন হোক—নির্বিষ্কার,—যেমন কামার-শালের লোহা, যার উপর হাতুড়ি দিয়ে পেটে। আর দ্বিতীয়, পুরুষকার,—খুব রোখ্। কাম, ক্রোধে আমার অনিষ্ট করছে, তো একেবারে ত্যাগ। কচ্ছপ যদি হাত, পা একবার ভিতরে সাঁদ করে, চাঁরখানা করে কাটলেও আর বাঁর করবে না।

৩১। শুদ্ধাত্মা নির্লিপ্ত,—প্রকৃতির পার। তাঁর ক্ষুধা, তৃষ্ণা নাই। জন্ম, মৃত্যু নাই,—অজর, অমর, সুমেরুবৎ। যার এই ব্রহ্মজ্ঞান হয়েছে, সে জীবমুক্ত। সে ঠিক বুঝতে পারে যে, আত্মা আলাদা, আর দেহ আলাদা। ভগবানকে দর্শন করলে দেহাত্মবুদ্ধি আর থাকে না। দুটি আলাদা। যেমন নারিকেলের জল শুকিয়ে গেলে, শাঁস আলাদা আর খোলা আলাদা হয়। আত্মাটি যেন দেহের ভিতর নড়্ নড়্ করে। তেমনি বিষয়-বুদ্ধি-রূপ জল শুকিয়ে গেলে আত্মজ্ঞান হয়; আত্মা আলাদা আর দেহ আলাদা বোধ হয়। কাঁচা সুপারী বা কাঁচা বাদামের ভিতরের সুপারী বা বাদাম ছাল থেকে তফাৎ করা যায় না, কিন্তু পাকা অবস্থায় সুপারী বা বাদাম আলাদা, ও ছাল আলাদা হয়ে যায়। ব্রহ্মজ্ঞান হলে বিষয় রস শুকিয়ে যায়।

৩২। বেদে আছে, সচ্চিদানন্দ ব্রহ্ম। ব্রহ্মা একও নও, দুইও নয়। এক দুয়ের মধ্যে। অস্তিত্বও বলা যায় না, নাস্তিত্বও বলা যায় না, তবে অস্তিত্ব নাস্তিত্বের মধ্যে।

৩৩। বেদান্তের অদ্বৈত ভাব বা ভাবাতীত ভাব কি রকম জানিস্ ?—যেমন অনেক দিনের পুরাণো চাকর ; মনিব তার গুণে খুসী হয়ে, তাকে সকল কথায় বিশ্বাস করে সব বিষয়ে পরামর্শ করে। একদিন খুসী হয়ে তার হাত ধরে নিজের গদীতেই বসাতে গেল। চাকর সঙ্কেচ হয়ে “কি কর ?” “কি কর ?” বল্লেও, মনিব জোর করে টেনে বসিয়ে বল্লে, “আঃ, ব’স্ না, তুইও যে, আমিও সে”—সেই রকম।

৩৪। ব্রহ্ম, তিনি বিদ্যা ও অবিদ্যার পার, তিনি মায়াতীত। এই জগতে বিদ্যা-মায়া, অবিদ্যা-মায়া, দুইই আছে ; জ্ঞান, ভক্তি আছে ; আবার কামিনী-কাঞ্চনও আছে ; সৎও আছে, অসৎও আছে ; ভালও আছে, আবার মন্দও আছে ; কিন্তু ব্রহ্ম নির্লিপ্ত। ভাল মন্দ জীবের পক্ষে ; সৎ অসৎ জীবের পক্ষে ; তাঁর ওতে কিছু হয় না। যেমন প্রদীপের সম্মুখে কেউ বা ভাগবত পড়্ছে, আর কেউ বা জাল কর্ছে ; প্রদীপ নির্লিপ্ত ! সূর্য্য শিষ্টের উপর আলো দিচ্ছে, আবার ছুষ্টের উপরেও আলো দিচ্ছে। যদি বল, দুঃখ, পাপ, অশান্তি, এ সকল তবে কি ? তার উত্তর এই যে, ওসব জীবের পক্ষে ; ব্রহ্ম নির্লিপ্ত। সাপের ভিতর বিষ আছে, অণ্ডকে কামড়ালে মরে যায়, সাপের কিন্তু কিছু হয় না।

৩৫। দেখ না, একটা জিনিস দেখতেই কতগুলো দরকার —চক্ষু দরকার, আলো দরকার, আবার মনের দরকার। এই তিনটার মধ্যে একটা বাদ দিলে তার দর্শন হয় না। এই

মনের কাজ যতক্ষণ চলছে, ততক্ষণ কেমন করে বলবে যে জগৎ নাই, কি আমি নাই। মনের নাশ হলে, সংকল্প বিকল্প চলে গেলে, সমাপ্তি হয়, ব্রহ্মজ্ঞান হয়। কিন্তু সা, রে, গা, মা, পা, ধা, নি,—নি-তে অনেকক্ষণ থাকা যায় না।

৩৬। যতক্ষণ মনের দ্বারা বিচার, ততক্ষণ নিত্যতে পৌঁছান যায় না। মনের দ্বারা বিচার করতে গেলেই, জগৎকে ছাড়বার যো নাই,—রূপ, রস, গন্ধ, স্পর্শ, শব্দ,—ইন্দ্রিয়ের এই সকল বিষয়কে ছাড়বার যো নাই। বিচার বন্ধ হলে তবে ব্রহ্মজ্ঞান। এ মনের দ্বারা আত্মাকে জানা যায় না। আত্মা দ্বারাই আত্মাকে জানা যায়। শুদ্ধ মন, শুদ্ধ বুদ্ধি, শুদ্ধ আত্মা একই।

৩৭। কিন্তু হাজার বাজী দেখ, তবু তার অধীন ;—পালাবার যো নাই। তুমি স্বাধীন নও। তিনি যেমন করান, তেমনি করতে হবে। সেই আত্মাশক্তি ব্রহ্মজ্ঞান দিলে, তবে ব্রহ্মজ্ঞান হয়, তবে বাজী খেলা দেখা যায়। নচেৎ নয়। যতক্ষণ একটু ‘আমি’ থাকে, ততক্ষণ সেই আত্মাশক্তির এলাকা। তাঁর অধীনে, তাঁকে ছাড়িয়ে যাবার যো নাই।

৩৮। কৃপা হলেই দর্শন হয়। তিনি জ্ঞান-সূর্য্য। তাঁর একটি কিরণে এই জগতে জ্ঞানের আলো পড়েছে ; তবেই আমরা পরস্পরকে জানতে পারছি, আর জগতে কত রকম বিদ্যা উপার্জন করছি। তাঁর আলো যদি একবার তিনি নিজে তাঁর মুখের উপর ধরেন, তাহলে দর্শন লাভ হয়।

৩৯। সার্জেন্ট সাহেব রাত্রে আঁধারে লণ্ঠন হাতে করে

বেড়ায় । তার মুখ কেউ দেখতে পায় না । কিন্তু ঐ আলোতে সে সকলের মুখ দেখতে পায় ; আর সকলে পরস্পরের মুখ দেখতে পায় । যদি কেউ সার্জেন্টকে দেখতে চায়, তাহলে তাকে প্রার্থনা করতে হয়,—বলতে হয়, “সাহেব, কৃপা করে একবার আলোটি নিজের মুখের উপর ফিরাও, তোমাকে একবার দেখি ।” ঈশ্বরকে প্রার্থনা করতে হয়, “ঠাকুর, কৃপা করে জ্ঞানের আলো তোনার নিজের উপর একবার ধর, আমি তোমায় দর্শন করি ।” ঘরে যদি আলো না জ্বলে, সেটি দারিদ্র্যের চিহ্ন ; তাই জন্ম-মরণে জ্ঞানের আলো জ্বালতে হয় । “জ্ঞানদীপ জ্বলে ঘরে, ব্রহ্মময়ীর মুখ দেখ না ?”

৪০ । চিত্তশুদ্ধি না হলে ভগবান্ দর্শন হয় না । কাম, ক্রোধ, লোভ, এ সব জয় করলে তবে তাঁর কৃপা হয় ; তখন দর্শন হয় ।

৪১ । চিত্তশুদ্ধি না হলে হয় না । কামিনী-কাঞ্চনে মন মলিন হয়ে আছে, মনে ময়লা পড়ে আছে । ছুঁচ কাঁদা দিয়ে ঢাকা থাকলে আর চুম্বকে টানে না । মাটি, কাঁদা পুরে ফেলে, তখন চুম্বকে টানে । মনের ময়লা তেমনি চোখের জলে ধুয়ে ফেলা যায় । “হে ঈশ্বর ! আর অমন কাজ করবো না” ব'লে যদি কেউ অনুতাপে কাঁদে, তাহলে ময়লাটা পুরে যায় । তখন ঈশ্বররূপ চুম্বক-পাথর মনরূপ ছুঁচকে টেনে লয় । তখন সমাধি হয়, ঈশ্বরদর্শন হয় । কিন্তু হাজার চেষ্টা কর, তাঁর কৃপা না হলে কিছ হয় না । তাঁর কৃপা না হলে তাঁর দর্শন হয়

না। কৃপা কি সহজে হয়? অহঙ্কার একেবারে তাগ করতে হবে। “আমি কর্তা”, এ বোধ থাকলে ঈশ্বরদর্শন হয় না। ভাঁড়ারে একজন আছে, তখন বাড়ীর কর্তাকে যদি কেউ বলে, “মহাশয়, আপনি এসে জিনিস বা’র করে দিন।” তখন কর্তাটি বলে, “ভাঁড়ারে একজন রয়েছে, আমি আর গিয়ে কি করবো?” যে নিজে কর্তা হয়ে বসেছে, তার হৃদয়-মধ্যে ঈশ্বর সহজে আসেন না।

৪২। চৈতন্য না লাভ করলে, চৈতন্যকে জানা যায় না। বিচার কতক্ষণ? যতক্ষণ না তাঁকে লাভ করা যায়। শুধু মুখে বললে হবে না, ‘এই আমি দেখছি, তিনি সব হয়েছেন।’ তাঁর কৃপায় চৈতন্য লাভ করা চাই। চৈতন্য লাভ করলে সমাধি হয়; মাঝে মাঝে দেহ ভুল হয়ে যায়, কামিনী-কাঞ্চনের উপর আসক্তি থাকে না, ঈশ্বরীয় কথা ছাড়া কিছু ভাল লাগে না। বিষয় কথা শুনলে কষ্ট হয়। চৈতন্য লাভ করলে, তবে চৈতন্যকে জানতে পারা যায়। দেখছি, বিচার করে একরকম জানা যায়, তাঁকে ধ্যান করে একরকম জানা যায়। আবার তিনি যখন দেখিয়ে দেন, সে এক। কি রকম জান? যেমন অন্ধকারের ভিতর দেশলাই ঘসতে ঘসতে দপ্ করে আলো হয়। সেইরূপ দপ্ করে আলো যদি তিনি দেন, তাহলে সব সন্দেহ মিটে যায়। এরূপ বিচার করে কি তাঁকে জানা যায়?

৪৩। চৈতন্যকে চিন্তা করলে অচৈতন্য হয় না। তাঁর

কৃপা না হলে, সন্দেহ ভঞ্জন হয় না। তাঁর কৃপা হলে আর ভয় নাই। তিনি কৃপা করে যদি সন্দেহ ভঞ্জন করেন, আর দেখা দেন, আর কষ্ট নাই। তবে তাঁকে পাবার জন্য খুব ব্যাকুল হলে,—তাঁকে ব্যাকুল হয়ে ডাকতে ডাকতে, সাধনা করতে করতে,—তবে কৃপা হয়। ছেলে অনেক দৌড়াদৌড়ি করছে দেখে মা'র দয়া হয়। মা লুকিয়েছিল, এসে দেখা দেয়। তাঁর ইচ্ছা, যে খানিক দৌড়াদৌড়ি হয়, তবে আমোদ হয়। তিনি লীলায় এই সংসার রচনা করেছেন, এরই নাম মহামায়া। তাই, সেই শক্তিরূপিণী মা'র শরণাগত হতে হয়। মায়াপাশে বেঁধে ফেলেছে, এই পাশ ছেদন করতে পারলে, তবে ঈশ্বরদর্শন হতে পারে।

৪৪। তাঁর কৃপা পেতে গেলে, আত্মশক্তিরূপিণী তাঁকে প্রসন্ন করতে হয়। তিনিই মহামায়া, জগৎকে মুগ্ধ করে সৃষ্টি, স্থিতি, প্রলয় করছেন। তিনি অজ্ঞান করে রেখে দিয়েছেন। সেই মহামায়া দ্বার ছেড়ে দিলে তবে অন্তরে যাওয়া যায়। বাহিরে পড়ে থাকলে, বাহিরের জিনিস কেবল দেখা যায়। সেই নিত্য সচ্চিদানন্দ পুরুষকে জানতে পারা যায় না।

৪৫। জীবের অহঙ্কারই মায়া। এই অহঙ্কার সব আবরণ করে রেখেছে। “আমি মলে ঘুচিবে জঞ্জাল।” যদি ঈশ্বরের কৃপায় “আমি অকর্তা” এই বোধ হয়ে গেল, তা হলে সে ব্যক্তি ত জীবনুক্ত হয়ে গেল। তার আর ভয় নাই।

যদি গুরুর কৃপায় একবার অহং-বুদ্ধি যায়, তা হলে ঈশ্বর দর্শন হয়। আড়াই হাত দূরে শ্রীরামচন্দ্র, যিনি সাক্ষাৎ ঈশ্বর, মধো সীতারূপিণী মায়া বাবধান আছে বলে, লক্ষ্মণ-রূপ জীব সেই ঈশ্বরকে দেখতে পান নাই। এই দেখ, আমি এই গামছা খানা দিয়ে মুখের সামনে আড়াল করছি। আর আমায় দেখতে পাচ্ছ না। তবু আমি এত কাছে। সেইরূপ ভগবান্ সকলের চেয়ে কাছে; তবু এই মায়া আবরণের দরুণ তাঁকে দেখতে পাচ্ছ না। জীব ত সচ্চিদানন্দ স্বরূপ, কিন্তু এই মায়া বা অহঙ্কারে তাদের সব নানা উপাধি হয়ে পড়েছে, আর তারা আপনার স্বরূপ ভুলে গেছে।

৪৬। অহঙ্কার আছে বলে ঈশ্বর-দর্শন হয় না। ঈশ্বরের বাড়ীর দরজার সামনে, এই অহঙ্কার-রূপ গাছের গুঁড়ি পড়ে আছে। এই গুঁড়ি উল্লঙ্ঘন না করলে তাঁর ঘরে প্রবেশ করা যায় না। একজন ভূতসিদ্ধ হ'য়েছিল। সিদ্ধ হ'য়ে যাই ডেকেছে, অমনি ভূতটি এসেছে। এসে ব'লে, “কি কাজ করতে হবে বল। কাজ যাই দিতে পারবে না, অমনি তোমার ঘাড় ভাঙবে।” সে ব্যক্তি যত কাজ দরকান ছিল, সব ক্রমে ক্রমে করিয়ে নিল। তারপর আর কাজ পায় না; ভূতটি বললে, “এটবার তোমার ঘাড় ভাঙি।” সে বললে, “একটি দাঁড়াও, আমি আসছি।” এই বলে গুরুদেবের কাছে গিয়ে ব'লে, “মহাশয়, ভারি বিপদে পড়েছি, এই এই বিবরণ; এখন কি করি?” গুরু তখন ব'ললেন, “তুই এক কৰ্ম কর, তাকে এই

চুলগাছটি সোজা ক'রতে বল ।” ভূতটি দিন রাত ঐ ক'রতে লাগল । চুল কি সোজা হয় ? যেমন বাঁকা, তেমনি রছিল ! অহঙ্কারও এই যায়, আবার আসে । অহঙ্কার ত্যাগ না করলে ঈশ্বরের কৃপা হয় না । কৰ্ম্মের বাড়ীতে যদি একজনকে ভাঁড়ারি করা যায়, যতক্ষণ ভাঁড়ারে সে থাকে, ততক্ষণ কর্তা আসে না । যখন সে নিজে ইচ্ছা ক'রে ভাঁড়ার ছেড়ে চলে যায়, তখনই কর্তা ঘরে চাবি দেয় ও নিজে ভাঁড়ারের বন্দোবস্ত করে !

৪৭ । নাবালকেরই অছী । ছেলেমানুষ নিজে বিষয় রক্ষা ক'রতে পারে না ; রাজা ভার লন । অহঙ্কার ত্যাগ না করলে ঈশ্বর ভার লন না । বৈকুণ্ঠে লক্ষ্মীনারায়ণ বসে আছেন, হঠাৎ নারায়ণ উঠে দাঁড়ালেন । লক্ষ্মী পদসেবা করছিলেন ; বল্লেন, “ঠাকুর কোথা বাও ?” নারায়ণ বল্লেন, “আমার একটি ভক্ত বড় বিপদে পড়েছে, তাই তাকে রক্ষা করতে যাচ্ছি ।” এই বলে নারায়ণ বেরিয়ে গেলেন । কিন্তু তৎক্ষণাৎ আবার ফিরলেন । লক্ষ্মী বল্লেন, “ঠাকুর, এত শীঘ্র ফিরলে যে ?” নারায়ণ হেসে বল্লেন, “ভক্তটি প্রেমে বিহ্বল হয়ে পথে চলে যাচ্ছিল ; ধোপারা কাপড় শুকাতে দিচ্ছিল, ভক্তটি মাড়িয়ে যাচ্ছিল ! দেখে ধোপারা লাঠি নিয়ে তাকে মারতে যাচ্ছিল । তাই আমি তাকে রক্ষা করতে গিয়েছিলাম ।” লক্ষ্মী আবার বল্লেন, “ফিরে এলেন কেন ?” নারায়ণ হাসতে হাসতে বল্লেন, “সে ভক্তটি নিজে ধোপাদের মারবার জন্য ইট তুলেছে, দেপলাম । তাই আর আমি গেলাম না ।”

৪৮। ব্রহ্ম আর মায়া। জ্ঞানী মায়া ফেলে দেয়। মায়া আবরণ স্বরূপ। এই দেখ, গামছা আড়াল করলাম ; আর প্রদীপের আলো দেখা যাচ্ছে না। ভক্ত কিন্তু মায়া ছেড়ে দেয় না ; মহামায়ার পূজা করে। শরণাগত হয়ে বলে, “মা, পথ ছেড়ে দাও ; তুমি পথ ছেড়ে দিলে তবে ব্রহ্মজ্ঞান হবে।”

৪৯। জীব, জগৎ, চতুর্বিংশতি তত্ত্ব, এ সব তিনি আছেন বলে সব আছে ; তাঁকে বাদ দিলে কিছুই থাকে না। একের পিঠে অনেক শূন্য দিলে সংখ্যা বেড়ে যায় ; এককে মুছে ফেললে, শূন্যের কোনও মূল্য থাকে না।

৫০। ব্রহ্মজ্ঞান হলে সংসারে আসক্তি, কামিনী-কাঞ্চন লয়ে উৎসাহ, সব চলে যায়। সব শান্তি হয়ে যায়। কাঠ পোড়াবার সময় অনেক পড়পড় শব্দ করে, আর আগুনের ঝাঁজ যখন সব শেষ হয়ে গেল, ছাই পড়লো—তখন আর শব্দ থাকে না। আসক্তি গেলেই উৎসাহ যায় ; শেষে শান্তি। ঈশ্বরের নিকট যত এগিয়ে যাবে, তত শান্তি। শান্তি, শান্তি, শান্তি, প্রশান্তি ! গঙ্গার যত নিকটে যাবে, ততই শীতল বোধ হবে, স্নান করলে আরও শান্তি। ব্রহ্মদর্শন হলে মানুষ চুপ হয়ে যায়। যতক্ষণ দর্শন না হয়, ততক্ষণই বিচার। ঘি যতক্ষণ কাঁচা থাকে, ততক্ষণই কল্কলানি। পাকা ঘির কোনও শব্দ থাকে না। কিন্তু যখন পাকা ঘিয়ে আবার কাঁচা লুচি পড়ে, তখন আর একবার ছাঁক্ কল্কল্

করে। যখন কাঁচা লুচিকে পাকা করে, তখন আবার চুপ হয়ে যায়। তেমনি সমাধিস্থ পুরুষ, লোককে শিক্ষা দিবার জংঘ আবার নেমে আসে, আবার কথা কয়। যতক্ষণ মৌমাছি ফুলে না বসে, ততক্ষণ ভন্ভন্ করে; ফুলে বসে মধুপান করতে আরম্ভ করলে চুপ হয়ে যায়। মধুপান করবার পর মাতাল হয়ে আবার কখনও কখনও গুন্গুন্ করে। পুকুরে কলসীতে জল ভরবার সময় ভক্ভক্ শব্দ হয়। পূর্ণ হয়ে গেলে আর শব্দ হয় না। তবে আর এক কলসীতে যদি ঢালাঢালি হয়, তবে আবার শব্দ হয়।

৫১। তাঁকে লাভ হলে, তাঁতে সমাধিস্থ হলে, জ্ঞান-বিচার আর থাকে না। জ্ঞান-বিচার আর কতক্ষণ? যতক্ষণ অনেক বলে বোধ হয়,—যতক্ষণ জীব, জগৎ, আমি, তুমি, এ সব বোধ থাকে। যখন ঠিক ঠিক এক জ্ঞান হয়, তখন চুপ হয়ে যায়, যেমন ত্রৈলোক্য স্বামী। ব্রাহ্মণভোজনের সময় দেখ নাই? প্রথমটা খুব হৈ চৈ। পেট যত ভরে আসছে, ততই হৈ চৈ কমে আসছে। যখন দধি মুণ্ডি পড়লো, তখন কেবল সুপ্ সাপ্; আর কোনও শব্দ নাই। তার পর নিদ্রা—সমাধি। তখন হৈ চৈ আর আদৌ নাই।

৫২। বেদান্তবাদী কেবল বিচার করে,—ব্রহ্ম সত্য, জগৎ মিথ্যা। বড় কঠিন পথ। জগৎ মিথ্যা হলে তুমিও মিথ্যা, যিনি বলছেন, তিনিও মিথ্যা, তাঁর কথাও মিথ্যা, স্বপ্নবৎ। বড় দূরের কথা। কি রকম জান? যেমন কর্পূর পোড়ালে কিছুই

বাকী থাকে না ; কাঠ পোড়ালে তবু ছাই বাকী থাকে । শেষ বিচারের পর সমাধি হয় । তখন ‘আমি’, ‘তুমি’, ‘জগৎ’, এ সবার খবর থাকে না ।

৫৩ । সমাধি কাকে বলে ? যেখানে মনের লয় হয় । জ্ঞানীর জড় সমাধি হয়—‘আমি’ থাকে না । ভক্তিশোভার সমাধিকে চেতন সমাধি বলে । এতে সেব্য-সেবকের ‘আমি’ থাকে ; রস-রসিকের ‘আমি’ ; আশ্বাচ্ছ-আশ্বাদকের ‘আমি’ । ঈশ্বর—সেব্য, ভক্ত—সেবক । ঈশ্বর রসস্বরূপ, ভক্ত রসিক । ঈশ্বর আশ্বাচ্ছ, ভক্ত আশ্বাদক । চিনি হব না, খেতে ভালবাসি ।

৫৪ । জ্ঞানলাভ হলে অহঙ্কার যেতে পারে । জ্ঞানলাভ হলে সমাধিস্থ হয় । সমাধিস্থ হলে, তবে অহং যায় । সে জ্ঞানলাভ বড় কঠিন । বেদে আছে যে, সপ্তম ভূমিতে মন গেলে তবে সমাধি হয় ; সমাধি হলে তবে অহং চলে যেতে পারে । মনের সচরাচর বাস কোথায় ? প্রথম, তিন ভূমিতে । লিঙ্গ, গুহা, নাভি—সেই তিন ভূমি । তখন মনের আসক্তি কেবল সংসারে ; কামিনী-কাঞ্চনে । হৃদয়ে যখন মনের বাস হয়, তখন ঈশ্বরীয় জ্যোতিঃ দর্শন হয় ; সে ব্যক্তি যদি দর্শন করে, বলে “এ কি ! এ কি !” তার পর কষ্ট ; সেখানে যখন মনের বাস হয়, তখন কেবল ঈশ্বরীয় কথা কহিতে ও শুনতে ইচ্ছা হয় । কপালে—ক্রমধ্যে মন গেলে, তখন সচ্চিদানন্দ-রূপ দর্শন হয়, সেই রূপের সঙ্গে আলিঙ্গন, স্পর্শন করতে ইচ্ছা হয়,

কিন্তু পারে না ; লণ্ঠনের ভিতর আলো দর্শন হয়, কিন্তু স্পর্শ হয় না । ছুঁই ছুঁই বোধ হয়, কিন্তু ছোঁয়া যায় না । সপ্তম ভূমিতে মন যখন যায়, তখন অহং আর থাকে না ; সমাধি হয় । সপ্তম ভূমিতে মন পৌঁছিলে, কি হয় মুখে বলা যায় না । জাহাজ একবার কালাপানিতে গেলে, আর ফেরে না । জাহাজের খবর আর পাওয়া যায় না । সমুদ্রের খবরও জাহাজের কাছে পাওয়া যায় না ।

৫৫ । ব্রহ্মজ্ঞান যার হয়, সে খবর দিতে পারে না । চার বন্ধু বেড়াতে বেড়াতে পাঁচিলে ঘেরা একটা জায়গা দেখতে পেলো । খুব উঁচু পাঁচিল । ভিতরে কি আছে দেখবার জন্ম সকলে বড় উৎসুক হলো । পাঁচিল বেয়ে একজন উঠলো । উকি মেরে যা দেখলে, তাতে অবাক হয়ে 'হা' 'হা' 'হা' 'হা' বলে ভিতরে পড়ে গেল । আর কোন খবর দিল না । যেই উঠে, সেই 'হা' 'হা' 'হা' 'হা' করে পড়ে যায় ! তখন খবর আর কে দেবে ? জড়ভরত, দত্তাত্রেয়, এরা ব্রহ্ম দর্শন করে আর খবর দিতে পারে নাই ।

৫৬ । কিন্তু 'আমি' থাকবেই থাকবে,—যায় না : যেমন অনন্ত জল,—উপরে, নীচে, সম্মুখে, পেছনে, ডাইনে, বামে, জলে পরিপূর্ণ ! সেই জলের মধ্যে একটি জলপূর্ণ কুন্ত আছে ; ভিতরে, বাহিরে জল ; কিন্তু তবু কুন্তটি আছে ; 'আমি'-রূপ কুন্ত । যতক্ষণ 'আমি' বোধ তিনি রেখেছেন, ততক্ষণ সবই আছে । আর স্বপ্নবৎ বন্বার যো নাই । নীচে আগুন জ্বালা

আছে ; তাই হাঁড়ির ভিতর জল, ভাত, আলু, পটোল, সব টগুবগু করছে, লাফাচ্ছে, আর যেন বলছে, “আমি আছি, আমি লাফাচ্ছি ।” শরীরটা যেন হাঁড়ি, মন বুদ্ধি জল, আর ইন্দ্রিয়ের বিষয়গুলি যেন ডাল, ভাত, আলু, পটোল । অহং যেন তাদের অভিমান—“আমি টগুবগু” ‘করছি’ । আর সচ্চিদানন্দ অগ্নি ।

৫৭ । জ্ঞানী জ্ঞানলাভ করবার পরও বিদ্যামায়া নিয়ে থাকে,—ভক্তি, দয়া, বৈরাগ্য, এই সব—নিয়ে থাকে । এর দুটি উদ্দেশ্য । প্রথম, লোকশিক্ষা হয় । তার পর রসাস্বাদনের জন্ম । জ্ঞানী যদি সমাধিস্থ হয়ে চুপ করে থাকে, তা হলে লোক-শিক্ষা হয় না । তাই শঙ্করাচার্য্য বিদ্যার ‘আমি’ রেখেছিলেন । আর ঈশ্বরের আনন্দ ভোগ করবার জন্ম,—সন্তোগ করবার জন্ম—ভক্ত ভক্তি নিয়ে থাকে । এই বিদ্যার ‘আমি’, কি ভক্তের ‘আমি’, এতে দোষ নাই । বজ্জাত ‘আমি’তে দোষ হয় । তাঁকে দর্শন করবার পর বালকের স্বভাব হয় ; বালকের ‘আমি’তে কোনও দোষ নাই । যেমন আসির মুখ, লোককে গালাগাল দেয় না ।

৫৮ । ঈশ্বর দর্শনের পর, কখনও কখনও তিনি অহঙ্কার একেবারে মুছে ফেলেন ; যেমন সমাধি অবস্থা । আবার প্রায় অহঙ্কার একটু রেখে দেন । কিন্তু সে অহঙ্কারে দোষ নাই ; যেমন বালকের অহঙ্কার । পাঁচ বছরের বালক ‘আমি’ ‘আমি’ করে, কিন্তু কারও অনিষ্ট করতে জানে না । পরশমণি ছুঁলে লোহা সোনা হয়ে যায় । লোহার তরোয়াল সোনার তরোয়াল

হয়ে যায়। তরোয়ালের আকার থাকে, কারও অনিষ্ট করে না। সোনার তরোয়ালে মারা কাটা চলে না।

৫৯। পোড়া দড়ি দেখতেই দড়ির আকার; ফুঁ দিলে উড়ে যায়। জ্ঞানাগ্নিতে অহঙ্কার পুড়ে গেছে। এখন আর কারও অনিষ্ট করে না। নাম মাত্র ‘আমি’। নিত্যতে পৌঁছিয়ে আবার লীলায় থাকা,—যেমন ওপারে গিয়ে আবার এপারে আসা; লোকশিক্ষার জন্তু আর বিলাসের জন্তু—আমোদের জন্তু।

৬০। যিনি ঈশ্বর দর্শন করেছেন, তাঁর দ্বারা আর ছেলে-মেয়ের জন্ম দেওয়া,—সৃষ্টির কাজ হয় না। ধান পুঁতলে গাছ হয়; কিন্তু ধান সিদ্ধ করে পুঁতলে গাছ হয় না। যিনি ঈশ্বর দর্শন করেছেন, তাঁর ‘আমি’টা নামমাত্র থাকে। সে ‘আমি’ দ্বারা কোনও অণ্ডায় কাজ হয় না। নামমাত্র থাকে, যেমন নারিকেলের বাল্দের দাগ; বাল্দো ঝড়ে গেছে, এখন কেবল দাগমাত্র।

৬১। ব্রহ্মজ্ঞানের পরও ঈশ্বর একটু ‘আমি’ রেখে দেন। সেই ‘আমি’ ভক্তের ‘আমি’, বিচার ‘আমি’। তা হতে এ অনন্তলীলা আশ্বাদন হয়। মুঘল সব ঘসে, তার একটুখানি আবার উলুবনে পড়ে কুলনাশন,—যত্নবংশ ধ্বংস হলো। বিজ্ঞানী তাই এই ভক্তের ‘আমি’, বিদ্যার ‘আমি’ রাখে,—লোকশিক্ষার জন্তু।

৬২। জ্ঞানী কেবল ঈশ্বরের কথা ভালবাসে; বিষয়ের

কথা হলে তার বড় কষ্ট হয়। কিন্তু বিষয়ীরা আলাদা লোক। তাদের অবিদ্যা পাগুড়ি খসে না। তাই ফিরে ঘুরে ঐ বিষয়ের কথা এনে ফেলে। বেদেতে সপ্তভূমির কথা আছে। পঞ্চম ভূমিতে যখন জ্ঞানী উঠে, তখন ঈশ্বর-কথা বই শুনতেও পারে না, আর বলতেও পারে না। তখন তার মুখ থেকে কেবল জ্ঞান উপদেশ বেরায়।

৬৩। আমি দেখছি, বাজীকর আর বাজীকরের খেলা। বাজীকরই সত্য; তার খেলা সব অনিত্য, স্বপ্নের মত।

৬৪। যতক্ষণ না তাঁকে জানতে পার্ছো, ততক্ষণ ‘আমি’ ‘আমি’ কর্ছো। সকলেই তাঁকে জানতে পার্বে। সকলেরই উদ্ধার হবে। তবে কেহ সকাল সকাল খেতে পায়, কেহ দুপুর বেলা, কেহ বা সন্ধ্যার সময়। কিন্তু কেহ অভুক্ত থাক্বে না। সকলেই আপনার স্বরূপকে জানতে পার্বে।

৬৫। যতক্ষণ বোধ যে, ঈশ্বর সেথা সেথা, ততক্ষণ অজ্ঞান। যখন হেথা হেথা, তখনি জ্ঞান। একজন তামাক খাবে; প্রতিবেশীর বাড়ী টিকে ধরাতে গেছে। রাত অনেক হয়েছে। তারা ঘুমিয়ে পড়েছিল। অনেকক্ষণ ধরে ঠেলাঠেলি করার পর একজন দোর খুলতে নেমে এল। লোকটির সঙ্গে দেখা হলে, সে জিজ্ঞাসা করলে, “কি গো? কি মনে ক’রে?” “আর কি মনে ক’রে! তামাকের নেশা আছে, জান ত! টিকে ধরাব মনে ক’রে।” তখন সেই লোকটি বললে, “বাঃ! তুমি ত বেশ লোক! এত কষ্ট ক’রে আসা, আর দোর ঠেলাঠেলি।

তোমার হাতে যে লণ্ঠন রয়েছে !” যা চায়, তাই কাছে রয়েছে, অথচ লোকে নানা স্থানে ঘুরে বেড়ায় ।

৬৬ । যতদিন বেঁটাটির ল্যাজ্ থাকে, ততদিন সে জলেই থাকে । তার পর ল্যাজ্ খসে গেলে, সে জলেও থাকতে পারে, আবার ডাঙ্গায়ও থাকতে পারে । তেমনি মানুষের যতদিন অবিচাররূপ ল্যাজ্ থাকে, ততদিন সে সংসার-রূপ জলে থাকে । অবিচাররূপ ল্যাজ্ খসে গেলে, সংসারেও থাকতে পারে, আবার সচ্চিদানন্দেও যেতে পারে ।

৬৭ । সাংখ্যদর্শনে বলে, “পুরুষ অকর্তা, কিছু করেন না ; প্রকৃতিই সকল কাজ করেন । পুরুষ প্রকৃতির ঐ সকল কাজ সাক্ষি-স্বরূপ হয়ে দাঁখেন ; প্রকৃতিও আবার পুরুষকে ছেড়ে আপনি কোনও কাজ করতে পারে না ।” -ঐ যে গো, দেখনি, —বিয়ে বাড়ীতে ? কর্তা হুকুম দিয়ে নিজে বসে বসে আল-বোলায় তামাক টানছে, গিন্নী কিন্তু কাপড়ে হালুদ মেখে এক-বার এখানে, একবার ওখানে, বাড়ীময় ছুটাছুটা ক’রে এ কাজটি হলো কি না, ও কাজটা করলে কি না, সব দেখছেন, শুনছেন ; বাড়ীতে যত মেয়ে ছেলে আসছে, তার আদর অভ্যর্থনা করছেন ; আর মাঝে মাঝে কর্তার কাছে এসে হাত মুখ নেড়ে শুনিয়ে যাচ্ছেন, “এটা এই রকম করা হলো, ওটা এই রকম হলো, এটা করতে হবে, ওটা করা হবে না” এই সব । কর্তা তামাক টানতে টানতে সব শুনছেন, আর “ভঁ ভঁ” করে ঘাড় নেড়ে সব কথার সায় দিচ্ছেন !—সেই রকম আর কি !

৬৮। ব্রহ্ম আর শক্তি অভেদ। এককে মানলে . আর একটিকে মানতে হয়। যেমন অগ্নি, আর তার দাহিকা-শক্তি ; —অগ্নি মানলেই দাহিকা-শক্তি মানতে হয়। দাহিকা-শক্তি ছাড়া অগ্নি ভাবা যায় না ; আবার অগ্নিকে বাদ দিয়ে দাহিকা-শক্তি ভাবা যায় না। সেইরূপ আবার সূর্য্যকে বাদ দিয়ে সূর্য্যের রশ্মি ভাবা যায় না ; আবার সূর্য্যের রশ্মিকে ছেড়ে সূর্য্যকে ভাবা যায় না। দুধ কেমন ? না ধব্ধবে। দুধকে ছেড়ে দুধের ধবলত্ব ভাবা যায় না ; আবার দুধের ধবলত্ব ছেড়ে দুধকে ভাবা যায় না। তাই ব্রহ্মকে ছেড়ে শক্তিকে, আবার শক্তিকে ছেড়ে ব্রহ্মকে ভাবা যায় না। নিত্যকে ছেড়ে লীলা, আবার লীলাকে ছেড়ে নিত্যকে ভাবা যায় না।

৬৯। তিনি খিভুরূপে সর্বভূতে আছেন,—পিপ্ড়েতে পর্য্যন্ত। কিন্তু শক্তি বিশেষ। তা না হলে একজন লোকে দশ জনকে হারিয়ে দেয় ? আর কেউ একজনের কাছ থেকে পালায় ?

৭০। কালী,—যিনি কালের সহিত রমণ করেন,— আত্মশক্তি। কাল ও কালী,—ব্রহ্ম ও শক্তি অভেদ। সেই সংস্বরূপ ব্রহ্ম নিত্য,—তিন কালেই আছেন—আদি-অন্ত-রহিত। তাঁকে মুখে বর্ণনা করা যায় না ; হৃদ বলা যায়, “তিনি চৈতন্যস্বরূপ, আনন্দস্বরূপ।” জগৎ অনিত্য, তিনিই নিত্য। জগৎ ভেঙ্কি-স্বরূপ। বাজীকরই সত্য, বাজীকরের ভেঙ্কি অনিত্য। যিনি ব্রহ্ম, তিনিই শক্তি।

তঁাকেই মা বলে ডাকি। যখন তিনি নিষ্ক্রিয়, তখন তঁাকে ব্রহ্ম বলি; আবার যখন সৃষ্টি, স্থিতি, সংহার কার্য করেন, তখন তঁাকে শক্তি বলি। যেমন, স্থির জল, আর জলে ঢেউ হয়েছে। এই আত্মশক্তি বা মহামায়া ব্রহ্মকে আবরণ করে রেখেছে। আবরণ গেলেই “যা ছিলুম, তাই হলাম!” “আমিই তুমি,” “তুমিই আমি!” যতক্ষণ আবরণ রয়েছে, ততক্ষণ বেদান্ত-বাদীদের ‘সোহং’ অর্থাৎ আমিই সেই পর-ব্রহ্ম,—একথা ঠিক খাটে না। জলেরই তরঙ্গ, তরঙ্গের কিছু জল নয়। যতক্ষণ আবরণ রয়েছে, ততক্ষণ “মা” “মা” বলে ডাকা ভাল। তুমি মা, আমি তোমার সন্তান; তুমি প্রভু, আমি তোমার দাস। সেব্য-সেবক ভাবই ভাল। এই দাসভাব থেকে আবার সব ভাবই আসে,—শান্ত, সখ্য প্রভৃতি। মনিব যদি দাসকে ভালবাসে, তাহলে আবার তাকে বলে, “আয়, আমার কাছে বস; তুইও যা আমিও তা।” কিন্তু দাস যদি মনিবের কাছে সেধে বসতে যায়, মনিব রাগ করবে না?

৭১। বেদান্তে বলে,—ব্রহ্ম ও ব্রহ্মশক্তি—পুরুষ ও প্রকৃতি অভেদ, অর্থাৎ পুরুষ ও প্রকৃতি দুইটি পৃথক পদার্থ নয়। একই পদার্থ; কখনও পুরুষভাবে, কখনও বা প্রকৃতিভাবে থাকে। সেটা কি রকম জানিস? যেমন সাপটা কখনও চলছে, আবার কখনও বা স্থির হয়ে পড়ে আছে। যখন স্থির হয়ে আছে, তখন হলো পুরুষভাব, প্রকৃতি তখন পুরুষের

সঙ্গে মিশে এক হয়ে আছে। আর যখন সাপটা চলছে, তখন যেন প্রকৃতি পুরুষ থেকে আলাদা হ'য়ে কাজ করছে।

৭২। ব্রহ্ম ও কালী একই ব্যক্তি ; নামরূপ ভেদ। যেমন—
জল, water, পানি। এক পুকুরে তিন চার ঘাট আছে।
এক ঘাটে হিন্দুরা জল খায়, তারা বলে জল। এক
ঘাটে মুসলমানেরা জল খায়, তারা বলে পানি। আর এক ঘাটে
ইংরাজেরা জল খায়, তারা বলে water (ওয়াটার)। তিনি
একই ; কেবল নামে তফাৎ। তাঁকে কেউ বলে “আল্লা”,
কেউ বলে “God” (গড্), কেউ বলে “ব্রহ্ম” কেউ বলে
“কালী”, কেউ কেউ বলে “রাম”, “হরি”, “যীশু”, “দুর্গা”।

৭৩। যখন তিনি সৃষ্টি, স্থিতি, প্রলয় করেন, তখন তাঁকে
সগুণ ব্রহ্ম,—আত্মশক্তি বলি। যখন তিনি তিন গুণের
অতীত, তখন তাঁকে নিগুণ ব্রহ্ম, বাক্যমনের অতীত বলা
যায়—পরব্রহ্ম।

৭৪। মেঘেতে যেমন সূর্যকে ঢেকে রাখে, মায়াতে তেমনি
ঈশ্বরকে ঢেকে রেখেছে ; মেঘ সরে গেলেই যেমন সূর্যকে
দেখা যায়, মায়া দূর হলে তেমনি ঈশ্বরকে দেখা যায়।

৭৫। তাঁকে কি বুঝা যায় গো ? আনিও কখন তাঁকে
ভাবি ভাল, কখনও ভাবি মন্দ। তাঁর মহামায়ার ভিত্তর
আমাদের রেখেছেন। কখনও তিনি হুঁস করেন, কখনও তিনি
অজ্ঞান করেন। একবার অজ্ঞানটা চলে যায়, আবার ঘিরে
ফেলে। পুকুর পানাটাকা, টিল মারলে খানিকটা জল দেখা

যায় ; আবার খানিকক্ষণ পরে পানা নাচতে নাচতে এসে সে জলটুকুও ঢেকে ফেলে । যতক্ষণ দেহ-বুদ্ধি, ততক্ষণই সুখ দুঃখ, জন্মমৃত্যু, রোগশোক । দেহেরই এই সব ; আত্মার নয় । দেহের মৃত্যুর পর তিনি হয়ত ভাল জায়গায় নিয়ে যাচ্ছেন, —যেমন প্রসব-বেদনার পর সন্তান-লাভ । আত্মজ্ঞান হলে সুখদুঃখ, জন্মমৃত্যু, স্বপ্নবৎ বোধ হয় ।

৭৬ । এ সংসার তাঁর মায়া । মায়ার কাজের ভিতর অনেক গোলমাল আছে,—কিছু বুঝা যায় না । ঈশ্বরের কার্য কিছু বুঝা যায় না । ভীষ্মদেব শরশয্যায় শুয়ে আছেন, পাণ্ডবেরা দেখতে এসেছেন ; সঙ্গে কৃষ্ণ । তাঁরা এসে খানিকক্ষণ পরে দেখেন, ভীষ্মদেব কাঁদছেন । পাণ্ডবেরা তখন কৃষ্ণকে বললেন, “কৃষ্ণ, কি আশ্চর্য্য ! ইনি অষ্টবসুর একজন বসু । আর এর মত জ্ঞানী দেখা যায় না ; ইনিও মৃত্যুর সময় মায়াতে কাঁদছেন !” কৃষ্ণ বললেন, “ভীষ্ম সেজন্য কাঁদছেন না ; ওঁকে জিজ্ঞাসা কর দেখি ?” জিজ্ঞাসা করাতে ভীষ্ম বললেন, “কৃষ্ণ, ঈশ্বরের কার্য কিছু বুঝতে পারলাম না । আমি এইজন্য কাঁদছি যে, পাণ্ডবদের সঙ্গে সঙ্গে সাক্ষাৎ নারায়ণ ফিরছেন তাঁদের কিন্তু বিপদেব শেষ নাই,—এই কথা যখন ভাবি, দেখি যে তাঁর কার্য কিছু বোঝবার যো নাই ।”

৭৭ । মায়াকে চিন্তে পারলে সে তখনই পালায় । এক গুরু শিষ্যবাড়ী যাচ্ছিলেন ; সঙ্গে চাকর ছিল না । পথের মাঝে এক মুচিকে দেখতে পেয়ে বললেন, “ওরে, আমার সঙ্গে যাবি ?

ভাল খেতে পাবি, আদরে থাকবি, চল না ?” মুচি বললে, “ঠাকুর, আমি অতি নীচ জাত, কেমন করে আপনার চাকর হয়ে যাব ?” গুরু বল্লেন, “তাতে তোর কোনও চিন্তা নাই ; তুই কাকেও আপনার পরিচয় দিস্ না, কি কারু সঙ্গে আলাপ করিস্ না ।” মুচি রাজী হল । সন্ধ্যের সময় শিষ্যবাড়ীতে গুরু সন্ধ্যা করছেন, এমন সময় আর একজন ব্রাহ্মণ এসে সেই চাকরকে বল্লেন, “আমার জুতা জোড়াটা এনে দে ত ?” চাকর কথা কইলে না । ব্রাহ্মণ আবার বল্লেন, সে তাতেও চুপ করে রইল । ব্রাহ্মণ তিন চার বার বল্লেন, সে তবুও নড়লো না । শেষে ব্রাহ্মণ বিরক্ত হয়ে বল্লেন, “আরে বেটা, ব্রাহ্মণের কথা শুনিস্ নে ? তুই কি জাত ? মুচি না কি ?” মুচি এ কথা শুনে ভয়ে কাঁপতে কাঁপতে গুরুর দিকে চেয়ে বল্লেন, “ঠাকুর মশায় গো ! ঠাকুর মশায় গো ! আমায় চিনেছে, আমি পালাই ।”

৭৮ । হরিদাস বাঘের মুখোস্ মুখে দিয়ে একটা ছেলেকে ভয় দেখাচ্ছিল । মা এসে ছেলেকে শান্ত করবার জন্য বল্লেন, “ওকে আবার ভয় কি ? ও যে আমাদের হরে । ও কাগজের মুখোস্ মুখে দিয়েছে ।” সে তাতেও থামলো না ; পরে যখন হরিদাস মুখোস্ খুলে তার মুখে দাঁড়াল, ও মুখোস্টি তার হাতে দিয়ে শান্ত করলে, তখন সে সব বুঝলে, আর মুখোস্ ভয় পায় না । সেই রকম মায়ার ভিতর যিনি আছেন, তাঁকে জানতে পারলে আর মায়াকে ভয় হয় না ।

৭৯ । “জ্ঞান”, “জ্ঞান”, বললেই কি হয় ? জ্ঞান হবার

লক্ষণ আছে। দুটি লক্ষণ,—প্রথম, অনুরাগ অর্থাৎ ঈশ্বরকে ভালবাসা। শুধু জ্ঞানবিচার করছি, কিন্তু ঈশ্বরেতে অনুরাগ নাই, ভালবাসা নাই, সে মিছে। আর একটি লক্ষণ, কুণ্ডলিনী শক্তির জাগরণ। কুলকুণ্ডলিনী যতক্ষণ নিদ্রিত থাকেন, ততক্ষণ জ্ঞান হয় না। বসে বসে বই পড়ে যাচ্ছি, বিচার করছি, কিন্তু ভিতরে ব্যাকুলতা নাই। সেটি জ্ঞানের লক্ষণ নয়।

৮০। ঈশ্বরদর্শনের একটি লক্ষণ,—ভিতর থেকে মহাবায়ু গড়গড় করে উঠে নাথার দিকে যায়। তখন যদি সমাধি হয়, ভগবানের দর্শন হয়।

৮১। ব্যাকুলতার সঙ্গে কাঁদ ; আর বিবেক বৈরাগ্য এনে যদি সর্বত্যাগ করতে পার, তা হলে সাক্ষাৎকার হবে। সে ব্যাকুলতা এলে, উন্মাদের অবস্থা হয়,—তা জ্ঞান-পথেই থাক, আর ভক্তি-পথেই থাক। দুর্বাসার জ্ঞানোন্মাদ হয়েছিল। সংসারীর জ্ঞান আর সর্বত্যাগীর জ্ঞান, অনেক তফাৎ। সংসারীর জ্ঞান, দীপের আলোর গায়, ঘরের ভিতরটি আলো করে ;—নিজের দেহ, ঘরকন্না ছাড়া আর কিছু বুঝতে পারে না। সর্বত্যাগীর জ্ঞান সূর্যের আলোর গায়। সে আলোতে ঘরের ভিতর বা'র সব দেখা যায়। চৈতন্যদেবের জ্ঞান সৌরজ্ঞান,—জ্ঞান-সূর্যের আলো। আবার তাঁর ভিতর ভক্তি-চন্দ্রের শীতল আলোও ছিল। ব্রহ্মজ্ঞান, ভক্তিপ্রেম,—দুইই ছিল।

৮২। দিব্যচক্ষু চাই। মন শুদ্ধ হলেই সেই চক্ষু হয়।

দেখ না, কুমারী পূজা! হাগা মোতা মেয়ে, তাকে ঠিক দেখলুম সাক্ষাৎ ভগবতী। এক দিকে স্ত্রী, এক দিকে ছেলে, দুজনকেই আদর : করছে, কিন্তু ভিন্ন ভাবে। তবেই হলো, মন নিয়ে কথা। শুদ্ধ মনেতে এক ভাব হয়। সেই মনটি পেলে সংসারে ঈশ্বরদর্শন হয়। তবে সাধন চাই।

৮৩। মনেতেই বদ্ধ, মনেতেই মুক্ত। ‘আমি মুক্তপুরুষ। সংসারেই থাকি বা অরণ্যেই থাকি, আমার বন্ধন কি? আমি ঈশ্বরের সন্তান,—রাজাধিরাজের ছেলে! আমায় আবার বাঁধে কে?’ যদি সাপে কামড়ায়, ‘বিষ নাই’ জোর করে বললে বিষ ছেড়ে যায়; তেমনি ‘আমি বদ্ধ নই’, ‘আমি মুক্ত’, এই কথাটি রাখ করে বলতে বলতে তাই হয়ে যায়,—মুক্তই হয়ে যায়।

৮৪। জ্ঞানীর পথ বিচার-পথ। বিচার করতে করতে নাস্তিকভাব হয়ত কখনও কখনও এসে পড়ে। ভক্তের আন্তরিক তাঁকে জানবার ইচ্ছা থাকলে, নাস্তিকভাব এলেও, সে ঈশ্বর-চিন্তা ছেড়ে দেয় না। যার বাপ পিতামহ চাষাগিরি করে এসেছে, হাজা শুকা বৎসরে ফসল না হলেও সে চাষ করে।

৮৫। বেশী বিচার করা ভাল নয়। আগে ঈশ্বর, তার পর জগৎ। তাঁকে লাভ করলে তাঁর জগতের বিষয়ও জানা যায়। যত মল্লিকের সঙ্গে আলাপ করলে তার কত বাড়ী, বাগান, কোম্পানীর কাগজ, সব জানতে পারা যায়। তাই ত

ঋষিরা বাণ্মীকিকে “মরা” “মরা” জপ করতে বললেন। ওর একটু মানে আছে,—“ম” মানে ঈশ্বর, “রা” মানে জগৎ; আগে ঈশ্বর, তারপর জগৎ। তাই আগে বাণ্মীকির মত সব ত্যাগ করে, নির্জনে গোপনে ব্যাকুল হয়ে কেঁদে কেঁদে ঈশ্বরকে ডাকতে হয়। আগে দরকার ঈশ্বর-দর্শন; তারপর বিচার—শাস্ত্র, জগৎ।

৮৬। ‘আমিই সেই’—এ অভিমান ভাল নয়। দেহাত্ম-বুদ্ধি থাকতে যে এ অভিমান করে, তার বিশেষ হানি হয়; এগুতে পারে না, ক্রমে অধঃপতন হয়। পরকে ঠকায়, আবার নিজেকে ঠকায়; নিজের অবস্থা বুঝতে পারে না।

৮৭। ব্রহ্ম সত্য, জগৎ মিথ্যা,—এই বোধ ঠিক হলে মনের লয় হয়,—সমাধি হয়। কিন্তু কলিতে জীব অন্তগত প্রাণ। “ব্রহ্ম সত্য, জগৎ মিথ্যা” কেমন করে বোধ হবে? সে বোধ দেহ-বুদ্ধি না গেলে হয় না। ‘আমি দেহ নই, আমি মন নই, চতুর্বিংশতি তত্ত্ব নই, আমি সুখদুঃখের অতীত, আমার আবার রোগ, শোক, জরা, মৃত্যু কই?’ এ সব বোধ কলিতে হওয়া কঠিন। যতই বিচার কর, কোন্ খান্ থেকে দেহাত্ম-বুদ্ধি এসে দেখা দেয়। অশ্বখ গাছ এই কেটে দাও, মনে করলে মূলশুদ্ধ উঠে গেল। কিন্তু তার পরদিন সকালে দেখ, গাছের একটি ফেঁকুড়ি দেখা দিয়েছে। দেহাভিমান যায় না। তাই ভক্তিযোগ কলির পক্ষে ভাল,—সহজ।

৮৮। অভিমান ত্যাগ করা বড় কঠিন! এই বিচার

করছে, ‘অভিমান কিছু নয়’, আবার কোথা থেকে এসে পড়ে। ছাগলকে কেটে ফেলা গেছে, তবু অঙ্গ প্রত্যঙ্গ নড়ছে। স্বপ্নে ভয় দেখেছ, ঘুম ভেঙ্গে গেল, বেশ জেগে উঠলে; তবু বুক ছুড়ছুড় করে। অভিমান ঠিক সেই রকম; তাড়িয়ে দিলেও আবার কোথা থেকে এসে পড়ে। অমনি মুখ ভার করে বলে, “আমায় খাতির করলে না?”

৮৯। জ্ঞান আর ভক্তি একই জিনিস;—তবে একজন বলছে ‘জল,’ আর একজন ‘জলের খানিকটা চাপ’।

৯০। পূর্ণ জ্ঞান আর পূর্ণ ভক্তি একই। ‘নেতি নেতি’ করে বিচারের শেষ হলে ব্রহ্মজ্ঞান হয়।” তারপর যা ত্যাগ করে গিয়েছিল, তাই আবার গ্রহণ করে। ছাদে উঠবার সময় সাবধানে উঠতে হয়। তারপর দেখে যে, ছাদও যে জিনিসের তৈয়ারী,—ইট, চূণ, শুড়কি,—সিঁড়িও সেই জিনিসে তৈয়ারী। যার উচুবোধ আছে, তার নীচুবোধ আছে। জ্ঞানের পর, উপর নীচে এক বোধ হয়।

৯১। জাগ্রত, স্বপ্ন, সুষুপ্তি;—এই তিন অবস্থা জ্ঞানীরা উড়িয়ে দেয়। ভক্তেরা এ সব অবস্থাই লয়। যতক্ষণ ‘আমি’ আছে, ততক্ষণ সবই আছে। যতক্ষণ ‘আমি’ আছে, ততক্ষণ দেখে যে, তিনিই মায়া, জীব, জগৎ, চতুর্বিংশতি তত্ত্ব,—তিনিই সব হয়েছেন। মায়াবাদ শুকনো।

৯২। বেদান্তবিচারে সংসার মায়াময়,—স্বপ্নের মত, সব মিথ্যা। যিনি পরমাত্মা, তিনি সাক্ষিস্বরূপ,—জাগ্রত, স্বপ্ন,

স্বপ্ন, তিন অবস্থারই সাক্ষিস্বরূপ। স্বপ্নও যত সত্য, জাগরণও সেইরূপ সত্য। এদেশে একটি চাষা থাকে। ভারি জ্ঞানী। চাষবাস করে;—পরিবার আছে, একটি ছেলেও অনেক দিন পরে হয়েছে, নাম হারু। ছেলেটার উপর বাপ, মা দুজনেরই ভালবাসা; কেন না, সবে ধন নীলমণি। চাষীটি ধার্মিক; গাঁয়ের সব লোকেই ভালবাসে। একদিন মাঠে কাজ করছে, এমন সময় একজন এসে খবর দিলে, হারুর কলেরা হয়েছে। চাষাটি বাড়ী গিয়ে অনেক চিকিৎসা করালে; কিন্তু ছেলেটি মারা গেল। বাড়ীর সকলে শোকে কাতর হলো; কিন্তু চাষাটির যেন কিছুই হয় না। উল্টে আবার সকলকে বুঝায় যে, শোক করে কি হবে? তারপর আবার চাষুবাস করতে গেল। বাড়ী ফিরে এসে দেখে, পরিবার আরও কাঁদছে। পরিবার আবার বললে, “তুমি নিষ্ঠুর, ছেলেটার জন্য একবারও কাঁদলে না।” চাষা তখন স্থির হয়ে বললে, “কেন কাঁদছি না বলবো? আমি কাল একটা ভারি স্বপ্ন দেখেছি। দেখলাম যে আমি রাজা হয়েছি, আর আট ছেলের বাপ হয়েছি, আর খুব সুখে আছি। তারপর ঘুম ভেঙে গেল। এখন মহা ভাবনায় পড়েছি,—আমার সেই আট ছেলের জন্য শোক করবো, না তোমার এই এক ছেলে ‘হারুর’ জন্য শোক করবো?” চাষা জ্ঞানী; তাই দেখেছিল, স্বপ্ন অবস্থাও যেমন মিথ্যা, জাগরণ অবস্থাও তেমনি মিথ্যা। এক নিত্য বস্তু সেই আত্মা।

৯৩। আমি সবই লই। তুরীয়,—আবার জাগ্রত, স্বপ্ন, সুষুপ্তি ; আমি তিন অবস্থাই লই। আমি ব্রহ্ম,—আবার মায়া, জীব, জগৎ, সবই লই। সব না নিলে ওজনে কম পড়ে। ব্রহ্ম,—জীব-জগৎ-বিশিষ্ট। প্রথম, 'নেতি নেতি' করবার সময় জীব জগৎকে ছেড়ে দিতে হয়। অহং বুদ্ধি যতক্ষণ, ততক্ষণ তিনিই সব হয়েছেন এই বোধ হয় ;—তিনিই চতুর্বিংশতি তত্ত্ব হয়েছেন। বেলের সার বলতে গেলে শাঁসই বুঝায়, তখন বীচি আর খোলা ফেলে দিতে হয়। কিন্তু বেলটাকত ওজনে ছিল বলতে গেলে, শুধু শাঁস ওজন করলে হবে না। ওজন করবার সময় শাঁস, বীচি, খোলা সব নিতে হবে। যারই শাঁস, তারই বীচি, তারই খোলা। যারই নিত্য, তাঁরই লীলা। তাই আমি নিত্য, লীলা, সবই লই। মায়া বলে জগৎসংসার উড়িয়ে দিই না। তাহলে যে ওজনে কম পড়বে ?

৯৪। জ্ঞানবিজ্ঞানের শেষে সমাধি হলে 'আমি টামি' কিছু থাকে না। কিন্তু সমাধি হওয়া বড় কঠিন। 'আমি' কোনও মতে যেতে চায় না। আর যেতে চায় না বলে, ফিরে ফিরে এই সংসারে আসতে হয়। সমাধির পর কাহারও কাহারও 'আমি' থাকে—'দাস আমি', 'ভক্তের আমি'। 'দাস আমি', 'বিচার আমি', 'ভক্তের আমি',—এরই নাম 'পাকা আমি'। 'কাঁচা আমি' কি জান ? 'আমি কর্তা, আমি এত বড় লোকের ছেলে, আমি বিদ্বান্, আমি ধনবান্, আমাকে এমন কথা বলে ?' এই সব ভাব। ঈশ্বর লাভ হলে পাঁচ বছরের বালকের স্বভাব

হয়। বালক কোনও গুণের বশ নয়। ত্রিগুণাতীত। সত্ত্ব
 রজঃ তমঃ কোনও গুণের বশ নয়। দেখ, ছেলে তমোগুণের
 বশ নয়। এই মাত্র ঝগড়া মারামারি করলে, আবার তৎক্ষণাৎ
 তারই গলা ধরে কত ভাব, কত খেলা। আবার রজোগুণেরও
 বশ নয়। এই খেলা ঘর পাতলে, কত বন্দোবস্ত, আবার
 কিছুক্ষণ পরেই সব পড়ে রইল ; মা'র কাছে ছুটেছে। হয়ত
 একখানি সুন্দর কাপড় পরে বেড়াচ্ছে। খানিকক্ষণ পরে
 কাপড় খুলে পড়ে গেছে ; হয় কাপড়ের কথা একেবারে ভুলে
 গেল,—নয় বগলদাবা করে বেড়াচ্ছে। যদি ছেলোটিকে বল,
 “বেশ কাপড়খানি ! কার কাপড় রে ?” সে বলে, “আমার
 কাপড়, আমার বাবা দিয়েছে।” যদি বল, “লক্ষ্মী ছেলে,
 আমায় কাপড়খানি দাও না ?” সে বলে, “না, আমার কাপড়,
 আমার বাবা দিয়েছে ; না, আমি দোবো না।” তারপর
 ভুলিয়ে একটি পুতুল কি একটি বাঁশি যদি হাতে দাও, তাহলে
 পাঁচটাকা দামের কাপড়খানা তোমায় দিয়ে চলে যাবে। আবার
 পাঁচ বছরের ছেলের সত্ত্বগুণেরও আঁট নাই। এই পাড়ার
 খেলুড়েদের সঙ্গে কত ভালবাসা, একদণ্ড না দেখলে থাকতে
 পারে না। কিন্তু বাপ মা'র সঙ্গে যখন অণু জায়গায়
 চলে গেল, তখন নূতন খেলুড়ে হলো। তাদের উপর তখন সব
 ভালবাসা পড়লো। পুরাণো খেলুড়েদের এক রকম একেবারে
 ভুলে গেল। তারপর জাত্ অভিমান নাই। মা বলে দিয়েছে, “ও
 তোর দাদা হয়।” তা সে ষোল আনা জানে যে, এ আমার ঠিক

লাদা। তা এক জন যদি বামুনের ছেলে হয়, আর একজন যদি কামারের ছেলে হয়, তো এক পাতে বসে ভাত খাবে। আর শুচি অশুচি নাই; হেগো পোঁদে খাবে। আবার লোক-লজ্জা নাই, ছোঁচাবার পর যাকে তাকে পেছন ফিরে বলে,—“দেখ দেখি, আমার ছোঁচান হয়েছে কি না?” আবার ‘বুড়োর আমি’ আছে। বুড়োর অনেকগুলি পাশ। জাতি, অভিমান, লজ্জা, ঘৃণা, ভয়, এই সব। বিষয়বুদ্ধি, পাটোয়ারি, কপটতা। যদি কারুর উপর আকোচ্ হয়, তো সহজে যায় না;—হয়ত যতদিন বাঁচে, ততদিন যায় না। তার পাণ্ডিত্যের অহঙ্কার, ধনের অহঙ্কার, এই সব। বুড়োর আমি ‘কাঁচা আমি’।

৯৫। দয়া সত্ত্বগুণ থেকে হয়। সত্ত্বগুণে পালন, রজোগুণে সৃষ্টি, তমোগুণে সংহার। কিন্তু ব্রহ্ম সত্ত্বরজস্তমঃ তিন গুণের পার,—প্রকৃতির পার।

৯৬। ত্রিগুণাতীত হওয়া বড় কঠিন। ঈশ্বরলাভ না করলে হয় না। জীব মায়ার রাজ্যে বাস করে। এই মায়া ঈশ্বরকে জানতে দেয় না। এই মায়া মানুষকে অজ্ঞান করে রেখেছে।

৯৭। সংসারই অরণ্য। এই বনে সত্ত্বরজস্তমঃ তিন গুণ ডাকাত জীবের তত্ত্বজ্ঞান কেড়ে লয়। তমোগুণ জীবের বিনাশ করতে যায়। রজোগুণ সংসারে বদ্ধ করে। কিন্তু সত্ত্বগুণ রজস্তমঃ থেকে বাঁচায়। সত্ত্বগুণের আশ্রয় পেলে কাম, ক্রোধ, এই সব তমোগুণ থেকে রক্ষা হয়। সত্ত্বগুণ আবার

জীবের সংসার বন্ধন মোচন করে। কিন্তু সত্ত্বগুণও চোর,— তত্ত্বজ্ঞান দিতে পারে না। কিন্তু সেই পরম ধামে যাবার পথে তুলে দেয়। দিয়ে বলে “ঐ দেখ, তোমার বাড়ী দেখ; ঐ দেখা যায়।” যেখানে ব্রহ্মজ্ঞান, সেখান থেকে সত্ত্বগুণও অনেক দূরে। একটি লোক বনের পথ দিয়ে যাচ্ছিল। এমন সময়ে তাকে তিন জন ডাকাত এসে ধরলে। তারা তার সর্বস্ব কেড়ে নিলে। একজন ডাকাত বলে, “আর এ লোকটাকে রেখে কি হবে?” এই কথা বলে কাটতে এল। তখন আর একজন বলে, “না হে, কেটে কি হবে? একে হাত পা বেঁধে এখানে ফেলে যাও।” তখন তাকে হাত পা বেঁধে রেখে চলে গেল। কিছুক্ষণ পরে একজন ফিরে এসে বললে, “আহা, তোমায় কি লেগেছে? এস আমি তোমার বন্ধন খুলে দিই।” তার বন্ধন খুলে দিয়ে ডাকাতটি বলে, “আমার সঙ্গে সঙ্গে এস, তোমায় সদর রাস্তায় তুলে দিচ্ছি।” অনেকক্ষণ পরে সদর রাস্তায় এসে বললে, “এই রাস্তা ধরে যাও, ঐ তোমার বাড়ী দেখা যাচ্ছে।” তখন লোকটি ডাকাতকে বলে, “মশায়, আমার অনেক উপকার করলেন, এখন আপনিও আসুন, আমার বাড়ী পর্য্যন্ত যাবেন।” ডাকাত বলে, “না, আমার ওখানে যাবার যো নাই। পুলিশে টের পাবে।”

৯৮। পঞ্চভূত লয়ে যে দেহ, সেইটি স্কুল দেহ। মন, বুদ্ধি, অহঙ্কার আর চিত্ত, এই লয়ে সূক্ষ্ম শরীর। যে শরীরে ভগবানের আনন্দ লাভ হয়, আর সন্তোষ হয়, সেইটি কারণ

শরীর। তন্নে বলে ‘ভাগবতী তনু’। সকলের অতীত,
“মহাকারণ” (তুরীয়)—মুখে বলা যায় না।

৯৯। শুদ্ধ আত্মা নির্লিপ্ত। আর শুদ্ধ আত্মাকে দেখা যায় না। জলে লবণ মিশ্রিত থাকলে লবণকে চোখের দ্বারা দেখা যায় না। যিনি শুদ্ধাত্মা, তিনি মহাকারণ—কারণের কারণ। স্মুল, সূক্ষ্ম, কারণ ; মহাকারণ। পঞ্চভূত স্মুল। মন, বুদ্ধি, অহঙ্কার সূক্ষ্ম। প্রকৃতি বা আত্মাশক্তি সকলের কারণ। ব্রহ্ম বা শুদ্ধাত্মা কারণের কারণ। এই শুদ্ধ আত্মাই আমাদের স্বরূপ ! জ্ঞান কাকে বলে ? এই স্ব-স্বরূপকে জানা, আর তাঁতে মন রাখা।

১০০। বহির্মুখ অবস্থায় স্মুল দেখে ; অন্তময় কোষে মন থাকে। তার পর সূক্ষ্ম শরীর, লিঙ্গ শরীর,—মনোময় ও বিজ্ঞানময় কোষে মন থাকে। তার পর কারণ শরীর। যখন মন কারণ শরীরে আসে, তখন আনন্দ,—আনন্দময় কোষে মন থাকে। এইটি চৈতন্যদেবের অর্দ্ধবাহ্য দশা। তারপর মন লীন হয়ে যায়। মনের নাশ হয়। মহাকারণে নাশ হয়। মনের নাশ হলে আর খবর নাই। এইটি চৈতন্যদেবের অন্তর্দর্শা। অন্তর্মুখ অবস্থা কি রকম জান ? দয়ানন্দ বলেছিল, “অন্দের এস কপাট বন্ধ ক’রে।” অন্দেরবাড়ীতে যে সে যেতে পারে না। আমি দীপ-শিখাকে নিয়ে আরোপ কর্তুম। লাল্চে রংটাকে বল্তুম “স্মুল”, তার ভিতর সাদা সাদা ভাগটাকে বল্তুম “সূক্ষ্ম”, সব ভিতরে কাল খড়্‌কের মত ভাগটাকে বল্তুম “কারণ শরীর”।

১০১। জ্ঞানীর শরীর যেমন, তেমনি থাকে ; তবে জ্ঞানাগ্নিতে কামাদি রিপু দগ্ধ হয়ে যায় ।

১০২। আপনার ভিতর আপনাকে দেখতে পেলে ত সব হয়ে গেল । এই দেখতে পাবার জন্মই সাধনা । ঐ সাধনার জন্মই শরীর । যতক্ষণ না স্বর্ণপ্রতিমা ঢালাই হয়, ততক্ষণ মাটির ছাঁচের দরকার । প্রতিমা হয়ে গেলে, মাটির ছাঁচটা ফেলে দেওয়া যায় । তিনি শুধু অন্তরে নয়, অন্তরে বাহিরে । কালীঘরে মা আমাকে দেখালেন, সবই চিন্ময় । মাই সব হয়েছেন,—প্রতিমা, আমি, কোশাকুশী, চুম্বকী, চৌকাট, মার্বেল পাথর,—সব চিন্ময় । এইটি সাক্ষাৎকার করবার জন্মই তাঁকে ডাকা,—সাধন, ভজন, তাঁর নাম-গুণ-কীর্তন । এইটির জন্মই তাঁকে ভক্তি করা দরকার ।

১০৩। আনন্দ তিন প্রকার ;—বিষয়ানন্দ, ভজনানন্দ ও ব্রহ্মানন্দ । যা সবাই নিয়ে আছে—কামিনী-কাঞ্চনের আনন্দ, তার নাম বিষয়ানন্দ । ঈশ্বরের নাম গুণ গান করে যে আনন্দ, তার নাম ভজনানন্দ । আর ভগবান্ দর্শনের যে আনন্দ, তার নাম ব্রহ্মানন্দ । ব্রহ্মানন্দ লাভের পর ঋষিদের স্বেচ্ছাচার হয়ে যেতো । চৈতন্যদেবের তিন রকম অবস্থা হতো,—অন্তর্দর্শা, অর্দ্ধবাহ্য দশা ও বাহ্য দশা । অন্তর্দর্শায় ভগবান্ দর্শন করে সমাধিস্থ হতেন,—জড় সমাধির অবস্থা হতো । অর্দ্ধবাহ্যে একটু বাহিরের হুঁস্ থাকতো । বাহ্য দশায় নাম গুণ কীর্তন করতে পারতেন ।

১০৪। ঈশ্বর দর্শন হচ্ছে কি না, তার লক্ষণ আছে। একটি লক্ষণ আনন্দ। সঙ্কোচ থাকে না। যেমন সমুদ্র, উপরে হিল্লোল, নীচে গভীর জল।

১০৫। ঈশ্বর লাভ করলে তাঁর বাহিরের ঐশ্বর্য, তাঁর জগতের ঐশ্বর্য ভুল হয়ে যায়। তাঁকে দেখলে তাঁর ঐশ্বর্য মনে থাকে না। ঈশ্বরের আনন্দে মগ্ন হয়ে ভক্তের আর হিসাব থাকে না। হনুমানকে একজন জিজ্ঞাসা করেছিল, “আজ কি তিথি ?” হনুমান বলে, “ভাই, আমি বার, তিথি, নক্ষত্র, এ সব জানি না। আমি এক রাম চিন্তা করি।”

১০৬। শিব-অংশে জন্মালে জ্ঞানী হয় ; ব্রহ্ম সত্য, জগৎ মিথ্যা, এই বোধের দিকে মন সর্বদা যায়। বিষ্ণু-অংশে জন্মালে প্রেম ভক্তি হয়। সে প্রেম ভক্তি যাবার নয়। জ্ঞান-বিচারের পর এই প্রেম ভক্তি যদি কমে যায়, আবার এক সময়ে হু হু করে বেড়ে যায় ; যত্বংশ ধ্বংস করেছিল মৃগল, তারই মত।

১০৭। জ্ঞানীর পথও পথ, জ্ঞান ভক্তির পথও পথ। আবার ভক্তির পথও পথ। জ্ঞান যোগও সত্য, ভক্তি পথও সত্য। সব পথ দিয়ে তাঁর কাছে যাওয়া যায়। তিনি যতক্ষণ ‘আমি’ রেখে দেন, ততক্ষণ ভক্তি পথই সোজা।

১০৮। এই কয় জনের জ্ঞান হয় না ;—(১) যার বাঁকা মন, সরল নয় ; (২) যার শুচিবাই ; (৩) যারা সংশয়ান্বিত। আরও কয় জনের জ্ঞান হয় না। যার বিচার অহঙ্কার, যার

পাণ্ডিত্যের অহঙ্কার, যার ধনের অহঙ্কার,—তার জ্ঞান হয় না।

১০৯। জ্ঞান লাভের অধিকারী বড়ই কম। গীতায় বলেছে,—হাজার হাজার লোকের ভিতর একজন তাঁকে জানতে ইচ্ছা করে। আবার যারা জানতে ইচ্ছা করে, সেইরূপ হাজার লোকের ভিতর একজন জানতে পারে।

১১০। বিষয় বুদ্ধির লেশ থাকলে এই ব্রহ্মজ্ঞান হয় না। কামিনী-কাঞ্চন মনে আদৌ থাকবে না, তবে হবে। গিরিরাজকে পার্বতী বল্লেন, “বাবা, ব্রহ্মজ্ঞান যদি চাও, তা হলে সাধু সঙ্গ কর।”

১১১। টাকা থাকলেই বড় মানুষ হয় না। বড় মানুষের বাড়ীর একটা লক্ষণ যে, সব ঘরে আলো থাকে। গরীবেরা তেল খরচ করতে পারে না; তাই তত আলোর বন্দাবস্ত করে না। এই দেহ মন্দির অন্ধকারে রাখতে নাই; জ্ঞান দীপ জ্বলে দিতে হয়।

১১২। যারা অজ্ঞান, ঈশ্বরকে মানে না অথচ সংসারে আছে, তারা যেন মাটির ঘরের ভিতর বাস করে। ক্ষীণ আলোতে শুধু ঘরের ভিতরটি দেখতে পায়। কিন্তু যারা জ্ঞান লাভ করেছে, ঈশ্বরকে জেনেছে তারপর সংসারে আছে, তারা যেন সাসির ঘরের ভিতর বাস করে,—ঘরের ভিতরও দেখতে পায়, ঘরের বাহিরের জিনিসও দেখতে পায়। জ্ঞান-সূর্যের আলো ঘরের ভিতরে খুব প্রবেশ করে। সে ব্যক্তি ঘরের

ভিতরের জিনিস খুব স্পষ্টরূপে দেখতে পায়,—কোনটি ভাল, কোনটি মন্দ ; কোনটি নিত্য, কোনটি অনিত্য ।

১১৩। ঈশ্বর সৎ, আর সব অসৎ, এই বিচার । ‘সৎ’ মানে ‘নিত্য’ । ‘অসৎ’,—‘অনিত্য’ । যার বিবেক হয়েছে, সে জানে ঈশ্বরই বস্তু, আর সব অবস্তু । বিবেক উদয় হলে ঈশ্বরকে জানবার ইচ্ছা হয় ; অসৎকে ভাল বাসলে,—যেমন দেহসুখ, লোকমান্য, টাকা, এই সব ভাল বাসলে,—ঈশ্বর, যিনি সৎস্বরূপ, তাঁকে জানতে ইচ্ছা হয় না । সদসৎ বিচার এলে, তবে ঈশ্বরকে খুঁজতে ইচ্ছা করে । মনে নিবৃত্তি এলে তবে বিবেক হয় ; বিবেক হলে তবে তত্ত্ব কথা মনে উঠে ।

কৰ্মযোগ ।

১। কৰ্ম চাই, তবে দৰ্শন হয় । একদিন ভাবে হালদার পুকুর দেখলুম । দেখি, একজন ছোটলোক পানা ঠেলে জল নিচ্ছে, আর হাতে তুলে এক একবার দেখছে ;—যেন দেখালে, পানা না ঠেলে জল দেখা যায় না । কৰ্ম না করলে ভক্তি লাভ হয় না, ঈশ্বর দৰ্শন হয় না । ধ্যান, জপ, এই সব কৰ্ম ; তাঁর নামগুণ-কীর্তনও কৰ্ম ; দান, যজ্ঞ, এই সবও কৰ্ম । মাখন যদি চাও, তবে দুধকে দই পাততে হয় ; তারপর নিৰ্জ্জনে রাখতে হয় ; তারপর দই বস্লে পরিশ্রম করে মগ্নন করতে হয় ; তবে মাখন তোলা হয় ।

২। কৰ্ম চাই । ঈশ্বর আছেন ব'লে বসে থাকলে হবে না ; যো সো ক'রে তাঁর কাছে যেতে হবে । নিৰ্জ্জনে তাঁকে ডাক, প্রার্থনা কর—দেখা দাও ব'লে । ব্যাকুল হয়ে কাঁদ ; কামিনী-কাঞ্চনের জন্তু পাগল হয়ে বেড়াতে পার, তাঁর জন্তু একটু পাগল হও । লোকে বলুক, যে ঈশ্বরের জন্তু অমুক পাগল হয়ে গেছে । দিন কতক না হয় সব ত্যাগ করে, তাঁকে একলা ডাক । শুধু তিনি আছেন ব'লে বসে থাকলে কি হবে ?

৩। সংসারের কর্ম, বিষয়কর্ম, তাও করবে ; সংসার-যাত্রার জন্য যেটুকু দরকার । কিন্তু কেঁদে নির্জনে তাঁর কাছে প্রার্থনা করতে হবে, যাতে ঐ কর্মগুলি নিষ্কামভাবে করা যায় ; আর বলবে “হে ঈশ্বর, আমার বিষয়কর্ম কমিয়ে দাও । কেন না, ঠাকুর দেখছি যে, বেশী কর্ম জুটলে তোমায় ভুলে যাই ।” মনে করছি, নিষ্কাম কর্ম করছি, কিন্তু সকাম হয়ে পড়ে । হয়তো দান, সদাব্রত বেশী করতে গিয়ে লোক-মাণ্য হতে ইচ্ছা হয়ে পড়ে । সম্মুখে যেটা পড়লো, না করলে নয়, সেইটাই নিষ্কাম হয়ে করতে হয় । ইচ্ছা করে বেশী কাজ জড়ানো ভাল নয়, ঈশ্বরকে ভুলে যেতে হয় । কালীঘাটে দানই করতে লাগলো, কালীদর্শন আর হ’ল না । আগে যো সো করে ধাক্কা ধুকি খেয়েও কালীদর্শন করতে হয় ; তারপর দান যত কর আর না কর ; ইচ্ছা হয়, খুব কর । ঈশ্বরলাভের জন্যই কর্ম ।

৪। যতদিন সংসারে ভোগ করবার ইচ্ছা থাকে, ততদিন কর্মত্যাগ করতে পারে না । যতক্ষণ ভোগের আশা, ততক্ষণ কর্ম ।

৫। মনোযোগ ও কর্মযোগ । পূজা, তীর্থ, জীবসেবা । এ সব গুরু-উপদেশে কর্ম করার নাম কর্মযোগ । জনকাদি যা কর্ম করতেন, তার নামও কর্মযোগ । যোগীরা যে স্মরণ, মনন করেন, তার নাম মনোযোগ ।

৬। জীবনের উদ্দেশ্য ঈশ্বরলাভ । কর্ম ত আদিকাণ্ড ;

জীবনের উদ্দেশ্য হতে পারে না। তবে নিষ্কাম কর্ম,—একটি উপায়,—উদ্দেশ্য নয়।

৭। কর্মকাণ্ড হচ্ছে আদিকাণ্ড। সত্ত্বগুণ,—ভক্তি, বিবেক, বৈরাগ্য, দয়া, এই সব,—না হলে ঈশ্বরকে পাওয়া যায় না। রজোগুণে কাজের আড়ম্বর হয়; তাই রজোগুণ থেকে তমোগুণ এসে পড়ে। বেশী কাজ জড়ালেই ঈশ্বরকে ভুলিয়ে দেয়, আর কামিনী-কাঞ্চনে আসক্তি বাড়ে। তবে কর্ম একেবারে ত্যাগ করবার যো নাই; তোমার প্রকৃতিতে তোমায় কর্ম করাবে, তা তুমি ইচ্ছা কর, আর নাই কর। তাই বলেছে, অনাসক্ত হয়ে কর্ম কর। অনাসক্ত হয়ে কর্ম করা,—কিনা কর্মের ফল আকাঙ্ক্ষা করবে না। যেমন পূজা, জপ, তপ করছো, কিন্তু লোকমাণ্য হবার জন্য নয়, কিংবা পুণ্য করবার জন্য নয়। এরূপ অনাসক্ত হয়ে কর্ম করার নাম কর্মযোগ। ভারি কঠিন। একে কলিযুগ, সহজেই আসক্তি এসে যায়। মনে করছি, অনাসক্ত হয়ে কর্ম করছি, কিন্তু কোন্‌দিক দিয়ে আসক্তি এসে যায়, জানতে দেয় না। হয়ত পূজা, মহোৎসব করলুম, কি অনেক গরিব কাঙ্গালের সেবা করলুম,—মনে করলুম যে অনাসক্ত হয়ে করেছি; কিন্তু কোন্‌ দিক দিয়ে লোকমাণ্য হবার ইচ্ছা হয়েছে জানতে দেয় না। তবে একবারে অনাসক্ত হওয়া সম্ভব কেবল তাঁর, যার ঈশ্বর-দর্শন হয়েছে।

৮। এটি যেন মনে থাকে যে, 'তোমার মানব জন্মের

ঐদ্দেশ্যে ঈশ্বরলাভ ;—হাঁসপাতাল, ডিস্পেন্‌সারি করা নয় । মনে কর, ঈশ্বর তোমার সামনে এলেন । এসে বললেন, “তুমি বর লও ।” তা হ’লে তুমি কি বলবে, “আমায় কতক-গুলো হাঁসপাতাল, ডিস্পেন্‌সারি করে দাও” ; না বলবে, “হে ভগবান্, তোমার পাদপদ্মে যেন আমার শুদ্ধাভক্তি হয়, আর যেন তোমাকে আমি সর্বদা দেখতে পাই ?” হাঁসপাতাল, ডিস্পেন্‌সারি এ সব অনিত্য বস্তু ; তাঁকে লাভ হলে তাঁর ইচ্ছায় অনেক হাঁসপাতাল, ডিস্পেন্‌সারি হ’তে পারে ।

৯ । সংসারীলোক শুদ্ধ ভক্ত হ’লে অনাসক্ত হয়ে কৰ্ম্ম করে । কৰ্ম্মের ফল,—লাভ, লোকসান, সুখ, দুঃখ,—ঈশ্বরকে সমর্পণ করে ; আর তাঁর কাছে রাতদিন ভক্তি প্রার্থনা করে, আর কিছু চায় না । এরই নাম নিষ্কাম কৰ্ম্ম,—অনাসক্ত হ’য়ে কৰ্ম্ম করা । সন্ন্যাসীরও সব কৰ্ম্ম নিষ্কাম করতে হয় । তবে সন্ন্যাসী বিষয়কৰ্ম্ম সংসারীদের মত করে না । সংসারী ব্যক্তি নিষ্কামভাবে যদি কাউকে দান করে, সে নিজের উপকারের জন্ত,—পরোপকারের জন্ত নয় । সর্বভূতে হরি আছেন, তাঁরই সেবা করা হয় । হরি-সেবা হলে নিজেরই উপকার হ’লো, পরোপকার নয় । এই সর্বভূতে হরির সেবা,—শুধু মানুষের নয়, জীবজন্তুর মধ্যেও হরির সেবা,—যদি কেউ করে, আর যদি সে মান চায় না, যশ চায় না, মরবার পর স্বর্গ চায় না, যাদের সেবা করছে, তাদের কাছ থেকে উল্টে কোনও উপকার চায় না, এরূপ ভাবে যদি সেবা করে,

তাহলে তার যথার্থ নিষ্কাম কর্ম, অনাসক্ত কর্ম করা হয়। এইরূপ নিষ্কাম কর্ম করলে, তার নিজের কল্যাণ হয়। এরই নাম কর্মযোগ। এই কর্মযোগও ঈশ্বরলাভের একটি পথ।

১০। যে অনাসক্ত হয়ে এরূপ কর্ম করে,—দয়া, দান করে,—সে নিজেরই মঙ্গল করে। পরের উপকার, পরের মঙ্গল, সে ঈশ্বর করেন,—যিনি চন্দ্র, সূর্য্য, বাপ, মা, ফল, ফুল, শস্য জীবের জন্ম করেছেন। বাপ মার ভিতর যা স্নেহ দেখ, সে তাঁরই স্নেহ,—জীবের রক্ষার জন্মই দিয়েছেন। দয়ালুর ভিতর যা দয়া দেখ, সে তাঁরই দয়া, নিঃসহায় জীবের রক্ষার জন্ম দিয়েছেন। তুমি দয়া কর, আর না কর, তিনি কোনও না কোন সূত্রে তাঁর কাজ করবেন ; তাঁর কাজ আটকে থাকে না। জগতের দুঃখনাশ তুমি করবে ? জগৎ কি এতটুকু ? বর্ষাকালে গঙ্গায় কাঁকড়া হয় জান ? এইরূপ অসংখ্য জগৎ আছে। এই জগতের পতি যিনি, তিনি সকলের খবর নিচ্ছেন। তাঁকে আগে জানা,—এই জীবনের উদ্দেশ্য। তারপর যা হয় করো।

১১। তিনি সব করাচ্ছেন বটে ; তিনিই কর্তা, মানুষ যন্ত্রের স্বরূপ। অবশ্য এও ঠিক যে কর্মফল আছেই আছে। লক্ষা মরিচ খেলেই পেট জ্বালা করবে। তিনিই বলে দিয়েছেন যে, খেলে পেট জ্বালা করবে। পাপ করলেই তার ফলটি পেতে হবে। পাপ আর পারা কেউ হজম করতে

পারে না। যদি কেউ লুকিয়ে পারা খায়, তাহলে কোন দিন না কোন দিন গায়ে ফুটে বেরোবে। যে ব্যক্তি সিদ্ধিলাভ করেছে, যে ঈশ্বরদর্শন করেছে, সে কিন্তু পাপ করতে পারে না। সাধা লোকের বেতালে পা পড়ে না। যার সাধা গলা, তার সুরেতে সা রে গা মাই এসে পড়ে।

১২। ঈশ্বরের নিয়ম যে, পাপ করলে তার ফল পেতে হবে। লক্ষা খেলে তার ঝাল লাগবে না? সেজোবাবু বয়সকালে অনেক রকম করেছিল, তাই মৃত্যুর সময় নানা-রকম অসুখ হ'লো। কম বয়সে এত টের পাওয়া যায় না। কালীবাড়ীতে ভোগ রাঁধবার অনেক সুন্দরী কাঠ থাকে। ভিজ কাঠ প্রথমটা বেশ জ্বলে যায়; তখন ভিতরে যে জল আছে, টের পাওয়া যায় না। কাঠটা পোড়া শেষ হলে যত জল পিছনে ঠেলে আসে, ও ফ্যাচ্ ফোচ্ করে উলুন নিবিয়ে দেয়। তাই কাম, ক্রোধ, লোভ, এ সব থেকে সাবধান হতে হয়। দেখ না, হনুমান ক্রোধ করে লক্ষা দগ্ন করেছিল, শেষে মনে পড়লো, অশোকবনে সীতা আছেন। তখন ছটফট করতে লাগলো, পাছে সীতার কিছু হয়।

১৩। যতক্ষণ বাসনা থাকে, ততক্ষণ কৰ্ম থাকে : আর কৰ্মের দরুণ ভাবনা, চিন্তা, অশান্তি। বাসনা ত্যাগ হলেই কৰ্মক্ষয় হয়, আর শান্তি হয়। তবে নিষ্কাম কৰ্ম ভাল; তাতে অশান্তি হয় না। কিন্তু নিষ্কাম করা ভারি কঠিন। আগে যদি অনেক সাধন থাকে, সাধনের বলে কেউ কেউ

নিষ্কাম কৰ্ম করতে পারে। ঈশ্বর-দর্শনের পর নিষ্কাম কৰ্ম অনায়াসে করা যায়। ঈশ্বর-দর্শনের পর প্রায় কৰ্মত্যাগ হয়। দু' একজন (নারদাদি) লোকশিক্ষার জন্য কৰ্ম করে।

১৪। ভোগের শান্তি না হলে বৈরাগ্য হয় না। ছোট ছেলেকে খাবার আর পুতুল দিয়ে বেশ ভুলান' যায়; কিন্তু যখন খাওয়া হয়ে গেল, আর পুতুল নিয়ে খেলা হয়ে গেল, তখন 'না যাব' বলে। মার কাছে নিয়ে না' গেলে পুতুল ছুড়ে ফেলে দেয়, আর চীৎকার করে কাঁদে।

১৫। কৰ্ম ভাল। জমি পাট করা হলে যা রুইবে, তাই জন্মাবে। তবে কৰ্ম নিষ্কামভাবে করতে হয়।

১৬। তুমি জপ, আহ্নিক, উপবাস, পুরশ্চরণ, এই সব কৰ্ম করছো, তা বেশ। যার আন্তরিক ঈশ্বরের উপর টান থাকে, তাকে দিয়ে তিনি এই সব কৰ্ম করিয়ে লন। ফল-কামনা না করে এই সব কৰ্ম করে যেতে পারলে, নিশ্চিত তাঁকে লাভ হয়।

১৭। জপ থেকে ঈশ্বরলাভ হয়। নিজে, গোপনে তাঁর নাম করতে করতে তাঁর কৃপা হয়, তারপর দর্শন হয়; যেমন জলের ভিতর ডুবানো বাহাছুরি কাঠ আছে, তীরেতে শিকল দিয়ে বাঁধা। সেই শিকলের এক এক পাপ্ ধরে ধরে গেলে, শেষে বাহাছুরি কাঠকে স্পর্শ করা যায়।

১৮। তা সংসারে আছ, থাকলেই বা। কিন্তু কৰ্মফল সমস্ত ঈশ্বরকে সমর্পণ করতে হবে; নিজে কোনও ফল

কাঙ্ক্ষনা করতে নাই। তবে একটা কথা আছে, ভক্তি-কামনা কামনার মধ্যে নয়। ভক্তি-কামনা, ভক্তিপ্রার্থনা করতে পার। ভক্তির তমঃ আনবে, মার কাছে জোর কর। তোমার যে আপনার মা গো! এ কি পাতানো মা? এ কি ধর্ম মা? এতে জোর চলবে না ত কিসে জোর চলবে? আপনার মা, জোর কর। যার যাতে সত্ত্বা থাকে, তার তাতে টানও থাকে। মার সত্ত্বা আমার ভিতর আছে বলে, তাই ত মার দিকে অত টান হয়। যে ঠিক শৈব, সে শিবের সত্ত্বা পায়, কিছু কণা তার ভিতর এসে পড়ে। যে ঠিক বৈষ্ণব, তার নারায়ণের সত্ত্বা ভিতরে আসে।

১৯। অন্তরে কি আছে জানবার জন্য একটু সাধন চাই। প্রথমটা একটু উঠে পড়ে লাগতে হয়; তার পর আর বেশী পরিশ্রম করতে হবে না। যতক্ষণ চেউ, ঝড়, তুফান থাকে, আর বাঁকের কাছ দিয়ে যেতে হয়, ততক্ষণ মাঝির দাঁড়িয়ে হাল ধরতে হয়। সেইটুকু পার হয়ে গেলে আর না। যদি বাঁক পার হ'লো, আর অনুকূল হাওয়া বইল, তখন মাঝি আরাম করে ব'সে হালে হাতটা ঠেকিয়ে রাখে; তার পর পাল টাঙ্গাবার বন্দোবস্ত ক'রে তামাক সাজতে বসে। কামিনী-কাঞ্চনের ঝড়, তুফানগুলো কাটিয়ে গেলে তখন শান্তি।

২০। সাধনের খুব দরকার। ফস্ ক'রে কি আর ঈশ্বর-দর্শন হয়? একজন জিজ্ঞাসা করলে, “কই, ঈশ্বরকে দেখতে পাই না কেন?” তা মনে উঠলো, বললুম, “বড় মাছ ধরবে,

তার আয়োজন কর, চার কর, হাতসুতো, ছিপ্ এ সব যোগ্য কর ; গন্ধ পেয়ে গভীর জল থেকে মাছ আসবে। তখন জল নড়লে টের পাবে বড় মাছ এসেছে। ‘ঈশ্বর আছেন,’ ‘ঈশ্বর আছেন’ বললে কি ঈশ্বরকে দেখা যায়? সাধন চাই। নিজে ভগবতী পঞ্চমুণ্ডীর উপব বসে কাঠের তপস্যা করেছিলেন,—লোকশিক্ষার জন্য। শ্রীকৃষ্ণ সান্ধাৎ পূর্ণব্রহ্ম। তিনিও রাধাযন্ত্র কুড়িয়ে পেয়ে লোকশিক্ষার জন্য তপস্যা করেছিলেন।”

২১। সাধন করে আরও এগিয়ে পড়। সাধন করতে করতে আরও এগিয়ে পড়লে শেষে জানতে পারবে যে, ঈশ্বরই বস্তু, আর সব অবস্তু, ঈশ্বরলাভই জীবনের উদ্দেশ্য। একজন কাঠুরে বনে কাঠ কাটতে গিয়েছিল। হঠাৎ এক ব্রহ্মচারীর সঙ্গে দেখা হলো। ব্রহ্মচারী বল্লেন, “ওহে এগিয়ে পড়।” কাঠুরে বাড়ীতে ফিরে এসে ভাবতে লাগলো, ব্রহ্মচারী এগিয়ে যেতে বল্লেন কেন? এই রকমে কিছুদিন যায়। একদিন সে বসে আছে, এমন সময় এই ব্রহ্মচারীর কথাগুলি মনে পড়লো। তখন সে মনে মনে বল্লেন, “আজ আমি আরও এগিয়ে যাব।” বনে গিয়ে আরও এগিয়ে ছাখে যে, অসংখ্য চন্দনের গাছ। তখন আনন্দে গাড়ি গাড়ি চন্দনের কাঠ নিয়ে এলো, আর বাজারে বেচে খুব বড় মানুষ হয়ে গেল। এই রকমে কিছুদিন যায়। আর একদিন মনে পড়লো, ব্রহ্মচারী বলেছেন, “এগিয়ে পড়।” তখন আবার বনে গিয়ে এগিয়ে

দুঃখে, নদীর ধারে রূপোর খনি। একথা সে কখনও স্বপ্নেও ভাবে নাই। তখন খনি থেকে কেবল রূপো নিয়ে গিয়ে বিক্রী করতে লাগলো। এত টাকা হলো যে আঙুল হয়ে গেল। আবার কিছুদিন যায়। একদিন বসে ভাবছে, “ব্রহ্মচারী ত আমাকে রূপোর খনি পর্য্যন্ত যেতে বলেন নাই, তিনি যে আমাকে এগিয়ে যেতে বলেছেন।” এবার নদীর পারে গিয়ে ছাখে, সোনার খনি। তখন সে ভাবলে, “ওহো, তাই ব্রহ্মচারী বলেছিলেন, ‘এগিয়ে পড়’।” আবার কিছুদিন পরে, এগিয়ে ছাখে,—হীরে, মাণিক রশ্মিকৃত পড়ে আছে। তখন তার কুবেরের ঐশ্বর্য হলো। তাই বলছি যে যা কিছু কর না কেন, এগিয়ে গেলে আরও ভাল জিনিস পাবে। একটু জঁপ ক’রে উদ্দীপন হয়েছে বলে মনে করো না, যা হবার তা হয়ে গেছে। কর্ম কিছু জীবনের উদ্দেশ্য নয়। আরও এগোও ; তাহলে কর্ম নিষ্কাম করতে পারবে। তবে নিষ্কাম কর্ম বড় কঠিন। তাই ভক্তি ক’রে, ব্যাকুল হয়ে তাঁকে প্রার্থনা কর, “হে ঈশ্বর, তোমার পাদপদ্মে ভক্তি দাও, আর কর্ম কমিয়ে দাও ; আর যেটুকু রাখবে, সেটুকু কর্ম যেন নিষ্কাম হয়ে করতে পারি।” আরও এগিয়ে গেলে ঈশ্বরকে লাভ হবে, তাঁকে দর্শন হবে, ক্রমে তাঁর সঙ্গে আলাপ, কথাবার্তা হবে।

২২। নিষ্কাম কর্ম করতে পারলে ঈশ্বরে ভালবাসা হয়। ক্রমে তাঁর কৃপায় তাকে পাওয়া যায়। ঈশ্বরকে দেখা যায়,

আবার তাঁর সঙ্গে কথা কওয়া যায়, যেমন আমি তোমার সঙ্গে কথা কচ্ছি।

২৩। কি জান ? ডিমের ভিতর ছানা বড় না হলে পাখী ঠোকরায় না। সময় হলেই পাখী ডিম ফুটায়। তবে একটু সাধনা করা দরকার। গুরুই সব করেন, তবে শেষটা একটু সাধনা করিয়ে লন। বড় গাছ কাটবার সময় প্রায় সবটা কাটা হলে পর, একটু সরে দাঁড়াতে হয় ; তারপর গাছটা মড়মড় করে আপনি ভেঙ্গে পড়ে। যখন খাল কেটে জল আনে, আর একটু কাটলেই নদীর সঙ্গে যোগ হয়ে যাবে, তখন যে কাটে, সে সরে দাঁড়ায়। তখন মাটিটা ভিজে আপনিই পড়ে যায়, আর নদীর জল হুড়হুড় করে খালে আসে।

২৪। সাধনা করতে করতে তাঁর কৃপায় সিদ্ধ হয়। একটু খাটা চাউ। তার পরেই দর্শন ও আনন্দলাভ। অমুক জায়গায় সোনার কলসী পোঁতা আছে,—শুনে লোক ছুটে যায়, আর খুঁড়তে আরম্ভ করে। খুঁড়তে খুঁড়তে মাথার ঘাম পড়ে। অনেক খোঁড়ার পর এক জায়গায় কোদালে ঠং করে শব্দ হ'লো। কোদাল ফেলে দ্যাখে, কলসী বেরিয়েছে কি না। কলসী দেখে নাচতে থাকে। কলসী বা'র ক'রে মোহর ঢেলে হাতে ক'রে গণে,—আর খুব আনন্দ। দর্শন, স্পর্শন, সন্তোষ ! কেমন ?

২৫। কর্মযোগে কতকগুলি শক্তি হয়,—সিদ্ধাই হয়।

১৬। কৃষ্ণ অর্জুনকে বলেছিলেন, “ভাই, যদি দেখে যে
সিদ্ধির একটি সিদ্ধি কারও আছে, তাহলে জেনো যে,
সে ব্যক্তি আমাকে পাবে না। কেন না, সিদ্ধাই থাকলেই
অহঙ্কার থাকবে; আর অহঙ্কারের লেশ থাকলে, ভগবানকে
পাওয়া যায় না।

২৭। ঈশ্বরের প্রতি প্রেম এলে কর্মত্যাগ আপনিই হয়ে
যায়। যাদের ঈশ্বর কর্ম করচ্ছেন, তারা করুক।

১৮। যখন একবার ‘হরি’ বা একবার ‘রাম’ নাম করলে
রোমাঞ্চ হয়, অশ্রুপাত হয়, তখন নিশ্চয়ই জেনো যে, সন্ধ্যাদি
কর্ম আর করতে হবে না। তখন কর্মত্যাগের অধিকার
হয়েছে। কর্ম আপনা আপনি ত্যাগ হয়ে যাচ্ছে। তখন
কেবল রামনাম কি হরিনাম, কি শুদ্ধ ওঁকার জপলেই হ’লো।
সন্ধ্যা গায়ত্রীতে লয় হয়, গায়ত্রী আবার ওঁকারে লয় হয়।
প্রণব সমাপিতে লয় হয়। যেমন ঘণ্টার শব্দ টং—ট—অম্।
যোগী নাদ ভেদ করে পরব্রহ্মে লয় হন। সমাধি মধ্যে
সন্ধ্যাদি কর্মের লয় হয়। এই রকমে জ্ঞানীদের কর্মত্যাগ
হয়।

১৯। পূজা, হোম, যাগ, যজ্ঞ কিছুই কিছু নয়। যদি
তার উপর ভালবাসা আসে, তাহলে আর এ সব কর্মের বেশী
দরকার নাই। যতক্ষণ হাওয়া পাওয়া না যায়, ততক্ষণই
পাথার দরকার। যদি দক্ষিণে হাওয়া আপনি আসে, তা
হলে পাথা রেখে দেওয়া যায়; আর পাথার কি দরকার?

৩০। ফল হ'লেই ফুল প'ড়ে যায়। ভক্তি—ফল ; কর্ম—ফুল। গৃহস্থের বৌ পেটে ছেলে হ'লে বেশী কর্ম করতে পারে না। শাশুড়ী দিন দিন তার কর্ম কমিয়ে দেয়। দশমাস পড়লে, শাশুরী প্রায় কর্ম করতে দেয় না। ছেলে হ'লে সে ঐটিকে নিয়ে কেবল নাড়াচাড়া করে ; আর কর্ম করতে হয় না।

৩১। সমাপ্তি হ'লে সব কর্মত্যাগ হয়ে যায়। পূজা, জপাদি কর্ম, বিষয় কর্ম, সব ত্যাগ হয়। প্রথমে কর্মের বড় হৈ চৈ থাকে। যত ঈশ্বরের দিকে এগুবে, ততই কর্মের আড়ম্বর কমে। এমন কি, তাঁর নামগুণগান পর্যন্ত বন্ধ হয়ে যায়।

ভক্তির্যোগ ।

১ । কলিযুগের পক্ষে নারদীয় ভক্তি । শাস্ত্রে যে সকল কৰ্মের কথা আছে, তার সময় কে ? আজকালকার জ্বরে দশমূল পাঁচন চলে না । দশমূল পাঁচন দিতে গেলে রোগীর এদিকে হয়ে যায় ! আজকাল ফিভার মিক্‌চার । কৰ্ম করতে যদি বল, ত নেজা মুড়া বাদ দিয়ে বলবে । আমি লোকদের বলি, তোমাদের “আপোধন্যাত্মা” ও সব অত বলতে হবে না । তোমাদের গায়ত্রী জপলেই হবে ।

২ । আবার জ্ঞানযোগও এ যুগে ভারি কঠিন । জীবের একে অল্পগত প্রাণ, তাতে আবার আয়ু কম, তার পর আবার দেহবুদ্ধি কোন মতে যায় না । এদিকে দেহবুদ্ধি না গেলে একেবারে জ্ঞানই হবে না । এ যুগের পক্ষে ভক্তির্যোগ । এতে অন্যান্য পথের চেয়ে সহজে ঈশ্বরের কাছে যাওয়া যায় । জ্ঞানযোগ বা কৰ্মযোগ আর অন্যান্য পথ দিয়েও ঈশ্বরের কাছে যাওয়া যেতে পারে । কিন্তু এ সব পথ ভারি কঠিন । ভক্তির্যোগ যুগধৰ্ম,—তার এ মানে নয় যে, তত্ত্ব এক জায়গায় যাবে, জ্ঞানী বা কৰ্মী তার এক জায়গায় যাবে । এর মানে ঐহিক ব্রহ্মজ্ঞান চান, তিনি যদি ভক্তিপথ ধরেও যান, তা



হ'লেও সেই জ্ঞানলাভ করবেন। ভক্তবৎসল মনে করলেই ব্রহ্মজ্ঞান দিতে পারেন।

৩। ভক্তিযোগে সব পাওয়া যায়। আমি মা'র কাছে কেঁদে কেঁদে ব'লেছিলাম, “মা, যোগীরা যোগ ক'রে যা জেনেছে, জ্ঞানীরা বিচার ক'রে যা জেনেছে, আমাদের জানিয়ে দাও,—আমায় দেখিয়ে দাও।” মা আমায় সব দেখিয়ে দিয়েছেন। ব্যাকুল হ'য়ে তাঁর কাছে কাঁদলে তিনি সব জানিয়ে দেন। বেদ, বেদান্ত, পুরাণ, তন্ত্র,—এ সব শাস্ত্রে কি আছে, সব তিনি আমায় জানিয়ে দিয়েছেন।

৪। ভক্ত ঈশ্বরের সাকার রূপ দেখতে চায় ও তাঁর সঙ্গে আলাপ করতে চায়; প্রায় ব্রহ্মজ্ঞান চায় না। তবে ঈশ্বর ইচ্ছাময়,—তাঁর যদি খুসী হয়, তিনি ভক্তকে সকল ঐশ্বর্যের অধিকারী করেন,—ভক্তিও দেন, জ্ঞানও দেন। জগতের মাকে পেলে ভক্তিও পাবে, আবার জ্ঞানও পাবে; জ্ঞানও পাবে, আবার ভক্তিও পাবে। ভাব-সমাধিতে রূপ দর্শন হয়, আবার নির্বিকল্প সমাধিতে অখণ্ড সচ্চিদানন্দ দর্শন হয়,—তখন অহং, নাম, রূপ থাকে না।

৫। শুদ্ধ জ্ঞান, আর শুদ্ধা ভক্তি এক। শুদ্ধ জ্ঞান যেখানে, শুদ্ধা ভক্তিও সেইখানে নিয়ে যায়। ভক্তিপথ বেশ সহজ পথ।

৬। কলিযুগে ভক্তিযোগই ভাল। ভক্তিদ্বারাও তাঁকে পাওয়া যায়। ভক্তি মেয়ে মানুষ, তাই অক্ষুঃপুর পর্য্যন্ত যেতে

পারে। জ্ঞান বা'র বাড়ী পর্য্যন্ত যায়। বেশী বিচার করা ভাল নয়। মা'র পাদপদ্মে ভক্তি থাকলেই হ'লো। বেশী বিচার করতে গেলে সব ঘুলিয়ে যায়। এদেশে 'পুকুরের জল উপর উপর খাও, বেশ পরিষ্কার জল পাবে। বেশী নীচে হাত দিয়ে নাড়লে জল ঘুলিয়ে যায়। তাই তাঁর কাছে ভক্তি প্রার্থনা কর।

৭। যে ঠিক ভক্ত, তার কাছে হাজার বেদান্ত বিচার কর, তার স্বপ্নবৎ বল, তার ভক্তি যাবার নয়। ফিরে ঘুরে একটু-খানি থাকবেই।

৮। ভক্তেরও একাকার জ্ঞান হয় ; সে দেখে, ঈশ্বর ছাড়া আর কিছুই নাই। 'স্বপ্নবৎ' বলে না ; তবে বলে, 'তিনিই এই সব হয়েছেন !' মোমের বাগানে সবই মোম, তবে নানা রূপ। তবে পাকা ভক্তি হ'লে এইরূপ বোধ হয়। অনেক পিত্ত জন্মে গ্যাঁবা লাগে। তখন দেখে যে সবই হল্দে। শ্রীমতী শ্যামকে ভেবে ভেবে সমস্ত শ্যামময় দেখলে, আর নিজেকেও শ্যাম বোধ হ'লো। পারার হৃদে সীসে অনেক দিন থাকলে সেটাও পারা হয়ে যায়। আরশুলা কুমুরে পোকা ভেবে ভেবে নিশ্চল হয়ে যায়, নড়ে না ; শেষে কুমুরে পোকাই হয়ে যায়। ভক্তও তাঁকে ভেবে ভেবে অহংশৃণু হয়ে যায় ; আবার দেখে 'তিনিই আমি', 'আমিই তিনি।' আরশুলা যখন কুমুরে পোকা হয়ে যায়, তখন সব হয়ে গেল : তখনই মুক্তি।

৯। কলিতে ভক্তিযোগ। ঈশ্বরের নামগুণ গান করা ও ব্যাকুল হয়ে প্রার্থনা করা, “হে ঈশ্বর, আমায় জ্ঞান দাও, ভক্তি দাও, আমায় দেখা দাও।” ভক্তিই সার। ঈশ্বরকে বিচার করে কে জানতে পারবে? আমার দরকার ভক্তি। তাঁর অনন্ত ঐশ্বর্য; অত জানবার আমার কি দরকার? এক বোতল মদে যদি মাতাল হই, গুঁড়ির দোকানে কত মণ মদ আছে সে খবরে আমার কি দরকার? এক ঘটা জলে আমার তৃষ্ণা যেতে পারে; পৃথিবীতে কত জল আছে সে খবরে আমার প্রয়োজন নাই।

১০। কলিতে সর্বদা তাঁর নামগুণ কীর্তন করা। যাদের সময় নাই, তারা যেন সন্ধ্যা সকালে হাততালি দিয়ে একমনে ‘হরিবোল’ ‘হরিবোল’ ব’লে, তাঁর ভজনা করে। ভক্তির ‘আমি’তে অহঙ্কার হয় না। এ ‘আমি’তে অজ্ঞান কবে না; বরং ঈশ্বরলাভ করিয়ে দেয়। এ ‘আমি’ আমির মধ্যে নয়। যেমন হিঙ্কশাক শাকের মধ্যে নয়; অগ্নি শাকে অসুখ হয়, কিন্তু হিঙ্কশাক খেলে পিত্তনাশ হয়; উল্টে উপকার হয়। মিছরি মিষ্টের মধ্যে নয়; অগ্নি মিষ্টি খেলে অপকার হয়, মিছরি খেলে অম্বল নাশ হয়। হাঁ, ‘দাস আমি’—অর্থাৎ ‘আমি ঈশ্বরের দাস, আমি তাঁর ভক্ত’, এই অভিমান। এতে দোষ নাই, বরং এতে ঈশ্বর লাভ হয়। কেউ কেউ সমাধির পরও ‘ভক্তের আমি’, ‘দাস আমি’ নিয়ে থাকে। ‘আমি দাস, তুমি প্রভু’, ‘আমি ভক্ত, তুমি ভগবান’, এই অভিমান

ভক্তি। এত জপ করতে হবে, উপোষ করতে হবে, তীর্থে যেতে হবে, এত উপচারে পূজা করতে হবে, এতগুলি বলিদান দিতে হবে,—এ সব বৈধী-ভক্তি। এ সব অনেক ক'রতে ক'রতে ক্রমে রাগভক্তি আসে। কিন্তু রাগভক্তি যতক্ষণ না হবে, ততক্ষণ ঈশ্বরলাভ হবে না। তাঁর উপর ভালবাসা চাই। সংসার-বুদ্ধি একেবারে চলে যাবে, আর তাঁর উপর যোল আনা মন হবে,—তবে তাঁকে পাবে।

১৭। রাগভক্তি এলে, অর্থাৎ ঈশ্বরে ভালবাসা এলে, তবে তাঁকে পাওয়া যায়। বৈধীভক্তি হতেও যেমন, যেতেও তেমন। এত জপ, এত ধ্যান করবে, এত যাগ যজ্ঞ হোম করবে, এই এই উপচারে পূজা করবে, পূজার সময় এই এই মন্ত্র পাঠ করবে, এই সকলের নাম বৈধীভক্তি। হতেও যেমন, যেতেও তেমন। কত লোকে বলে, “আর ভাই, কত হবিষ্য করলুম, কতবার বাড়ীতে পূজা আনলুম, কিন্তু কি হ'লো?” রাগভক্তির কিন্তু পতন নাই। কাদের রাগভক্তি হয়? যাদের পূর্ব জন্মে অনেক কাজ করা আছে, অথবা যারা নিত্য-সিদ্ধ। যেমন, একটা পোড়ো বাড়ীর বন জঙ্গল কাটতে কাটতে নল বসান ফোয়ারা পেয়ে গেল। মাটি শুরুকি ঢাকা ছিল; যাঁই সরিয়ে দিলে, অমনি ফর্ ফর্ করে জল উঠতে লাগলো। যাদের রাগভক্তি, তারা এমন কথা বলে না, “ভাই কত হবিষ্য করলুম, কিন্তু কি হ'লো?” যারা নূতন চাষ করে, তাদের যদি ফসল না হয়, তাহলে জমি ছেড়ে দেয়। কিন্তু খান্দানি

চাষা ফসল হোক আর না হোক, আবার চাষ করবেই। তাদের বাপ-পিতামহ চাষাগিরি ক'রে এসেছে। তারা জানে যে, চাষ করেই খেতে হবে। যাদের রাগভক্তি, তাদেরই আন্তরিক। ঈশ্বর তাদের ভার লন। ঈশ্বর যাদের ধরে আছেন, তাদের কোনও ভয় নাই। মাঠের আলের উপর চলতে চলতে যে ছেলে বাপকে ধ'রে থাকে, সে পড়লেও পড়তে পারে,—যদি অন্তমনস্ক হ'য়ে হাত ছেড়ে দেয়। কিন্তু বাপ যে ছেলেকে ধ'রে থাকে, সে পড়ে না।

১৮। কিন্তু কারু কারু রাগভক্তি আপনা আপনি হয়, —স্বতঃসিদ্ধ। ছেলেকেই আছে। ছেলেকেই থেকে ঈশ্বরের জন্ম কাঁদে, যেমন প্রহ্লাদ।

১৯। যতক্ষণ না তাঁর উপর ভালবাসা জন্মায়, ততক্ষণ ভক্তি কাঁচা ভক্তি। তাঁর উপর ভালবাসা এলে তখন সেই ভক্তির নাম পাকা ভক্তি। যার কাঁচা ভক্তি, সে ঈশ্বরের কথা, উপদেশ ধারণা করতে পারে না। পাকা ভক্তি হ'লে ধারণা করতে পারে। ফটোগ্রাফের কাঁচে যদি কালি মাখান থাকে, তাহ'লে যা ছবি পড়ে তা রয়ে যায়। কিন্তু শুধু কাঁচের উপর হাজার ছবি পড়ুক, একটাও থাকে না। একটু সরে গেলেই যেমন কাঁচ, তেমনি কাঁচ। ঈশ্বরের উপর ভালবাসা না থাকলে উপদেশ ধারণা হয় না।

২০। ভক্তি দ্বারাই তাঁকে দর্শন হয়; কিন্তু পাকা ভক্তি, প্রেমাভক্তি, রাগভক্তি চাই। সেই ভক্তি এলেই তাঁর উপর

ভালবাসা আসে। যেমন ছেলের মা'র উপর ভালবাসা, মা'র ছেলের উপর ভালবাসা, স্ত্রীর স্বামীর উপর ভালবাসা। এ ভালবাসা, এ রাগভক্তি এলে স্ত্রী, পুত্র, আত্মীয় কুটুম্বের উপর সে মায়ার টান থাকে না। দয়া থাকে। এ ভালবাসা এলে সংসার বিদেশ বোধ হয়; একটি কৰ্মভূমি মাত্র বোধ হয়। ঈশ্বরে ভালবাসা এলে সংসারাসক্তি,—বিষয়-বুদ্ধি—একেবারে যাবে।

২১। কিন্তু ভক্তি অমনি করলেই ঈশ্বরকে পাওয়া যায় না। প্রেমাভক্তি না হ'লে ঈশ্বরলাভ হয় না। প্রেমাভক্তির আর একটি নাম রাগভক্তি। প্রেম, অনুরাগ না হ'লে ভগবান লাভ হয় না। ঈশ্বরের উপর ভালবাসা না এলে, তাঁকে লাভ করা যায় না।

২২। গোপীদের প্রেমাভক্তি। প্রেমাভক্তিতে দুটি জিনিস থাকে,—অহংতা আর মমতা। আমি কৃষ্ণকে সেবা না করলে কৃষ্ণের অসুখ হ'বে,—এর নাম অহংতা। এতে ঈশ্বর-বোধ থাকে না। মমতা,—‘আমার’ ‘আমার’ করা। পাছে শ্রীকৃষ্ণের পায়ে কিছু আঘাত লাগে, গোপীদের এত মমতা যে, তাদের সূক্ষ্ম শরীর তাঁর চরণতলে থাকতো। যশোদা বলেন, “তোদের চিন্তামণি কৃষ্ণ জানি না,—আমার গোপাল।” গোপীরাও বলে, “কোথায় প্রাণবল্লভ! হৃদয়বল্লভ!”—ঈশ্বর-বোধ নাই।

২৩। একটি আছে,—অহৈতুকী ভক্তি। এটি যদি হয়,

তাহ'লে খুব ভাল। প্রহ্লাদের অহৈতুকী ভক্তি ছিল। সেরূপ ভক্ত বলে, “হে ঈশ্বর, আমি ধন, মান, দেহসুখ, এ সব কিছুই চাই না। এই কর যেন তোমার পাদপদ্মে আমার শুদ্ধাভক্তি হয়।”

২৪। অহল্যা বলেছিলেন, “হে রাম, যদি শূকর যোনিতে জন্ম হয়, তাতেও আমার আপত্তি নাই, কিন্তু যেন তোমার পাদপদ্মে শুদ্ধাভক্তি থাকে,—আমি আর কিছু চাই না।”

২৫। নারদ রাবণ-বধের কথা স্মরণ করাবার জন্য অযোধ্যায় রামচন্দ্রের সঙ্গে দেখা করতে গিয়েছিলেন। তিনি সীতারাম দর্শন করে স্তব করতে লাগলেন। রামচন্দ্র স্তবে সন্তুষ্ট হয়ে বল্লেন, “নারদ, আমি তোমার স্তবে সন্তুষ্ট হয়েছি ; তুমি কিছু বর লও।” নারদ বল্লেন, “রাম, যদি একান্ত আমায় বর দেবে, তো এই বর দাও, যেন তোমার পাদপদ্মে আমার শুদ্ধাভক্তি থাকে ; আর এই ক'রো যেন তোমার ভুবনমোহিনী মায়ায় মুগ্ধ না হই।”

২৬। যারা কিন্তু ঈশ্বরচিন্তা করে, বিষয়ে আসক্তি, কামিনী-কাঞ্চনে ভালবাসা চলে যাবার জন্য রাতদিন প্রার্থনা করে, যাদের বিষয়রস তেঁতো লাগে, হরিপাদপদ্মের সুধা বই আর কিছু ভাল লাগে না, তাদের স্বভাব যেমন হাঁসের স্বভাব। হাঁসের স্মুখে দুধে জলে দাও, জল ত্যাগ করে দুধ খাবে। আর হাঁসের গতি দেখেছো? একদিকে সোঁজা

চলে যাবে। শুদ্ধ ভক্তের গতিও কেবল ঈশ্বরের দিকে। সে আর কিছু চায় না; তার আর কিছু ভাল লাগে না।

২৭। তাই নিষ্কাম ভক্তি,—অহেতুকী ভক্তি,—সর্বাপেক্ষা ভাল।

২৮। অহেতুকী ভক্তি ঈশ্বরকোটির হয়, জীবকোটির হয় না।

২৯। আবার আছে উর্জিতা ভক্তি। ভক্তি যেন উথলে পড়ছে। ‘ভাবে হাসে, কাঁদে, নাচে, গায়।’ যেমন চৈতন্যদেবের। রাম লক্ষ্মণকে বললেন, “ভাই, যেখানে দেখবে উর্জিতা ভক্তি, সেইখানে জানবে, আমি স্বয়ং বর্তমান।”

৩০। ভক্তের ভিতর একটানা নয়; জোয়ার ভাটা হয়। হাসে, কাঁদে, নাচে, গায়। ভক্ত তাঁর সঙ্গে বিলাস করতে ভালবাসে,—কখনও সাঁতার দেয়, কখনও ডুবে, কখনও উঠে,—যেমন জলের ভিতর বরফ টাপুর টুপুর, টাপুর টুপুর করে।

৩১। যার ঠিক ঠিক ঈশ্বরে ভক্তি আছে, সে শরীর, টাকা, এ সব গ্রাহ্য করে না। সে ভাবে, দেহস্ব্থের জন্ম, কি লোক-মাণ্ডের জন্ম, কি টাকার জন্ম আবার জপ তপ কি? এ সব অনিত্য, দিন দুই তিনের জন্ম।

৩২। আর এক রকম ভক্ত আছে। এক জায়গায় একটি স্মাক্‌রার দোকান আছে। তারা পরম বৈষ্ণব, গলায় মালা, তিলক সেবা, প্রায় হাতে হরিনামের ঝুলি, আর মুখে সর্বদা হরিনাম। সাধু বল্লই হয়,—তবে পেটের জন্ম স্মাক্‌রার কন্ম

করা ; মাগ ছেলেদের তো খাওয়াতে হবে ? পরম বৈষ্ণব,
—এই কথা শুনে অনেক খরিদার তাদেরই দোকানে আসে ;
কেন না, তারা জানে যে, এদের দোকানে সোনা রূপা
গোলমাল হবে না । খরিদার দোকানে গিয়ে ছাখে যে, মুখে
হরিনাম করছে, আর বসে বসে কাজকর্ম করছে । খরিদার
যাই গিয়ে বসলো, একজন বলে উঠলো, “কেশব ! কেশব !
কেশব !” খানিকক্ষণ পরে আর একজন ব’লে উঠলো,
“গোপাল ! গোপাল ! গোপাল !” আবার একটু কথাবার্তা
হ’তে না হ’তেই আর একজন বলে উঠলো, “হরি ! হরি !
হরি !” গয়না গড়াবার কথা যখন এক রকম ফুরিয়ে এল, তখন
আর একজন ব’লে উঠলো, “হর ! হর ! হর !” কাজেকাজেই
এত ভক্তি, প্রেম দেখে তারা স্মাক্রাদের কাঁছে টাকা কড়ি
দিয়ে নিশ্চিন্ত হ’লো ; জানে যে, এরা কখনও ঠকাবে না !
কিন্তু কথা কি জান ? খরিদার আসবার পর যে বলেছিল,
“কেশব ! কেশব !” তার মানে এই, এরা সব কে ? অর্থাৎ যে
খরিদারেরা আসলো, এরা সব কে ? যে বললে, “গোপাল !
গোপাল !” তার মানে এই, এরা দেখছি ‘গরুর পাল, ‘গরুর
পাল’ । যে বললে, “হরি ! হরি !”, তার মানে এই, যে কালে
দেখছি ‘গরুর পাল’, সে স্থলে তবে হরি অর্থাৎ হরণ করি ।
আর যে বললে, “হর ! হর !” তার মানে এই, যে কালে গরুর
পাল দেখ্ছো, সে কালে সর্বস্ব হরণ কর । এই তারা পরম
ভক্ত সাধু !

৩৩। প্রেম কি সামান্য জিনিস গো ? চৈতন্যদেবের প্রেম হ'য়েছিল। প্রেমের দুটি লক্ষণ। প্রথম,—জগৎ ভুল হ'য়ে যাবে ; এত ঈশ্বরেতে ভালবাসা, যে বাহ্যশূন্য। চৈতন্যদেব “বন দেখে বৃন্দাবন ভাবে, সমুদ্র দেখে শ্রীযমুনা ভাবে।” দ্বিতীয় লক্ষণ,—নিজের দেহ যে এত প্রিয় জিনিস, এর উপরও মমতা থাকবে না। দেহাত্মবোধ একেবারে চ'লে যাবে। ঈশ্বরদর্শন না হ'লে প্রেম হয় না। ঈশ্বরলাভের কতকগুলি লক্ষণ আছে। যার ভিতর অনুরাগের ঐশ্বর্য্য প্রকাশ হচ্ছে, তার ঈশ্বরলাভের আর দেরী নাই। অনুরাগের ঐশ্বর্য্য কি কি ? বিবেক, বৈরাগ্য, জীবে দয়া, সাধুসেবা, সাধুসঙ্গ, ঈশ্বরের নামগুণ কীর্ত্তন, সত্য কথা, এই সব। এই সকল অনুরাগের লক্ষণ দেখলে ঠিক বলতে পারা যায়, ঈশ্বরদর্শনের আর দেরী নাই। বাবু কোন খানসামার বাড়ী যাবেন, এরূপ যদি ঠিক হ'য়ে থাকে, খানসামার বাড়ীর অবস্থা দেখে ঠিক বুঝতে পারা যায়। প্রথমে বন জঙ্গল কাটা হয়, বুল ঝাড়া হয়, ঝাঁট পাট দেওয়া হয়। বাবু নিজেই সতরঞ্চ, গুড়-গুড়ি, এই সব পাঁচ রকম জিনিস পাঠিয়ে দেন। এই সব আসতে দেখলেই লোকের বুঝতে বাকী থাকে না, বাবু এসে পড়লেন ব'লে।

৩৪। ঈশ্বরে খুব ভালবাসা না হ'লে প্রেমাভক্তি হয় না। তিন বন্ধু বন দিয়ে যাচ্ছে। এক বাঘ এসে উপস্থিত। একজন বলে, “ভাই, আমরা সব মারা গেলুম।” আর একজন বলে,

“কেন, মারা যাব কেন ? এস, আমরা ঈশ্বরকে ডাকি ।” আর একজন বলে, “না, তাঁকে আর কষ্ট দিয়ে কি হবে ? এস, এই গাছে উঠে পড়ি ।” যে লোকটি বলে, “আমরা মারা গেলুম,” সে জানে না যে, ঈশ্বর রক্ষাকর্তা আছেন । যে বলে, “এস, আমরা ঈশ্বরকে ডাকি,” সে ব্যক্তি জানী । তার বোধ আছে যে, ঈশ্বর সৃষ্টি, স্থিতি, প্রলয়, সব করছেন । আর যে ব্যক্তি বলে, “তাঁকে কষ্ট দিয়ে কি হবে ? এস, আমরা গাছে উঠি,” তার ভিতরে প্রেম জন্মেছে, ভালবাসা জন্মেছে । তা প্রেমের স্বভাবই এই যে, আপনাকে বড় মনে করে, আর প্রেমের পাত্রকে ছোট মনে করে, পাছে তার কষ্ট হয় । কেবল এই ইচ্ছা যে, যাকে ভালবাসে, তার পায়ে কাঁটাটি পর্যন্ত না ফোটে ।

৩৫ । সব মতকে নমস্কার ক’রবে : তবে একটি আছে নিষ্ঠাভক্তি । সবাইকে প্রণাম ক’রবে বটে, কিন্তু একটির উপরে প্রাণঢালা ভালবাসার নাম নিষ্ঠা । রামরূপ বই আর কোনও রূপ হনুমানের ভাল লাগতো না । গোপীদের এত নিষ্ঠা যে, তারা দ্বারকার পাগড়ি বাঁধা শ্রীকৃষ্ণকে দেখতে চাইলে না । পত্নী, দেওর, ভাসুর,—এ সবকে পা ধোবার জল, আসন দিয়ে সেবা করে ; কিন্তু পতিকে যেরূপ সেবা করে, সেরূপ সেবা আর কাকেও করে না । পতির সঙ্গে সম্বন্ধ আলাদা ।

৩৬ । ব্যাকুলতা থাকলে সব পথ দিয়েই তাঁকে পাওয়া

যায়। তবে নিষ্ঠা থাকা ভাল। নিষ্ঠাভক্তির আর একটি নাম
অব্যভিচারিণী ভক্তি। যেমন, একডেলে গাছ, সোজা উঠেছে।
ব্যভিচারিণী ভক্তি,—যেমন পাঁচ ডেলে গাছ। গোপীদের
এমনই নিষ্ঠা যে, বৃন্দাবনের মোহনচূড়া, পীতধ্বজা পরা রাখাল
কৃষ্ণ ছাড়া আর কিছু ভালবাসবে না। মথুরায় যখন রাজবেশ,
পাগড়ি মাথায় কৃষ্ণকে দর্শন ক'রলে, তখন তারা ঘোমটা
দিলে, আর বললে, “ইনি আবার কে? এঁর সঙ্গে আলাপ ক'রে
কি আমরা দ্বিচারিণী হ'ব?”

৩৭। নিষ্ঠার পর ভক্তি। ভক্তি পাকলে ভাব হয়। ভাব
ঘনীভূত হ'লে মহাভাব হয়। সর্বশেষে প্রেম। প্রেম
রজ্জ্বরূপ। প্রেম হ'লে ভক্তের কাছে ঈশ্বর বাঁধা পড়েন, আর
পালাতে পারেন না। সামান্য জীবের ভাব পর্য্যন্ত হয়।
ঈশ্বরকোটি না হ'লে মহাভাব, প্রেম হয় না। চৈতন্যদেবের
হয়েছিল।

৩৮। কুণ্ডলিনী শক্তির জাগরণ হ'লে ভাব, ভক্তি, প্রেম,
এই সব হয়। এরই নাম ভক্তিযোগ।

৩৯। ‘আমি’ তো সহজে যায় না; তাই ভক্ত জাগ্রত,
স্বপ্ন, এ সব অবস্থা উড়িয়ে দেয় না। ভক্ত সব অবস্থাই লয়;
সত্ত্ব, রজঃ, তমঃ, তিন গুণও লয়। ভক্ত দেখে, তিনিই
চতুর্বিংশতি তত্ত্ব হ'য়ে রয়েছেন,—জীব জগৎ হ'য়ে রয়েছেন;
আবার দেখে সাকার চিন্ময়রূপে তিনি দর্শন দেন।

৪০। সব তত্ত্ব শেষে আকাশতত্ত্বে লয় হয়। আবার

সৃষ্টির সময় আকাশতত্ত্ব থেকে মহৎতত্ত্ব, মহৎতত্ত্ব থেকে অহঙ্কার, এই সব ক্রমে ক্রমে সৃষ্টি হ'য়েছে। অনুলোম, বিলোম। ভক্ত সবই লয়। ভক্ত অখণ্ড সচ্চিদানন্দকেও লয়, আবার জীব জগৎকে লয়।

৪১। ভক্ত বিচ্যামায়া আশ্রয় ক'রে থাকে। সাধুসঙ্গ, তীর্থ, জ্ঞান, ভক্তি, বৈরাগ্য, এই সব আশ্রয় ক'রে থাকে। সে বলে, যদি 'আমি' সহজে চলে না যায়, তবে থাক্ শালা দাস হ'য়ে,—ভক্ত হ'য়ে।

৪২। ভক্ত যেমন ভগবান না হ'লে থাকতে পারে না, ভগবানও ভক্ত না হ'লে থাকতে পারেন না। তখন ভক্ত হন রস, ভগবান হন রসিক ; ভক্ত হন পদ, ভগবান হন অলি। তিনি নিজের মাধুর্য্য আশ্বাদন করবার জন্তু দুটি হয়েছেন। তাই রাধাকৃষ্ণ লীলা।

৪৩। ভক্তিই সার ; ঠিক ভক্তের কোনও ভয় ভাবনা নাই। মা সব জানে। বিড়াল ইঁদুরকে ধরে এক রকম ক'রে, কিন্তু নিজের ছানাকে আর এক রকম ক'রে ধরে।

৪৪। তিনি খুব কাণ খড়্কে, সব শুন্তে পান গো। যত ডেকেছো, সব শুনেছেন। একদিন না একদিন দেখা দেবেনই দেবেন। অন্ততঃ মৃত্যু সময়েও দেখা দেবেন।

৪৫। একজন মুসলমান নমাজ ক'রতে ক'রতে “হো আল্লা, হো আল্লা” ব'লে চীৎকার ক'রে ডাক্ছিলো। তাকে একজন লোক এসে বল্লে, “তুই আল্লাকে ডাক্ছিস্, তা অত

চৈচাচ্ছিস্ কেন ? তিনি যে পিপ্‌ড়ের পায়ের নূপুর শুনতে পান ।” তাঁতে যখন মনের যোগ হয়, তখন ঈশ্বরকে খুব কাছে দেখে ; হৃদয়ের মধ্যে দেখে । কিন্তু আর একটি কথা আছে ; যত এই যোগ হবে, ততই বাহিরের জিনিস থেকে মন স’রে আসবে । ভক্তমালাে একজন ভক্তের কথা আছে । সে বেশালায়ে রোজ যেতো । একদিন অনেক রাত্রে যাচ্ছে । বাড়ীতে বাপ মায়ের শ্রাদ্ধ হয়েছিল, তাই দেৱী হ’য়েছে । শ্রাদ্ধের খাবার বেশালাকে দেবে ব’লে হাতে ক’রে লয়ে যাচ্ছে । তার বেশালা দিকে এত একাগ্র মন যে, কিসের উপর দিয়ে যাচ্ছে, কোন্‌খান দিয়ে যাচ্ছে, এ সব কিছুই হুঁস্ নাই । পথে এক যোগী চোক বুজে ঈশ্বরচিন্তা করছিল । তার গায়ে পা দিয়ে চলে যাচ্ছে ; যোগী রাগ ক’রে ব’লে উঠলো, “কি, তুই দেখতে পাচ্ছিস্ না ? আমি ঈশ্বরকে চিন্তা করছি, তুই গায়ের উপর পা দিয়ে চলে যাচ্ছিস্ !” তখন সে লোকটি বল্লে, “আমায় মাপ করবেন ; কিন্তু একটা কথা জিজ্ঞাসা করি ; বেশালাকে চিন্তা ক’রে আমার হুঁস্ নাই, আর আপনি ঈশ্বরচিন্তা করছেন, আপনার সব বাহিরের হুঁস্ আছে ; এ কি রকম ঈশ্বরচিন্তা ?” সে ভক্ত শেষে সংসার ত্যাগ ক’রে ঈশ্বরের আরাধনায় চলে গিয়েছিল । বেশালাকে ব’লেছিল, “তুমি আমার গুরু, কেন না, তুমিই শিখিয়েছ, কি রকম ক’রে ঈশ্বরে অনুরাগ ক’রতে হয় ।” বেশালাকে “মা” ব’লে ত্যাগ ক’রেছিল ।

৪৬। ভক্তের হৃদয় তাঁর আবাসস্থান। তিনি সর্বভূতে আছেন বটে, কিন্তু ভক্তহৃদয়ে তিনি বিশেষরূপে আছেন। যেমন কোন জমিদার তার জমিদারীর সকল স্থানে থাকতে পারে। তবে অমুক বৈঠকখানায় তিনি প্রায়ই থাকেন, এই কথা লোকে বলে। ভক্তের হৃদয় ভগবানের বৈঠকখানা।

৪৭। ভক্ত তিন শ্রেণীর। অধম ভক্ত বলে, “ঐ ঈশ্বর”, অর্থাৎ আকাশের দিকে সে দেখাইয়া দেয়। মধ্যম ভক্ত বলে যে, তিনি হৃদয়ের মধ্যে অন্তর্ধ্যামীরূপে আছেন। আর উত্তম ভক্ত বলে যে, তিনিই এই সব হয়েছেন,—যা কিছু দেখছি, সবই তাঁর এক একটি রূপ।

৪৮। ঠিক ভক্তের লক্ষণ আছে। গুরুর উপদেশ শুনে স্থির হ’য়ে থাকে। বেহুলার গানের কাছে জাত্ সাপ স্থির হ’য়ে শুনে, কিন্তু কেউটে নয়। আর একটি লক্ষণ,— ঠিক ভক্তের ধারণাশক্তি হয়। আরও একটি লক্ষণ,— ঠিক ভক্ত জিতেদ্রিয় হয়, কামজয়ী হয়। গোপীদের কাম হতো না।

৪৯। যখন দেখবে ঈশ্বরের নাম করতেই অশ্রু আব পুলক হয়, তখন জানবে, কামিনী-কাঞ্চনে আসক্তি চলে গেছে, ঈশ্বরলাভ হয়েছে। দেশলাই যদি শুকনো হয়, একটা ঘস্লেই দপ ক’রে জ্বলে উঠে। আর যদি ভিজ়ে হয়, পঞ্চাশটা ঘস্লেও কিছু হয় না; কেবল কাঠিগুলো ফেলা যায়। বিষয়-রসে র’সে থাকলে, কামিনী-কাঞ্চন-রসে মন ভিজ়ে থাকলে,

ঈশ্বরের উদ্দীপনা হয় না। হাজার চেষ্টা কর,—কেবল পণ্ড-
শ্রম। বিষয়-রস শুকূলে তৎক্ষণাৎ উদ্দীপন হয়।

৫০। ভক্তের জাতি নাই। ভক্তি হ'লেই দেহ, মন,
আত্মা, সব শুদ্ধ হয়। গৌর নিতাই হরিনাম দিতে লাগলেন,
আর আচণ্ডালে কোল দিলেন। ভক্তি না থাকলে, ব্রাহ্মণ
ব্রাহ্মণ নয়। ভক্তি থাকলে চণ্ডাল চণ্ডাল নয়। অস্পৃশ্য জাতি
ভক্তি থাকলে শুদ্ধ, পবিত্র হয়।

৫১। বড় মানুষের দ্বারবান একদিন এসে বাবুর সভার
একধারে দাঁড়িয়ে আছে, হাতে কি একটি জিনিস আছে,
কাপড়ে ঢাকা; অতি সঙ্কোচভাবে আছে। বাবু জিজ্ঞাসা
ক'রলেন, “কি দরবান, হাতে কি আছে?” দ্বারবান সঙ্কোচ-
ভাবে একটি আতী বা'র ক'রে বাবুর সামনে রাখলে, ইচ্ছা
বাবু ওটি খাবেন। বাবু দ্বারবানের ভক্তিভাব দেখে আতীটি
খুব আদর করে নিলেন, আর বললেন, “আহা এটি বেশ
আতী; তুমি এটি কোথা থেকে কষ্ট করে আনলে?” তিনি
ভক্তাধীন! তুর্ঘ্যোধন অত যত্ন দেখালেন আর বললেন, “এখানে
খাওয়া দাওয়া করুন।” ঠাকুর (শ্রীকৃষ্ণ) কিন্তু বিছরের
কুর্টীয়ে গেলেন! তিনি ভক্তবৎসল,—বিছরের শাকান্ন তিনি
সুধার গ্ৰায় খেলেন।

৫২। একটা ভাব পাকা ক'রে তাঁকে আপনার করে
নিতে হবে; তবে তো তাঁর উপর জোর চ'লবে। এই দেখ
না, প্রথম প্রথম একটু আধটু ভাব যতক্ষণ, ততক্ষণ ‘আপনি’

‘মশাই’ এ সব লোকে ব’লে থাকে ; সেই ভাব যাই বাড়লো, অমনি ‘তুমি’ ‘তুমি’ ; আর তখন আপনি টাপনি গুলো র’লা আসে না । যাই আরও বাড়লো, আর তখন তুমি টুমিতেও মানে না ; তখন ‘তুই’ ‘মুই’ । তাঁকে আপনার হ’তে আপনার ক’রে নিতে হবে, তবে তো হবে । যেমন নষ্ট মেয়ে পরপুরুষকে প্রথম প্রথম ভালবাসতে শিখছে,—তখন কত লুকোলুকি, কত ভয়, কত লজ্জা ; তার পর, যাই ভাব বেড়ে উঠলো, তখন আর কিছু নাই ; একেবারে তার হাত ধরে সকলের সামনে কুলের বাইরে এসে দাঁড়াল । তখন যদি সে পুরুষটা তাকে আদর যত্ননা ক’রে ছেড়ে যেতে চায়, তো তার গলায় কাপড় দিয়ে টেনে ধ’রে বলে, “তোর জন্তে পথে দাঁড়ালুম, এখন তুই খেতে দিবি কি না বল্ ?” সেই রকম যে ভগবানের জন্তে সব ছেড়েছে, তাঁকে আপনার ক’রে নিয়েছে, সে তাঁর উপর জোর ক’রে বলে, “তোর জন্তে সব ছাড়লুম, এখন দেখা দিবি কি না, বল্ ?”

৫৩। তাঁকে লাভ ক’রতে হ’লে একটা ভাব আশ্রয় ক’রতে হয়,—শান্ত, দাম্ভ, সখ্য, বাৎসল্য বা মধুর । শান্ত, —ঋষিদের ছিল । তাদের অন্য কিছু ভোগ করবার বাসনা ছিল না । যেমন স্ত্রীর স্বামীতে নিষ্ঠা ;—সে জানে আমার পতি কন্দর্প । দাম্ভ,—যেমন হনুমানের । রামের কাজ করবার সময় সিংহতুল্য । স্ত্রীরও দাম্ভভাব থাকে । স্বামীকে প্রাণপণে সেবা করে । মা’র কিছু কিছু থাকে ; যশোদারও

ছিল। সখ্য,—যেমন বন্ধুর ভাব ; এস, এস, কাছে এসে বস। শ্রীদামাদি কৃষ্ণকে কখনও এঁটো ফল এনে খাওয়াচ্ছে, কখনও ঘাড়ে চড়ছে। বাৎসল্য,—যেমন যশোদার। স্ত্রীরও কতকটা থাকে ; স্বামীকে প্রাণ চিরে খাওয়ায়। ছেলেটি পেট ভ'রে খেলে, তবেই মা সন্তুষ্ট। যশোদা কৃষ্ণ খাবেন বলে ননী হাতে ক'রে বেড়াতেন। মধুর,—যেমন শ্রীমতীর। স্ত্রীরও মধুর ভাব। এ ভাবের ভিতরে সকল ভাবই আছে,—শান্ত, দাস্য, সখ্য, বাৎসল্য।

৫৪। কথাটা এই,—সচ্চিদানন্দে প্রেম। কিরূপ প্রেম ? ঈশ্বরকে কিরূপ ভালবাসতে হবে ? গৌরী বলতো, 'রামকে জানতে গেলে সীতার মত হ'তে হয়।' ভগবানকে জানতে ভগবতীর মত হ'তে হয়। ভগবতী যেমন শিবের জন্য কঠোর তপস্যা ক'রেছিলেন, সেইরূপ তপস্যা ক'রতে হয়। পুরুষকে জানতে গেলে প্রকৃতিভাব আশ্রয় ক'রতে হয়,—সখীভাব, দাসীভাব, মাতৃভাব।

৫৫। শক্তিই জগতের মূলাধার। সেই আত্মশক্তির ভিতরে বিদ্যা ও অবিদ্যা দুইই আছে। অবিদ্যা মুগ্ধ করে। অবিদ্যা,—যা থেকে কামিনী-কাঞ্চন,—মুগ্ধ করে। বিদ্যা,—যা থেকে ভক্তি, দয়া, জ্ঞান, প্রেম,—ঈশ্বরের পথে লয়ে যায়। সেই অবিদ্যাকে প্রসন্ন করতে হবে। তাই শক্তির পূজা পদ্ধতি। তাঁকে প্রসন্ন করবার জন্য নানা ভাবে পূজা করা হয়। দাসীভাব, সখীভাব, বীরভাব, সন্তানভাব। বীরভাব, অর্থাৎ

রমণ দ্বারা তাঁকে প্রসন্ন করা। শক্তি সাধনা। সব ভারি উৎকর্ষ সাধনা,—চালাকি নয়। আমি মা'র দাসীভাবে, সখীভাবে দুই বৎসর ছিলাম। আমার কিন্তু সন্তান ভাব। স্ত্রীলোকের স্তন মাতৃস্তন মনে করি। মেয়েরা এক একটি শক্তির রূপ। পশ্চিমে বিবাহের সময় বরের হাতে ছুরি থাকে, বাংলা দেশে জাঁতি থাকে, অর্থাৎ ঐ শক্তিরূপা কন্যার সাহায্যে বর মায়া পাশ ছেদন ক'রবে। এটি বীরভাব। আমি বীরভাবে পূজা করি নাই; আমার সন্তানভাব। কন্যা শক্তিরূপা। বিবাহের সময় দেখ নাই, বর বোকাটি পেছনে ব'সে থাকে, কন্যা কিন্তু নিঃশঙ্ক।

৫৬। তাঁকে চক্ষুচক্ষু দেখা যায় না। সাধন ক'রতে ক'রতে একটি প্রেমের শরীর হয়; তাঁর প্রেমের চক্ষু, প্রেমের কর্ণ। সেই চক্ষু তাঁকে দেখে, সেই কর্ণে তাঁর বাণী শোনা যায়। আবার প্রেমের লিঙ্গ যোনি হয়; এই প্রেমের শরীরে আত্মার সহিত রমণ হয়। ঈশ্বরের প্রতি খুব ভালবাসা না এলে হয় না। খুব ভালবাসা হ'লে, তবেই তো চারিদিক ঈশ্বরময় দেখা যায়। খুব গ্ৰাভা হ'লে, তবেই চারিদিক হৃদয়ে দেখা যায়। তখন আবার 'তিনিই আমি' এইটি বোধ হয়। তাঁকে রাতদিন চিন্তা ক'রলে, তাঁকে চারিদিকে দেখা যায়। যেমন প্রদীপের শিখার দিকে যদি একদৃষ্টে চেয়ে থাক, তবে খানিকক্ষণ পরে চারিদিকে শিখাময় দেখা যায়।

৫৭। এ জন্মে না হোক, পরজন্মে পাব; ওকি কথা?

অমন ম্যাদাটে ভক্তি করতে নাই। তাঁর কৃপায় তাঁকে এ জন্মেই পাব,—এখনই পাব,—মনে এই রকম জোর রাখতে হয়,—বিশ্বাস রাখতে হয়; তা না হ'লে কি হয়? ওদেশে চাষীরা সব গরু কিন্তে গিয়ে গরুর ল্যাঙ্গে আগে হাত দেয়। কতকগুলো গরু আছে, ল্যাঙ্গে হাত দিলে কিছু বলে না, গা এলিয়ে শুয়ে পড়ে,—অমনি তারা বোঝে, সেগুলো ভাল নয়। আর যেগুলোর ল্যাঙ্গে হাত দেবামাত্র তিরিং মিরিং ক'রে লাফিয়ে উঠে, অমনি বোঝে,—এইগুলো খুব কাজ দেবে। এইগুলোর ভিতর থেকে পছন্দ ক'রে কেনে। ম্যাদাটে ভাব ভাল নয়। জোর নিয়ে একে বিশ্বাস ক'রে বল, “তাঁকে পাবই পাব,—এখনই পাব;” তবে তো হবে।

৫৮। তাঁর শরণাগত হও। তিনি সদ্বুদ্ধি দিবেন। তিনি সব ভার লবেন। তখন সব রকম বিকার দূরে যাবে। এ বুদ্ধি দিয়ে কি তাঁকে বুঝা যায়? এক সের ঘটিতে কি চার সের ছুধ ধরে? আর তিনি না বুঝালে কি বুঝা যায়? তাই বলছি, তাঁর শরণাগত হও। তাঁর যা ইচ্ছা, তিনি করুন। তিনি ইচ্ছাময়। মানুষের কি শক্তি আছে?

৫৯। তাঁর পদে সব সমর্পণ কর,—তাঁকে আশ্রয়িতারি দাও; তিনি যা ভাল হয় করুন। বড় লোকের উপর যদি ভার দেওয়া যায়, সে লোক কখনও মন্দ ক'রবে না। সাধনার প্রয়োজন বাটে, কিন্তু ছুরকম সাধক আছে। এক রকম সাধকের বানরের ছাঁর স্বভাব; আর এক রকম সাধকের

বিড়ালের ছাঁর স্বভাব। বানরের ছাঁ নিজে যো সো ক'বে মাকে আঁকুড়িয়ে ধরে। সেইরূপ কোন কোন সাধক মনে করে, এত জপ করতে হবে, এত ধ্যান করতে হবে, এত তপস্যা করতে হবে, তবে ভগবানকে পাওয়া যাবে। এ সাধক নিজে চেষ্টা ক'রে ভগবানকে ধরতে যায়। বিড়ালের ছাঁ কিন্তু নিজে মাকে ধরতে পারে না। সে প'ড়ে কেবল মিউ মিউ ক'রে ডাকে,—মা যা করে। মা কখনও বিছানার উপর রেখে দিচ্ছে, কখনও হেঁশেলে রেখে দিচ্ছে, কখনও ছাদেব উপর কাঠের আড়ালে রেখে দিচ্ছে। মা তাকে মুখে ক'রে এখানে ওখানে নিয়ে রাখে। সে নিজে মাকে ধরতে জানে না। সেইরূপ কোন কোন সাধক নিজে হিসাব ক'রে কোনও সাধন ক'রতে পারে না,—এত জপ ক'রবো, এত ধ্যান ক'রবো, এই সব। সে কেবল ব্যাকুল হ'য়ে কেঁদে কেঁদে তাঁকে ডাকে। তিনি তার কান্না শুনে তার থাকতে পারেন না, এসে দেখা দেন।

৬০। উপরে ভাসলে কি হবে? একটু ডুব দাও। গভীর জলের নীচে রত্ন রয়েছে। জলের উপর হাত পা ছুড়লে কি হবে? ঠিক মাণিক ভারি হয়; জলে ভাসে না, তলিয়ে গিয়ে জলের নীচে থাকে। ঠিক মাণিক লাভ ক'রতে গেলে জলের ভিতর ডুব দিতে হয়। ঈশ্বরকে ভালবাসতে শেখ। তাঁর প্রেমে মগ্ন হও। সব লোক বাবুর বাগান দেখেই অবাক! কেমন গাছ, কেমন ফুল, কেমন ঝিল, কেমন

বৈঠকখানা, কেমন তার ভিতর ছবি ; এই সব দেখেই অবাক্ ।
 কিন্তু কেই, বাগানের মালিক যে বাবু, তাঁকে খোঁজে ক'জন ?
 বাবুকে খোঁজে ছু একজনা । ঈশ্বরকে ব্যাকুল হ'য়ে খুঁজলে
 তাঁকে দর্শন হয়,—তাঁর সঙ্গে আলাপ হয়, কথা হয়, যেমন
 আমি তোমাদের সঙ্গে কথা কচ্ছি । সত্য বলছি, মাইরি
 বলছি, দর্শন হয় ! এ কথা কারেই বা বলছি, কেই বা
 বিশ্বাস করে !

যোগতত্ত্ব ।

১ । গর্ভে ছিলাম, যোগে ছিলাম,
ভূমে প'ড়ে খেলাম মাটি ।
ওরে, ধাত্রীতে কেটেছে নাড়ী,
মায়ার বেড়ী কিসে কাটি ॥

কামিনী-কাঞ্চনই মায়া । মন থেকে ঐ ছুটি গেলেই যোগ । আত্মা,—পরমাত্মা,—চুম্বক পাথর, জীবাত্মা যেন একটি ছুঁচ,—তিনি টেনে নিলেই যোগ । কিন্তু ছুঁচে যদি মাটি রাখান থাকে, চুম্বকে টানে না ; মাটি সাফ্ ক'রে দিলে আবার টানে । কামিনী-কাঞ্চন মাটি পরিষ্কার করতে হয় । তাঁর জন্ম বাকুল হ'য়ে কাঁদ,—সেই জল মাটিতে লাগলে ধুয়ে ধুয়ে যাবে । যখন খুব পরিষ্কার হবে, তখন চুম্বকে টেনে লবে । যোগ তবেই হবে ।

২ । কামিনী-কাঞ্চনে মন থাকলে যোগ হয় না । সাধারণ জীবের মন লিঙ্গ, গুহা ও নাভিতে । সাধ্য সাধনার পর কুলকুণ্ডলিনী জাগ্রত হন । ঈড়া, পিঙ্গল! আর সুষুন্না নাড়ী । সুষুন্নার মধ্যে ছয়টি পদম আছে । সর্বনীচে মূলাধার । তারপর স্বাধিষ্ঠান, মণিপুর, অনাহত, বিশুদ্ধ ও আঞ্জা । এইগুলিকে ষড়্‌চক্র বলে ।

৩। কুলকুণ্ডলিনী জাগ্রত হ'লে মূলাধার, স্বাধিষ্ঠান, মণিপুর, এই সব পদ্য ক্রমে পার হ'য়ে হৃদয়মধ্যে অনাহত পদ্য,—সেইখানে এসে অবস্থান করে। তখন লিঙ্গ, গুহা, নাভি থেকে মন স'রে গিয়ে চৈতন্য হয়, আর জ্যোতিঃ দর্শন হয়। সাধক অবাক্ হ'য়ে জ্যোতিঃ দেখে, আর বলে, “একি ! একি !” বেদমতে এ সব চক্রকে ‘ভূমি’ বলে। সপ্তভূমি। হৃদয় চতুর্থ ভূমি,—অনাহত পদ্য দ্বাদশদল।

৪। বিশুদ্ধ চক্র পঞ্চম ভূমি। এখানে মন উঠলে, কেবল ঈশ্বরের কথা বলতে আর শুনতে প্রাণ ব্যাকুল হয়। এ চক্রের স্থান কণ্ঠ। ষোড়শদল পদ্য। যার এ চক্রে মন এসেছে, তার সামনে বিষয় কথা, কামিনী-কাঞ্চনের কথা হ'লে, ভারি কষ্ট হয়। ওরূপ কথা শুনলে সে সেখান থেকে উঠে যায়।

৫। তারপর ষষ্ঠ ভূমি। আঞ্জাচক্র,—দ্বিদল পদ্য। এখানে কুলকুণ্ডলিনী এলে ঈশ্বরের রূপ দর্শন হয়। কিন্তু একটু আড়াল থাকে,—যেমন লণ্ঠনের ভিতর আলো ; মনে হয় আলো ছুঁলাম, কিন্তু কাঁচ ব্যবধান আছে ব'লে ছোঁয়া যায় না।

৬। ষড়্চক্র ভেদ হ'লে কুণ্ডলিনী সহস্রার পদ্যে গিয়া মিলিত হন। কুণ্ডলিনী সেখানে গেলে সমাধি হয়। সপ্তম-ভূমি সহস্রার পদ্য। সেখানে কুণ্ডলিনী গেলে সমাধি হয়। সহস্রারে সচ্চিদানন্দ শিব আছেন, তিনি শক্তির সহিত মিলিত হন। শিবশক্তির মিলন। সহস্রারে মন এসে সমাধিস্থ হ'য়ে আর বাহ্য থাকে না। সে আর দেহরক্ষা

ক'রতে পারে না। মুখে দুধ দিলে দুধ গড়িয়ে যায়।, এ অবস্থায় থাকলে একুশদিনে মৃত্যু হয়। কালাপানিতে গেলে জাহাজ আর ফেরে না।

৭। ঈশ্বর-কোটি,—অবতারাди এই সমাধি অবস্থা থেকে নামতে পারে। তারা ভক্তি ভক্ত নিয়ে থাকে, তাই নামতে পারে। তিনি তাদের ভিতর 'বিচার আমি', 'ভক্তের আমি', লোকশিক্ষার জন্য রেখে দেন। তাদের অবস্থা, যেমন ষষ্ঠ-ভূমি আর সপ্তমভূমির মাঝখানে বাচ্ খেলা। সমাধির পর 'বিচার আমি' কেউ কেউ ইচ্ছা করে রেখে দেন। সে 'আমি'র আঁট নাই,—রেখা মাত্র।

৮। হৃষীকেশের সাধু এসেছিল। সে বললে যে, সমাধি পাঁচ প্রকার,—তা তোমার সবই হয় দেখছি, পিপীলিকাবৎ, নীনবৎ, কপিবৎ, পক্ষিবৎ, তির্ঘ্যগ্‌বৎ। কখনও বায়ু উঠে পি'পড়ের মত শিড়্ শিড়্ ক'রে। কখনও সমাধি অবস্থায় ভাবসমুদ্রের ভিতর আত্মা-মীন আনন্দে খেলা করে। কখনও পাশ ফিরে রয়েছে, মহাবায়ু বানরের গায় আমায় ঠেলে আমোদ করে; আমি চুপ ক'রে থাকি। সেই বায়ু হঠাৎ যেন বানরের গায় লাফ দিয়ে সহস্রারে উঠে যায়। তাই তো তিরিং ক'রে লাফিয়ে উঠি। আবার কখনও পাখীর মত এ ডাল থেকে ও ডাল, ও ডাল থেকে এ ডাল, মহাবায়ু উঠতে থাকে। যে ডালে বসে, সে স্থান আগুনের মত বোধ হয়। হয়তো মূলাধার থেকে স্বাধিষ্ঠান, স্বাধিষ্ঠান থেকে হৃদয়, এই-

রূপ, ক্রমে মাথায় উঠে। কখনও বা মহাবায়ু তির্য্যক্ গতিতে চলে;—এঁকে বেঁকে। এইরূপ চ'লে চ'লে শেষে মাথায় এলে সমাধি হয়।

৯। আবার ছুরকম আছে। প্রথম, স্থিত সমাধি; একেবারে বাহ্যশূন্য; অনেকক্ষণ, হয়ত অনেক দিন রইল। দ্বিতীয়, উন্মনা সমাধি,—চঠাৎ মনটা চার দিক্ থেকে কুড়িয়ে এনে ঈশ্বরেতে যোগ ক'রে দেওয়া।

১০। থিয়েটার অভিনয় দেখ নাই? লোকসব পরস্পর কথা ক'ছে, এমন সময় পর্দা উঠে গেল; তখন সকলের সমস্ত মনটা অভিনয়ে যায়, আর বাহ্যদৃষ্টি থাকে না,—এরই নাম সমাধিস্থ হওয়া। আবার পর্দা প'ড়ে গেলে বাহিরে দৃষ্টি। মায়ারূপ যবনিকা প'ড়ে গেলে আবার মানুষ বহিস্মুখ হয়।

১১। কুলকুণ্ডলিনী না জাগলে চৈতন্য হয় না। মূলাধারে কুলকুণ্ডলিনী আছেন। চৈতন্য হ'লে তিনি সুষুপ্ত-নাড়ীর মধ্য দিয়ে স্বাধিষ্ঠান, মণিপুর, এই সব চক্র ভেদ ক'রে, শেষে শিরোমধ্যে গিয়ে পড়েন। এরই নাম মহাবায়ুর গতি। তবেই শেষে সমাধি হয়। শুধু পুঁথি প'ড়লে চৈতন্য হয় না। তাঁকে ডাকতে হয়। ব্যাকুল হ'লে তবে কুলকুণ্ডলিনী জাগেন। শুনে, বই পড়ে, জ্ঞানের কথা! তাতে কি হবে? আমার এই অবস্থা যখন হ'লো, তার ঠিক আগে আমায় দেখিয়ে দিলে,—কিরূপ কুণ্ডলিনী শক্তি জাগরণ হ'য়ে, ক্রমে ক্রমে সব পদ্যগুলি ফুটে যেতে লাগলো, আর সমাধি হ'লো।

এ অতি গুহ্য কথা। দেখলাম, ঠিক আমার মতন বাইশ তেইশ বছরের ছোকরা সুষুমানাড়ীর ভিতর গিয়ে, জিহ্বা দিয়ে যোনিরূপ পদের সঙ্গে রমণ করতে লাগলো। প্রথমে গুহ্য, লিঙ্গ, নাভি। চতুর্দল, ষড়্‌দল, দশদল পদ্য সব অধোমুখ হ'য়েছিল। উর্দ্ধমুখ হ'লো। হৃদয়ে যখন এল,—বেশ মনে প'ড়ছে,—জিহ্বা দিয়ে রমণ ক'রবার পর, দ্বাদশদল অধোমুখ পদ্য উর্দ্ধমুখ হ'লো আর প্রস্ফুটিত হ'লো। তার পর কণ্ঠে ষোড়শদল, আর কপালে দ্বিদল। শেষে সহস্রদল পদ্য প্রস্ফুটিত হ'লো! সেই অবধি আমার এই অবস্থা।

১২। ঈড়া; পিঙ্গলা, সুষুমা। সুষুম্নার ভিতর সব পদ্য আছে; চিন্ময়। যেমন মোমের গাছ,—ডাল পালা, ফল,—সব মোমের। মূলাধার পদ্যে কুলকুণ্ডলিনী শক্তি আছেন। চতুর্দল পদ্য। যিনি আত্মশক্তি, তিনিই সকলের দেহে কুলকুণ্ডলিনীরূপে আছেন। যেন ঘুমন্ত সাপ, কুণ্ডলী পাকিয়ে রয়েছে! “প্রসুপ্ত ভূজগাকারা আধার পদ্যবাসিনী!” ভক্তি-যোগে কুলকুণ্ডলিনী শীঘ্র জাগ্রত হয়। কিন্তু ইনি জাগ্রত না হ'লে ভগবান দর্শন হয় না। গান ক'রে ক'রে একাগ্রতার সহিত গাইবে,—নির্জর্জনে,—গোপনে,—“জাগো মা কুলকুণ্ডলিনি! তুমি নিত্যানন্দস্বরূপিণী, প্রসুপ্ত ভূজগাকারা আধার পদ্যবাসিনী।” গানে রামপ্রসাদ সিদ্ধ। ব্যাকুল হ'য়ে গান গাইলে ঈশ্বর দর্শন করা যায়।

১৩। কোনও রকম ক'রে তাঁর সঙ্গে যোগ হ'য়ে

থাকা। দুই পথ আছে,—কর্মযোগ আর মনোযোগ। যারা আশ্রমে আছে, তাদের যোগ কর্মের দ্বারা। ব্রহ্মচর্যা, গাইশ্য, বানপ্রস্থ, সন্ন্যাস। সন্ন্যাসীরা কাম্য কর্ম ত্যাগ করবে, কিন্তু নিত্য কর্ম কামনাশূন্য হ'য়ে করবে। দণ্ডধারণ, ভিক্ষা করা, তীর্থ যাত্রা, পূজা, জপ, এ সব কর্মের দ্বারা তাঁর সঙ্গে যোগ হয়। আর যে কর্মই কর, ফলাকাঙ্ক্ষা ত্যাগ করে, কামনাশূন্য হ'য়ে করতে পারলে, তাঁর সঙ্গে যোগ হয়। আর এক পথ,—মনোযোগ। একরূপ যোগীর বাহিরে কোনও চিহ্ন নাই, অন্তরে যোগ। যেমন জড়ভরত, শুকদেব। আরও কত আছে,—এঁরা নামজাদা। এঁদের শরীরে চুল, দাড়ি যেমন তেমনই থাকে। পরমহংস অবস্থায় কর্ম উঠে যায়। স্মরণ মনন থাকে। সর্বদাই মনের যোগ। যদি কর্ম করে, সে লোকশিক্ষার জন্ম।

১৪। কর্মের দ্বারাই যোগ হোক, আর মনের দ্বারাই যোগ হোক, ভক্তি হ'লে সব জানতে পারা যায়। ভক্তিতে কুস্তক আপনি হয়,—একাগ্র মন হ'লেই বায়ু স্থির হ'য়ে যায়; আর বায়ু স্থির হ'লেই মন একাগ্র হয়, বুদ্ধি স্থির হয়। যার হয়, সে নিজে টের পায় না।

১৫। তাঁর জন্ম কাঁদতে পারলে দর্শন হয়,—সমাধি হয়। যোগে সিদ্ধ হ'লেই সমাধি। কাঁদলে কুস্তক আপনি হয়;—তারপর সমাধি।

১৬। মন স্থির না হ'লে যোগ হয় না, যে পথেই যাও।

মন যোগীর বশ ; যোগী মনের বশ নয় । মন স্থির হ'লে বায়ু স্থির হয়,—কুস্তক হয় । এই কুস্তক ভক্তিয়োগেতেও হয় ; ভক্তিতে বায়ু স্থির হ'য়ে যায় । “নিতাই আমার মাতা হাতী !” “নিতাই আমার মাতা হাতী !” এই কথা বলতে বলতে যখন ভাব হ'য়ে যায়, তখন সব কথাগুলো ব'লতে পারে না ; কেবল বলে “হাতী” “হাতী”, তার পর শুধু “হা” । ভাব হ'লে বায়ু স্থির হয়, কুস্তক হয় । একজন ঝাঁট দিচ্ছে, এমন সময় একজন লোক এসে বলে, “ওগো, তমুক নেই, মারা গেছে ।” যে ঝাঁট দিচ্ছে, তার যদি আপনার লোক না হয়, তাহ'লে সে ঝাঁট দিতে থাকে, আর মাঝে মাঝে বলে, “আহা ! তাই তো গো, লোকটা মারা গেল ! বেশ ছিল !” এদিকে ঝাঁটও চলছে । আর যদি আপনার লোক হয়, তাহ'লে ঝাঁটা হাত থেকে প'ড়ে যায় ; আর “এঁ্যা” ব'লে বসে পড়ে । তখন বায়ু স্থির হ'য়ে গেছে ; তখন আর কোনও কাজ বা চিন্তা ক'রতে পারে না । মেয়েদের ভিতর দেখ নাই ? যদি কেউ অবাক হ'য়ে একটা জিনিস দেখে বা একটা কথা শুনে, তখন অন্য মেয়েরা বলে, “তোরা ভাব লেগেছে না কি লো ?” এখানেও বায়ু স্থির হয়েছে । তাই অবাক হ'য়ে হাঁ ক'রে থাকে । ভাবেতে মানুষ অবাক হয়, বায়ু স্থির হ'য়ে যায়, আপনি কুস্তক হয় । যেমন বন্দুকের গুলি ছোড়বার সময় যে ব্যক্তি গুলি ছোড়ে, সে বাক্যশূন্য হয় ও তার বায়ু স্থির হ'য়ে যায় ।

১৭। মন স্থির না হ'লে যোগ হয় না। সংসার-হাওয়া মনরূপ দীপকে সর্বদা চঞ্চল ক'রছে। ঐ দীপটা যদি আদপে না নড়ে, তাহ'লে ঠিক যোগের অবস্থা হ'য়ে যায়।

১৮। ক্ষণকাল তাঁর সঙ্গে যোগ হ'লেই মুক্তি। আন্তরিক তাঁর কাছে প্রার্থনা ক'রলে তাঁতে মন হয় ;—ঈশ্বরের পাদ-পদ্মে শুদ্ধাভক্তি হয়।

১৯। যোগীর মন সর্বদাই ঈশ্বরেতে থাকে,—সর্বদাই আত্মস্থ। চক্ষু ফ্যালফেলে ; চক্ষু দেখলেই বুঝা যায়। যেমন পাখী ডিমে তা দিচ্ছে, সব মনটা সেই ডিমের দিকে ; উপরে নামমাত্র চেয়ে রয়েছে।

২০। যোগীও পরমাত্মাকে সাক্ষাৎকার ক'রতে চেষ্টা করে। উদ্দেশ্য,—জীবাত্মা ও পরমাত্মার যোগ। যোগী বিষয় থেকে মন কুড়িয়ে লয় ও পরমাত্মাতে মন স্থির ক'রতে চেষ্টা করে। তাই প্রথম অবস্থায় নির্জনে, স্থির আসনে, অনন্যমন হ'য়ে ধ্যান চিন্তা করে।

২১। অভ্যাসযোগের দ্বারা কামিনী-কাঞ্চনে আসক্তি ত্যাগ করা যায়, গীতায় এ কথা আছে। অভ্যাস দ্বারা মনে অসাধারণ শক্তি এসে পড়ে। তখন ইন্দ্রিয়-সংযম ক'রতে,—কাম, ক্রোধ বশ ক'রতে,—কষ্ট হয় না। যেমন কচ্ছপ হাত পা টেনে নিলে আর বার করে না। কুড়ুল দিয়ে চারখানা ক'রে কাটলেও আর বার করে না।

২২। এই মায়া জীব জগৎ পার হ'য়ে গেলে, তবে নিত্যতে

পৌছান যায়। নাদ ভেদ হ'লে তবে সমাধি হয়। ঔঁকার সাধন ক'রতে ক'রতে নাদভেদ হয় আর সমাধি হয়।

২৩। শব্দ ব্রহ্ম। ঋষি মুনিরা ঐ শব্দ লাভের জন্য তপস্যা ক'রতেন। সিদ্ধ হ'লে শুনতে পায়, নাভি থেকে ঐ শব্দ আপনি উঠছে,—অনাহত শব্দ। একমতে শুধু শব্দ শুনলে কি হ'বে? দূর থেকে শব্দ কল্লোল শোনা যায়। সেই শব্দ কল্লোল ধ'রে গেলে সমুদ্রে পৌছান যায়। যে কালে কল্লোল আছে, সে কালে সমুদ্রও আছে। অনাহত ধ্বনি ধ'রে ধ'রে গেলে তার প্রতিপাচ্চ ব্রহ্ম, তাঁর কাছে পৌছান যায়। তাকেই পরমপদ ব'লেছে। 'আমি' থাকতে ওরূপ দর্শন হয় না। যেখানে 'আমি'ও নাই, 'তুমি'ও নাই, একও নাই, অনেকও নাই, সেইখানেই এই দর্শন।

২৪। হঠযোগীরা দেহাভিমানী সাধু। কেবল নেতি ধৌতি ক'রছে,—কেবল দেহের যত্ন। ওদের উদ্দেশ্য—আয়ু বুদ্ধি করা। দেহ নিয়ে রাত দিন সেবা। ও ভাল নয়।

২৫। শরীর, টাকা, এ সব অনিত্য। এর জন্য এত কেন? দেখ না, হঠযোগীদের দশা? শরীর কিসে দীর্ঘায়ু হ'বে, এই দিকেই নজর। ঈশ্বরের দিকে লক্ষ্য নাই। নেতি ধৌতি,—কেবল পেট সাফ ক'রছেন! নল দিয়ে দুধ গ্রহণ ক'রছেন! একজন স্মাক্‌রা, তার তালুতে জিভ্‌ উল্টে গিয়েছিল। তখন তার জড়সমাধির মত হ'য়ে গেল। আর নাড়ে চড়ে না। অনেকদিন ঐ ভাবে ছিল। সকলে এসে

পূজা ক'রতো । কয়েক বৎসর পরে তার জিভ্ হঠাৎ সোজা হ'য়ে গেল । তখন আগেকার মত চৈতন্য হ'লো ; আবার স্মাক্রার কাজ ক'রতে লাগলো । ওসব শরীরের কার্য্য ;—ওতে প্রায় ঈশ্বরের সঙ্গে সম্বন্ধ থাকে না ।

২৬ । কারও কারও যোগীর লক্ষণ দেখা যায় । কিন্তু তাদেরও সাবধান হওয়া উচিত । কামিনী-কাঞ্চনই যোগের ব্যাঘাত । যোগভ্রষ্ট হ'য়ে সংসারে এসে পড়ে ; হয়ত ভোগের বাসনা কিছু ছিল । সেইগুলো হ'য়ে গেলে আবার ঈশ্বরের দিকে যাবে,—আবার সেই যোগের অবস্থা । সট্কা কল জান ? ওদেশে আছে । বাঁশ নুইয়ে রাখে ; তাতে বড়সী লাগান দড়ী বাঁধা থাকে ; বড়সীতে টোপ দেওয়া হয় ; মাছ যাই টোপ খায়, অমনি সরাৎ ক'রে বাঁশটা উঠে পড়ে । যেমন উপরে উচু দিকে মুখ ছিল, সেইরূপই হ'য়ে যায় ।

২৭ । যোগভ্রষ্ট হ'লে ভাগ্যবানের ঘরে জন্ম হয়,—তারপর আবার ঈশ্বরের জন্ম সাধনা করে । পূর্বজন্মে ঈশ্বরচিন্তা ক'রতে ক'রতে হয়ত হঠাৎ ভোগ ক'রবার লালসা হ'য়েছে । একরূপ হ'লে যোগভ্রষ্ট হয়, আর পরজন্মে ঐরূপ জন্ম হয় । কামনা থাকতে, ভোগ লালসা থাকতে মুক্তি নাই । তাই খাওয়া পরা, রমণ ফমন, সব ক'রে নেবে । ভোগ লালসা থাকা ভাল নয় । আমি সেইজন্ম যা যা মনে উঠতো, অমনি ক'রে নিতাম ।

ধ্যানতত্ত্ব ।

১। ধ্যানের অবস্থা কি রকম জান ? মনটি হয়ে যায় তৈলধারার ন্যায় ;—এক চিন্তা, ঈশ্বরের ; অন্য কোন চিন্তা তার ভিতর আসবে না ।

২। ধ্যান করবার সময় তাঁতে মগ্ন হতে হয় । উপর উপর ভাসলে কি জলের নীচের রত্ন পাওয়া যায় ? স্তুমুখে ঢাক ঢোল বাজাতে বাজাতে মহা জাঁকজমকে একটি বর আসছে ; পাশে একটা ব্যাধ এক মনে আপনার লক্ষ্যের দিকে চেয়ে আছে । এমন যে জাঁকজমকে বর আসছে, তার দিকে সে একবারও চেয়ে দেখছে না । তুমি যখন ধ্যানে বসবে, তখন যেন ঐ রকম লক্ষ্য হয় । একজন মাছ ধ'রছে, অবধূত তার কাছে গিয়ে জিজ্ঞাসা করলেন, “ভাই ! অমুক জায়গা কোন্ পথে যাব ?” তখন তার ফাৎনায় মাছ খাচ্ছে, সে কোন উত্তর না দিয়ে আপনার মনে মাছের দিকে লক্ষ্য ক'রে রইল । কাজ শেষ ক'রে পেছন ফিরে ব'ললে, “আপনি কি বলছেন ?” অবধূত প্রণাম করে বললেন, “আপনি আমার গুরু, আমি যখন পরমাত্মার ধ্যানে বসবো, তখন যেন এই রকম আপন কাজ শেষ না ক'রে অগ্ন্যদিকে মন না দিই ।”

৩। গভীর ধ্যানে বাহ্যজ্ঞান শূন্য হয় ; ধ্যানে একাগ্রতা হয়, 'অন্য কিছু দেখা যায় না, শুনাও যায় না, স্পর্শবোধ পর্য্যন্ত হয় না। সাপ গায়ের উপর দিয়ে চলে যায়, জানতে পারে না। যে ধ্যান করে, সেও বুঝতে পারে না ; সাপটাও জানতে পারে না।

৪। গভীর ধ্যানে ইন্দ্রিয়ের কাজ সব বন্ধ হয়ে যায়। মন বহিমুখ থাকে না, যেন বা'র বাড়ীতে কপাট পড়লো। ইন্দ্রিয়ের পাঁচটি বিষয়,—রূপ, রস, গন্ধ, স্পর্শ, শব্দ,—বাহিরে পড়ে থাকবে। ধ্যানের সময় প্রথম প্রথম ইন্দ্রিয়ের বিষয় সকল সামনে আসে। গভীর ধ্যানে সে সকল আর আসে না। বাহিরে প'ড়ে থাকে।

৫। ধ্যান করবে মনে, কোণে ও বনে।

৬। ঈশ্বরচিন্তা যত লোকে টের না পায়, ততই ভাল।

৭। সব কাজ ফেলে সন্ধ্যার সময় তোমরা তাঁকে ডাকবে। অন্ধকারে ঈশ্বরকে মনে পড়ে। সব এই দেখা যাচ্ছিল, কে এরূপ করলে ? মুসলমানেরা দেখ, সব কাজ ফেলে ঠিক সময়ে নমাজটি পড়বে।

৮। হৃদয় ডঙ্কাপেটা জায়গা। হৃদয়ে ধ্যান হতে পারে, অথবা সহস্রারে ; এগুলি আইনের ধ্যান,—শাস্ত্রে আছে। তবে তোমার যেখানে অভিরুচি ধ্যান করতে পার। সব স্থানই ত ব্রহ্মময়। কোথায় তিনি নাই ? যখন বলির কাছে তিন পায় নারায়ণ স্বর্গ, মর্ত্য ও পাতাল ঢেকে ফেল্লেন,

তখন কি কোন স্থান বাকী ছিল ? গঙ্গাতীরও যেমন পবিত্র, আবার যেখানে খারাপ মাটি আছে, সেও তেমনি পবিত্র । আবার আছে, এ সমস্ত তাঁরই বিরাট মূর্তি ।

৯ । আর এক আছে ধ্যান,—সহস্রারে শিব বিশেষরূপে আছেন, তাঁর ধ্যান । শরীর সরা, মন বুদ্ধি জল । এই জলে সেই সচ্চিদানন্দ সূর্যের প্রতিবিম্ব পড়ে । সেই প্রতিবিম্ব-সূর্য্য ধ্যান করতে করতে সত্য-সূর্য্য তাঁর রূপায় দর্শন হয় ।

১০ । দেখ, ধ্যান করতে বসবার আগে, একবার (আপনাকে দেখাইয়া) একে ভেবে নিবি । কেন বলছি ? এখানকার উপর তাদের বিশ্বাস আছে কি না ? একে ভাবলেই তাঁকে (ভগবানকে) মনে পড়ে যাবে । ঐ যে গো, যেমন গরুর পাল দেখলেই রাখালকে মনে পড়ে, ছেলেকে দেখলেই তার বাপের কথা মনে পড়ে, উকিল দেখলেই কাছারির কথা মনে পড়ে, সেই রকম, বুঝলে কি না ? মন নানান্ জায়গায় ছড়িয়ে থাকে কি না ? একে ভাবলেই মনটা এক জায়গায় গুটিয়ে আসবে, আর সেই মনে ঈশ্বরকে চিন্তা করলে তাতে ঠিক ঠিক ধ্যান লাগবে ।

১১ । ওগো, তখন তখন ইষ্টচিন্তা করবার আগে ভাবতুম, যেন মনের ভিতরটা বেশ ক'রে ধুয়ে দিচ্ছি ; মনের ভিতর নানান্ আবর্জনা, ময়লা, মাটি (চিন্তা, বাসনা, এই সব) থাকে কি না ? সেগুলো সব বেশ ক'রে ধুয়ে ধেয়ে সাফ ক'রে, তার ভিতর ইষ্টকে এনে বসাবি । এই রকম ক'রো ।

১২। স্মরণ মনন থাকলেই হ'লো। ইহাতেই ধ্যান হয়। বিষয়ীদের পূজা, জপ, তপ, যখনকার তখন। যারা ভগবান্ বই জানে না, তারা নিশ্বাসের সঙ্গে তাঁর নাম করে। কেউ মনে মনে সর্বদাই 'রাম ওঁ রাম' জপ করে। জ্ঞান-পথের লোকেরা 'সোহিং'ও জপ করে। কারও কারও সর্বদাই জিহ্বা নড়ে। সর্বদাই স্মরণ মনন থাকা উচিত।

১৩। দেখ, আমি তখন তখন ভাবতুম, ভগবান্ যেন সমুদ্রের জলের মত সব জায়গা পূর্ণ ক'রে রয়েছেন, আর আমি যেন একটি মাছ, সেই সচ্চিদানন্দসাগরে ডুবছি, ভাসছি, সাঁতার দিচ্ছি; আবার কখনও মনে হ'তো, আমি যেন একটি কুম্ভ, সেই জলে ডুবে র'য়েছি, আর আমার ভিতরে বাহিরে সেই অখণ্ড সচ্চিদানন্দ পূর্ণ হ'য়ে রয়েছেন।

১৪। ঞ্চাংটা জ্ঞানীর ধ্যানের কথা ব'লত। জলে জল, অধো উর্দ্ধ পরিপূর্ণ; জীব যেন মীন, সেই জলে আনন্দে সাঁতার দিচ্ছে; ঠিক ধ্যান হ'লে এইটি সত্য সত্য দেখবে। অনন্ত সমুদ্র; জলের অবধি নাই। তার ভিতরে যেন একটি ঘট রয়েছে; বাহিরে ভিতরে জল। জ্ঞানী দেখে, অন্তরে বাহিরে সেই পরমাত্মা। তবে ঘটটি কি? ঘট আছে ব'লে জল দুই ভাগ দেখাচ্ছে; অন্তর বাহির বোধ হ'চ্ছে। 'আমি' ঘট থাকলে এই বোধ হয়। ঐ 'আমি'টি যদি যায়, তা'হলে যা আছে তাই, মুখে বলবার কিছু নাই।

১৫। জ্ঞানীর ধ্যান আর কি রকম জান? অনন্ত

আকাশ, তাতে পাখী আনন্দে উড়ছে, পাখা বিস্তার ক'রে।
চিদাকাশ আত্মাপাখী। পাখী খাঁচায় নাই, চিদাকাশে
উড়ছে ; আনন্দ ধরে না।

১৬। নিরাকার ধ্যান বড় কঠিন। সে ধ্যানে যা কিছু
দেখছ, শুনছ, লীন হ'য়ে যাবে ; কেবল স্ব-স্বরূপ চিন্তা।
সেই স্বরূপ চিন্তা ক'রে শিব নাচেন ; 'আমি কি', 'আমি কি',
এই ব'লে নাচেন। একে বলে শিবযোগ। ধ্যানের সময়
কপালে দৃষ্টি রাখতে হয়। নেতি নেতি ক'রে জগৎ ছেড়ে
স্ব-স্বরূপ চিন্তা।

১৭। তাঁকে ধ্যান ক'রতে হ'লে, প্রথমে উপাধিশূন্য তাঁকে
ধ্যান করবার চেষ্টা করা উচিত। তিনি নিরূপাধি, বাক্য-
মনের অতীত। কিন্তু এ ধ্যানে সিদ্ধ হওয়া বড় কঠিন।
তিনি মানুষে অবতীর্ণ হন ; তখন ধ্যানের খুব সুবিধা।
মানুষের ভিতর নারায়ণ। দেহটি আবরণ, যেন লণ্ঠনের ভিতর
আলো জ্বলছে ; অথবা সার্সির ভিতর বহুমুখ জিনিস দেখছি।

১৮। আর এক আছে বিষ্ণুযোগ। নামাগ্রে দৃষ্টি,
অর্দেক জগতে, অর্দেক অন্তরে। সাকার ধ্যানে এইরূপ হয়।

১৯। যদি বল, কোন্ মূর্তির চিন্তা করব ? যে মূর্তি ভাল
লাগে, তারই ধ্যান করবে। কিন্তু জানবে যে, সবই এক।
কারও উপর বিদ্বেষ করতে নাই। শিব, কালী, হরি,—সবই
একেরই ভিন্ন ভিন্ন রূপ। যে এক করেছে, সেই ধন্য। বহিঃ
শৈব, হৃদে কালী, মুখে হরিবোল !

২০। ধ্যান করবার সময় ভাববে, যেন মনকে রেশমের রশি দিয়ে ইষ্টের পাদপদ্মে বেঁধে রেখেছ ; যেন সেখান থেকে আর কোথাও যেতে না পারে। রেশমের দড়ি বলছি কেন ? সে পাদপদ্ম যে বড় নরম ; অন্য দড়ি দিয়ে বাঁধলে লাগবে, —তাই। ধ্যান করবার সময় ইষ্টচিন্তা ক'রে, তারপর কি অন্য সময় ভুলে থাকতে হয় ? কতকটা মন সেইদিকে সর্বদা রাখবে। দেখেছ ত, দুর্গাপূজার সময় একটা যাগ্‌প্রদীপ জ্বলতে হয় ; ঠাকুরের কাছে সর্বদা একটা জ্যোৎ (জ্যোতিঃ) রাখতে হয় ; সেটাকে নিভতে দিতে নাই। নিভলে গেরস্তোর অকল্যাণ হয়। সেই রকম হৃদয়পদ্মে ইষ্টকে এনে বসিয়ে তাঁর চিন্তারূপ যাগ্‌প্রদীপ সর্বদা জ্বলে রাখতে হয়। সংসারের কাজ ক'রতে ক'রতে মাঝে মাঝে ভিতরে চেয়ে দেখতে হয়, সে প্রদীপটা জ্বলছে কি না !

২১। ধ্যান যে ঠিক হচ্ছে, তার লক্ষণ আছে। একটি লক্ষণ, মাথায় পাখী ব'সবে, জড় মনে ক'রে। চক্ষু চেয়েও ধ্যান হয়। কথা কচ্ছে, তবুও ধ্যান হয় ; যেমন মনে কর, একজনের দাঁতের ব্যামো আছে, কন্ কন্ করে।

২২। সাধকের ধ্যানের সময় মধো মধো একরকম নিদ্রার মতন আসে ; তাকে যোগনিদ্রা বলে। সে অবস্থায় অনেক সাধক ভগবানের রূপ দেখতে পায়।

২৩। তাঁকে চিন্তা যত ক'রবে, ততই সংসারের সামান্য ভোগের জিনিসে আসক্তি কমবে। তাঁর পাদপদ্মে যত ভক্তি

হবে, ততই বিষয়-বাসনা কম পড়ে আসবে, ততই দেহের সুখের দিকে নজর কমবে ; পরস্ত্রীকে মাতৃবৎ বোধ হবে ; নিজের স্ত্রীকে ধর্মের সহায়, বন্ধু বোধ হবে ; পশুভাব চলে যাবে, দেবভাব আসবে ; সংসারে একবারে অনাসক্ত হয়ে যাবে । তখন সংসারে যদিও থাক, জীবন্মুক্ত হয়ে বেড়াবে ।

সত্যকথা ।

১। যার সত্যনিষ্ঠা আছে, সে সত্যের ভগবানকে পায় ।
যার সত্যনিষ্ঠা আছে, মা তার কথা কখনও মিথ্যা হতে দেন না ।

২। যারা বিষয়কর্ষ করে,—আফিসের কাজ, কি বাবসা,
—তাদেরও সত্যেতে থাকা উচিত । সত্যকথা কলির তপস্যা ।

৩। সত্যকথাই কলির তপস্যা । সত্যকে আঁট ক'রে
ধ'রে থাকলে ভগবান লাভ হয় । সত্যে আঁট না থাকলে,
ক্রমে ক্রমে সব নষ্ট হয়ে যায় । আমি এই ভেবে যদিও
কখনও ব'লে ফেলি যে বাহ্যে যাবো, যদি বাহ্যে নাও পায়,
তবুও একবার গাড়ুটা সঙ্গে ক'রে ঝাউতলার দিকে যাই ।
ভয় এই, পাছে সত্যের আঁট যায় । সব মাকে দিতে পারলুম,
'সত্য' মাকে দিতে পারলুম না ।

৪। সংসারে থাকতে গেলে, সত্যকথার খুব আঁট চাই ।
সত্যেতেই ভগবানকে লাভ করা যায় । রামের বাড়ী গেলুম
ক'লকাতায় ; বলে ফেলেছি 'লুচি খাব না ।' যখন খেতে
দিলে, তখন আবার ক্ষিদে পেয়েছে ; কিন্তু লুচি খাব না
ব'লেছি ; তখন মিঠাই দিয়ে পেট ভরাই ।

সরলতা । দশরথ কত সরল । নন্দ,—শ্রীকৃষ্ণের বাবা,—কত সরল । লোকে বলে, “আহা, কি স্বভাব, ঠিক যেন নন্দ ঘোষ ।”

৫ । সরল হ'লে ঈশ্বরকে সহজে পাওয়া যায় । সরল হ'লে উপদেশে শীঘ্র কাজ হয় । পাটকরা জমি,—যাতে কাঁকর কিছু নাই,—তাতে বীজ পড়লেই গাছ হয়, আর শীঘ্র ফল হয় ।

বিশ্বাস ।

১। তাঁর কাছে প্রার্থনা করতে হয়, ‘আমাকে ভক্তি, বিশ্বাস দাও ।’ বিশ্বাস হয়ে গেলেই হলো । বিশ্বাসের চেয়ে আর জিনিস নাই । বিশ্বাসের কত জোর তা ত শুনেছ । পুরাণে আছে, রামচন্দ্র, যিনি সান্ধাৎ পূর্ণব্রহ্ম নারায়ণ, তাঁর লঙ্কায় যেতে সেতু বাঁধতে হলো ; কিন্তু হনুমান রাম-নামে বিশ্বাস ক’রে লাফ দিয়ে সমুদ্রের পারে গিয়ে পড়ল ।

২। বালকের মত বিশ্বাস না হ’লে, ঈশ্বরকে পাওয়া যায় না । মা বলেছেন, ‘ও তোর দাদা ।’ বালকের অমনি বিশ্বাস যে, ‘ও আমার ষোল আনা দাদা’ । মা বলেছেন, ‘জুজু আছে’ ; তো ষোল আনা বিশ্বাস যে, ‘ও ঘরে জুজু আছে ।’ এইরূপ বালকের ঞায় বিশ্বাস দেখলে, ঈশ্বরের দয়া হয় । সংসার-বুদ্ধিতে ঈশ্বরকে পাওয়া যায় না ।

৩। ঈশ্বরলাভ হবে ব’লে, যে যেটা সরলভাবে, প্রাণের সহিত বিশ্বাস ক’রে অনুষ্ঠান করে, সেটাকে খারাপ বলতে নাই, নিন্দা করতে নাই । কারু ভাব নষ্ট করতে নাই । কেন না, যে কোনও একটা ভাব, ঠিক ঠিক ধরলে, তা থেকেই ভাবময় ভগবানকে পাওয়া যায় । যে যার ভাব ধ’রে তাঁকে

ডেকে যা। আর কারও ভাবের নিন্দা করিস্ নি, বা অপরের ভাবটা নিজের ব'লে নিতে যাস্ নি।

৪। কৰ্ম কর্তে গেলে আগে একটি বিশ্বাস চাই। সেই সঙ্গে জিনিসটি মনে ক'রে আনন্দ হয়। তবে সেই ব্যক্তি কাজে প্রবৃত্ত হয়। মাটির নীচে একঘড়া মোহর আছে, এই জ্ঞান, এই বিশ্বাস প্রথমে চাই। ঘড়া মনে ক'রে সেই সঙ্গে আনন্দ হয়; তারপর খোঁড়ে। খুঁড়তে খুঁড়তে ঠং শব্দ হলে আনন্দ বাড়ে। তারপর ঘড়ার কানা দেখা যায়। তখন আনন্দ আরও বাড়ে। এই রকম ক্রমে ক্রমে আনন্দ বাড়তে থাকে।

৫। 'ইনিই আমার ইষ্ট', এইটি ষোল আনা বিশ্বাস যদি হয়, তাঁকে লাভ হয়, দর্শন হয়। আগেকার লোকের খুব বিশ্বাস ছিল।

৬। 'তাঁর কৃপায় তাঁকে এ জন্মেই পাব, এখনই পাব', মনে এই রকম জোর রাখতে হয়, বিশ্বাস রাখতে হয়। তা না হ'লে কি হয়?

৭। বিশ্বাস করো, নির্ভর করো, তাহ'লে নিজের কিছু করতে হবে না। মা কালী সব করবেন।

৮। সাধন বড় দরকার। তবে হবে না কেন? ঠিক বিশ্বাস যদি হয়, তাহলে আর বেশী খাটতে হয় না। গুরু-বাক্যে বিশ্বাস। ব্যাসদেব যমুনা পার হবেন, গোপীরা এসে উপস্থিত। গোপীরাও পার হবে, কিন্তু খেয়া মিলছে না।

গোপীরা বলে, “ঠাকুর, এখন কি হবে ?” ব্যাসদেব বলেন, “আচ্ছা, তোদের পার করে দিচ্ছি, কিন্তু আমার বড়’খিদে পেয়েছে, কিছু আছে ?” গোপীদের কাছে দুধ, ক্ষীর, নবনী, অনেক ছিল ; সমস্ত ভক্ষণ করলেন । গোপীরা বলে, “ঠাকুর, পারের কি হলো ?” ব্যাসদেব তখন ধারে গিয়ে দাঁড়ালেন ; বলেন, “হে যমুনে, যদি আজ কিছু খেয়ে না থাকি, তাহ’লে তোমার জল ছ’ভাগ হয়ে যাবে, আর আমরা সব সেই পথ দিয়ে পার হয়ে যাব ।” বলতে না বলতে জল ছ’ধারে সরে গেল । গোপীরা অবাক ; তারা ভাবতে লাগল, উনি এই মাত্র এত খেলেন, আবার বলছেন, ‘যদি আমি কিছু খেয়ে না থাকি’ । এই দৃঢ় বিশ্বাস,—‘আমি না, হৃদয় মধ্য নারায়ণ, তিনি খেয়েছেন ।’

৯ । প্রধান কথা বিশ্বাস । “যেমন ভাব, তেমনি লাভ, মূল সে প্রত্যয় ।” বিশ্বাস হয়ে গেলে আর ভয় নাই । অনেকের গুরুর প্রয়োজন আছে । তবে গুরুবাক্যে বিশ্বাস করতে হয় । গুরুকে ঈশ্বরজ্ঞান করলে তবে হয় ।

১০ । সরল বিশ্বাসে কি না হয় । গুরুপুত্রের অনুরোধে শিষ্যেরা যে যেমন পারে উৎসবের আয়োজন করছে । একটি গরীব বিধবা, সেও শিষ্য । তার একটি গরু আছে, সে এক ঘটি দুধ এনেছে । গুরু মনে করেছিলেন যে, দুধ দধির ভার ঐ মেয়েটি লবে । বিরক্ত হয়ে সে যা এনেছিল ফেলে দিলেন, আর বললেন, “তুই জলে ডুবে মরতে পারিস নি ?” মেয়েটি

এই গুরুর আঞ্জা মনে করে নদীর ধারে ডুবতে গেল। তখন নারায়ণ দর্শন দিলেন; আর প্রসন্ন হয়ে বললেন, “এই পাত্রটিতে দধি আছে, যতই ঢালবে, ততই বেরুবে, গুরু সন্তুষ্ট হবেন।” সেই পাত্রটি দেওয়া হলে, গুরু অবাক্; আর সমস্ত বিবরণ শুনে নদীর ধারে এসে মেয়েটিকে বললেন, “নারায়ণকে যদি আমাকে দর্শন না করাও, তবে আমি এই জলেতে প্রাণত্যাগ করব।” নারায়ণ দর্শন দিলেন, কিন্তু গুরু দেখতে পেলেন না। মেয়েটি তখন বললে, “প্রভু গুরুদেবকে যদি দর্শন না দেন, আর তাঁর শরীর যদি যায়, ত আমিও শরীর ত্যাগ করব।” তখন নারায়ণ একবার গুরুকে দেখা দিলেন। দেখ, গুরুভক্তি থাকলে নিজেরও দর্শন হ’ল, আবার গুরুদেবেরও হ’ল। তাই বলি, ‘যতপি আমার গুরু শুঁড়ি বাড়ী যায়, তথাপি আমার গুরু নিত্যানন্দ রায়’। সকলেই গুরু হ’তে চায়। শিষ্য হতে বড় কেউ চায় না। কিন্তু দেখ, উঁচু জমিতে বৃষ্টির জল জমে না। নীচু জমিতে, খাল জমিতে জমে। গুরু যে নামটি দেবেন, বিশ্বাস ক’রে সে নামটি লয়ে সাধন ভজন করতে হয়। যে শামুকের ভিতর মুক্তা তয়ের হয়, সেই শামুক স্বাভিনক্ষত্রের বৃষ্টির জলের জন্য প্রস্তুত হয়ে থাকে। সেই জল পড়লে একেবারে অতল জলে ডুবে চলে যায়, যত দিন না মুক্তা হয়।

১১। অন্ধ বিশ্বাসটা কাকে বলিস্? আমাকে বোঝাতে পারিস্? বিশ্বাসের ত সবটাই অন্ধ। বিশ্বাসের আবার

চক্ষু কি ? হয় বল্ 'বিশ্বাস', আর নয় বল্ 'জ্ঞান' । তা নয়, বিশ্বাসের ভিতর আবার কতকগুলো অন্ধ, আর কতকগুলোর চোক আছে, এ আবার কি রকম ?

১২। বিশ্বাস যত বাড়বে, জ্ঞানও তত বাড়বে । যে গরু বেছে বেছে খায়, সে ছিড়িক্ ছিড়িক্ ক'রে দুধ দেয় ; আর যে গরু শাক, পাতা, খোসা, ভূষি, জাব, যা দাও, গব্গব্ ক'রে খায়, সে গরু হুড়্ হুড়্ ক'রে দুধ দেয় ।

১৩। শাক্তদের বিশ্বাস, 'কি ! একবার কালীনাম, দুর্গা-নাম করেছি, একবার রামনাম করেছি, আমার আবার পাপ !' বৈষ্ণবদের বড় দীনহীন ভাব, যারা কেবল মালা জপে, কেঁদে ককিয়ে বলে, 'হে কৃষ্ণ, দয়া কর, আমি অধম, আমি পাপী' । এমন জ্বলন্ত বিশ্বাস চাই যে, 'তঁার নাম করেছি, আমার আবার পাপ !' রাতদিন হরিনাম করে, আবার বলে, 'আমার পাপ' ।

১৪। তঁার নামে বিশ্বাস কর । তা হলে আর তীর্থাদিরও প্রয়োজন হবে না । ঠিক বিশ্বাসের দ্বারাষ্ট তাঁকে লাভ করা যায় । আর, সব বিশ্বাস করলে আরও শীঘ্র হয় । গুরু ভক্তকে বলে দিয়েছিলেন যে, 'রামই ঘট্ ঘট্মে লেটা' । ভক্তের অমনি বিশ্বাস ! যখন একটা কুকুর রুটি মুখে ক'রে পালাচ্ছে, তখন ভক্ত ঘিয়ের ভাঁড় হাতে ক'রে পেছু পেছু দৌড়াচ্ছে, আর বলছে, "রাম একটু দাঁড়াও, রুটিতে ঘি মাখান হয় নাই" ! বাহোর পর ঝাউতলা থেকে আসছি, পঞ্চবটীর দিকে ; দেখি, সঙ্গে একটা কুকুর আসছে । তখন পঞ্চবটীর কাছে একবার

দাঁড়াই, মনে করি, মা যদি একে দিয়ে কিছু বলান। তাই বলি, বিশ্বাসে সব মিলে।

১৫। বিশ্বাস নাই অথচ পূজা, জপ, সন্ধ্যাদি কৰ্ম করছে, তাতে কিছুই হয় না।

১৬। যার ঈশ্বরে বিশ্বাস আছে, সে যদি মহাপাতক করে,—গো, ব্রাহ্মণ, স্ত্রী হত্যা করে,—তবুও ভগবানে এই বিশ্বাসের বলে, ভারি ভারি পাপ থেকে উদ্ধার হতে পারে। সে যদি বলে, আর আমি এমন কাজ করব না, তার কিছুতেই ভয় হয় না।

ব্যাকুলতা ।

১। অনুরাগ হ'লে ঈশ্বরলাভ হয় । খুব ব্যাকুলতা চাই । খুব ব্যাকুলতা হ'লে সমস্ত মন তাঁতে গত হয় । বালকের মত বিশ্বাস । বালক মাকে দেখবার জন্য যেমন ব্যাকুল হয়, সেই ব্যাকুলতা । এই ব্যাকুলতা হ'ল তো, অরুণ উদয় হ'ল । তারপর সূর্য উঠবেই । এই ব্যাকুলতার পরেই ঈশ্বর দর্শন । জটিল বালকের কথা আছে । সে পাঠশালে যেত ; একটু বনের পথ দিয়ে পাঠশালে যেতে হতো ; তাই'সে ভয় পেত । মাকে বলতে মা বললে, “তোমার ভয় কি ? তুমি মধুসূদনকে ডাকবি ।” ছেলেটি জিজ্ঞাসা করলে, “মধুসূদন কে ?” মা বললে, “মধুসূদন তোমার দাদা হয় ।” তখন একলা যেতে যেতে যাই ভয় পেয়েছে, অমনি ডেকেছে, ‘দাদা মধুসূদন’ । কেউ কোথাও নাই । তখন উচ্চৈঃস্বরে কাঁদতে লাগল “কোথায় দাদা মধুসূদন ? তুমি এস, আমার বড় ভয় হচ্ছে ।” ঠাকুর তখন থাকতে পারলেন না ; এসে বললেন, “এই যে আমি, তোমার ভয় কি ?” এই বলে সঙ্গে করে পাঠশালার রাস্তা পর্যন্ত পৌঁছে দিলেন ; আর বললেন, “তুমি যখন ডাকবি আমি আসব । ভয় কি ?” এই বালকের বিশ্বাস,

এই ব্যাকুলতা। একটি ব্রাহ্মণের বাড়ীতে ঠাকুরের সেবা ছিল। একদিন কোন কাজ উপলক্ষে, তার অন্তস্থানে যেতে হয়েছিল। তখন ছোট ছেলেটিকে বলে গেল, “তুই আজ ঠাকুরের ভোগ দিস্ ; ঠাকুরকে খাওয়াবি।” ছেলেটি ঠাকুরকে ভোগ দিল। ঠাকুর কিন্তু চুপ করে বসে আছেন। কথাও কন না, খানও না। ছেলেটি অনেকক্ষণ বসে বসে দেখলে যে, ঠাকুর উঠছেন না। সে ঠিক জানে যে ঠাকুর এসে আসনে বসে খাবেন। তখন সে বারবার বলতে লাগল, “ঠাকুর, এসে খাও ; অনেক দেৱী হ’ল ; আর আমি বসতে পারি না।” ঠাকুর কথা কন না। তখন ছেলেটি কান্না আরম্ভ করলে। বলতে লাগল, “ঠাকুর, বাবা তোমাকে খাওয়াতে বলে গেছেন ; তুমি কেন আসবে না, তুমি কেন আমার কাছে খাবে না ?” ব্যাকুল হয়ে যাই খানিকক্ষণ কেঁদেছে, অমনি ঠাকুর হাসতে হাসতে এসে আসনে বসে খেতে লাগলেন। ঠাকুরকে খাইয়ে যখন ঠাকুরঘর থেকে সে গেল, বাড়ীর লোকেরা বললে, “ভোগ হয়ে গেছে, সে সব নামিয়ে আন।” ছেলেটি বললে, “হঁা হয়ে গেছে ; ঠাকুর খেয়ে গেছেন।” তারা বললে, “সে কিরে ?” ছেলেটি সরলবুদ্ধিতে বললে, “কেন ঠাকুর ত খেয়ে গেছেন !” তখন ঠাকুরঘরে গিয়ে দেখে সকলে অবাক্ !

২। একজন জিজ্ঞাসা করেছিল, “ঈশ্বরকে কেমন ক’রে পাওয়া যায় ?” গুরু বললে, “এসো আমার সঙ্গে, তোমাকে দেখিয়ে দিই, কি হলে ঈশ্বরকে পাওয়া যায়।” এই বলে

একটা পুকুরে নিয়ে গিয়ে তাকে জলে চুবিয়ে ধরলে।
খানিকক্ষণ পরে তাকে ছেড়ে দেওয়ার পর, শিষ্যকে জিজ্ঞাসা
করলে, “তোমার প্রাণটা কি রকম কচ্ছিলো?” সে বললে,
“প্রাণ যায় যায় হচ্ছিলো।”

৩। ঈশ্বরের জন্তু প্রাণ আট্ট বাট্ট করলে জানবে যে,
দর্শনের আর দেৱী নাই। অরুণ উদয় হলে, পূর্বদিক লাল
হলে, বুঝা যায় সূর্য উঠবে।

৪। ব্যাকুলতা হ'লেই অরুণ উদয় হ'ল। তারপর সূর্য
দেখা দিবেন। ব্যাকুলতার পরই ঈশ্বরদর্শন। তিন টান
হলে তবে তিনি দেখা দেন,—বিষয়ীর বিষয়ের উপর টান,
মায়ের সন্তানের উপর টান, আর সতীর পতির উপর টান।
এই তিন টান যদি কারুর এক সঙ্গে হয়, সেই স্টানের জোরে
ঈশ্বরকে লাভ করতে পারে। কথাটা এই, ঈশ্বরকে
ভালবাস্তে হবে।

৫। আন্তরিক ঈশ্বরকে যে জানতে চাইবে তারই হবে,
হবেই হবে। যে ব্যাকুল, ঈশ্বর বই আর কিছু চায় না,
তারই হবে।

৬। যে পথেই থাক, ব্যাকুল হয়ে তাঁকে ডাকা চাই।
তিনি ত অন্তর্যামী, সে আন্তরিক ডাক শুনবেনই শুনবেন।
ব্যাকুল হয়ে সাকারবাদীর পথেই যাও, আর নিরাকারবাদীর
পথেই যাও, তাঁকেই পাবে। মিছরির রুটি,—সিধে ক'রেই
খাও, আর আড় ক'রেই খাও, মিষ্ট লাগবেই।

৭। ঈশ্বরের জন্ম প্রাণ ব্যাকুল হবে, যেমন ব্যাকুল হয়ে 'বৎসের পিছে গাভী ধায়।' ব্যাকুলতার সঙ্গে কাঁদ। আর বিবেক বৈরাগ্য এনে যদি কেউ সর্বত্যাগ করতে পারে, তা হলে সাক্ষাৎকার হবে। সে ব্যাকুলতা এলে উন্মাদের অবস্থা হয়, তা জ্ঞানপথেই থাক, আর ভক্তিপথেই থাক। দুর্বাসার জ্ঞানোন্মাদ হয়েছিল।

৮। ব্যাকুল হয়ে তাঁর জন্ম কাঁদতে পার? লোকে ছেলের জন্ম, স্ত্রীর জন্ম, টাকার জন্ম, এক ঘটি কাঁদে; কিন্তু ঈশ্বরের জন্ম কে কাঁদছে? যতক্ষণ ছেলে চুষি নিয়ে ভুলে থাকে, মা রান্না বান্না বাড়ীর কাজ সব করে। ছেলের যখন চুষি আর ভাল লাগে না, চুষি ফেলে চীৎকার করে কাঁদে, তখন মা ভাতের ঠাঁড়ি নামিয়ে ছুড়ছুড় করে এসে ছেলেকে কোলে নেয়।

৯। ঈশ্বরকে লাভ করতে গেলে পাগল হতে হয়। তবে কামিনী-কাঞ্চনে মন থাকলে হয় না। কামিনীর সঙ্গে রমণ, তাতে কি সুখ আছে? ঈশ্বরকে দর্শন হলে, রমণ সুখের কোটীগুণ আনন্দ হয়। গৌরী বলত, মহাভাব হ'লে শরীরের সব ছিদ্র, লোমকূপ পর্য্যন্ত, মহাযোনি হয়ে যায়; এক একটি ছিদ্রে আত্মার সহিত রমণ সুখ বোধ হয়।

১০। ব্যাকুলতা চাই। যখন ছেলে বিষয়ের ভাগের জন্ম ব্যতিব্যস্ত করে, তখন বাপ মা দুজনে পরামর্শ করে, আর ছেলেকে আগেই হিষ্টি ফেলে দেয়। ব্যাকুল হলে তিনি

শুন্বেনই শুন্বেন । তিনি যে কালে জন্ম দিয়াছেন, সে কালে তাঁর ঘরে আমাদের হিষ্টিয়া আছে । তিনি আপনার বাঁপ, আপনার মা । তাঁর উপর জোর খাটে । “দাও পরিচয় ! নয় গলায় ছুরি দিব ।” আমি মা বলে এইরূপে ডাক্তাম, “মা আনন্দময়ি, দেখা দিতে যে হবে ।” আবার কখনও বল্তাম, “ওহে দীননাথ, জগন্নাথ, আমি ত জগৎ ছাড়া নই নাথ । আমি জ্ঞানহীন, সাধনহীন, ভক্তিহীন, আমি কিছুই জানি না ; দয়া ক’রে দেখা দিতে হবে ।”

১১ । মা’র কাছে ব্যাকুল হয়ে ডাক । তাঁর দর্শন হলে বিষয়রস শুকিয়ে যাবে ; কামিনী-কাঞ্চনে আসক্তি সব দূরে চলে যাবে । আপনার মা বোধ থাকলে এক্ষণই হয় । তিনি ত ধর্ম মা নন । তিনি আপনারই মা । ব্যাকুল হয়ে মা’র কাছে আদ্যার কর । তিনি অবশ্য দেখা দিবেন ।

১২ । ব্যাকুল হয়ে তাঁকে প্রার্থনা কর, যাতে তাঁর নামে কচি হয় । তিনিই মনোবাঞ্ছা পূর্ণ করবেন ।

১৩ । এই কর্মের দ্বারা তাঁকে পাওয়া যাবে, আর এ কর্মের দ্বারা পাওয়া যাবে না, তা নয় । তাঁর কৃপার উপর নির্ভর । তবে ব্যাকুল হয়ে কিছু কর্ম ক’রে যেতে হয় । ব্যাকুলতা থাকলে তাঁর কৃপা হয় ।

১৪ । তাঁর শরণাগত হও, আর ব্যাকুল হয়ে প্রার্থনা কর, যাতে অনুকূল হাওয়া বয়,—যাতে শুভযোগ ঘটে । ব্যাকুল হয়ে ডাকলে তিনি শুন্বেনই শুন্বেন । সব সুযোগ ক’রে দেবেন ।

সাধুসঙ্গ, বিবেক, সদগুরু লাভ ; হয়ত এক জন বড় ভাই
সংসারের ভার নিলে ; হয় ত স্ত্রীটি বিদ্যাশক্তি, বড় ধার্মিক ;
কি বিবাহ আদর্শই হল না, সংসারে বন্ধ হতে হল না :
এই সব যোগাযোগ হলে হয়ে যায়। এক জনের বাড়ীতে
ভারি অসুখ,—যায় যায়। কেউ বলে, “স্বাতীনক্ষত্রে বৃষ্টি
পড়বে সেই বৃষ্টির জল মড়ার মাথার খুলিতে থাকবে, আর
একটা সাপ ব্যাঙকে তেড়ে যাবে, ব্যাঙকে ছোবল মারবার
সময় ব্যাঙটা যাই লাফ দিয়ে পালাবে, অমনি সেই সাপের
বিষ মড়ার মাথার খুলিতে পড়ে যাবে ; সেই বিষে ঔষধ তৈয়ার
ক’রে যদি খাওয়াতে পার, তবে বাঁচে।” তখন যার বাড়ীতে
অসুখ, সেই লোক দিন ক্ষণ নক্ষত্র দেখে বাড়ী থেকে বেরলো,
আর ব্যাকুল হ’য়ে এ সব খুঁজতে লাগলো। মনে মনে
ঈশ্বরকে ডাক্ছে, “ঠাকুর তুমি যদি জোটপাট ক’রে দাও, তবেই
হয়!” এইরূপে যেতে যেতে সত্য সত্যই দেখতে পেলো,
একটা মড়ার খুলি পড়ে রয়েছে। দেখতে দেখতে এক পসলা
বৃষ্টিও হ’ল। তখন সে ব্যক্তি বল্ছে, “হে গুরুদেব ! মড়ার
মাথার খুলিও পেলুম, আবার স্বাতীনক্ষত্রে বৃষ্টিও হ’ল, সেই
বৃষ্টির জলও ঐ খুলিতে পড়েছে ; এখন কৃপা করে আর
কয়টির যোগাযোগ ক’রে দাও ঠাকুর !” ব্যাকুল হ’য়ে ডাক্ছে ;
এমন সময় দেখে একটা বিষধর সাপ আস্ছে। তখন সে
লোকটির ভারি আহ্লাদ হ’ল ; আর সে এত ব্যাকুল হ’ল যে
বুক ছুড়্ ছুড়্ করতে লাগলো। আর সে বলতে লাগলো, “হে

গুরুদেব ! এবার সাপও এসেছে ; অনেকগুলির যোগাযোগও হ'ল ; কৃপা করে এখন আর যেগুলি বাকী আছে, সেগুলি করিয়ে দাও !” বলতে বলতে ব্যাঙও এলো, সাপটা ব্যাঙ তাড়া ক'রে যেতেও লাগলো : মড়ার মাথার খুলির কাছে এসে যাই ছোবল দিতে যাবে, অমনি ব্যাঙটা লাফিয়ে ওদিকে গিয়ে প'ড়লো, আর বিষ অমনি খুলির ভিতর প'ড়ে গেল । তখন লোকটি আনন্দে হাততালি দিয়ে নাচতে লাগলো । তাই বলছি, ব্যাকুলতা থাকলে সব হ'য়ে যায় ।

১৫ । বালক যেমন মাকে না দেখলে দিশেহারা হয়, সন্দেশ মিঠাই হাতে দিয়ে ভোলাতে যাও, কিছুই চায় না, কিছুতেই ভোলে না, আর বলে, ‘না, আমি মা'র কাছে যাব’ ; সেই রকম ঈশ্বরের জন্ম ব্যাকুলতা চাই ! আহা ! কি অবস্থা ! বালক যেমন মা মা করে পাগল হয় ; কিছুতেই ভোলে না । যার সংসারে এ সব সুখ ভোগ আলুনি লাগে, যার আর কিছু ভাল লাগে না, টাকা, মান, দেহের সুখ, ইন্দ্রিয়ের সুখ যার কিছুই ভাল লাগে না, সেই আন্তরিক মা মা ক'রে কাতর হয় । তারই জন্মে মা'র আবার সকল কাজ ফেলে দৌড়ে আসতে হয় । এই ব্যাকুলতা । যে পথেই যাও, —হিন্দু, মুসলমান, খৃষ্টান, শাক্ত, ব্রহ্মজ্ঞানী,—যে পথেই যাও, ঐ ব্যাকুলতা নিয়েই কথা । তিনি ত অন্তর্যামী, ভুল পথে গিয়ে পড়লেও দোষ নাই, যদি ব্যাকুলতা থাকে, তিনিই আবার ভাল পথে তুলে লন । আর, সব পথেই ভুল আছে ;

সব্বাই মনে করে, আমার ঘড়ি ঠিক যাচ্ছে, কিন্তু কারও ঘড়ি ঠিক যায় না ; মাঝে মাঝে সূর্যের সঙ্গে ঘড়ি মিলিয়ে নিতে হয় । ব্যাকুলতা থাকলে সাধুসঙ্গ জুটে যায়, সাধুসঙ্গে নিজের ঘড়ি অনেকটা ঠিক ক'রে লওয়া যায় ।

১৬। ব্যাকুল না হলে তাঁকে দেখা যায় না । এই ব্যাকুলতা ভোগান্ত না হলে হয় না । যারা কামিনী-কাঞ্চনের মধ্যে আছে, ভোগান্ত হয় নাই, তাদের ব্যাকুলতা আসে না । ও দেশে হৃদয়ের ছেলে সমস্ত দিন আমার কাছে থাকত, চার পাঁচ বছরের ছেলে । আমার সামনে এটা ওটা খেলা করত, এক রকম ভুলে থাকত । যাই সন্ধ্যা হয় হয়, অমনি বলে 'মা যাব' । আমি কত বলতুম, 'পায়রা দোব' এই সব কথা ; সে ভুলত না, ঝেঁদে কেঁদে বলত, 'মা যাব ।' খেলা টেলা কিছুই ভাল লাগত না । আমি তার অবস্থা দেখে কাঁদতুম । এই বালকের মত ঈশ্বরের জন্ম কান্না । এই ব্যাকুলতা । আর খেলা, খাওয়া কিছুই ভাল লাগে না । ভোগান্তে এই ব্যাকুলতা ও তাঁর জন্ম কান্না ।

১৭। এত তীর্থ, এত জপ ক'রে হয় না কেন ? ব্যাকুলতা নাই । ব্যাকুল হয়ে তাঁকে ডাকলে তিনি দেখা দেন । যাত্রার গোড়ায় অনেক খচ মচ খচ মচ করে ; তখন শ্রীকৃষ্ণকে দেখা যায় না । তার পর নারদ ঋষি যখন ব্যাকুল হয়ে বৃন্দাবনে এসে, বীণা বাজাতে বাজাতে ডাকে আর বলে, "প্রাণ হে গোবিন্দ মম জীবন !" তখন কৃষ্ণ আর থাকতে পারেন না ।

রাখালদের সঙ্গে সামনে আসেন, আর বলেন, “ধবলী রও, ধবলী রও।”

১৮। রোজ তাঁকে ডাকা অভ্যাস করতে হয়। একদিনে হয় না। রোজ ডাকতে ডাকতে ব্যাকুলতা আসে। কেবল রাতদিন বিষয়-কর্ম করলে ব্যাকুলতা কেমন করে আসবে ?

সাকার ও নিরাকার ।

১। তিনি সাকারও বটে, আবার নিরাকারও বটে । আবার তা ছাড়া আরও কি, তা কে জানে ? সাকার কেমন জানিস্ ? যেমন, জল আর বরফ । জল জমেই বরফ হয় । বরফের ভিতরে বাহিরে জল । জল ছাড়া বরফ আর কিছুই নয় । কিন্তু দেখ, জলের রূপ নাই (একটা কোনও বিশেষ আকার নাই) । , কিন্তু বরফের আকার আছে । তেমনি ভক্তিব্রহ্মে অথগু সচ্চিদানন্দ-সাগরের জল জ'মে বরফের মত নানা আকার ধারণ করে ।

২। ঈশ্বর সাকার বলে কি হবে ? তিনি শ্রীকৃষ্ণের গায় মানুষের মত দেহ ধারণ ক'রে আসেন, এও সত্য,—নানা রূপ ধ'রে ভক্তকে দেখা দেন, এও সত্য । আবার তিনি নিরাকার, অথগু সচ্চিদানন্দ, এও সত্য । বেদে তাঁকে সাকার, নিরাকার, দুইই ব'লেছে । সগুণও ব'লেছে, নিগুণও ব'লেছে । কি রকম জান ? সচ্চিদানন্দ যেন অনন্ত সাগর ; ঠাণ্ডার গুণে যেমন সাগরের জল বরফ হ'য়ে ভাসে, নানা রূপ ধ'রে বরফের ঠাঁই সাগরের জলে ভাসে, তেমনি ভক্তিব্রহ্ম লেগে, সচ্চিদানন্দ

সাগরে সাকার মূর্ত্তি দর্শন হয়। ভক্তের জন্ম সাকার।
আবার জ্ঞানসূর্য্য উঠলে বরফ গ'লে যায়। আগেকার যেমন
জল, তেমনি জল। অধঃ, উর্দ্ধ, পরিপূর্ণ ; জলে জল।

৩। সাকার, নিরাকার,—তুই-ই সত্য। শুধু নিরাকার বলা
কিরূপ জান? যেমন রসুনচৌকীর একজন পোঁধ'রে থাকে,
তাব বাঁশীর সাত ফোকর সত্ত্বেও। কিন্তু আর একজন দেখ,
কত রাগ রাগিনী বাজায়। সেইরূপ সাকারবাদীরা, দেখ,
ঈশ্বরকে কতভাবে সম্ভোগ করে,—শান্ত, দাম্ভ, সখা, বাৎসল্য,
মধুর,—নানাভাবে।

৪। বেদান্ত বিচারের কাছে রূপ টুপ উড়ে যায়। সে
বিচারের শেষ সিদ্ধান্ত এই,—ব্রহ্ম সত্য, আর নামরূপযুক্ত
জগৎ মিথ্যা। যতক্ষণ 'আমি ভক্ত' এই অভিমান থাকে,
ততক্ষণই ঈশ্বরের রূপ দর্শন, আর ঈশ্বরকে বাক্তি ব'লে বোধ
সম্ভব হয়। বিচারের চক্ষে দেখলে, ভক্তের 'আমি' অভিমান
ভক্তকে একটু দূরে রেখেছে। কালীরূপ কি শ্যামরূপ
চৌদ্দপোয়া কেন? দূরে ব'লে। দূরে ব'লে সূর্য্য ছোট
দেখায়। কাছে যাও, তখন এত বড় দেখাবে যে, ধারণা
ক'রতে পারবে না। আবার, কালীরূপ কি শ্যামরূপ শ্যামবর্ণ
কেন? সেও দূরে ব'লে। যেমন দীঘির জল দূরে থেকে
সবুজ, নীল বা কাল বর্ণ দেখায়; কাছে গিয়ে হাতে ক'রে
জল তুলে দেখ, কোনও রঙই নাই। আকাশ দূরে দেখলে,
নীলবর্ণ; কাছে দেখ, কোনও রঙ নাই। তাই বলছি, বেদান্ত

বিচারে ব্রহ্ম নিগূর্ণ। তাঁর কি স্বরূপ, তা মুখে বলা যায় না। কিন্তু যতক্ষণ তুমি নিজে সত্য, ততক্ষণ জগৎও সত্য; ঈশ্বরের নানা রূপও সত্য। ঈশ্বরকে ব্যক্তি বোধও সত্য।

৫। 'ব্রহ্ম সত্য, জগৎ মিথ্যা' এই বিচারের পর সমাধি হ'লে রূপ টুপ উড়ে যায়। তখন আর ঈশ্বরকে ব্যক্তি ব'লে বোধ হয় না। কি তিনি, মুখে বলা যায় না। কে ব'লবে? যিনি ব'লবেন, তিনিই নাই। তিনি তাঁর 'আমি' আর খুঁজে পান না। তখন ব্রহ্ম নিগূর্ণ; তখন তিনি কেবল বোধে বোধ হন; মন বুদ্ধি দ্বারা তাঁকে ধরা যায় না।

৬। তাঁর ইতি করা যায় না। তিনি নিরাকার, আবার সাকার। ভক্তের জন্ম তিনি সাকার। যারা জ্ঞানী, অর্থাৎ জগৎকে যাদের স্বপ্নবৎ মনে হয়েছে, তাদের পক্ষে তিনি নিরাকার। ভক্ত জানে, 'আমি' একটি জিনিস, 'জগৎ' একটি জিনিস। তাই ভক্তের কাছে ঈশ্বর ব্যক্তি হয়ে দেখা দেন। জ্ঞানী,—যেমন বেদান্তবাদী,—কেবল নেতি নেতি বিচার করে। বিচার ক'রে জ্ঞানীর বোধে বোধ হয় যে, 'আমি'ও মিথ্যা, 'জগৎ'ও মিথ্যা, স্বপ্নবৎ। জ্ঞানী ব্রহ্মকে বোধে বোধ করে। তিনি যে কি, মুখে ব'লতে পারে না।

৭। ঈশ্বরের যত কাছে যাবে, ততই ধারণা হবে, তাঁর নামরূপ নাই। পেছিয়ে একটু দূরে এলে, আবার আমার শ্যামা না যেন ঘাস ফুলের রং। শ্যামা পুরুষ, না প্রকৃতি? যিনি শ্যামা, তিনিই ব্রহ্ম। যারই রূপ, তিনিই অরূপ! যিনি

সগুণ, তিনিই নিগুণ । ব্রহ্ম শক্তি, শক্তি ব্রহ্ম,—অভেদ ।
সচ্চিদানন্দময় আর সচ্চিদানন্দময়ী ।

৮ । তিনি সাকার, আবার নিরাকার । একজন সন্ন্যাসী
জগন্নাথ দর্শন ক'রতে গিয়েছিল । জগন্নাথ দর্শন ক'রে সন্দেহ
হ'লো, ঈশ্বর সাকার না নিরাকার । হাতে দণ্ড ছিল, সেই
দণ্ড দিয়ে দেখতে লাগলো, জগন্নাথের গায়ে ঠেকে কি না ।
একবার এধার থেকে ওধারে দণ্ডটি নিয়ে যাবার সময় দেখলে
যে, জগন্নাথের গায়ে ঠেকলো না । ছাথে যে, সেখানে
ঠাকুরের মূর্ত্তি নাই । আবার দণ্ড এধার থেকে ওধার নিয়ে
যাবার সময়, বিগ্নাহের গায়ে ঠেকলো । তখন সন্ন্যাসী বুঝল
যে, ঈশ্বর নিরাকার, আবার সাকার ।

৯ । তিনি অন্তরে বাহিরে আছেন । অন্তরে তিনিই
আছেন, তাই বেদে বলে, “তত্ত্বমসি” (সেই তুমি) । আর
বাহিরেও তিনি । মায়াতে দেখাচ্ছে, নানারূপ, কিন্তু বস্তুতঃ
তিনিই র'য়েছেন ; তাই সব নামরূপ বর্ণনা ক'রবার আগে
ব'লতে হয়, “ওঁ তৎসৎ ।”

১০ । যে ব্যক্তি সদা সর্বদা ঈশ্বরচিন্তা করে, সেইই
জানতে পারে, তাঁর স্বরূপ কি ? সে ব্যক্তিই জানে যে, তিনি
নানা রূপে দেখা দেন, নানা ভাবে দেখা দেন । তিনি সগুণ,
আবার তিনি নিগুণ । যে গাছতলায় থাকে, সেই জানে যে,
বহুরূপীর নানা রং ; আবার কখনও কখনও কোনও রঙই
থাকে না । অণু লোকে কেবল তর্ক, ঝগড়া ক'রে কষ্ট পায় ।

ভক্ত যে রূপটি ভালবাসে, সেই রূপে তিনি দেখা দেন : তিনি যে ভক্তবৎসল !

১১। যে ভক্ত যেরূপ দেখে, সে সেইরূপ মনে করে। বাস্তবিক কোনও গণ্ডগোল নাই। তাঁকে কোনও রকমে যদি একবার লাভ ক'রতে পারা যায়, তাহ'লে তিনি সব বুঝিয়ে দেন। সে পাড়াতেই গেলে না,—সব খবর পাবে কেমন ক'রে? একজন বাহো গিয়েছিল। সে দেখলে যে, গাছের উপর একটি জানোয়ার রয়েছে। সে এসে আর একজনকে বললে, “দেখ, অমুক গাছে একটি সুন্দর লাল রঙের জানোয়ার দেখে এলাম।” লোকটি উত্তর ক'রলে, “আমি যখন বাহো গিয়েছিলাম, আমিও দেখেছি; তা সে লাল রং হতে যাবে কেন? সে যে সবুজ রং।” আর একজন বললে, “না, না, আমি দেখেছি হল্‌দে।” এইরূপে আরও কেউ কেউ বললে, “না, জর্দা, বেগুনী, নীল, এই সব।” শেষে ঝগড়া। তখন তারা গাছতলায় গিয়ে দেখে একজন লোক ব'সে আছে। তাকে জিজ্ঞাসা করাতে সে বললে, “আমি এই গাছতলায় থাকি; আমি সে জানোয়ারটিকে বেশ জানি। তোমরা যা যা ব'ল্‌ছ, সব সত্য। সে কখনও লাল, কখনও সবুজ, কখনও হল্‌দে, কখনও নীল, আরও সব কত কি হয়। আবার কখনও দেখি, কোনও রং নাই।”

১২। ঈশ্বরকে লাভ না ক'রতে পারলে, এ সব বুঝা যায় না। সাধকের জন্ম তিনি নানাভাবে, নানারূপে দেখা দেন।

একজনের এক গামলা রং ছিল। অনেকে তার কাছে কাপড় রং করাতে আসতো। সে লোকটি জিজ্ঞাসা করতো, “তুমি কি রংএ ছোপাতে চাও?” একজন হয়ত বলে, “আমি লাল রংএ ছোপাতে চাই।” অমনি সেই লোকটি গামলার রংএ সেই কাপড়খানি ছুপিয়ে বলতো, “এই নাও তোমার লাল রংএ ছোপান কাপড়।” আর একজন বলে, “আমার হল্‌দে রংএ ছোপান চাই।” অমনি সেই লোকটি সেই গামলায় কাপড়খানি ডুবিয়ে বলতো, “এই নাও তোমার হল্‌দে রং।” কেউ নীল রংএ ছোপাতে চাইলে, আবার সেই একই গামলায় ডুবিয়ে সেই কথা, “এই নাও তোমার নীল রংএ ছোপান কাপড়।” এই রকমে যে যে রংএ ছোপাতে চাইত, তার কাপড় সেই রংএ সেই একই গামলা হ’তে ছোপান হ’তো। একজন লোক এই আশ্চর্য ব্যাপার দেখছিল। যার গামলা, সে জিজ্ঞাসা করলে, “কেমন হে, তোমার কি রংএ ছোপাতে হবে?” তখন সে বলে, “ভাই, তুমি যে রংএ রঙেছ, আমায় সেই রঙ দাও।”

১৩। নিরাকার সাধন হবে না কেন? তবে বড় কঠিন। কামিনী-কাঞ্চন ত্যাগ না হ’লে হয় না। বাহিরে ত্যাগ, আবার ভিতরে ত্যাগ। বিষয়বুদ্ধির লেশ থাকলে হবে না। সাকার সাধনা সোজা; তবে তেমন সোজা নয়। নিরাকার সাধনা জ্ঞানযোগের সাধন। ভক্তদের কাছে বলতে নাই। অনেক কষ্টে একটু ভক্তি হচ্ছে; সব স্বপ্নবৎ বলে, ভক্তির হানি হয়।

১৪। নিরাকার ছ'রকম আছে :—পাকা ও কাঁচা। পাকা নিরাকার উচু ভাব বটে; সাকার ধ'রে সে নিরাকারে পৌঁছাতে হয়। কাঁচা নিরাকারে চোখ বুজলেই অন্ধকার।

১৫। রূপ,—ঈশ্বরীয় রূপ,—অবিশ্বাস ক'রো না। রূপ আছে বিশ্বাস কর। তার পর যে রূপটি ভালবাস, সেই রূপ ধ্যান কর।

১৬। ঈশ্বরীয় রূপ মানতে হয়। জগদ্ধাত্রী রূপের মানে জান ? যিনি জগৎকে ধারণ ক'রে আছেন। তিনি না ধরলে, তিনি না পালন ক'রলে, জগৎ প'ড়ে যায়, নষ্ট হ'য়ে যায়, মনকরীকে যে বশ ক'রতে পারে, তারই হৃদয়ে জগদ্ধাত্রী উদয় হন। সিংহবাহিনীর সিংহ তাই হাতীকে জব্দ ক'রে র'য়েছে।

১৭। সব মানতে হয় গো,—নিরাকার, সাকার সব মানতে হয়। কালীঘরে ধ্যান ক'রতে ক'রতে দেখলুম, রমণী খান্‌কি, বল্লম, “মা, তুই এই রূপেও আছিস্!” তাই ব'ল্ছি,—সব মানতে হয়। তিনি কখন কিরূপে দেখা দেন, সামনে আসেন, বলা যায় না।

১৮। যেমন বাপের ফটোগ্রাফ দেখলে বাপকে মনে পড়ে, তেমনি প্রতিমায় পূজা ক'রতে ক'রতে সত্যের রূপ উদ্দীপন হয়। সাকার রূপ কি রকম জান ? যেমন জলরাশির মাঝ থেকে ভুড়-ভুড়ি উঠে, সেইরূপ। মহাকাশ, চিদাকাশ থেকে এক একটি রূপ উঠছে দেখা যায়। অবতারও একটি রূপ। অবতার-লীলা সে আত্মশক্তিরই খেলা।

১৯। যদি ঐ মাটির প্রতিমা পূজা কর্তে কিছু ভুল হ'য়ে থাকে, তিনি কি জানেন না, তাঁকেই ডাকা হচ্ছে? তিনি ঐ পূজাতেই সন্তুষ্ট হবেন। মাটির প্রতিমা পূজাতেও প্রয়োজন আছে। নানা রকম পূজা ঈশ্বরই আয়োজন ক'রেছেন। যার জগৎ, তিনিই এ সব ক'রেছেন,—অধিকারী ভেদে। যার যা পেটে সয়, মা সেইরূপ খাবার বন্দোবস্ত করেন। এক মার পাঁচ ছেলে। বাড়ীতে মাছ এসেছে। মা মাছের নানা রকম ব্যঞ্জন করেছেন, যার যা পেটে সয়। কারও জন্ম মাছের পোলোয়া, কারও জন্ম মাছের অশ্বল, মাছের চড়্‌চড়ি, মাছ ভাজা, এই সব ক'রেছেন। যেটি যার ভাল লাগে। যেটি যার পেটে সয়।

২০। প্রতিমায় আবির্ভাব হ'তে হ'লে, তিনটি জিনিসের দরকার :—প্রথম, পূজারীর ভক্তি; দ্বিতীয়, প্রতিমা সুন্দর হওয়া চাই; তৃতীয়, গৃহস্থামীর ভক্তি।

২১। আহা! কেমন দালানের শোভা হ'য়েছে; মা যেন আলো ক'রে ব'সে আছেন! এ রূপ দর্শন ক'রলে কত আনন্দ হয়! ভোগের ইচ্ছা, শোক, এ সব পালিয়ে যায়। তবে নিরাকার কি দর্শন হয় না, তা নয়। বিষয় বুদ্ধি একটুও থাকলে হ'বে না। ঋষিরা সর্বত্যাগ ক'রে অখণ্ড সচ্চিদানন্দের চিন্তা ক'রেছিলেন। তোমরা দেখ, কেমন বাহিরে দর্শন ক'রছ, আর আনন্দ পাচ্ছ! যারা নিরাকার নিরাকার ক'রে কিছু পায় না, তাদের না আছে বাহিরে, না আছে ভিতরে।

২২। নিরাকারও সত্য, আবার সাকারও সত্য। তোমার যেটি বিশ্বাস, সেইটি ধরে থাকবে।

২৩। তিনি নিরাকার কি সাকার, সে সব কথা ভাব্‌বারই বা কি দরকার? নির্জনে, গোপনে, ব্যাকুল হ'য়ে কেঁদে কেঁদে তাঁকে বল্লেই হয়, “হে ঈশ্বর, তুমি যে কেমন, তাই আমায় দেখা দাও।”

২৪। সাকার কি নিরাকার, যদি ঠিক করতে না পারিস্, তো এই ব'লে প্রার্থনা করিস্ যে, “হে ভগবান, তুমি সাকার কি নিরাকার, আমি বুঝতে পারি না। তুমি যাহা ই হও, আমায় কৃপা কর,—দেখা দাও।”

অবতার-তত্ত্ব ।

১। অবতার, যিনি তারণ করেন। তা দশাবতার আছে, চব্বিশ অবতার আছে, আবার অসংখ্য অবতার আছে।

২। মানুষদেহ ধারণ ক'রে ঈশ্বর অবতীর্ণ হন। তিনি সর্বস্থানে সর্বভূতে আছেন বটে, কিন্তু অবতার না হলে জীবের আকাঙ্ক্ষা পূরে না; প্রয়োজন মিটে না।

৩। ঈশ্বরলীলা, দেবলীলা, নরলীলা, জগৎলীলা। নর-লীলায় অবতার হন। নরলীলা কিরূপ জান? যেমন বড় ছাদের জল নল দিয়ে ছড় ছড় ক'রে পড়ছে। সেই সচ্চিদানন্দ, তাঁরই শক্তি একটি প্রণালী দিয়ে,—নলের ভিতর দিয়ে,—আসছে।

৪। ঈশ্বর অনন্ত হউন আর যত বড়ই হউন, তিনি উচ্ছা করলে, তাঁর ভিতরের সারবস্তু, মানুষের ভিতর দিয়ে আসতে পারে ও আসে। তিনি অবতার হয়ে থাকেন, এটি উপমা দিয়ে বুঝান যায় না। অনুভব হওয়া চাই। প্রত্যক্ষ হওয়া চাই। উপমার দ্বারা কতকটা আভাস পাওয়া যায়। গরুর মধ্যে শিংটা যদি ছোঁয়, গরুকে ছোঁয়াই হ'ল; পা-টা বা

ল্যাজটা ছুঁলেও গরুটাকে ছোঁয়া হ'ল। কিন্তু আমাদের
শাফে গরুর ভিতরের সার পদার্থ হচ্ছে দুধ। সেই দুধ বাঁট
দিয়ে আসে। সেইরূপ প্রেম, ভক্তি শিখাবার জন্য ঈশ্বর
মানুষদেহ ধারণ ক'রে সময়ে সময়ে অবতীর্ণ হন।

৫। তাঁর নানারূপ, নানালীলা। ঈশ্বরলীলা, দেবলীলা,
নরলীলা, জগৎলীলা। তিনি মানুষ হয়ে, অবতার হয়ে, যুগে
যুগে আসেন,—প্রেম, ভক্তি শিখাবার জন্য। দেখ না,
চৈতন্যদেব। অবতারের ভিতরেই তাঁর প্রেম, ভক্তি আশ্বাদন
করা যায়। তাঁর অনন্ত লীলা; কিন্তু আমার দরকার প্রেম,
ভক্তি। আমার ক্ষীরটুকু দরকার। গাভীর বাঁট দিয়েই
ক্ষীর আসে; অবতার গাভীর বাঁট।

৬। হাঁ, ঈশ্বরকে অবশ্য দেখা যায়। নিরাকার, সাকার
দুইই দেখা যায়। সাকার চিন্ময়-রূপ দর্শন হয়; আবার
সাকার মানুষ, তাতেও তিনি প্রত্যক্ষ। অবতারকে দেখাও
যা, ঈশ্বরকে দেখাও তা। ঈশ্বরই যুগে যুগে মানুষরূপে
অবতীর্ণ হন।

৭। ঈশ্বরের সব ধারণা কে করতে পারে? তা তাঁর
বড় ভাবটাও পারে না, আবার ছোট ভাবটাও পারে না।
আর সব ধারণা করা কি দরকার? তাঁকে প্রত্যক্ষ করতে
পারলেই হ'ল। তাঁর অবতারকে দেখলেই তাঁকে দেখা হ'ল।
যদি কেউ গঙ্গার কাছে গিয়ে গঙ্গাজল স্পর্শ করে, সে বলে,
গঙ্গা দর্শন, স্পর্শন ক'রে এলুম। সব গঙ্গাটা হরিদ্বার থেকে

গঙ্গাসাগর পর্য্যন্ত হাত দিয়ে ছুঁতে হয় না। তোমার পা-টা যদি ছুঁই, তাহ'লে তোমায় ছোঁয়াই হ'ল।

৮। ষাঁরই নিত্য, তাঁরই লীলা। ভক্তের জন্ম লীলা। তাঁকে নররূপে দেখতে পেলে, তবে ত ভক্তেরা ভালবাসতে পারবে। তবেই ভাই, ভগিনী, বাপ, মা, সন্তানের মত ঈশ্বরকে স্নেহ করতে পারবে। তিনি ভক্তের ভালবাসার জন্ম ছোটটি হয়ে লীলা করতে আসেন।

৯। ঈশ্বর-তত্ত্ব যদি খোঁজ, মানুষে খুঁজবে। মানুষে তিনি বেশী প্রকাশ হন। যে মানুষে দেখবে উর্জিতাভক্তি, প্রেমভক্তি উথলে পড়ছে, ঈশ্বরের জন্ম পাগল, তাঁর প্রেমে মাতোয়ারা,—সেই মানুষে নিশ্চিত জেনো, তিনি অবতীর্ণ হয়েছেন। তিনি ত আছেনই; তবে তাঁর শক্তি কোথাও বেশী প্রকাশ, কোথাও বা কম প্রকাশ। অবতারের ভিতর তাঁর শক্তি বেশী প্রকাশ। সেই শক্তি কখন কখন পূর্ণভাবে থাকে। শক্তিরই অবতার।

১০। প্রতিমাতে তাঁর আবির্ভাব হয়, আর মানুষে হবে না? তিনি নরলীলা করবার জন্ম মানুষের ভিতর অবতীর্ণ হন; যেমন রামচন্দ্র, শ্রীকৃষ্ণ, চৈতন্যদেব। অবতারকে চিন্তা করলেই তাঁর চিন্তা করা হয়। আমি কেশব সেনকে বলেছিলাম যে, মানুষের ভিতর তিনি বেশী প্রকাশ। মাঠের আলের ভিতর ছোট ছোট গর্ত থাকে; তাদের বলে ঘুঁটি। ঘুঁটির ভিতর মাছ, কাঁকড়া জমে থাকে। মাছ, কাঁকড়া

খুঁজতে গেলে ঐ ঘুঁটির ভিতর খুঁজতে হয় ; ঈশ্বরকে খুঁজতে হলে অবতারের ভিতর খুঁজতে হয় । ঐ চৌদ্দপোয়া মানুষের ভিতরে জগৎমাতা প্রকাশ হন । কিন্তু ঈশ্বরকে জানতে হ'লে, অবতারকে চিন্তে গেলে, সাধনের প্রয়োজন । দীর্ঘিতে বড় মাছ আছে ; চার ফেলতে হয় । ছুধেতে মাখন আছে ; মস্তন করতে হয় । সরিষার ভিতর তেল আছে ; সরিষাকে পিষতে হয় । মেতীতে হাত রাঙ্গা হয় ; মেতী বাঁটতে হয় ।

১১ । অবতার বা অবতারের অংশ, এদের বলে ঈশ্বরকোটি ; আর সাধারণ লোকদের বলে জীব বা জীবকোটি । যারা জীবকোটি, তারা সাধনা ক'রে ঈশ্বরলাভ করতে পারে । তারা সমাধিস্থ হ'য়ে আর ফেরে না । যারা ঈশ্বরকোটি, তারা যেমন রাজায় বেটা, সাত তলার চাবি তাদের হাতে । তারা সাত তলায় উঠে যায়, আবার ইচ্ছামত নেমে আসতে পারে । জীবকোটি যেমন ছোট কর্মচারী, সাত তলা বাড়ীর খানিকটা যেতে পারে,—ঐ পর্য্যন্ত ।

১২ । ঈশ্বরকোটি (যেমন অবতারাদি) না হ'লে সমাধির পর ফেরে না । জীব কেউ কেউ সাধনার জোরে সমাধিস্থ হয়, কিন্তু আর ফেরে না । তিনি যখন নিজে মানুষ হয়ে আসেন, যখন অবতার হন, যখন জীবের মুক্তির চাবি তাঁর হাতে থাকে, তখন সমাধির পর ফেরেন,—লোকের মঙ্গলের জন্য ।

১৩ । অবতারাদি ঈশ্বরকোটি । তারা ফাঁকা জায়গায়

বেড়াচ্ছে। তারা কখনও সংসারে বদ্ধ হয় না, বন্দী হয় না। তাদের 'আমি' মোটা 'আমি' নয়,—সংসারী লোকদের মত। সংসারী লোকদের অহঙ্কার, সংসারী লোকদের 'আমি', যেন চতুর্দিকে পাঁচিল,—মাথার উপর ছাদ; বাহিরের কোন জিনিস দেখা যায় না। অবতারাতির 'আমি' পাতলা 'আমি'। এ 'আমির' ভিতর দিয়ে ঈশ্বরকে সর্বদা দেখা যায়। যেমন একজন লোক পাঁচিলের একপাশে দাঁড়িয়ে আছে; পাঁচিলের দু'দিকেই অনন্ত মাঠ। সেই পাঁচিলের গায়ে যদি ফৌকর থাকে, পাঁচিলের ওধারে সব দেখা যায়। বড় ফৌকর হলে আনাগোনাও হয়। অবতারাতির 'আমি', ঐ ফৌকরওয়ালা পাঁচিল। পাঁচিলের এধারে থাকলেও অনন্ত মাঠ দেখা যায়। এর মানে, দেহ ধারণ করলেও তারা সর্বদা যোগেতেই থাকে। আবার ঈচ্ছা হলে, বড় ফৌকরের ওধারে গিয়ে সমাধিস্থ হয়। আবার বড় ফৌকর হলে আনাগোনা করতে পারে; সমাধিস্থ হলেও আবার নেমে আসতে পারে।

১৪। মানুষে তিনি বেশী প্রকাশ। যদি বল, অবতার কেমন ক'রে হবে, যার ক্ষুধা, তৃষ্ণা এই সব জীবের ধর্ম অনেক আছে, হয় ত রোগ শোকও আছে,—তার উত্তর এই যে, “পঞ্চভূতের ফাঁদে, ব্রহ্ম প'ড়ে কাঁদে।” দেখ না, রামচন্দ্র সীতার শোকে কাতর হয়ে কাঁদতে লাগলেন। হিরণ্যাক্ষ বধ করবার জন্য বরাহ অবতার হলেন। হিরণ্যাক্ষ বধ হ'ল, কিন্তু নারায়ণ স্বধামে যেতে চান না। বরাহ হয়ে আছেন।

কতকগুলি ছানাপোনা হয়েছে। তাদের নিয়ে এক রকম বেশ আনন্দে রয়েছেন। দেবতারা ব'ল্লেন, “একি হ'ল ? ঠাকুর যে আঁর আস্তে চান না।” তখন সকলে শিবের কাছে গেল ও ব্যাপারটি নিবেদন করলে। শিব গিয়ে তাঁকে অনেক জেদা-জিদি করলেন, তিনি ছানাপোনাদের মাই দিতে লাগলেন। তখন শিব ত্রিশূল দিয়ে শরীরটা ভেঙ্গে দিলেন। ঠাকুর হি হি ক'রে হেসে তখন স্বধামে চলে গেলেন।

১৫। মানুষ লীলা কেন জান ? এর ভিতর তাঁর কথা শুন্তে পাওয়া যায় ; এর ভিতর তাঁর বিলাস : এর ভিতর তিনি রসাস্বাদন করেন। আর সব ভক্তদের ভিতর তাঁরই একটু একটু প্রকাশ। যেমন জিনিস অনেক চুসতে চুসতে একটু রস, ফুল চুসতে চুসতে একটু মধু।

১৬। তিনিই স্বরাট্, তিনিই বিরাট্। যঁরই নিতা, তাঁরই লীলা। তিনি মানুষ হতে পারেন না, এ কথা জোর ক'রে আমরা গুদ্র বুদ্ধিতে কি বলতে পারি ? আমাদের গুদ্রবুদ্ধিতে এ সব কথা কি ধারণা হ'তে পারে ? একসের ঘটিতে কি চার সের দুধ ধরে ? তাই সাধুমহাত্মা যঁরা ঈশ্বর লাভ করেছেন, তাঁদের কথা বিশ্বাস করতে হয়। সাধুরা ঈশ্বরচিন্তা নিয়ে থাকেন ; যেমন উকিলরা মোকদ্দমা নিয়ে থাকে।

১৭। অবতার যখন আসে, সাধারণ লোকে জানতে পারে না ; গোপনে আসে। দুই চার জন অন্তরঙ্গ ভক্ত জানতে পারে। রাম পূর্ণব্রহ্ম, পূর্ণ অবতার, একথা বার জন

ঋষি কেবল জান্ত। অন্যান্য ঋষিরা বলেছিল, “হে রাম, তোমাকে আমরা দশরথের ব্যাটা বলে জানি।” ভরদ্বাজাদি ঋষি রামকে স্তব করেছিলেন, আর বলেছিলেন, “হে রাম, তুমিই সেই অখণ্ড সচ্চিদানন্দ ! তুমি আমাদের কাছে মানুষ-রূপে অবতীর্ণ হয়েছ। বস্তুতঃ তুমি তোমার মায়া আশ্রয় ক’রেছ ব’লে, তোমাকে মানুষের মত দেখাচ্ছে।”

১৮। কেমন ক’রে জানলে, অবতার নাই ? অবতারকে সকলে চিন্তে পারে না। নারদ যখন রামচন্দ্রকে দর্শন করতে গেলেন, রাম দাঁড়িয়ে উঠে সাষ্টাঙ্গে প্রণাম করলেন, আর বললেন, “আমরা সংসারী জীব, আপনাদের মত সাধুরা না এলে কি ক’রে পবিত্র হবো ?” আবার যখন সত্যপালনের জন্ম বনে গেলেন, তখন দেখলেন, রামের বনবাস শুনে অবধি ঋষিরা আহাৰ ত্যাগ ক’রে অনেকে পড়ে আছেন। রাম যে সাক্ষাৎ পরব্রহ্ম, তা তাঁরা অনেকেই জানেন নাই।

১৯। বড় বড় বাহাছুরী কাঠ যখন ভেসে আসে, তখন কত লোক তার উপরে চড়ে চলে যায়। তাতে সে ডোবে না। সামান্য একখানা কাঠে একটা কাক বসলে অমনি ডুবে যায়। তেমনি যখন অবতারাди আসেন, কত শত লোক তাঁকে আশ্রয় ক’রে তরে যায়। সিদ্ধলোক নিজে কষ্টে সৃষ্টে যায় মাত্র। রেলের ইঞ্জিন্ আপনি চলে যায় ও কত মাল বোঝাই গাড়ী টেনে নিয়ে যায় ; অবতারেরাও সেই রকম সহস্র সহস্র লোকদের ঈশ্বরের নিকট নিয়ে যান।

২০। তিনি ভক্তের জন্য দেহধারণ করে যখন আসেন, তখন তাঁর সঙ্গে সঙ্গে ভক্তরাও আসে। কেউ অন্তরঙ্গ, কেউ বহিরঙ্গ, কেউ রসদার। যারা সংসার ছেড়ে এখানে আছে, তারা অন্তরঙ্গ; আর যারা একবার এসে ‘কেমন আছেন, মশাই’ জিজ্ঞাসা করে, তারা বহিরঙ্গ।

২১। মন থেকে কামিনী-কাঞ্চন সব না গেলে, অবতারকে চিন্তে পারা কঠিন। যার যেমন পুঁজি, জিনিসের সেই রকম দর দেয়। একজন বাবু তার চাকরকে বললে, “তুই এই হীরেটি বাজারে নিয়ে যা, আমায় বলবি কে কি রকম দর দেয়। আগে বেগুনওয়ালার কাছে নিয়ে যা।” চাকরটি প্রথমে বেগুনওয়ালার কাছে গেল। সে নেড়ে চেড়ে দেখে বললে, “ভাই, নয় সের বেগুন আমি দিতে পারি।” চাকরটি বললে, “ভাই, আর একটু ওঠ, না হয় দশ সের দাও।” সে বললে, “আমি বাজার দরের চেয়ে বেশী বলে ফেলেছি; এতে তোমার পোষায় ত দিয়ে যাও।” চাকর তখন হাস্তে হাস্তে হীরেটি ফিরিয়ে নিয়ে বাবুর কাছে বললে, “মহাশয়, বেগুনওয়ালার নয় সের বেগুনের বেশী একটি ও দেবে না। সে বললে, আমি বাজার দরের চেয়ে বেশী বলে ফেলেছি।” বাবু হেসে বললে, “আচ্ছা, এবার কাপড়ওয়ালার কাছে নিয়ে যা। ও বেগুন নিয়ে থাকে, ও আর কতদূর বুঝবে? কাপড়ওয়ালার পুঁজি একটু বেশী, দেখি ও কি বলে।” চাকরটি কাপড়ওয়ালার কাছে বললে, “ওহে এটি নেবে? কত দর দিতে

পার ?” কাপড়ওয়ালা বললে, “হঁ। জিনিসটা ভাল, এতে বেশ গয়না হতে পারে ; তা ভাই, আমি নয়শো টাকা দিতে পারি।” চাকরটি বললে, “ভাই আর একটু ওঠ ; তা হলে ছেড়ে দিয়ে যাই ; না হয় হাজার টাকাই দাও।” কাপড়ওয়ালা বললে, “ভাই, আর কিছু বল না ; আমি বাজার দরের চেয়ে বেশী বলে ফেলেছি। নয়শো টাকার বেশী একটি টাকাও আমি দিতে পারব না।” চাকর ফিরিয়ে নিয়ে মনিবের কাছে হাস্তে হাস্তে ফিরে গেল। আর বললে, “কাপড়ওয়ালা বলেছে যে, নয়শো টাকার বেশী একটি টাকাও সে দিতে পারবে না। আরও সে বলেছে, আমি বাজার দরের চেয়ে বেশী বলে ফেলেছি।” তখন তার মনিব হাস্তে হাস্তে বললে, “এইবার জহুরীর কাছে যাও ; সে কি বলে, দেখা যাক।” চাকরটি জহুরীর কাছে এল। জহুরী একটু দেখেই একেবারে বললে, “এক লাখ টাকা দেবো।”

২২। পূর্ণ ও অংশ,—যেমন অগ্নি ও তার ফুলিঙ্গ।
অবতার ভক্তের জন্ম, জ্ঞানীর জন্ম নয়।

২৩। জ্ঞানীরা নিরাকার চিন্তা করে ; তারা অবতার মানে না। অর্জুন শ্রীকৃষ্ণকে স্তব করছেন, “তুমি পূর্ণব্রহ্ম।” কৃষ্ণ অর্জুনকে বললেন, “আমি পূর্ণব্রহ্ম কি না দেখবে এস।” এই বলে একটা জায়গায় নিয়ে গিয়ে বললেন, “তুমি কি দেখছ ?” অর্জুন বললে, “আমি এক বৃহৎ গাছ দেখছি, তাতে থোলো থোলো কাল জামের মত ফল ফলে রয়েছে।”

কৃষ্ণ বললেন, “আরও কাছে এসে দেখ দেখি, ও খোলো খোলো। কাল ফল নয়, খোলো খোলো কৃষ্ণ অসংখ্য ফলে রয়েছে,—আমার মত।” অর্থাৎ, সেই পূর্ণব্রহ্ম-রূপ ব্রহ্ম থেকে অসংখ্য অবতার হচ্ছে, যাচ্ছে।

শাস্ত্র ও পাণ্ডিত্য

- ১। যে পাণ্ডিত্যের বিবেক নাই, সে ব্যক্তি পাণ্ডিত্যই নয়।
- ২। শুধু পাণ্ডিত্য কি হবে, যদি বিবেক, বৈরাগ্য না থাকে? পাণ্ডিত্যের যদি দেখি বিবেক নাই, ঈশ্বরে ভালবাসা নাই, তাহলে তাকে খড় কুটো মনে হয়।
- ৩। যারা, শুধু পাণ্ডিত্য, কিন্তু যাদের ভগবানে ভক্তি হয়, নাই, তাদের কথা গোলমলে।
- ৪। শুধু পাণ্ডিত্যে কি হবে? অকনক শ্লোক, অনেক শাস্ত্র পাণ্ডিত্যের জানা থাকতে পারে; কিন্তু যার সংসারে আসক্তি আছে, যার কামিনী-কাঞ্চনে মনে মনে ভালবাসা আছে, তার শাস্ত্র ধারণা হয় নাই; মিছে পড়া। পঁাজীতে লিখেছে, বিশ আড়া জল, কিন্তু পঁাজী টিপলে এক ফোঁটাও পড়ে না। এক ফোঁটাই পড়ে,—কিন্তু এক ফোঁটাও পড়ে না।
- ৫। পাণ্ডিত্য খুব লম্বা লম্বা কথা বলে, কিন্তু নজর কোথায়? কামিনী আর কাঞ্চনে, দেহের সুখে আর টাকায়। শকুনি খুব উঁচুতে উড়ে, কিন্তু নজর ভাগাড়ে; কেবল খুঁজছে, কোথায় মরা জানোয়ার, কোথায় ভাগাড়, কোথায় মড়া।
- ৬। শাস্ত্র, বই, শুধু এ সব তাতে কি হবে? তাঁর

কৃপা না হলে, কিছু হবে না। যাতে তাঁর কৃপা হয়, ব্যাকুল হয়ে তার চেষ্টা কর। কৃপা হলে তাঁর দর্শন হবে। তিনি তোমাদের সঙ্গে কথা কইবেন।

৭। তুমি কল-কলানি ছাড়। ঘি কাঁচা থাকলেই কল-কল করে। একবার তাঁর আনন্দ পেলে বিচার-বুদ্ধি পালিয়ে যায়। মধুপানের আনন্দ পেলে আর ভন্-ভনানি থাকে না। বই পড়ে কতকগুলো কথা বলতে পারলে কি হবে? পণ্ডিতেরা কত শ্লোক বলে,—‘শীর্ণা গোকুলমণ্ডলী!’—এই সব। ‘সিদ্ধি’ ‘সিদ্ধি’ মুখে বললে কি হবে? কুলকুচো করলেও কিছু হবে না। পেটে ঢুকতে হবে; তবে নেশা হবে। ঈশ্বরকে নির্জনে, গোপনে, ব্যাকুল হয়ে না ডাকলে এ সব কথা ধারণা হয় না।

৮। বই, শাস্ত্র, এ সব কেবল ঈশ্বরের কাছে পৌঁছবার পথ বলে দেয়। পথ, উপায়, জেনে নেবার পর, আর বই শাস্ত্রে কি দরকার? তখন নিজে কাজ করতে হয়।

৯। শুধু শাস্ত্র পড়ে কি হবে? শাস্ত্রে বালিতে চিনিতে মিশেল আছে। চিনিটুকু লওয়া বড় কঠিন: তাই শাস্ত্রের মর্ম সাধু মুখে, গুরু মুখে শুনে নিতে হয়। তখন আর গ্রন্থের কি দরকার? চিঠিতে খবর এসেছে,—পাঁচ সের সন্দেশ পাঠাইবা, আর একখানা রেলপেড়ে কাপড় পাঠাইবা। এখন চিঠিখানি হারিয়ে গেল। তখন ব্যস্ত হয়ে চারিদিকে খোঁজে। অনেক খোঁজবার পর চিঠিখানি পেলে; প’ড়ে দেখে,—

লিখেছে, পাঁচ সের সন্দেশ আর একখানা রেলপেড়ে কাপড় পাঠাইবা। তখন চিঠিখানি আবার ফেলে দেয়। আর কি দরকার? এখন সন্দেশ আর কাপড়ের জোগাড় করলেই হ'ল। সব সন্ধান জেনে, তারপর ডুব দাও। পুকুরের অমুক জায়গায় ঘটিটি প'ড়ে গেছে; জায়গাটি ঠিক ক'রে দেখে নিয়ে, সেইখানে ডুব দিতে হয়।

১০। তাঁকে লাভ হ'লেই হ'লো। সংস্কৃত নাই জান্লাম। তাঁর কৃপা পণ্ডিত, মূর্খ সকল ছেলেরই উপর, যে তাঁকে পাবার জন্য ব্যাকুল হয়। বাপের পাঁচটি ছেলে; ছুই একজন 'বাবা' ব'লে ডাকতে পারে; আবার কেউ বা 'বা' ব'লে ডাকে, কেউ বা 'পা' ব'লে ডাকে; সবটা উচ্চারণ করতে পারে না। যে 'বাবা' বলে, তার উপর কি বাপের বেশী ভালবাসা হবে, যে 'পা' বলে তার চেয়ে? বাবা জানে, এরা ক'টা ছেলে, 'বাবা' ঠিক বলতে পারছে না। বাপের সকলের উপর সমান স্নেহ।

১১। শাস্ত্র কত পড়বে? শুধু বিচার করলে কি হবে? আগে তাঁকে লাভ করবার চেষ্টা কর, গুরুবাক্যে বিশ্বাস ক'রে কিছু কর্ম কর। গুরু না থাকেন, তাঁকে ব্যাকুল হ'য়ে প্রার্থনা কর; তিনি কেমন, তিনিই জানিয়ে দিবেন। বই প'ড়ে কি জানবে? যতক্ষণ না হাতে পৌঁছান যায়, ততক্ষণ দূর হতে কেবল 'হো হো' শব্দ; হাতে পৌঁছিলে আর একরকম। তখন স্পষ্ট দেখতে পাবে, শুন্তে পাবে। 'আলু নাও,' 'পয়সা

দাও' স্পষ্ট শুনতে পাবে। সমুদ্র দূর হতে 'হো হো' শব্দ করছে। কাছে গেলে কত জাহাজ যাচ্ছে, পাখী উড়ছে, ঢেউ হচ্ছে, দেখতে পাবে। বই পড়ে ঠিক অনুভব হয় না। অনেক তফাৎ। তাঁকে দর্শনের পর বই, শাস্ত্র, সায়েন্স (Science) সব খড় কুটো বোধ হয়।

১২। বড় বাবুর সঙ্গে আলাপ দরকার। তাঁর ক'খানা বাড়ী, ক'টা বাগান, কত কোম্পানীর কাগজ, এ আগে জানবার জন্য অত ব্যস্ত কেন? চাকরদের কাছে গেলে তারা দাঁড়াতেই দেয় না; কোম্পানীর কাগজের খবর কি দিবে? কিন্তু যো সো করে বড়বাবুর সঙ্গে একবার আলাপ কর, তা ধাক্কা খেয়েই হোক আর বেড়া ডিঙ্গিয়েই হোক; তখন কত বাড়ী, কত বাগান, কোম্পানীর কাগজ, তিনিই ব'লে দিবেন। বাবুর সঙ্গে আলাপ হ'লে, আবার চাকর, দ্বারবান্ সব সেলাম করবে।

১৩। দর্শন করলে এক রকম, আর শাস্ত্র প'ড়ে আর এক রকম। শাস্ত্রে আভাস মাত্র পাওয়া যায়। তাই কতক-গুলো শাস্ত্র পড়বার কোন প্রয়োজন নাই। তার চেয়ে নির্জনে তাঁকে ডাকা ভাল।

১৪। শাস্ত্রের ভিতর কি ঈশ্বরকে পাওয়া যায়? শাস্ত্র প'ড়ে হৃদ অস্তি মাত্র বোধ হয়। কিন্তু নিজে ডুব না দিলে, ঈশ্বর দেখা দেন না। ডুব দেবার পর, তিনি নিজে জানিয়ে দিলে তবে সন্দেহ দূর হয়। বই হাজার পড়, মুখে হাজার শ্লোক বল, ব্যাকুল হয়ে তাতে ডুব না দিলে তাঁকে ধরতে

১৯। সদগুরুর কাছে উপদেশ নিতে হয়। সদগুরুর লক্ষণ আছে। যে কাশী গিয়েছে আর দেখেছে, তার কাছেই কাশীর কথা শুন্তে হয়। শুধু পণ্ডিত হলে হয় না। যার সংসার অনিত্য বলে বোধ হয় নাই, সে পণ্ডিতের কাছে উপদেশ লওয়া উচিত নয়। পণ্ডিতের বিবেক, বৈরাগ্য থাকলে তবে উপদেশ দিতে পারে।

২০। শাস্ত্রের মর্ম গুরুমুখে শুনে নিয়ে, তারপর সাধন করতে হয়। এই সাধন ঠিক ঠিক হলে তবে প্রত্যক্ষ দর্শন হয়। ডুব দিলে তবে ত ঠিক ঠিক সাধন হয়। ব'সে ব'সে শাস্ত্রের কথা নিয়ে কেবল বিচার করলে কি হবে? যদি বল, ডুব দিলেও হাঙ্গর কুমীরের ভয় আছে,—কাম ক্রোধাদির ভয় আছে,—হলুদ মেখে ডুব দাও, তারা কাছে আসতে পারবে না ;—বিবেক-বৈরাগ্য হলুদ।

২১। পাণ্ডিত্যে কি আছে? ব্যাকুল হ'য়ে ডাকলে তাঁকে পাওয়া যায়; নানা বিষয় জানবার দরকার নাই। যিনি আচার্য্য, তাঁরই পাঁচটা জানা দরকার। অপরকে বধ করবার জন্ত ঢাল তরোয়াল চাই; আপনাকে বধ করবার জন্ত, একটি ছুঁচ বা নরুন হ'লেই হয়।

২২। আমার তিন কথাতে গায়ে কাঁটা বেঁধে; গুরু, কর্তা, আর বাবা। গুরু এক সচ্চিদানন্দ। তিনিই শিক্ষা দিবেন। আমার সম্ভান ভাব। মানুষ গুরু মেলে লাখ লাখ। সকলেই গুরু হতে চায়; শিষ্য কে হতে চায়? লোকশিক্ষা

দেওয়া বড় কঠিন। যদি তিনি সাক্ষাৎকার হন, আর আদেশ দেন, তাহ'লে হতে পারে। নারদ শুকদেবাদির আদেশ হয়েছিল ; শঙ্করের আদেশ হয়েছিল। আদেশ না হলে, কে তোমার কথা শুন্বে ?

২৩। প্রচার ! ওগুলো অভিমানের কথা। মানুষ ত ক্ষুদ্র জীব। প্রচার তিনিই করবেন, যিনি চন্দ্র সূর্য্য সৃষ্টি ক'রে এই জগৎ প্রকাশ করেছেন। প্রচার করা কি সামান্য কথা ? তিনি সাক্ষাৎকার হ'য়ে আদেশ না দিলে প্রচার হয় না। তবে হবে না কেন ? আদেশ হয় নি, তুমি বকে যাচ্ছ ; ঐ দুদিন লোকে শুন্বে, তারপর ভুলে যাবে। যেমন একটা হুজুক আর কি ! যতক্ষণ তুমি বলবে, ততক্ষণ লোকে বলবে, 'আহা, ইনি বেশ বলছেন !' তুমি থামবে, তারপর কোথাও কিছু নাই। যতক্ষণ দুধের নীচে আগুনের জ্বাল রয়েছে, ততক্ষণ দুধটা ফোঁশ্ করে ফুলে উঠে। জ্বালও টেনে নিলে, আর দুধও যেমন তেমনি ; কমে গেল। আর সাধন ক'রে নিজের শক্তি বাড়াতে হয়। তা না হ'লে প্রচার হয় না। 'আপনি শুতে স্থান পায় না, শঙ্করাকে ডাকে।'

২৪। আবার মনে মনে আদেশ হলে হয় না। তিনি সত্য সত্যই সাক্ষাৎকার হন, আর কথা কন; তখন আদেশ হতে পারে। সে কথার জোর কত ? পর্ব্বত টলে যায়। শুধু লেক্চার ? দিনকতক লোক শুন্বে। তারপর ভুলে যাবে, সে কথা অনুসারে কাজ করবে না। ও দেশে হালদার

পুকুর বলে একটা পুকুর আছে। পুকুরের পাড়ে রোজ সকালবেলা লোকে বাহে ক'রে রাখতো। যারা সকালবেলা আসে, তারা খুব গালাগাল দেয়। কিন্তু আবার তার পরদিন সেইরূপ। বাহে আর থামে না। তখন লোকে কোম্পানীকে জানালে। তারা একটা চাপরাসী পাঠিয়ে দিলে। সেই চাপরাসী যখন একটা কাগজ মেরে দিলে, 'এখানে বাহে করিও না', তখন সব বন্ধ হলো। যে লোক শিক্ষা দিবে, তার চাপরাস্ চাই; না হলে হাসির কথা হয়ে পড়ে। আপনারই হয় না, আবার অন্য লোক। কাণা কাণাকে পথ দেখিয়ে নিয়ে যাচ্ছে! হিতে বিপরীত হয়। ভগবান্ লাভ হলে অন্তর্দৃষ্টি হয়; তবেই কার কি রোগ বুঝা যায়, উপদেশ দেওয়া যায়। আদেশ না থাকলে, 'আমি লোকশিক্ষা দিচ্ছি', এই অহঙ্কার হয়। অহঙ্কার হয় অজ্ঞানে। অজ্ঞানে বোধ হয়, 'আমি কর্তা'। 'ঈশ্বর কর্তা, ঈশ্বরই সব করছেন, আমি কিছুই করছি না', এ বোধ হলে তো সে জীবমুক্ত। 'আমি কর্তা', এই বোধ থেকেই যত দুঃখ, অশান্তি।

১৫। যদি আদেশ হয়ে থাকে, তাহ'লে লোকশিক্ষায় দোষ নাই। আদেশ পেয়ে যদি কেউ লোকশিক্ষা দেয়, তাকে কেউ হারাতে পারে না। বাগ্দিনার কাছ থেকে যদি একটি কিরণ আসে, তাহ'লে এমন শক্তি হয় যে, বড় বড় পণ্ডিতগুলো কেঁচোর মত হয়ে যায়।

২৬। প্রদীপ জ্বাললে বাতুলে পোকাগুলো ঝাঁকে ঝাঁকে

আপনি আসে, ডাক্তে হয় না। তেমনি যে আদেশ পেয়েছে, তার লোক ডাক্তে হয় না; অমুক সময়ে লেক্চার হবে ব'লে, খবর পাঠাতে হয় না। তার নিজের এমনি টান যে, লোক তার কাছে আপনি আসে। চুম্বক পাথর কি লোহাকে বলে, 'তুমি আমার কাছে এস?' ব'লতে হয় না। লোহা আপনি চুম্বক পাথরের টানে ছুটে আসে। এরূপ লোক পণ্ডিত নয় বটে; তা ব'লে মনে ক'রো না যে, তার জ্ঞানের কিছু কমতি হয়। বই পড়ে কি জ্ঞান হয়? যে আদেশ পেয়েছে, তার জ্ঞানের শেষ নাই। সে জ্ঞান ঈশ্বরের কাছ থেকে আসে, ফুরায় না। ও দেশে ধান মাপবার সময়, একজন মাপে, আর একজন রাশ ঠেলে দেয়; তেমনি যে আদেশ পায়, সে যত লোকশিক্ষা দিতে থাকে, মা আমার পেছন থেকে জ্ঞানের রাশ ঠেলে ঠেলে দেন; সে জ্ঞান আর ফুরায় না। মা'র যদি একবার কটাক্ষ হয়, তা হ'লে কি আর জ্ঞানের অভাব থাকে? চৈতন্যদেব নিজে অবতার। তিনি যা ক'রে গেলেন, তারই কি রয়েছে বল দেখি? আর যে আদেশ পায় নাই, তার লেক্চারে কি উপকার হবে?

বিবিধ ।

১। তিনি নানাভাবে লীলা করছেন । তিনিই মহাকালী, নিত্যকালী, শ্মশানকালী, রক্ষাকালী, শ্যামাকালী । মহাকালী, নিত্যকালীর কথা তন্ত্রে আছে । যখন সৃষ্টি হয় নাই,—চন্দ্র, সূর্য্য, গ্রহ, পৃথিবী ছিল না, নিবিড় অন্ধকার, তখন কেবল মা নিরাকারা মহাকালী মহাকালের সঙ্গে বিরাজ করছিলেন । শ্যামাকালীর অনেকটা কোমল ভাব,—বরাভয়দায়িনী । গ্রহস্ফের বাড়ীতে তাঁহারি পূজা হয় । যখন মহামারী, দুর্ভিক্ষ, ভূমিকম্প, অনারম্ভি, অদিতবৃষ্টি হয়, তখন রক্ষাকালীর পূজা করতে হয় । শ্মশানকালীর সংহার মূর্ত্তি ! শব, শিবা, ডাকিনী, যোগিনী মধ্যে শ্মশানের উপর থাকেন,—রুধিরধারা, গলায় মুণ্ডমালা, কটিতে নরহস্তের কোমরবন্ধ । আবার যখন জগৎ নাশ হয়, মহাপ্রলয় হয়, তখন মা সৃষ্টির বীজ সকল কুড়িয়ে রাখেন ; গিন্নির কাছে যেমন একটা গ্যাতাক্যাতার হাঁড়ি থাকে, আর সেই হাঁড়িতে গিন্নি পাঁচ রকম জিনিস তুলে রাখে । তার ভিতর সমুদ্রের ফেনা, নীলবড়ি, ছোট ছোট পুঁটলি বাঁধা শশাবীচি, কুমড়া বীচি, লাউ বীচি, এই সব রাখে । দরকার হ'লে বার করে । মা ব্রহ্মময়ী সৃষ্টিনাশের পর, ঐ রকম সব বীজ কুড়িয়ে রাখেন ।

২। ঈশ্বরের সৃষ্টিতে নানারকম জীব, জন্তু, গাছপালা আছে। জানোয়ারের মধ্যে ভাল আছে, মন্দ আছে; বাঘের মত হিংস্র জন্তু আছে। গাছের মধ্যে অমৃতের গায় ফল হয় এমন আছে, আবার বিষফল হয় এমন আছে। তেমনি মানুষের মধ্যে ভাল আছে, মন্দও আছে; সাধু আছে; অসাধুও আছে; সংসারী জীব আছে, আবার ভক্ত আছে। জীব চার প্রকার :—বদ্ধজীব, মুমুক্শুজীব, মুক্তজীব, ও নিত্যজীব। নিত্যজীব,—যেমন নারদাদি। এরা সংসারে থাকে, জীবের মঙ্গলের জন্য, জীবদিগকে শিক্ষা দিবার জন্য। বদ্ধজীব,—বিষয়ে আসক্ত হয়ে থাকে, আর ভগবানকে ভুলে থাকে, ভুলেও ভগবানের চিন্তা করে না। মুমুক্শুজীব,—যারা মুক্ত হবার ইচ্ছা করে। কিন্তু তাদের মধ্যে কেউ মুক্ত হতে পারে, কেউ বা পারে না। মুক্তজীব,—যারা সংসারে কামিনী-কাঞ্ছনে বদ্ধ নয়; যেমন, সাধু মহাত্মারা, যাদের মনে বিষয়-বুদ্ধি নাই, আর যারা সর্বদা হরিপাদপদ্ম চিন্তা করে।

৩। সংসার জালের স্বরূপ, জীব যেন মাছ, ঈশ্বর (যাঁর মায়া,—এই সংসার) তিনি জেলে! জেলের জালে যখন মাছ পড়ে, কতকগুলো মাছ জাল ছিঁড়ে পালাবার,—অর্থাৎ মুক্ত হবার,—চেষ্টা করে। এদের মুমুক্শুজীব বলা যায়। যারা পালাবার চেষ্টা করছে, সকলেই পালাতে পারে না। দু'চারটা মাছ ধপাঙ্ শব্দ করে পালায়। তখন লোকেরা বলে,—“ঐ মাছটা বড় পালিয়ে গেল।” এই দু'চারটা লোক,—মুক্তজীব!

কতকগুলি মাছ স্বভাবতঃ এত সাবধান যে, কখনও জালে পড়ে না। নারদাদি নিত্যজীব কখনও সংসার জালে পড়ে না। কিন্তু অধিকাংশ মাছ জালে পড়ে; অথচ এ বোধ নাই যে, জালে পড়েছে, মরতে হবে! জালে পড়েই জালশুদ্ধ চোঁচা দৌড় মারে ও একেবারে পাঁকে গিয়ে শরীর লুকাবার চেষ্টা করে। পালাবার কোন চেষ্টা নাই, বরং আরও পাঁকে গিয়ে পড়ে!—এরাই বদ্ধজীব। জালে এরা রয়েছে, কিন্তু মনে করে,—হেথায় বেশ আছি। বদ্ধজীব সংসারে,—অর্থাৎ কামিনী-কাঞ্চনে,—আসক্ত হয়ে আছে; কলঙ্কসাগরে মগ্ন, কিন্তু মনে করে যে, বেশ আছি! যারা মুমুক্শু বা মুক্ত, সংসার তাদের পাতকুয়া বোধ হয়, ভাল লাগে না। তাই কেউ কেউ জ্ঞানলাভের পর,—ভগবান্ লাভের পর,—শরীর ত্যাগ করে। কিন্তু সে রকম শরীর ত্যাগ, অনেক দূরের কথা।

৪। মানুষগুলি দেখতে সব এক রকম; কিন্তু ভিন্ন প্রকৃতি। কারু ভিতর সত্ত্বগুণ বেশী, কারু ভিতর রজোগুণ বেশী, কারু তমোগুণ। পুলিগুলি দেখতে সব এক রকম; কিন্তু কারু ভিতর ক্ষীরের পোর, কারু ভিতর নারিকেলের ছাঁই, কারু ভিতর কলায়ের পোর।

৫। পদ্মচক্ষু হলে মনে সদ্ভাব ও সাধুভাব থাকে। পুরুষের চক্ষু বুকের মত হলে কাম প্রবল হয়। যোগীর চক্ষু উর্দ্ধদৃষ্টি ও লাল হয়। দেবচক্ষু বেশী বড় হয় না, কিন্তু আকর্ষণ টানা হয়। কারও সঙ্গে কথা কইতে কইতে আড়চোখে

চাওয়া, তারা সাধারণ মানুষের চেয়ে বেশী বুদ্ধিমান হয়। এক চক্ষু টারা খারাপ লক্ষণ ; বরং এক চক্ষু কাণা ভাল, তবু টারা ভাল নয়,—ভারি ছুঁ ও খল হয়। কোঁটর চোঁখ, বিড়ালের মত কটা চোঁখ ও বাছুরে গাল ভাল নয়। ভক্তের শরীর সাধারণতঃ নরম ও হাতপায়ের গাঁটগুলি শিঁখিল হয় (অর্থাৎ সহজে ঘুরাণ ফিরাণ যায়)। রোগা হলেও শরীরের হাড় ও শিরাগুলি এমন থাকে যে, তাহাতে বেশী কোণ দেখা যায় না। হাত হাল্কা হলে সুবুদ্ধি হয়, খল হলে হাত ভারি হয়। ভোগীর নিশ্বাস একভাবে ও যোগীর নিশ্বাস অন্তভাবে পড়ে থাকে। ভোগীর মূত্রের ধারা বাঁদিকে ও ভোগীর মূত্র ডানদিকে হেলিয়া পড়ে। যোগীর মল শূকরে ছোঁয় না। নাক টেপা হওয়া ভাল নয় ; নাকটেপা হলে, ছানী হলেও সরল হয় না। উন-পাঁজুরে, হাড়-পেকে, কনুয়ের গাঁট মোটা, হাত ছিনে লক্ষণ ভাল নয়। ঠোঁট ডোমের মত হলে নীচবুদ্ধি হয়। স্ত্রীলোকের পশ্চাদ্ভাগ ডেঁয়ে পিঁপ্‌ড়ের (বড় পিঁপ্‌ড়ের) পশ্চাদ্ভাগের মত উঁচু হলে, তাদের কাম প্রবৃত্তি বেশী হয়।

৬। ঈশ্বর ছুঁলোক করলেন কেন ? তাঁর ইচ্ছা, তাঁর লীলা। তাঁর মায়াতে বিছাও আছে, অবিছাও আছে। অন্ধকারেরও প্রয়োজন আছে ; অন্ধকার থাকলে আলোর আরও মহিমা প্রকাশ হয়। কাম, ক্রোধ, লোভ, খারাপ জিনিস বটে, তবে তিনি দিয়েছেন কেন ? মহৎ লোক তৈয়ের

করবেন ব'লে। ইন্দ্রিয় জয় করলে মহৎ হয়। জিতেইন্দ্রিয় কি না করতে পারে? ঈশ্বরলাভ পর্য্যন্ত তাঁর কৃপায় করতে পারে। আবার অন্যদিকে দেখ, কাম থেকে তাঁর সৃষ্টি লীলা চলছে। দুষ্টলোকেরও দরকার আছে। একটি তালুকের প্রজারা বড়ই দুর্দান্ত হ'য়েছিল, তখন গোলোক চৌধুরীকে পাঠিয়ে দেওয়া হল। তার নামে প্রজারা কাঁপতে লাগল,—
এত কঠোর শাসন! সবই দরকার।

৭। কি জান, সুখ দুঃখ দেহ ধারণের ধর্ম। কবিকঙ্কণ-চণ্ডীতে আছে যে, কালুবীর জেলে গিয়েছিল; তার বুক পাষণ দিয়ে রেখেছিল। কিন্তু কালুবীর ভগবতীর বরপুত্র। দেহ ধারণ ক'রলেই সুখ দুঃখ ভোগ আছে। শ্রীমন্ত বড় ভক্ত; আর তার মা খুল্লনাকে ভগবতী কত ভালবাসতেন। সেই শ্রীমন্তের কত বিপদ! মশানে কাটতে নিয়ে গিয়েছিল। একজন কাঠুরে পরম ভক্ত; ভগবতীর দর্শন পেলে, তিনি কত ভালবাসলেন, কত কৃপা করলেন। কিন্তু তার কাঠুরের কাজ আর ঘুচলো না! সেই কাঠ কেটে আবার খেতে হ'লো। কারাগারে চতুর্ভূজ, শঙ্খ-চক্র-গদাধারী ভগবান,— দেবকীর দর্শন হ'লো, কিন্তু কারাগার ঘুচলো না।

৮। পাপ পুণ্য আছে, আবার নাই। তিনি যদি অহং তত্ত্ব রেখে দেন, তা হ'লে ভেদ-বুদ্ধিও রেখে দেন, পাপ-পুণ্য-জ্ঞানও রেখে দেন। তিনি দু একজনেতে অহঙ্কার একেবারে পুঁছে ফেলেন,—তারা পাপ-পুণ্য ভাল মন্দের পার হয়ে যায়।

ঈশ্বরদর্শন যতক্ষণ না হয়, ততক্ষণ ভেদ-বুদ্ধি, ভাল-মন্দ-জ্ঞান থাকবেই থাকবে। তুমি মুখে ব'লতে পার,—“আমার পাপ-পুণ্য সমান হয়ে গেছে ; তিনি যেমন করাচ্ছেন, তেমনি করছি।” কিন্তু অন্তরে জান যে, ও সব কথা মাত্র, মন্দ কাজটি করলেই মন ধুগ্ ধুগ্ করবে।

৯। যতক্ষণ ঈশ্বরকে লাভ না হয়, ততক্ষণ মনে হয় আমরা স্বাধীন। Englishmanরা (ইংরাজী জানা লোকেরা) যাকে ‘স্বাধীন ইচ্ছা’ (Free Will) বলে, সেই স্বাধীন-ইচ্ছা-বোধ তিনিই দিয়ে রাখেন। যারা তাঁকে লাভ করে নাই, তাদের ভিতর ঐ স্বাধীন-ইচ্ছা-বোধ না দিলে পাপের বৃদ্ধি হ'তো। নিজের দোষে পাপ করছি,—এ বোধ যদি তিনি না দিতেন, তা হলে পাপের আরও বৃদ্ধি হ'তো। পাপকে ভয় হ'তো না। পাপের শাস্তি হ'তো না। যারা তাঁকে লাভ করেছে, তারা জানে, ‘দেখতেই ‘স্বাধীন ইচ্ছা’,—বস্তুতঃ তিনিই যন্ত্রী, আমি যন্ত্র ; তিনি ইঞ্জিনিয়ার, আমি গাড়ী।’

১০। অহঙ্কার করা বৃথা ; ধন, মান, জীবন, যৌবন কিছুই চিরদিন থাকবে না। একটা মাতাল দুর্গা প্রতিমার রূপ ও সাজ্ গোজ্ দেখে ব'লেছিল, “মা, যতই কেন সাজো-গোজো না, তিনদিন পরে তোকে টেনে গঙ্গার জলে ফেলে দেবে।” তাই বলি জজই হও, আর যেই হও,—সব দুদিনের জন্ম। এ সব অহঙ্কার করা, দু'দিনের অহঙ্কার।

১১। যে সর্বদা 'পাপ' 'পাপ' করে, সে শালাই পাপী হ'য়ে যায়।

১২। আত্মহত্যা করা মহাপাপ ; ফিরে ফিরে সংসারে আসতে হবে, আর এই সংসার-যন্ত্রণা ভোগ করতে হবে। তবে যদি ঈশ্বরের দর্শন হ'য়ে কেউ শরীর ত্যাগ করে, তাকে আত্মহত্যা বলে না। সে শরীর ত্যাগে দোষ নাই। জ্ঞান-লাভের পর কেউ কেউ শরীর ত্যাগ করে। কবিরাজেরা বোতলের ভিতর মকরধ্বজ তৈয়ার করে। চারিদিকে মাটি দিয়ে আগুনে ফেলে রাখে। বোতলের ভিতর যে সোণা আছে, সেই সোণা আগুনের তাতে আরো অন্য জিনিসের সঙ্গে মিশে মকরধ্বজ হয়। তখন কবিরাজ বোতলটি আঁসে আঁসে ভেঙে, ভিতরের মকরধ্বজ রেখে দেয়। তখন বোতল থাকলেই বা কি, আর গেলেই বা কি ? ভগবান্ লাভের পর শরীর থাকলেই বা কি, আর গেলেই বা কি ?

১৩। যতক্ষণ মানুষ অজ্ঞান থাকে,—অর্থাৎ যতক্ষণ ঈশ্বর লাভ হয় নাই,—ততক্ষণ জন্মগ্রহণ করতে হবে। কিন্তু জ্ঞানলাভ হলে আর এ সংসারে আসতে হয় না ; পৃথিবীতে বা অন্য কোন লোকে যেতে হয় না। কুমোরেরা হাঁড়ি রোদে শুকুতে দেয় ; দেখ নাই, তার ভিতর পাকা হাঁড়িও আছে, আবার কাঁচা হাঁড়িও আছে। গরু টরু চলে গেলে, হাঁড়ি কতক কতক ভেঙে যায়। পাকা হাঁড়ি ভেঙে গেলে কুমোর সেগুলিকে ফেলে দেয়, তার দ্বারা আর কোন কাজ হয় না।

কাঁচা হাঁড়ি ভাঙলে কুমোর তাদের আবার নেয় ; নিয়ে চাকেতে তাল পাকিয়ে দেয়, নূতন হাঁড়ি তৈয়ের হয় ! তাই যতক্ষণ ঈশ্বর-দর্শন হয় নাই, ততক্ষণ কুমোরের হাতে যেতে হবে, অর্থাৎ এই সংসারে ফিরে ফিরে আসতে হবে । সিদ্ধ ধান পুঁতলে কি হবে ? আর গাছ হয় না । মানুষ জ্ঞানাগ্নিতে সিদ্ধ হলে, তাব দ্বারা আর নূতন সৃষ্টি হয় না, সে মুক্ত হয়ে যায় ।

১৪ । এক শিব-মন্দিরের পাশে একজন সন্ন্যাসী থাকত । মন্দিরের সামনেই একটি বেশ্যালয় ছিল । সেখানে দিন রাত লোক আসে দেখে, সন্ন্যাসীর মনে দুঃখ হ'ল, এবং সে একদিন বেশ্যাকে ডেকে তিরস্কার করে ব'লল, “দ্যাখ্, তুই ভারি পাপী, দিন রাত পাপ করছিস্, তোর কি দশা হবে ?” এই কথা শুনে, বেশ্যার অনুতাপ হ'ল, এবং মনে মনে আপনাকে ধিক্কার দিয়ে ঈশ্বরের নিকট বহু প্রার্থনা করল । সেই দিন থেকে, যখনই সে পেটের দায়ে পাপ কাজ করত, তখনই কাতর-প্রাণে ভগবানের নিকট ক্ষমা চাইত । এ দিকে সন্ন্যাসী মনে করল যে, মাগীর বাড়ীতে কত লোক আসে তা গুণে দেখবে ; এবং সেই দিন হতে, তার বাড়ীতে যতবার লোক আসে, সে ততবার এক একটি ক'রে টিল ধরে । ক্রমে এক একটা ক'রে অনেক টিল জমে গেল । পরে আর একদিন সেই মাগীকে দেখতে পেয়ে, সন্ন্যাসী টিলের কাঁড়িটার দিকে চেয়ে ব'লে, “দ্যাখ্ দেখি, এই ক'দিনে তুই কত রাশি রাশি পাপ

ক'রেছি, তা এখনও বলি সাবধান !” মাগী টিলের রাশি দেখে তাঁরি ভয় পেয়ে, ভগবানের কাছে কাতরপ্রাণে প্রার্থনা করল, “হে ভগবান্, আমায় মুক্ত কর ।” পরে ঐ বেষ্টা ও সন্ন্যাসীর একই দিনে মৃত্যু হ'ল । যমদূত এসে সন্ন্যাসীকে, আর বিষ্ণুদূত এসে বেষ্টাকে ল'য়ে যাচ্ছে । এই দেখে সন্ন্যাসী ব্যস্ত সমস্ত হ'য়ে বল্লে, “ওগো, তোমাদের ভুল হয়েছে : বিষ্ণুদূত আমার জন্মে এসেছে, আর যমদূত নিশ্চয়ই ঐ মাগীকে নিয়ে যেতে এসেছে ।” যমদূত ব'ল্লে, “না,— আমাদের ভুল হয় নাই, ঠিকই হয়েছে ।” সন্ন্যাসী তখন রেগে বল্লে, “কি ? আজীবন আমি ভগবানের নাম করলাম, আর ও মাগী বেষ্টাবৃত্তি করল । এখন আমায় তোমরা, আর ওকে বিষ্ণুদূতে নিয়ে যাবে,—এ কেমন কথা ?” যমদূত ব'ল্লে, “ও বেষ্টাবৃত্তি করে নাই, বেষ্টাবৃত্তি করেছ তুমি ; আর তুমি ভগবানের নাম কর নাই, নাম করেছে ঐ বেষ্টা । ভাল ক'রে তা বুঝে দেখ । যার যেমন ভাব, তার তেমন লাভ,— তা কি জান না ?”

১৫ । ভগবান্ মন দেখেন । কে কি কাজে আছে, কে কোথায় প'ড়ে আছে, তা দেখেন না । ‘ভাবগ্রাহী জনার্দন ।’ ছুই বন্ধু বেড়াতে বেড়াতে দেখতে পেল, এক জায়গায় ভাগবত পাঠ হচ্ছে । একজন বল্লে, “চল ভাই, খানিকক্ষণ ঐ খানে ব'সে ভাগবত শুনিয়ে ।” অপর জন বল্লে, “না ভাই, ভাগবত শুনে কি হবে ? চল ততক্ষণ বেষ্টাবাড়ী গিয়ে আমোদ

করিগে।” প্রথম জন তাতে রাজী হ'ল না। সে সেখানে গিয়ে ভাগবত শুনতে লাগল। অপর জন বেশ্যালয়ে গেল। কিন্তু বেশ্যালয়ে তার আমোদ করা হ'ল না। সে কেবলই ভাবতে লাগল যে, ‘হায়! হায়! আমি কেন এখানে এলাম! না জানি আমার বন্ধু এতক্ষণ সেখানে ব'সে কত হরিগুণ-গান শুনছে।’ অপর জন ভাগবত শুনতে বসল। কিন্তু তার ভাল লাগল না। সে সেখানে ব'সে কেবলই ভাবতে লাগল যে, ‘হায়! হায়! আমি কেন আমার বন্ধুর সঙ্গে গেলাম না! না জানি, সে বেশাবাড়ী এতক্ষণ কত আমোদ করছে।’ ফলে যে ব্যক্তি ভাগবত শুনছিল, তার বেশ্যালয়ে যাওয়ার ফল হ'ল; আর যে ব্যক্তি বেশ্যালয়ে গিয়েছিল, তার ভাগবত শুনার ফল হ'ল।

১৬। কর্ত্তাভজারা (অর্থাৎ, যারা কর্ত্তাকে,—গুরুকে,—ঈশ্বরবোধে ভজনা করে, পূজা করে) মন্ত্র দিবার সময় বলে ‘এখন মন তোঁর’; অর্থাৎ এখন সব তোঁর মনের উপর নির্ভর করছে। তারা বলে, ‘যার ঠিক মন, তার ঠিক করণ, তার ঠিক লাভ।’ কর্ত্তাভজাদের মত ভাল বটে, তবে ওরা খারাপ ক'রে ফেলেছে। ওদের মত হচ্ছে, ‘মেয়ে হিজড়ে, পুরুষ খোজা, তবে হবি কর্ত্তাভজা।’ দু জনেই কামজিৎ হওয়া চাই, তবে ঠিক ঠিক কর্ত্তাভজা।

১৭। জ্ঞান হলেই মুক্তি। যেখানেই থাকো,—ভাগাড়েই মৃত্যু হোক, আর গঙ্গাতীরেই মৃত্যু হোক,—জ্ঞানীর মুক্তি

হবে। তবে অজ্ঞানের পক্ষে গঙ্গাতীর। পুরাণ মতে, চণ্ডালেরও যদি ভক্তি হয়, তার মুক্তি হবে। এ মতে নাম করলেই হয়। যাগ, যজ্ঞ, তন্ত্র, মন্ত্র,—এ সব দরকার নাই। বেদমত আলাদা। ব্রাহ্মণ না হলে মুক্তি হয় না। আবার ঠিক মন্ত্র উচ্চারণ না হলে পূজা গ্রহণ হয় না। যাগ, যজ্ঞ, মন্ত্র, তন্ত্র,—সব বিধি অনুসারে করতে হবে।

১৮। পূজার চেয়ে জপ বড়। জপের চেয়ে ধ্যান বড়। ধ্যানের চেয়ে ভাব বড়। ভাবের চেয়ে মহাভাব প্রেম বড়। চৈতন্যদেবের প্রেম হ'য়েছিল। প্রেম হ'লে ঈশ্বরকে বাঁধবার দড়ি পাওয়া গেল।

১৯। তাঁকে লাভ করতে হ'লে, সংস্কার দরকার। একটু কিছু ক'রে থাকা চাই। তপস্যা। তা এ জন্মেই হোক, আর পূর্ব জন্মেই হোক। দ্রৌপদীর যখন বস্ত্র হরণ করছিল, তাঁর ব্যাকুল হ'য়ে ক্রন্দন শুনে ঠাকুর দেখা দিলেন, আর বললেন,—“তুমি যদি কারকে কখনও বস্ত্র দান করে থাক, ত মনে করে দেখ,—তবে লজ্জা নিবারণ হবে।” দ্রৌপদী বললেন, “হঁ। মনে পড়েছে। একজন ঋষি স্নান করছিলেন,—তাঁর কপনী ভেসে গিয়েছিল। আমি নিজের কাপড়ের আধখান ছিঁড়ে তাঁকে দিয়েছিলাম।” ঠাকুর বললেন, “তবে আর তোমার ভয় নাই।”

২০। পূর্ব জন্মের সংস্কার মানতে হয়। একজন শব সাধন করছিল; গভীর বনে ভগবতীর আরাধনা করছিল।

কিন্তু সে অনেক বিভীষিকা দেখতে লাগল। শেষে তাকে বাঘে নিয়ে গেল। আর একজন বাঘের ভয়ে নিকটে একটা গাছের উপর উঠেছিল। সে শব আর অন্যান্য পূজার উপকরণ তৈয়ারি দেখে, নেমে এসে আচমন করে শবের উপর বসে গেল। একটু জপ করতে করতে মা সাক্ষাৎকার হ'লেন ও বল্লেন,— “আমি তোমার উপর প্রসন্ন হয়েছি, তুমি বর নাও।” সে মার পাদপদ্মে প্রণত হয়ে বললে, “মা, একটা কথা জিজ্ঞাসা করি। তোমার কাণ্ড দেখে অবাক হয়েছি। সে ব্যক্তি এত খেটে, এত আয়োজন ক'রে, এতদিন ধ'রে তোমার সাধন করছিল। —তাকে তোমার দয়া হ'লো না। আর আমি কিছু জানি না, শুনি না,—ভজনহীন, সাধনহীন, জ্ঞানহীন, ভক্তিহীন,—আমার উপর এত কৃপা হ'লো!” ভগবতী হাস্তে হাস্তে বল্লেন, “বাছা, তোমার জন্মান্তরের কথা স্মরণ নাই। তুমি জন্ম জন্ম আমার তপস্যা ক'রেছিলে, সেই সাধন-বলে তোমার এরূপ জোটপাট হয়েছে,—তাই আমার দর্শন পেলে। এখন বল, কি বর চাও?”

২১। পুরাণ সংস্কার কি এমনি যায়? একজন হিন্দু বড় ভক্ত ছিল,—সর্বদা জগদম্বার পূজা আর নাম ক'রত মুসলমানদের যখন রাজ্য হ'ল, তখন সেই ভক্তকে ধ'রে মুসলমান ক'রে দিল। আর বললে, “তুই এখন মুসলমান হয়েছিস্, বল্ আল্লা! কেবল আল্লা নাম জপ কর্।” সে অনেক কষ্টে ‘আল্লা’ ‘আল্লা’ বলতে লাগল। কিন্তু এক একবার

বলে ফেলতে লাগল ‘জগদম্বা!’ তখন মুসলমানেরা তাকে মারতে যায়,—সে বললে, “দোহাই সেখজী, আমায় মারবেন না। আমি তোমাদের ‘আল্লা’ নাম করতে খুব চেষ্টা করছি, কিন্তু আমাদের ‘জগদম্বা’ আমার কণ্ঠা পর্য্যন্ত রয়েছেন,—তোমাদের ‘আল্লা’কে ঠেলে ঠেলে দিচ্ছেন।”

২২। ভক্তি দ্বারাই সব পাওয়া যায়। তাঁকে ভালবাসতে পারলে আর কিছুই অভাব থাকে না। ভগবতীর কাছে কার্তিক আর গণেশ বসে ছিলেন। তাঁর গলায় মণিময় রত্নমালা। মা বল্লেন, “যে ব্রহ্মাণ্ড আগে প্রদক্ষিণ ক’রে আসতে পারবে, তাকে এই মালা দিব।” কার্তিক তৎক্ষণাৎ ক্ষণবিলম্ব না ক’রে, ময়ূরে চড়ে বেরিয়ে গেলেন। গণেশ, আস্তে আস্তে মাকে প্রদক্ষিণ ক’রে প্রণাম করলেন। গণেশ জানেন, মার ভিতরেই ব্রহ্মাণ্ড! মা প্রসন্না হ’য়ে গণেশের গলায় হার পরিয়ে দিলেন। অনেকক্ষণ পরে কার্তিক এসে দেখেন যে, দাদা হার প’রে বসে আছেন।

২৩। একজন সস্ত্রীক বিবাগী হ’য়ে নানা তীর্থ ক’রে বেড়ায়। পথে যেতে যেতে স্বামী এক জায়গায় কয়েকটা হীরা পড়ে আছে দ্যাখে। হীরা দেখে তার মনে হ’ল,—‘এ গুলিকে মাটি চাপা দিয়ে রাখি; কি জানি, আমার স্ত্রী যদি দেখতে পায়, তার লোভ জন্মাতে পারে।’ সে তাই মনে ক’রে, ঐ গুলার উপর মাটি চাপা দিচ্ছে,—এমন সময় তার স্ত্রী তা দেখতে পেয়ে কাছে এসে বললে, “হ্যাঁ গা,—তুমি কি কচ্ছিলে?”

স্বামী খতমত খেয়ে গেল। স্ত্রী যাই পা দিয়ে ধুলো সরিয়েছে, অমনি হীরাগুলি দেখতে পেলে ও বললে, “এখনো হীরা মাটি তফাৎ বোধ রয়েছে,—তবে তুমি বনে এলে কেন?”

২৪। ঈশ্বরের কথা যদি কেউ বলে, লোকে বিশ্বাস করে না। যদি কোন মহাপুরুষ বলেন, “আমি ঈশ্বরকে দেখেছি,”—তবুও সাধারণ লোকে সেই মহাপুরুষের কথা লয় না। লোকে মনে করে,—“ও যদি ঈশ্বর দেখেছে, আমাদের দেখিয়ে দিগ্।” একজন তার বন্ধুকে এসে বললে, “ওহে! কাল ওপাড়া দিয়ে যাচ্ছি, এমন সময় দেখলাম, সে বাড়ীটা হুড়্ মুড়্ ক’রে পড়ে গেল।” বন্ধু বললে, “দাঁড়াও হে, একবার খবরের কাগজখানা দেখি।” এখন বাড়ী হুড়্ মুড়্ ক’রে পড়ার কথা খবরের কাগজে কিছুই নাই। তখন সে ব্যক্তি বললে, “কই খবরের কাগজে ত কিছুই নাই;—ও সব কাজের কথা নয়।” সে লোকটা বললে, “আমি যে দেখে এলাম!” ও বললে, “তা হোক, যে কালে খবরের কাগজে নাই, সে কালে ও কথা বিশ্বাস কল্পুম না।” ঈশ্বর মানুষ হয়ে লীলা করেন, এ কথা কেমন ক’রে বিশ্বাস করবে? এ কথা যে ওঁদের ইংরাজি লেখাপড়ার ভিতর নাই! পূর্ণ অবতার বোঝান বড় শক্ত; কি বল? চৌদ্দ পোয়ার ভিতর অনন্ত আসা!

২৫। বিশ্বাসের কত জোর তা জান? বিভীষণ একটি পাতায় রাম নাম লিখে, ঐ পাতাটি একটি লোকের কাপড়ের খুঁটে বেঁধে দিয়েছিল। সে লোকটি সমুদ্রের পারে যাবে।

বিভীষণ তাকে বললে,—“তোমার ভয় নাই, তুমি বিশ্বাস ক’রে জলের উপর দিয়ে চলে যাও ; কিন্তু দেখো, যাই অবিশ্বাস করবে, অম্নি জলে ডুবে যাবে।” লোকটি বেশ সমুদ্রের উপর দিয়ে চলে যাচ্ছিল। এমন সময়ে তার ভারি ইচ্ছা হ’ল যে, কাপড়ের খুঁটে কি বাঁধা আছে একবার চাখে। খুলে চাখে যে, কেবল ‘রাম নাম’ লেখা রয়েছে। তখন সে ভাবলে, ‘একি ! শুধু রাম নাম একটি লেখা রয়েছে !’ যাই অবিশ্বাস, অম্নি ডুবে গেল।

২৬। চক্ৰমকি পাথর শত বছর জলের ভিতর প’ড়ে থাকলেও, তার আগুন নষ্ট হয় না,—তুলে লোহায় ঘা মার্বা মাত্র আগুন বেরায়। ঠিক বিশ্বাসী ভক্ত, হাজার হাজার অপবিত্র সংসারীর ভিতর প’ড়ে থাকলেও, তার বিশ্বাস ভক্তি কিছুতেই নষ্ট হয় না। ভগবৎ কথা হ’লেই সে উন্মত্ত হয়। পাথর হাজার বছর জলের মধ্যে প’ড়ে থাকলেও, তার ভিতর জল ঢোকে না,—কিন্তু মাটিতে জল লাগলে তখনি গ’লে যায়। বিশ্বাসী হৃদয় হাজার হাজার পরীক্ষার মধ্যে প’ড়লেও হতাশ হয় না ; কিন্তু অবিশ্বাসী মানুষ সামান্য কারণেই টলে যায়।

২৭। যখন কোন দেব দেবীর গান গাইবি, আগে চোখের সামনে তাঁকে দাঁড় করাবি,—তাঁকে শুনাচ্ছিচ্ছ মনে ক’রে তন্ময় হ’য়ে গাইবি। লোককে শুনাচ্ছিচ্ছ কখনও ভাববি না,—তা হলে লজ্জা আসবে না।

২৮। গোপীদের বস্ত্রহরণের মানে কি ?—অষ্টপাশ।

গোপীদের সব পাশই গিয়েছিল, কেবল লজ্জা বাকি ছিল। তাই তিনি ও পাশটাও ঘুচিয়ে দিলেন। ঈশ্বর লাভ হলে সব পাশ চলে যায়।

২৯। মেয়েরা রাত্রে স্বামীর সঙ্গে কি কথা হয়েছে, কার কাছে বলে না,—বলতে ইচ্ছাও হয় না। কোঁন রকমে প্রকাশ হ'লে লজ্জা পায়; কিন্তু আপনার এক-বয়সীদের কাছে সব কথাই বলে,—বলবার জন্ম ব্যাকুল হয় ও ব'লে আনন্দ পায়। ঈশ্বর-ভক্তও যে ভাবে তাঁর সঙ্গে আলাপ করে, ও তাতে প্রাণে যে ভাব হয়, যার তার কাছে বলতে ইচ্ছা করে না,—ব'লেও সুখ পায় না, আর বলতে গেলে প্রাণে সে ভাব থাকে না। কিন্তু সে আর একজন ভক্তের কাছে প্রাণ খুলে সব কথা বলে,—ব'লেও সুখ পায়, আর বলবার জন্ম ব্যাকুল হয়।

৩০। যার ঈশ্বর লাভ হয়েছে, সে মন প্রাণ, দেহ আত্মা সমস্ত তাঁকে সমর্পণ করে। পম্পা-সরোবরে স্নানের সময়, রাম লক্ষ্মণ সরোবরের নিকট মাটিতে ধনুক গুঁজে রাখলেন। স্নানের পর উঠে লক্ষ্মণ তুলে দেখেন যে, ধনুক রক্তাক্ত হয়ে রয়েছে। রাম দেখে বললেন, “ভাই দেখ দেখ, বোধ হয় কোন জীব হিংসা হলো।” লক্ষ্মণ মাটি খুঁড়ে দেখেন, একটা বড় কোলা ব্যাঙ,—মুমূষু অবস্থা। রাম করুণ স্বরে বলতে লাগলেন, “কেন তুমি শব্দ কর নাই? আমরা তোমাকে বাঁচাবার চেষ্টা কর্তাম! যখন সাপে ধরে, তখন তো খুব

চীৎকার করো।” ব্যাঙ্ বললে, “রাম! যখন সাপে ধরে, তখন আমি এই ব’লে চীৎকার করি,—‘রাম রক্ষা করো, রাম রক্ষা করো।’ এখন দেখছি, রামই আমায় মার্ছেন। তাই চূপ করে আছি।”

৩১। যাদের চৈতন্য হয়েছে, তারা পাপপুণ্যের পার। তারা দেখে,—ঈশ্বরই সব করছেন। এক জায়গায় একটি মঠ ছিল। মঠের সাধুরা রোজ মাধুকরী (ভিক্ষা) করতে যায়। একদিন একটি সাধু ভিক্ষা করতে করতে দেখে যে, একটি জমিদার একটি লোককে ভারি মার্ছে। সাধুটি বড় দয়ালু; সে মাঝে পড়ে জমিদারকে মার্তে বারণ করলে। জমিদার তখন ভারি রেগে রয়েছে, সে সমস্ত কোপটা সাধুটির গায়ে ঝাড়ে। এমন প্রহার করলে যে, সাধুটি অচৈতন্য হয়ে পড়ে রইল। কেউ গিয়ে মঠে খপর দিলে, ‘তোমাদের একজন সাধুকে এক জমিদার ভারি মেরেছে।’ মঠের সাধুরা দৌড়ে এসে ছাখে, সাধুটি অচৈতন্য হয়ে পড়ে রয়েছে! তখন তারা পাঁচ জনে ধরাধরি করে, তাকে মঠের ভিতর নিয়ে গিয়ে একটি ঘরে শোয়ালে। সাধু অজ্ঞান, চারিদিকে মঠের লোকে ঘিরে বিমর্ষ হয়ে বসে আছে, কেউ কেউ বাতাস কচ্ছে। একজন বলে, “মুখে একটু দুধ দিয়ে দেখা যাক।” মুখে দুধ দিতে দিতে সাধুর চৈতন্য হ’ল। চোখ্ মিলে দেখতে লাগল। একজন বলে, “ওহে দেখি, জ্ঞান হয়েছে কি না? লোক চিন্তে পারছে কি না?” তখন সে সাধুকে খুব চঁচিয়ে

জিজ্ঞাসা করলে, “মহারাজ ! তোমাকে কে দুধ খাওয়াচ্ছে ?” সাধু আশ্বে আশ্বে বলছে, “ভাই, যিনি আমাকে মেরেছিলেন, তিনিই দুধ খাওয়াচ্ছেন।” ঈশ্বরকে জানতে না পারলে এরূপ অবস্থা হয় না।

৩২। তমোগুণকে পরের মঙ্গলের জন্য ব্যবহার করা যায়। বৈদ্য তিন প্রকার :—উত্তম বৈদ্য, মধ্যম বৈদ্য, অধম বৈদ্য। যে বৈদ্য এসে নাড়ী টিপে ‘ঔষধ খেও হে’, এই কথা বলে চলে যায়, সে অধম বৈদ্য,—রোগী খেলে কি না, এ খবর সে লয় না। যে বৈদ্য রোগীকে ঔষধ খেতে অনেক ক’রে বুঝায়,—যে মিষ্ট কথাতে বলে, ‘ওহে ঔষধ না খেলে কেমন করে ভাল হবে ! লক্ষ্মীটি খাও। আমি নিজে ঔষধ মেড়ে দিচ্ছি, খাও’,—সে মধ্যম বৈদ্য। আর যে বৈদ্য, রোগী কোন মতে খেলে না দেখে, বৃকে হাঁটু দিয়ে, জোর করে ঔষধ খাইয়ে দেয়,—সে উত্তম বৈদ্য। এই বৈদ্যের তমোগুণ,—এ গুণে রোগীর মঙ্গল হয়, অপকার হয় না।

৩৩। দয়া আর মায়া,—এ দুটি আলাদা জিনিস। মায়া মানে,—আত্মীয়ে মমতা ; যেমন বাপ মা, ভাই ভগ্নী, স্ত্রী পুত্র,—এদের উপর ভালবাসা। দয়া,—সর্বভূতে ভালবাসা ; সমদৃষ্টি। কারু ভিতর যদি দয়া দেখ,—যেমন বিদ্যাসাগরের,—সে জানবে ঈশ্বরের দয়া। দয়া থেকে সর্বভূতের সেবা হয়। মায়াও ঈশ্বরের। মায়া দ্বারা তিনি আত্মীয়দের সেবা করিয়ে লন। তবে একটি কথা আছে ;—মায়াতে অজ্ঞান

ক'রে রাখে, আর বন্ধ করে। কিন্তু দয়াতে চিন্তাশুদ্ধি হয়,—
ক্রমে বন্ধন মুক্তি হয়।

৩৪। তুমি বলছ বটে, তাঁর নাম রাখবার জন্য সব করছ ;
কিন্তু কিছুদিন পরে এ ভাবও থাকবে না। একজন লোকের
একটা পাহাড়ের উপর একখানা ঘর ছিল। কুঁড়ে ঘর,—
অনেক মেহনত ক'রে ঘরখানি করেছিল। কিছুদিন পরে
একদিন ভারি ঝড় এলো। কুঁড়ে ঘর টলমল করতে লাগল।
তখন সে ঘর রক্ষার জন্য ভারি চিন্তিত হ'ল। বললে, “হে
পবনদেব, দেখো যেন ঘরটি ভেঙ্গে না বাবা।” পবনদেব
কিন্তু শুনছেন না। ঘর মড়মড় করতে লাগল। তখন
লোকটা একটা ফিকির ঠাওরালে ;—তার মনে পড়ল যে,
হনুমান পবনের ছেলে। যাই মনে পড়া, অমনি ব্যস্ত হ'য়ে
বলে উঠলো, “বাবা, ঘর ভেঙ্গে না,—হনুমানের ঘর ; দোহাই
তোমার !” কিন্তু ঘর তবুও মড়মড় করে। কে বা তার
কথা শুনে ! অনেকবার ‘হনুমানের ঘর’ ‘হনুমানের ঘর’
করার পর দেখলে যে, কিছু হ'ল না। তখন বলতে লাগল,
“বাবা, লক্ষ্মণের ঘর, লক্ষ্মণের ঘর।” তাতেও হ'ল না।
তখন বললে, “বাবা, রামের ঘর, রামের ঘর। দেখো বাবা
ভেঙ্গে না,—দোহাই তোমার !” তাতেও কিছু হ'ল না ;—
ঘর মড়মড় ক'রে ভাঙতে আরম্ভ হ'ল। তখন প্রাণ বাঁচাতে
হবে,—লোকটা ঘর থেকে বেরিয়ে আসবার সময় বলতে
লাগল, “যাঃ শালার ঘর !”

৩৫। কলিতে বলে, এক দিন এক রাত কাঁদলে ঈশ্বর-দর্শন হয়। দেখ, ঈশ্বরকে দেখা যায়। অবাঞ্ছনসোগোচর,—বেদে বলেছে ; এর মানে বিষয়াসক্ত মনের অগোচর। বৈষ্ণব-চরণ বলতো,—তিনি শুদ্ধ-মন, শুদ্ধ-বুদ্ধির গোচর। তাই সাধুসঙ্গ, প্রার্থনা, গুরুর উপদেশ, এই সব প্রয়োজন। তবে চিত্তশুদ্ধি হয়। তবে তাঁর দর্শন হয়। ঘোলা জলে নির্মলী ফেললে পরিষ্কার হয়। তখন মুখ দেখা যায়। ময়লা আর্শিতেও মুখ দেখা যায় না। চিত্তশুদ্ধির পর ভক্তি লাভ করলে, তবে তাঁর কৃপায় তাঁকে দর্শন হয়। দর্শনের কথা কাহাকেও বলতে নাই,—তা হলে আর দর্শন হয় না।

৩৬। সময় না হলে কিছু হয় না। কারু কারু ভোগ, কর্ম অনেক বাকি থাকে। তাই জন্ম দেবীতে হয়। ফোড়া কাঁচা অবস্থায় অঙ্গ করলে হিতে বিপরীত হয় ; পেকে মুখ হলে ডাক্তার অঙ্গ করে। ছেলে বলছিল, “মা এখন আমি ঘুমুঠ, আমার বাহে পেলো তখন তুমি তুলো।” মা বলে, “বাবা, বাহোতেই তোমায় তুলবে, আমায় তুলতে হবে না।”

৩৭। যাকে যা দেবার তাঁর সব ঠিক করা আছে। সরার মাপে শাশুড়ী বৌদের ভাত দিত। তাতে কিছু ভাত কম হ’তো। একদিন সরাখানি ভেঙ্গে যাওয়াতে বৌরা আহ্লাদ কচ্ছিল। তখন শাশুড়ী বলে, “নাচ কোঁদ বৌমা, আমার হাতের আটকেল (আন্দাজ) আছে।”

৩৮। এ দেহ যখন অসার ও অনিত্য,—তখন সাধু

ভক্তেরা এ দেহের প্রতি এত যত্ন করেন কেন, জান ? খালি
সিন্দুকের কেউ যত্ন করে না ; যে সিন্দুকে মোহর, টাকা, কি
দামী জিনিস থাকে,—সকলে তাকে যত্ন ক’রে রক্ষা করে ।
যে হৃদয়ে তিনি বিরাজ করছেন,—যেখানে তাঁর নিত্য লীলা
প্রকাশ হচ্ছে,—সাদু ভক্তগণ সেই দেহকে যত্ন না ক’রে
থাকতে পারেন না ।

৩৯ । বাঁচবার ইচ্ছা কেন ? রাবণ বধের পর রাম
লক্ষ্মণ লঙ্কায় প্রবেশ করলেন ; রাবণের বাড়ীতে গিয়ে দেখেন,
—রাবণের মা নিকষা পালিয়ে যাচ্ছে । লক্ষ্মণ আশ্চর্য হ’য়ে
বললেন, “রাম ! নিকষার স্ববংশ নাশ হলো, তবু প্রাণের
উপর এত টান !” নিকষাকে কাছে ডাকিয়ে রাম বললেন,
“তোমার ভয় নাই ; তুমি কেন পালাচ্ছিলে ?” নিকষা বলে,
“রাম ! আমি সে জন্তু পালাই নাই । বেঁচে ছিলাম বলে
তোমার এত লীলা দেখতে পেলাম ; যদি আরও বাঁচি তো
আরও কত লীলা দেখতে পাব ! তাই বাঁচবার সাধ !”

৪০ । বৈষ্ণবরা বলে যে, ঈশ্বরের পথে যারা যাচ্ছে,
আর যারা তাঁকে লাভ ক’রেছে, তাদের থাক্ থাক্ আছে ;—
প্রবর্তক, সাধক, সিদ্ধ, আর সিদ্ধের সিদ্ধ । যে সবে পথে
উঠছে, তাকে প্রবর্তক বলে । যে সাধন ভজন করছে,—
পূজা, জপ, ধ্যান, নাম-গুণ-কীর্তন করছে,—সে ব্যক্তি সাধক ।
যে ব্যক্তি ঈশ্বর আছেন বোধে বোধ করছে, তাকেই সিদ্ধ
বলে । যেমন বেদান্তের উপমা আছে ;—অন্ধকার ঘর, বাবু

শুয়ে আছে ; একজন বাবুকে হাত্‌ড়ে হাত্‌ড়ে খুঁজছে । একটা কৌচে হাত দিয়ে বলছে,—‘এ নয়’ ; জানালায় হাত দিয়ে বলছে,—‘এ নয়’ ; দরজায় হাত দিয়ে বলছে,—‘এ নয়’ । ‘নেতি, নেতি, নেতি ।’ শেষে বাবুর গায়ে হাত পড়েছে, তখন বলছে, ‘ইহ’,—‘এই বাবু’ ; অর্থাৎ, ‘অস্তিত্ব’ বোধ হ’য়েছে । বাবুকে লাভ হ’য়েছে ; কিন্তু বিশেষরূপে জানা হয় নাই । আর এক থাক্ আছে, তাকে বলে সিদ্ধের সিদ্ধ । বাবুর সঙ্গে যদি বিশেষ আলাপ হয়,—যদি ঈশ্বরের সঙ্গে প্রেম-ভক্তির দ্বারা বিশেষ আলাপ হয়,—তাহ’লে আর এক রকম অবস্থা । যে সিদ্ধ, সে ঈশ্বরকে পেয়েছে বটে, যিনি সিদ্ধের সিদ্ধ, তিনি ঈশ্বরের সঙ্গে বিশেষরূপে আলাপ ক’রেছেন ।

৪১ । সকলেরই যে সাধন করতে হয়, তাও নয় । নিত্য-সিদ্ধ আর সাধন-সিদ্ধ । কেউ অনেক সাধন ক’রে ঈশ্বরকে পায় ; কেউ জন্ম অবধি সিদ্ধ,—যেমন প্রহ্লাদ । হোমাপাখী আকাশে থাকে । ডিম পাড়লে ডিম পড়তে থাকে । পড়তে পড়তে ডিম ফুটে যায় । ছানাটা বেরিয়ে আবার পড়তে থাকে । এখনও এত উঁচু যে, পড়তে পড়তে পাখা উঠে । যখন পৃথিবীর কাছে এসে পড়ে, তখন পাখীটা দেখতে পায় ; তখন বুঝতে পারে যে,—মাটিতে লাগলে চূরমার হ’য়ে যাবে । তখন একেবারে মার দিকে চোঁচা দৌড় দিয়ে উড়ে যায় । কোথায় মা ! কোথায় মা ! প্রহ্লাদাদি নিত্য-সিদ্ধের,—সাধন ভজন পরে । সাধনের আগে ঈশ্বর-

লাভ,—যেমন লাউ কুমড়োর আগে ফল, তার পর ফুল ।
নীচ বংশেও যদি নিত্য-সিদ্ধ জন্মায়, সে তাই হয় আর কিছু
হয় না । ছোলা বিষ্ঠাকুড়ে পড়লে ছোলা গাছই হয় ।

৪২ । সাধর্ন-সিদ্ধ আর কৃপা-সিদ্ধ । কেউ কেউ অনেক
কষ্টে ক্ষেত্র জল ছেঁচে আনে ;—অন্যতে পারলে ফসল হয় ।
আবার কারু জল ছেঁচে হ'ল না ; বৃষ্টির জলে ভেসে গেল ।
কষ্ট ক'রে আর জল অন্যতে হ'ল না । এই মায়ার হাত
থেকে এড়াতে গেলে, কষ্ট ক'রে সাধন করতে হয় । কৃপা-
সিদ্ধের কষ্ট করতে হয় না । সে কিন্তু ছ' একজন । যেমন
হাজার বছরের অন্ধকার ঘর, প্রদীপ নিয়ে গেলে একক্ষণে
আলো হ'য়ে যায় । আর নিত্য-সিদ্ধের,—এদের জন্মে জন্মে
জ্ঞান চৈতন্য হ'য়ে আছে । নিত্য-সিদ্ধের প্রথম অনুভাগ
যখন লোকে দেখে, তখন অবাক হয় । বলে, 'এত ভক্তি,
বৈরাগ্য, প্রেম কোথায় ছিল !' আবার আছে হঠাৎ-সিদ্ধ,—
হঠাৎ লাভ ক'রেছে । যেমন গরীবের ছেলে, বড় মানুষের
নজরে পড়ে গেছে । বাবু তাকে মেয়ে বিয়ে দিলে ; সেই
সঙ্গে বাড়ী ঘর, গাড়ী, দাস দাসী সব হ'য়ে গেল । আর আছে
স্বপ্ন-সিদ্ধ,—স্বপ্নে দর্শন হ'ল ।

৪৩ । নেত্রী ক'রে ধ্যান করা, সংসারী হ'য়ে জগৎ মিথ্যা
বলা, আর যোগী হ'য়ে স্ত্রীসঙ্গ করা,—এ তিনই আত্মপ্রবঞ্চনা
মাত্র ।

৪৪ । এক জমিদার ঋণের দায়ে পাওনাদারদের ফাঁকি

দেবার জন্ম পাগল সেজেছিল। ডাক্তার কবিরাজেরা কেহই তাকে ভাল করতে পারলে না। শেষে একজন বিজ্ঞ চিকিৎসক তাকে দেখেই বল্লেন,—“মহাশয়, কচ্ছেন কি! নকল করতে করতে শেষে আসল হ'য়ে যাবে। এর মধ্যেই তেঁা অনেকটা ছিট্‌ছিট্‌ হ'য়েছে।” তখন হতে জমিদারের চৈতন্য হ'ল ও সে পাগলামি ছেড়ে দিল। সর্বদা কোনরূপ ভাণ করলে, মনও ক্রমে ক্রমে সেইরূপ ভাব পেয়ে যায়।

৪৫। গীতায় আছে, যাকে অনেকে গণে মানে,—তা বিষ্ণুর জন্মই হোক, গাওনা বাজনার জন্মই হোক, বা লেক্‌চার দেওয়ার জন্মই হোক, বা আর কিছুই জন্মই হোক,—নিশ্চিত জেনো যে, তাতে ঈশ্বরের বিশেষ শক্তি আছে।

৪৬। বই লিখে, খবরের কাগজে লিখে, কারুকে বড় করা যায় না। ভগবান্ যাকে বড় করেন, বনে থাকলেও তাকে সকলে জানতে পারে। গভীর বনে ফুল ফুটেছে, মৌমাছি কিন্তু সন্ধান ক'রে যায়; অগ্নি মাছি সন্ধান পায় না! মানুষ কি করবে? মানুষের মুখ চেয়ো না,—লোক পোক! যে মুখে ভাল বলছে, সেই মুখেই আবার মন্দ বলবে।

৪৭। যিনি পাপ হরণ করেন, তিনিই হরি। হরি ত্রিতাপ হরণ করেন। আর চৈতন্যদেব হরিনাম প্রচার করেছিলেন,—অতএব ভাল। দেখ, চৈতন্যদেব কত বড় পণ্ডিত,—আর তিনি অবতার,—তিনি যে কালে এই নাম প্রচার করেছিলেন, এ অবশ্য ভাল। চাষারা নিমন্ত্রণ খাচ্ছে।

তাদের জিজ্ঞাসা করা হ'ল, “তোমরা আমড়ার অশ্বল খাবে?”
তারা বললে, “বাবুরা যদি খেয়ে থাকেন, তা হলে আমাদের
দেবেন। তাঁরা যেকালে খেয়ে গেছেন, সেকালে ভালই
হয়েছে।”

৪৮। লণ্ঠনের নীচে অন্ধকার থাকে, দূরে আলো পড়ে।
সেই রকম সাধু মহাপুরুষদের নিকটের লোকেরা বুঝতে পারে
না,—দূরের লোকেরা তাঁদের ভাবে মুগ্ধ হয়।

৪৯। ‘জরু, গরু, ধান,—এ তিন রাখবে আপন
বিচ্যমান।’ এ সব চারা গাছের সময় বেড়া না দিলে, ‘ছাগলে
মুড়াবে মাথা।’

৫০। তাদের নির্লিপ্ত সংসারী কেমন জানিস? কোন
বাড়ীতে এক গরিব ব্রাহ্মণ ভিক্ষা করতে এসেছে। বাড়ীর
কর্তাটি নির্লিপ্ত সংসারী,—নিজের হাতে একটি পয়সাও রাখ
না। যা কিছু সব স্ত্রীর হাতে। বাবু বললে, “ঠাকুর, আমি
ত পয়সা কড়ি ছুঁই না, আমায় মিছে বলা।” ব্রাহ্মণ না-
ছাড়-বান্দা,—অনেক কাকুতি মিনতি ক’রে ধ’রল। বাবু
মনে মনে ভাবল, ‘দেখ্‌চি, এ একটা টাকা না নিয়ে ছাড়বে
না’, ও প্রকাশে বললে,—“আচ্ছা কাল আসবেন, যা হয়
হবে।” তার পর বাড়ীতে গিয়ে স্ত্রীকে বলল, “দেখ, একটি
গরিব ব্রাহ্মণ ভারি বিপদে পড়েছে। তাকে একটা টাকা
দিতে হবে।” স্ত্রী টাকার কথা শুনেই রেগে জ্বলে উঠল;
বললে,—“ওঃ কি দাতাই হ’য়েছ! টাকা ওম্নি শাক পাতা

কি না, দিলেই হ'ল!" বাবু তখন আমতা আমতা ক'রে বললে, "গরিব মানুষ, অনেক ক'রে ধরেছে। একটা টাকা না দিলে চলে না।" স্ত্রী বললে, "তা হবে না। টাকা ফাকা আমি দিতে পারবো না।" বাবু শেষে অনেক জেদ্ করাতে, স্ত্রী বললে, "তবে এই একটা ছয়ানি আছে, নিয়ে যাও।" বাবুটি নির্লিপ্ত সংসারী! অগত্যা স্ত্রী যা হাতে তুলে দিলে, ব্রাহ্মণকে তাই এনে দিল।

৫১। একজন উমেদার বড় বাবুর কাছে আনা গোনা ক'রে হায়রাণ হয়েছে। কাজ আর হয় না। আফিসের বড় বাবু,—তিনি বলেন, "এখন খালি নাই, মাঝে মাঝে এসে দেখা কোরো।" এইরূপে কতকাল কেটে গেল;—উমেদার হতাশ হ'য়ে পড়ল। সে একজন বন্ধুর কাছে ছুঃখ করছে। বন্ধু বললে, "তোমার যেমন বুদ্ধি! ওটার কাছে আনা গোনা ক'রে পায়ের বাঁধন ছেঁড়া কেন? তুই গোলাপকে ধর, কালই তোমার কাজ হবে।" উমেদার বললে, "বটে!—আমি এখনি চল্লুম।" গোলাপ বড় বাবুর বাঁড়। উমেদার দেখা ক'রে বললে,—“মা, তুমি এটি না করলে হবে না। আমি মহাবিপদে পড়েছি। ব্রাহ্মণের ছেলে আর কোথায় যাই। মা, অনেক দিন কাজ কর্ম নাই, ছেলে পুলে না খেতে পেয়ে মারা যায়। তুমি একটি কথা বলে দিলেই, আমার একটি কাজ হয়।” গোলাপ ব্রাহ্মণের ছেলেকে বললে,—“বাছা, কাকে বললে হয়?” আর ভাবতে লাগলো,—‘আহা!

ব্রাহ্মণের ছেলে বড় কষ্ট পাচ্ছে।’ উমেদার বললে,—“বড় বাবুকে একটি কথা বললে, আমার নিশ্চয় একটি কাজ হয়।” গোলাপ বললে, “আমি আজই বড় বাবুকে বলে ঠিক ক’রে রাখবো।” তার পরদিন সকালে উমেদারের কাছে একটি লোক গিয়ে উপস্থিত। সে বললে, “তুমি আজ থেকেই বড় বাবুর আফিসে বেরুবে।” বড় বাবু সাহেবকে বললে, “এ ব্যক্তি বড় উপযুক্ত লোক। এঁকে নিযুক্ত করা হয়েছে; এঁর দ্বারা আফিসের বিশেষ উপকার হবে।”—এই কামিনী-কাঞ্চন নিয়েই সকলে ভুলে আছে।

৫২। কোন গ্রামে এক সতীসাক্ষী স্ত্রীলোক বাস করত। পরে তার অন্তিম দশা হ’লে, কপালে সিন্দূর, হাতে শাঁকা ও লাল পেড়ে কাপড় পরিয়ে যখন তাকে গঙ্গাযাত্রা কচ্ছিল, তখন একজন গ্রামের লোক দেখে কাঁদতে কাঁদতে বললে,— “হায়! হায়! এতকাল পরে আজ আমাদের গ্রামটা সতীহীন হ’লো।” সাক্ষী সতী এই কথা শুনে, তার পানে চেয়ে ব’ল্ল, “আগে যাই, তারপর ব’লো।” ‘মরবে নারী উড়বে ছাট, তবে নারীর গুণ গাই।’

৫৩। স্বামী বর্তমানে যে স্ত্রী ব্রহ্মচর্য্য পালন করে, সে তো নারী নয়,—সাক্ষাৎ ভগবতী।

৫৪। যার ঈশ্বরে মন, সেই তো মানুষ। মানুষ আর মান-হুঁস্। যার হুঁস্ আছে, চৈতন্য আছে,—যে নিশ্চিত জানে, ঈশ্বর সত্য, আর সব অনিত্য,—সেই মান-হুঁস্।

৫৫। শ্রোতের জলে দল হয় না, গেড়ে ডোবার বন্ধ জলে দল হয়। যার মন ঈশ্বর পাবার জন্য দৌড়েছে, তার আর কোন দিকে দৃষ্টি থাকে না। যে মান সম্রমের দিকে চেয়ে আছে, সেই দল বাঁধতে যায়।

৫৬। ‘মাগ্নেসে ছোট্টা হো যাতা।’ যার বাঁড়া নাই,— স্বয়ং ভগবান,—যখন ভিক্ষা করতে গিয়েছিলেন, তখন তাঁকেও বামনরূপ ধরতে হ’য়েছিল। তাই অপরের কাছে কোন বিষয় চাইতে হ’লে, ছোট হ’তে হয়।

৫৭। ছায়া, কায়া, ঘট, পট,—সমান।

৫৮। জ্ঞানীরা যাকে ব্রহ্ম বলে, যোগীরা তাঁকেই আত্মা বলে, আর ভক্তেরা তাঁকেই ভগবান্ বলে।

৫৯। যেমন এক চিনিতে ভিন্ন ভিন্ন প্রকার মঠ (ছাঁচ) তৈয়ার হয়, তেমনি এক ঈশ্বর, ভিন্ন ভিন্ন রূপে, ভিন্ন ভিন্ন দেশে, পূজিত হ’য়ে থাকেন। যেমন এক সোণাতে নানা রকম গহনা

তৈয়ার হয়। গহনা ভিন্ন ভিন্ন প্রকার হলেও
সর্বধর্ম-সম্বয়।

যেমন সকলেই এক সোণা, তেমনি ঈশ্বর ভিন্ন ভিন্ন রকমে ভিন্ন ভিন্ন দেশে পূজিত হন ; এবং বিভিন্ন নামে ও ভাবে পূজিত হ’লেও, সকলকার ভিতর সেই এক ঈশ্বর। যেমন কুমোরের দোকানে হাঁড়ি, গামলা, জালা, প্রদীপ, এই সব বিভিন্ন দ্রব্য থাকে ; কিন্তু সকলকার ভিতরে সেই এক মাটি। ঈশ্বরও সেই রকম এক হইয়াও, দেশ ভেদে ভিন্ন ভাবে প্রকাশিত হ’য়েছেন। বাড়ীর মধ্যে একজন র’য়েছেন,

—বাহির হ'তে কেউ তাঁকে খুড়ো মশাই, কেউ তাঁকে মামা বাবু, কেউ তাঁকে মেশো মশাই বলে ডাকছে। কিন্তু তিনি ভিতর থেকে বুঝতে পারছেন যে, সকলে তাঁকেই ডাকছে। ভগবানও সেইরূপ। যে তাঁকে যা ইচ্ছে ব'লে ডাকুক না কেন, তিনি বুঝতে পারেন যে, তাঁকেই ডাকা হচ্ছে।

৬০। এটা বলা ভাল নয় যে,—আমার ধর্ম ঠিক আর সকলের ভুল; আমরা যা বুঝছি তাই ঠিক, আর যে যা বলছে সব ভুল! আমরা নিরাকার বলছি, অতএব তিনি

নিরাকার,—তিনি সাকার নন। আমরা সাকার
সর্বধর্ম-সমন্বয়।

বলছি, অতএব তিনি সাকার,—তিনি নিরাকার নন। এ সব বুদ্ধির নাম 'মতুয়ার বুদ্ধি' (Dogmatism)। মানুষ কি তাঁর ইতি করতে পারে? এই রকম বৈষ্ণব-শাক্তদের ভিতর রেষারেষি। বৈষ্ণব বলে, 'আমার কেশব', —শাক্ত বলে, 'আমার ভগবতী',—একমাত্র উদ্ধারকর্তা। যত লোক দেখি, ধর্ম ধর্ম ক'রে—এ ওর সঙ্গে ঝগড়া করছে, ও ওর সঙ্গে ঝগড়া করছে! হিন্দু, মুসলমান, ব্রহ্মজ্ঞানী, শাক্ত, বৈষ্ণব, শৈব,—সব পরস্পর ঝগড়া। এ বুদ্ধি নাই যে, যাকে কৃষ্ণ বলছি,—তাঁকেই শিব, তাঁকেই আঢ্যাশক্তি বলা হয়; তাঁকেই যীশু, তাঁকেই আল্লা বলা হয়। এক রাম তাঁর হাজার নাম! বস্তু এক, নাম আলাদা। সকলেই এক জিনিসকে চাচ্ছে, তবে আলাদা জায়গা, আলাদা পাত্র, আলাদা নাম। তাই দলাদলি, মনান্তর, ঝগড়া; ধর্ম নিয়ে লাঠালাঠি,

মারামারি, কাটাকাটি,—এ সব ভাল নয়। সকলেই তাঁর পথে যাচ্ছে, সকলেই তাঁকে ডাকছে। ঘেঘোদেঘীর দরকার নাই। আমি বলি, যার সাকারে বিশ্বাস, সে সাকারই চিন্তা করুক ; যার নিরাকারে বিশ্বাস, সে নিরাকারই চিন্তা করুক। হিন্দু, মুসলমান, খৃষ্টান ; শাক্ত, শৈব, বৈষ্ণব ; ঋষিদের কালের ব্রহ্মজ্ঞানী ও ইদানীং ব্রহ্মজ্ঞানী,—সকলেই এক বস্তুকে চাচ্ছে। কি জান, দেশ-কাল-পাত্র-ভেদে ঈশ্বর নানা ধর্ম ক'রেছেন। কিন্তু সব মতই পথ, মত কিছু ঈশ্বর নয়। যে সমন্বয় ক'রেছে, সেই-ই লোক। ('জ্ঞানযোগের' ৭২ প্যারা দেখুন)।

৬১। তিনি অনন্ত, পথও অনন্ত। অনন্ত মত, অনন্ত পথ! সব পথ দিয়ে তাঁকে পাওয়া যায়। ছাদে উঠা নিয়ে বিষয়। তা তুমি পাকা সিঁড়ি দিয়েও উঠতে পার; কাঠের সিঁড়ি দিয়েও উঠতে পার; বাঁশের সিঁড়ি দিয়েও উঠতে পার, আর দড়ি দিয়েও উঠতে পার। আবার একটি আঁচোলা বাঁশ দিয়েও উঠতে পার। কিন্তু একটা জোর ক'রে ধরতে হয়। এতে খানিকটা পা, ওতে খানিকটা পা দিলে হয় না। একটা দৃঢ় ক'রে ধরতে হয়। ঈশ্বর লাভ করতে হ'লে, একটা পথ জোর ক'রে ধরে যেতে হয়। সকল ধর্মই সত্য। ধর্ম কিছু ঈশ্বর নয়। ভিন্ন ভিন্ন ধর্ম আশ্রয় ক'রে ঈশ্বরের কাছে যাওয়া যায়;—যেমন কালীঘাটে নানা পথ দিয়ে যাওয়া যায়। ভিন্ন ভিন্ন নদী সব নানা দিক দিয়ে আসে, কিন্তু সব নদী সমুদ্রে গিয়ে পড়ে।

সেখানে সব এক। তাঁরই ইচ্ছায় নানা ধর্ম, নানা মত হয়েছে। যার যা প্রকৃতি,—যার যা ভাব,—সে সেই ভাবটি নিয়ে থাকে। বারোয়ারীতে নানা মূর্তি করে,—আর নানা মতের লোক যায়। রাধাকৃষ্ণ, হর-পার্বতী, সীতারাম,—ভিন্ন ভিন্ন স্থানে ভিন্ন ভিন্ন মূর্তি রয়েছে ; আর প্রত্যেক মূর্তির কাছে লোকের ভিড় হয়েছে। যারা বৈষ্ণব, তারা বেশী রাধাকৃষ্ণের কাছে দাঁড়িয়ে দেখছে। যারা শাক্ত, তারা হর-পার্বতীর কাছে। যারা রামভক্ত, তারা সীতারামের মূর্তির কাছে। তবে যাদের কোন ঠাকুরের দিকে মন নাই, তাদের আলাদা কথা। বেণী উপপতিকে ঝাঁটা মার্ছে,—বারোয়ারীতে এমন মূর্তিও করে। ও সব লোক সেইখানে দাঁড়িয়ে হাঁ করে দেখে, আর চীৎকার করে বন্ধুদের বলে,—“আরে, ও সব কি দেখ্ছিছিস্ ? এ দিকে আয় ! এ দিকে আয় !”

৬১ : আন্তরিক হ'লে সব ধর্মের ভিতর দিয়াই ঈশ্বরকে পাওয়া যায়। বৈষ্ণবেরাও ঈশ্বরকে পাবে, শাক্তরাও পাবে, বেদান্তবাদীরাও পাবে, ব্রহ্মজ্ঞানীরাও পাবে ; আবার মুসলমান,

খৃষ্টান, এরাও পাবে। আন্তরিক হ'লে সবাই

পাবে। ব্যাকুলতা থাকলেই হ'ল ; তাঁর উপর ভালবাসা, টান থাকলেই হ'ল। তিনি যে অন্তর্যামী,—অন্তরের টান, ব্যাকুলতা দেখতে পান। কথাটা এই, কোন রকমে তাঁর উপর যাতে ভক্তি হয়,—ভালবাসা হয়। নানা

খবরে কাজ কি? একটা পথ দিয়ে যেতে যেতে যদি তাঁর উপর ভালবাসা হয়, তা হলেই হ'লো। ভালবাসা হলেই, তাঁকে লাভ করা যাবে। তারপর যদি দরকার হয়, তিনি সব বুঝিয়ে দিবেন,—সব পথের খবর বলে দিবেন। ঈশ্বরের উপর ভালবাসা এলেই হ'লো,—নানা বিচারের দরকার নাই।

৬৩। ঈশ্বরের সাক্ষাৎকার না করলে, তাঁর স্বরূপ বুঝা যায় না। যদি ঈশ্বর সাক্ষাৎ দর্শন হয়, তাহলে ঠিক বলা যায়। ঈশ্বর সম্বন্ধে যে যতটুকু দেখেছে, সে মনে করে ঈশ্বর এমনি, আর কিছু নয়। তাঁর সম্বন্ধে এমন সর্ব্বশক্তি-সম্বয়। কথা জোর ক'রে বলা না যে, তিনি এই হ'তে পারেন, আর এই হ'তে পারেন না। মানুষের এক ছটাক বুদ্ধিতে ঈশ্বরের স্বরূপ কি বুঝা যায়? কতুকগুলো কাণা একটা হাতীর কাছে এসে পড়েছিল। একজন লোক বলে দিলে,—‘এ জানোয়ারটির নাম হাতী’। তখন কাণাদের জিজ্ঞাসা করা হ'ল,—‘হাতীটা কি রকম?’ তারা হাতীর গা স্পর্শ করতে লাগল। একজন বলে, ‘হাতী একটা খামের মত!’ সে কাণাটি কেবল হাতীর পা স্পর্শ ক'রেছিল। আর একজন বলে, ‘হাতীটা একটা কুলোর মত!’ সে কেবল একটা কাণে হাত দিয়ে দেখেছিল। এই রকম যারা শুঁড়, কি পেটে হাত দিয়ে দেখেছিল, তারা নানা প্রকার বলতে লাগল। ঈশ্বর সম্বন্ধেও তেমনি।

৬৪। বংশে মহাপুরুষ যদি জন্মে থাকেন, তিনিই টেনে

নেবেন,—হাজার দোষ থাকুক। যখন গন্ধর্ব কৌরবদের বন্দী করলে, যুধিষ্ঠির গিয়ে তাদের মুক্ত করলেন। যে দুর্ঘোষন এত শত্রুতা করেছে,—যার জন্য যুধিষ্ঠিরের বনবাস হয়েছে,—তাকেই গিয়ে মুক্ত করলেন !

৬৫। দক্ষিণেশ্বরে ৩রাধাগোবিন্দজীর মূর্তি ভগ্ন হইলে, পণ্ডিতগণ ভগ্নমূর্তিটি গঙ্গার জলে ফেলিয়া দিবার বিধান দিলেন। ঠাকুরকে তাঁহার মতামত জিজ্ঞাসা করিলে, তিনি ভাবমুখে বলিয়াছিলেন,—“রাণীর জামাইদের যদি কেউ পড়ে পা ভেঙ্গে ফেলতো, তবে কি তাকে ত্যাগ ক’রে আর এক জনকে তার জায়গায় এনে বসান হতো, না তার চিকিৎসার ব্যবস্থা করা হতো? এখানেও সেই রকম করা হোক। মূর্তিটি জুড়ে যেমন পূজা হচ্ছে, তেমনি পূজা করা হোক। ত্যাগ করতে হবে কিসের জন্য?”

৬৬। গঙ্গাজল জলের মধো নয়; শ্রীবৃন্দাবনের রজঃ ধূলোর মধো নয়; আর শ্রীশ্রীজগন্নাথদেবের মহাপ্রসাদ অন্নের মধো নয়;—এই তিনই ব্রহ্মের স্বরূপ।

৬৭। লোকের ময়লা কাপড় চোপড় নিয়ে ধোপা ভাঁড়ারী হয়। কাপড় সাফ হলেই, তার ভাঁড়ার খালি হয়ে যায়। এজন্য বলি, “ধোপা ভাঁড়ারী হোস্ নি।”

৬৮। সাধুর নিকট ও দেবতার নিকট শুধু হাতে যেতে নাহি। কিছু না হ’লে, একটি হরিতকীও হাতে ক’রে যেতে হয়।

৬৯। ধর্মের সূক্ষ্ম গতি। একটু কামনা থাকলে ভগবানকে পাওয়া যায় না। ছুঁচের ভিতর সূতো ঘাওয়া ; একটু রোঁ থাকলে হয় না।

৭০। ধর্ম কি না, দানাদি কর্ম ! ধর্ম নিলেই অধর্ম নিতে হবে। পুণ্য নিলেই পাপ নিতে হবে। জ্ঞান নিলেই অজ্ঞান নিতে হবে। শুচি নিলেই অশুচি নিতে হবে। যেমন, যার আলো বোধ আছে, তার অন্ধকারও বোধ আছে। যার এক বোধ আছে, তার অনেক বোধও আছে। যার ভাল বোধ আছে, তার মন্দ বোধও আছে। সেইজন্য আমি মার কাছে এক মাত্র ভক্তি চেয়েছিলাম। মার পাদপদ্মে ফুল দিয়ে হাত জোড় ক'রে বলেছিলাম, “মা, এই লও তোমার ধর্ম, এই লও তোমার অধর্ম,—আমায় শুদ্ধাভক্তি দাও ! এই লও তোমার পাপ, এই লও তোমার পুণ্য,—আমায় শুদ্ধাভক্তি দাও ! এই লও তোমার জ্ঞান, এই লও তোমার অজ্ঞান,—আমায় শুদ্ধাভক্তি দাও ! এই লও তোমার শুচি, এই লও তোমার অশুচি,—আমায় শুদ্ধাভক্তি দাও ! এই লও তোমার ভাল, এই লও তোমার মন্দ,—আমায় শুদ্ধাভক্তি দাও !”

পারিশিষ্ট ।

শ্রীশ্রীমায়ের বাণী

১। তিনি জীবজন্তু সবই হয়েছেন বটে, তবে সংস্কার ও কৰ্ম অনুসারে সকলে নিজ নিজ কৰ্মফল ভোগ করে। সূর্য্য এক,—কিন্তু জায়গা ও বস্তু ভেদে তার প্রকাশ ভিন্ন ভিন্ন রকমের।

২। এখানে যে এসেছে, যারা আমার ছেলে, তাদের মুক্তি হয়ে আছে। বিধির সাধ্য নাই যে, আমার ছেলেদের রসাতলে ফেলে।

৩। সৰ্ব্বদা মনে ভাববে, ‘আমি কার সন্তান! কার আশ্রিত!’ যখনি মনে কোন কু-ভাব আসবে, মনকে বলবে, ‘তঁার ছেলে হ’য়ে আমি কি একাজ করতে পারি?’ দেখবে, মনে বল পাবে, শান্তি পাবে।

৪। যার উপর যেমন কর্তব্য করে যাবে, কিন্তু ভাল এক ভগবান ছাড়া আর কাউকে বেসো না। ভালবাসলে অনেক দুঃখ পেতে হয়।

৫। সাধন মানে,—তঁার পাদপদ্ম সৰ্ব্বদা মনে রেখে তঁার চিন্তাতে মনকে ডুবিয়ে রাখা। তঁার নাম জপ করবে।



৬। মন না বস্লেও জপ করতে ছাড়বে না। তোমার কাজ তুমি করে যাবে। নাম করতে করতে মন আপনি স্থির হবে,—বায়ুহীন স্থানে দীপশিখার মত। বাতাস থাকলে প্রদীপের শিখা স্থির থাকে না, মনেও কল্পনা বাসনা থাকলে মন স্থির হয় না। ঠিক ঠিক মন্ত্র উচ্চারণ না হলে দেবী হয়।

৭। সংখ্যা রেখে জপ করলে সংখ্যার দিকে লক্ষ্য থাকে। এমনি জপ করবে।

৮। নিত্য ধ্যান করবে। কাঁচা মন কি না? ধ্যান করতে করতে মন স্থির হয়ে যাবে। সর্বদা বিচার করবে। যে বস্তুতে মন যাচ্ছে, তা অনিত্য চিন্তা করে ভগবানে মন সমর্পণ করবে।

৯। মানুষের আর কতটুকু বুদ্ধি? কি চাইতে কি চাইবে;—শেষে কি শিব গড়তে বানর হয়ে যাবে! তাঁর শরণাগত হয়ে থাকা ভাল। তিনি যখন যেমন দরকার, তেমন দিবেন। তবে ভক্তি ও নির্বাসনা কামনা করতে হয়,—এ কামনা কামনার মধ্যে নয়।

১০। কর্ম করতে হয়; মেয়েলোকের ব'সে থাকতে নেই, ব'সে থাকলে নানা রকম বাজে চিন্তা,—কুচিন্তা,—সব আসে।

১১। কাজ করা চাই বৈ কি, কর্ম করতে করতে কর্মের বন্ধন কেটে যায়, তবে নিষ্কাম ভাব আসে। একদণ্ডও কাজ ছেড়ে থাকা উচিত নয়।

১২। প্রারন্ধের ভোগ ভুগতেই হয়। তবে ভগবানের

নাম করলে এই হয়,—যেখানে এক জনের পা কেটে যাবার কথা ছিল, সেখানে একটা কাঁটা ফুটে ভোগ হ'ল।

১৩। দেখ মা, সকলেই বলে, “এ দুঃখ, ও দুঃখ,—ভগবানকে এত ডাকলুম, তবু দুঃখ গেল না।” কিন্তু দুঃখই ত ভগবানের দয়ার দান। সংসারের দুঃখ কে না পেয়েছে বল? বৃন্দে বলেছিল কৃষ্ণকে, “কে বলে তোমাকে দয়াময়? রাম অবতারে সীতাকে কাঁদিয়েছ, কৃষ্ণ অবতারে রাধাকে কাঁদাচ্ছ। আর, কংস-কারাগারে দুঃখ-কষ্টে দিনরাত ‘কৃষ্ণ’ ‘কৃষ্ণ’ করেছে তোমার পিতা মাতা। তবে যে তোমাকে ডাকি, তা এই জন্ম যে, তোমার নামে শমন-ভয় থাকে না।”

১৪। দেখেছ! দিলে ভিখারীকে তাড়িয়ে। ঐ যে নিজেদের কাজ ছেড়ে একটু উঠে এসে ভিক্ষা দিতে হবে, এইটুকুও আর পারলে না, অলস হ'ল। ভিখারীকে এক মুঠো ভিক্ষা দিতে পারলে না। যার যা প্রাপ্য, তা হতে তাকে বঞ্চিত করা কি উচিত? এই যে তরকারীর খোসাটা,—এও গরুর প্রাপ্য। ওটিও গরুর মুখের কাছে ধরতে হয়।

১৫। মেয়ে মানুষের অত রাগ কি ভাল, সহ্য চাই। শৈশবে বাপ মায়ের কোল, ঘোঁষনে স্বামীর আশ্রয় ছাড়া মেয়েদের আর কেউ ‘আব্রুতে’ পারে না। মেয়েলোক খুব খারাপ জাত, ফস্ করে একটা কথা যদি কেউ বলেই ফেললে গো! মানুষের ত কথা,—বললেই হ'ল! তাই দুঃখ কষ্ট সয়েও (স্বামী বা বাপ মায়ের কাছে) থাকতে হয়।

১৬। যখন তখন যার তার সঙ্গে মেয়েলোকের তীর্থে যেতে নাই। তোমার হাতে দু পয়সা হয়, দশ বিশ জন বামুন খাইয়ে দিও। এই দেখ একজন, তীর্থ করতে গিয়ে 'কেমন ঠোঁকর খেয়ে এসেছে,—তীর্থ গমন, দুঃখ ভ্রমণ, মন উচাটন হ'য়ো নারে'; 'ভ্রমিয়ে বারো, ঘরে বসে তের; যদি করতে পার।'

১৭। হাঁটুর কাপড় উঠলেই, মেয়েলোক উলঙ্গের সামিল।

১৮। মেয়েলোকের আবার তর্ক! জ্ঞানী পুরুষরাই তর্ক করে তাঁকে বড় পেলে! ব্রহ্ম কি তর্কের বস্তু?

১৯। ভগবানের জন্ম স্বামীর কতকটা মতের বিরুদ্ধে, কোন স্ত্রী যদি অনুনয় বিনয়, বা সদালাপ দ্বারা সংযমী হয়ে থাকতে চেষ্টা করে, তাতে কোন পাপ হয় না মা। কেন হবে? ইন্দ্রিয় সংযম চাই, এই যে বিধবাদের এত ব্যবস্থা, সব ইন্দ্রিয় সংযমের জন্মে।

২০। দেখ মা, পুরুষ-জাতকে কখনও বিশ্বাস কোরো না,—অন্য পরের কথা কি, নিজের বাপকেও না, ভাইকেও না, এমন কি স্বয়ং ভগবান যদি পুরুষরূপ ধারণ করে তোমার সামনে আসেন, তাঁকেও বিশ্বাস কোরো না।

২১। মঠে বা যে সব স্থানে সাধু সন্ন্যাসীরা থাকেন, সে সব জায়গায় বেশী যেও না। দেখ মা, তোমরা ত ভাল মনে, ভক্তি করেই যাবে, কিন্তু তাতে তাঁদের মনে ক্ষতি হলে সেই সঙ্গে তোমারও পাপ হবে।

২২। সে কি বাবা, কত মহা মহা পাপী কাশীতে আসছে, আর বিশ্বনাথকে স্পর্শ করে উদ্ধার হচ্ছে। তিনি সকলের পাপ নির্বিকার ভাবে গ্রহণ করছেন।

২৩। কেন, গীতায় পড় নাই,—ফল, পুষ্প, জল ভগবানকে ভক্তি করে যা দেওয়া যায়, তা তিনি পান।

শ্রীশ্রীঠাকুর বলেছিলেন,

“এতদিন পরে আস্তে হয় ? আমি তোমার জন্ত কিরূপে প্রতীক্ষা ক’রে রয়েছি, তা একবার ভাবতে নাই ? রিমরী লোকের বাজে কথা শুন্তে শুন্তে আমার কাণ ঝালাপালা হ’য়ে গেল ! প্রাণের কথা কা’কেও বলতে না পেয়ে আমার পেট ফুলে র’য়েছে । জানি আমি প্রভু, তুমি সেই পুরাতন ঋষি,—নররূপী নারায়ণ, জীবের দুর্গতি নিবারণ ক’রতে পুনরায় শরীর ধারণ ক’রেছ ।”

“নরেন্দ্রর যেন আমার স্বপ্নর ঘর,—(আপনাকে দেখাইয়া) এর ভিতর যেটা আছে, সেটা যেন মাদী, আর ওর ভিতর যেটা আছে, সেটা যেন মদা ।”

“নরেন্দ্রের খুব উঁচু ঘর,—নিরাকারের ঘর । পুরুষের সত্তা । এত ভালু আস্ছে, ওর মত একটি নাই । এক একবার ব’সে ব’সে আমি খতাই । তা দেখি, অগ্ন পদ্ম কারুর দশ দল, কারুর ষোড়শ দল, কারুর শত দল ; কিন্তু পদ্ম মধ্যে নরেন্দ্র সহস্র দল । অগ্নেরা কলসী, ঘাটী, এ সব হ’তে পারে ; নরেন্দ্র জালা । ডোবা পুষ্করিণীর মধ্যে নরেন্দ্র বড় দীঘি । যেমন হালদার পুকুর । মাছের মধ্যে নরেন্দ্র রাঙ্গাচক্ষু বড় রুই ; আর সব নানা রকম মাছ,—পোনা, কাঠাবাটা, এই সব । খুব আধার,—অনেক জিনিস ধরে । বড় কুটোওলা বাঁশ । নরেন্দ্র কিছুর বশ নয় । ও আসক্তি, ইন্দ্রিয়-স্বথের বশ নয় । পুরুষ পায়রা । পুরুষ পায়রার ঠোঁট ধ’রলে টেনে ছিনিয়ে লয়,—মাদী পায়রা চুপ ক’রে থাকে ।”

স্বামী বিবেকানন্দের বাণী ।

১। এইটে জেনে রাখবি, সংসারে তুই বাঁচিস্ কি মরিস্, তাতে তোর আত্মীয় পরিজনদের বড় একটা কিছু আসে যায় না। তুই যদি কিছু বিষয় আশয় রেখে যেতে পারিস্ ত, তোর মরবার আগেই দেখতে পাবি, তা নিয়ে ঘরে লাঠালাঠি শুরু হয়েছে। তোর মৃত্যুশয্যায় সান্ত্বনা দেবার কেহ নাই, —স্ত্রী-পুত্র পর্য্যন্ত নয়। এর নামই সংসার।

২। আমরা মাতৃগর্ভ হইতে ভূমিষ্ঠ হই উলঙ্গ অবস্থায়, ইহলোক হইতে বিদায় হইবার সময় যাইও উলঙ্গ অবস্থায়, প্রভুর নাম ধন্য হউক।

৩। এই জগৎ দুঃখের আগার বটে, কিন্তু ইহা মহাপুরুষ-গণের শিক্ষালয় স্বরূপ। এই দুঃখ হইতেই সহানুভূতি, সহিষ্ণুতা, সর্বেপরি অদম্য দৃঢ় ইচ্ছাশক্তির বিকাশ হয়, যে শক্তিবলে মানুষ সমগ্র জগৎ চূর্ণ বিচূর্ণ হইয়া গেলে একটুও কম্পিত হয় না।

৪। মনের মত কাজ পেনে, অতি মূর্খতেও করতে পারে। যে সকল কাজকেই মনের মত করে নিতে পারে, সেই বুদ্ধিমান্। কোনও কাজই ছোট নয়, এ সংসারে যাবতীয়



বস্তু বটের বীজের মত, সর্ষপের মত ক্ষুদ্র দেখালেও অতি বৃহৎ বটগাছ তার মধ্যে ।

৫। ধন থাকিলে দারিদ্র্যের ভয় আছে, জ্ঞানে অজ্ঞানের ভয় আছে, রূপে বান্ধক্যের ভয় আছে, গুণে খলের ভয় আছে, অভ্যুদয়ে ঈর্ষার ভয় আছে, এমন কি দেহে মৃত্যুর ভয় আছে । এই জগতের সমুদয়ই ভয়যুক্ত ; তিনিই কেবল নির্ভীক, যিনি সর্বস্ব ত্যাগ করিয়াছেন ।

৬। জীবসেবার চেয়ে আর ধর্ম নাই । সেবা-ধর্মের ঠিক ঠিক অনুষ্ঠান করতে পারলে অতি সহজেই সংসারবন্ধন কেটে যায়,—“মুক্তিঃ করফলায়তে ।”

৭। যিনি এই সংসার-মায়ার পারে নিয়ে যান, যিনি কৃপা ক’রে সমস্ত মানসিক আধিব্যাধি বিনষ্ট করেন, তিনিই যথার্থ গুরু ।

৮। একটি জীবের মধ্যে ব্রহ্ম বিকাশ হইলে হাজার হাজার লোক সেই আলোকে পথ পাইয়া অগ্রসর হয় । ব্রহ্মজ্ঞ পুরুষেরাই একমাত্র লোকগুরু । এ কথা সর্ব শাস্ত্র ও যুক্তি দ্বারা সমর্থিত হয় । অবৈদিক, অশাস্ত্রীয় কুলগুরুপ্রথা স্বার্থপর ব্রাহ্মণেরাই এদেশে প্রচলন করিয়াছে । সেই জন্যই সাধন করিয়াও, লোক এখন সিদ্ধ বা ব্রহ্মজ্ঞ হইতে পারিতেছে না ।

৯। শাস্ত্রে বলে, যঁারা অধীতবেদবেদান্ত, যঁারা ব্রহ্মজ্ঞ, যঁারা অপরকে অভয়ের পারে নিতে সমর্থ, তাঁরাই যথার্থ গুরু ; তাঁদের পেলেই দীক্ষিত হবে,—“নাত্র কার্যবিচারণা ।”

এখন সেটা কেমন দাঁড়িয়েছে জানিস্,—“অন্ধেনৈব নীয়মানা যথাক্কাঃ ।”

১০। কামকাঙ্ক্ষনের আসক্তি না গেলে, ঈশ্বরে মন যায় না ; তা গেরস্তই হোক আর সন্ন্যাসীই হোক। ঐ দুই বস্তুতে যতক্ষণ মন আছে, জান্‌বি ততক্ষণ ঠিক্ ঠিক্ অনুরাগ, নিষ্ঠা বা শ্রদ্ধা কখনই আসবে না। গেরস্তের পক্ষে উপায় হচ্ছে, ছোট খাট বাসনাগুলিকে পূর্ণ করে নেওয়া ; আর বড় বড় গুলিকে বিচার করে ত্যাগ করা। ত্যাগ ভিন্ন ঈশ্বরলাভ হবে না।

১১। সন্ন্যাসীরা কামকাঙ্ক্ষন সম্পূর্ণভাবে ত্যাগ করতে প্রস্তুত হচ্ছে, চেষ্টা করছে, আর গেরস্তরা নোঙ্গর ফেলে নৌকায় দাঁড় টানছে,—এই প্রভেদ। ভোগের সাধ কখন মেটে কি রে ? গৃহে থেকে যারা কামকাঙ্ক্ষন ত্যাগ করতে পারে, তারা ধন্য ; কিন্তু তা ক’জনের হয় ?

১২। একমাত্র ব্রহ্মচর্য্য পালন ঠিক ঠিক করতে পারলে, সমস্ত বিঘ্না মুহূর্ত্তে আয়ত্ত হয়ে যায়,—শ্রুতিধর, স্মৃতিধর হয়। এই ব্রহ্মচর্য্যের অভাবেই আমাদের দেশের সব ধ্বংস হয়ে গেল।

১৩। যেখানে রাধাকৃষ্ণের প্রেমগীত হবে, সেখানে গিয়ে Right and left (দু হাতে) চাবুক মারুন। দেশটা উচ্ছন্ন গেল। এতটুকু বীর্য্য ধারণের ক্ষমতা নাই,—যাচ্ছেন কীর্ত্তন করতে। এতটুকু কামগন্ধ থাকলে মশাই, ও সব ধারণা

করতে পারে না। একি চালাকি? অনেক কাল ত চলেছে, এখন কীর্তন টীর্ভন কিছুকাল বন্ধ থাক্। দেশে বীর্য্যসঞ্চার করুন।

১৪। বিয়ে করেছিস্ তা কি হয়েছে? মা, রাপ, ভাই, বোনকে অন্নবস্ত্র দিয়ে যেমন পালন কচ্ছিস্, স্ত্রীকেও তেমনি করবি, বস্। ধর্ম্মোপদেশ দিয়ে তাকেও তোর পথে টেনে নিবি। মহামায়ার বিভূতি বলে সম্মানের চক্ষে দেখবি। ধর্ম্ম উদ্‌যাপনে ‘সহধর্ম্মিণী’ বলে মনে করবি। অণ্ড সময়ে অপর দশ জনের মত দেখবি। এইরূপ ভাবতে ভাবতে দেখবি মনের চঞ্চলতা একেবারে মরে যাবে। ভয় কি?

১৫। তাঁর কৃপা যারা পেয়েছে, তাদের মন বুদ্ধি কিছুতেই আর সংসারে আসক্ত হতে পারে না। কৃপার পরীক্ষা কিন্তু হচ্ছে,—কামকাঞ্চে অনাসক্তি। সেটা যদি কারও না হ’য়ে থাকে, তবে সে ঠাকুরের কৃপা কখনই ঠিক ঠিক লাভ করে নাই।

১৬। অর্থ জগতে শক্তি নহে; সাধুতাই,—পবিত্রতাই,—শক্তি।

১৭। টাকায় কিছুই হয় না, নামেও হয় না, যশেও হয় না, বিদ্যায়ও কিছু হয় না; ভালবাসায় সব হয়,—চরিত্রই বাধাবিঘ্নরূপ বজ্রদৃঢ় প্রাচীরের মধ্য দিয়া পথ করিয়া লইতে পারে।

১৮। সন্ন্যাস গ্রহণ না করিলে, কাহারও যথার্থ আত্মজ্ঞান

লাভই হইতে পারে না। তাহাই কেবল নহে,—বহুজন-
হিতকর, বহুসুখকর কোন ঐহিক কার্যের অনুষ্ঠান ও তাহাতে
সিদ্ধিলাভ করাও, সন্ন্যাস ভিন্ন হয় না।

১৯। সন্ন্যাসধর্ম সাধনের কালকাল নাই। শ্রুতি
বলছেন, যখনি বৈরাগ্যের উদয় হবে, তখনই প্রব্রজ্যা করবে।
জীবনের অনিত্যতাবশতঃ যুবাকালেই ধর্মশীল হবে। কে
জানে, কার কখন দেহ যাবে? শাস্ত্রে চতুর্বিধ সন্ন্যাসের
বিধান দেখতে পাওয়া যায় :—(১) বিদ্বৎ সন্ন্যাস, (২)
বিবিদিষা সন্ন্যাস, (৩) কর্কট সন্ন্যাস, (৪) আতুর সন্ন্যাস।
হঠাৎ ঠিক ঠিক বৈরাগ্য হ'ল ও তখনি সন্ন্যাস নিয়ে বেরিয়ে
পড়ল,—এটি প্রাক্জন্মসংস্কার না থাকলে হয় না। ইহারই
নাম বিদ্বৎ সন্ন্যাস। আত্মতত্ত্ব জান্বার প্রবল বাসনা থেকে,
শাস্ত্রপাঠ ও সাধনাদি দ্বারা স্ব-স্বরূপ অবগত হইবার জন্য,
কোন ব্রহ্মজ্ঞ পুরুষের কাছে সন্ন্যাস নিয়ে স্বাধ্যায় ও সাধন
ভজন করতে লাগল,—একে বিবিদিষা সন্ন্যাস বলে। সংসারের
তাড়নায় স্বজনবিয়োগ বা অন্য কোন কারণে, কেউ কেউ
বেরিয়ে পড়ে' সন্ন্যাস নেয়; কিন্তু এ বৈরাগ্য স্থায়ী হয় না,
এর নাম কর্কট সন্ন্যাস। আর এক প্রকার সন্ন্যাস আছে,
যেমন, মুমূর্ষু, রোগশয্যায় শায়িত, বাঁচবার আশা নাই,
তখন তাকে সন্ন্যাস দিবার বিধি আছে। সে যদি মরে ত
পবিত্র সন্ন্যাসব্রত গ্রহণ ক'রে মরে গেল,—পরজন্মে এই
পুণ্যে ভাল জন্ম হবে। আর যদি বেঁচে যায় ত, আর গৃহে

না গিয়ে ব্রহ্মজ্ঞান লাভের চেষ্টায় সন্ন্যাসী হয়ে কালযাপন করবে ।

২০। শাস্ত্রমতে ঐহারা সন্ন্যাস আশ্রম গ্রহণ করেন, তাঁহাদিগকে আপনাদের শ্রাদ্ধও ঐ সময়ে আপনি করিয়া লইতে হয় ; কারণ, সন্ন্যাস গ্রহণ করিলে লৌকিক কি বৈদিক কোন বিষয়ে আর অধিকার থাকে না । পুত্র-পৌত্রাদিকৃত শ্রাদ্ধ বা পিণ্ডদানাদি ক্রিয়ার ফল তাঁহাদিগকে আর স্পর্শ করিতে পারে না । সেইজন্য সন্ন্যাসগ্রহণের পূর্বে নিজের শ্রাদ্ধ নিজেই করিতে হয় ; নিজের পায়ে নিজের পিণ্ড অর্পণ করিয়া, সংসারের, এমন কি নিজ দেহের পূর্বে সম্বন্ধাদি সঙ্কল্পদ্বারা নিঃশেষে বিলোপসাধন করিতে হয় । ইহাকে সন্ন্যাসগ্রহণের অধিবাস ক্রিয়া বলা যাইতে পারে । সংসারে আজ থেকে এদের মৃত্যু হ'ল, কাল থেকে এদের নূতন দেহ, নূতন চিন্তা, নূতন পরিচ্ছদ হবে,—এরা ব্রহ্মবীর্য্যে প্রদীপ্ত হয়ে জ্বলন্ত পাবকের ন্যায় অবস্থান করবে । “আত্মনো মোক্ষার্থং জগদ্ধিতায় চ”,—এই হচ্ছে সন্ন্যাসের প্রকৃত উদ্দেশ্য । সন্ন্যাস না হ'লে কেহ কদাচ ব্রহ্মজ্ঞ হতে পারে না,—এ কথা বেদ বেদান্ত ঘোষণা করছে ।

২১। তাঁহার (ঠাকুরের) মত এই ছিল যে, এক পূর্ণ সিদ্ধ,—তাঁহার ইতস্ততঃ বিচরণ সাজে । যতক্ষণ না হয়, এক জায়গায় বসিয়া সাধনে নিমগ্ন হওয়া উচিত । আপনা আপনি যখন সকল দেহাদি ভাব চলিয়া যাইবে, তখন যাহার যে

প্রকার অবস্থা হইবার হইবে, নতুবা প্রবৃত্ত সাধকের পক্ষে ক্রমাগত বিচরণ অনিষ্টজনক ।

২২। মনু সন্ন্যাসিগণকে “একাকী থাকিবে, একাকী বিচরণ করিবে,” এরূপ উপদেশ দিয়াছেন । বন্ধুত্ব বা ভালবাসা মাত্রেই বন্ধন ; বন্ধুত্বে,—বিশেষতঃ স্ত্রীলোকদিগের বন্ধুত্বে,—চিরকালই ‘দেহি দেহি’ ভাব । হে মহাপুরুষগণ, তোমরাই ঠিক বলিয়াছ । যাহাকে কোন ব্যক্তিবিশেষের দিকে ফিরিয়া ফিরিয়া চাহিতে হয়, সে সত্যরূপী ঈশ্বরের সেবা করিতে পারে না ।

২৩। ত্যাগ ভিন্ন এই গভীর জীবনসমস্যার রহস্যভেদ কিছুতেই হবার নহে । ত্যাগ, ত্যাগ, ত্যাগ,—ইহাই যেন তোদের জীবনের মূলমন্ত্র হয় ।

২৪। ত্যাগই হচ্ছে আসল কথা,—ত্যাগী না হলে, কেউ পরের জন্ত ষোল আনা প্রাণ দিয়ে কাজ করতে পারে না । ত্যাগী সকলকে সমান ভাবে দেখে,—সকলের সেবায় নিযুক্ত হয় ।

২৫। ধন বা সম্ভান দ্বারা অমরত্ব লাভ হয় না, কিন্তু একমাত্র ত্যাগ দ্বারাই অমরত্ব লাভ হয় ।

২৬। জগতে সর্বদাই দাতার আসন গ্রহণ কর । সর্বস্ব দিয়ে দাও, আর ফিরে কিছু চেয়ো না । ভালবাসা দাও, সাহায্য দাও, সেবা দাও ; এতটুকু যা তোমার দেবার আছে, দিয়ে দাও । কিন্তু সাবধান, বিনিময়ে কিছু চেয়ো না ।

২৭। যতক্ষণ ‘আমি’ জ্ঞান আছে, ততক্ষণ সত্য। আর যখনই ‘আমি আত্মা’ এই অনুভব, তখনই এই ব্যবহারিক সত্তা মিথ্যা। লোকে যে পাপ পাপ বলে, সেটা দুর্বলতার ফল,—‘আমি দেহ’, এই অহং ভাবেরই রূপান্তর। যখন ‘আমি আত্মা’, এই ভাবে মন নিশ্চল হবে, তখন তুই পাপপুণ্য ধর্মাধর্মের অতীত হয়ে যাবি। ঠাকুর বলতেন, “আমি মলে ঘুচিবে জঞ্জাল।”

২৮। যত প্রকার দুর্বলতার অনুভবকেই পাপ বলা যায়। এই দুর্বলতা থেকেই হিংসাদ্বেষাদির উন্মেষ হয়। তাই দুর্বলতার নামই পাপ। ভিতরে আত্মা সর্বদা জ্বল জ্বল করছে,—সে দিকে না চেয়ে, হাড়মাসের কিস্তুত-কিমাকার খাঁচা, এই জড় শরীরটার দিকেই সবাই নজর দিয়ে ‘আমি’ ‘আমি’ করছে! ঐটেই হচ্ছে সকল প্রকার দুর্বলতার গোড়া।

২৯। আমি এত তপস্যা ক’রে এই সার বুঝেছি যে, জীবে জীবে তিনি অধিষ্ঠান হয়ে আছেন; তা ছাড়া ঈশ্বর ফীশ্বর কিছুই আর নাই। ‘জীবে দয়া করে যেই জন,—সেই জন সেবিছে ঈশ্বর।’

৩০। আমাদের কার্য,—কাজ করিয়া মরা। ‘কেন’ প্রশ্ন করিবার আমাদের অধিকার নাই। সাহস অবলম্বন কর, আমা দ্বারা ও তোমাদের দ্বারা মহৎ মহৎ কর্ম হইবে, এই বিশ্বাস রাখ। ভগবান মহৎ মহৎ কার্য করিবার জন্ত

আমাদিগকে নির্দিষ্ট করিয়াছেন, আর আমরা তাহা করিব। আপনাদিগকে প্রস্তুত করিয়া রাখ, অর্থাৎ পবিত্রতা, বিশুদ্ধ-স্বভাব এবং নিঃস্বার্থপ্রেমসম্পন্ন হও। দরিদ্র, দুঃখী, পদদলিতদিগকে ভালবাস; ভগবান তোমাকে আশীর্বাদ করিবেন। ভয় ত্যাগ কর, প্রভু তোমার সঙ্গেই রহিয়াছেন।

৩১। শরীর ত যাবেই, কুঁড়েমিতে কেন যায়? মর্চে প'ড়ে প'ড়ে মরার চেয়ে, ক্ষ'য়ে ক্ষ'য়ে মরা ভাল।

৩২। পরে কি হবে সর্বদা এ কথাই যে ভাবে, তার দ্বারা কোন কার্যই হ'তে পারে না। যা সত্য বলে বুঝেছি, তা এখনি ক'রে ফেল; পরে কি হবে না হবে সে কথা ভাব্বার দরকার কি? এতটুকু ত জীবন,—তার ভিতর অত ফলাফল খতালে কি কোন কাজ হতে পারে? ফলাফল-দাতা একমাত্র তিনি (ঈশ্বর), যাহা হয় করবেন; সে কথায় তোর কাজ কি? তুই ওদিকে না দেখে, কেবল কাজ করে যা।

৩৩। কোন ভাল কাজই বিনা বাধায় সম্পন্ন হয় না। কেবল যারা শেষ পর্য্যন্ত অধ্যবসায়ের সহিত লেগে থাকে, তারাই কৃতকার্য হয়।

৩৪। শক্তি ফক্তি কেউ কি দেয়? ও তোর ভিতরেই র'য়েছে, সময় হলেই আপনা আপনি বেরিয়ে পড়বে। তুই কাজে লেগে যা না; দেখবি, এত শক্তি আসবে যে সামলাতে পারবি না। পরার্থে এতটুকু কাজ করলে ভিতরের শক্তি

জেগে ওঠে ; পরের জন্য এতটুকু ভাবলে, ক্রমে হৃদয়ে সিংহ-
বলের সঞ্চার হয় ।

৩৫ । ভয় কি ? মনের ঐকান্তিকতা থাকলে, আমি
নিশ্চয় বলছি, এ জন্মেই হবে । তবে পুরুষকার চাই । পুরুষ-
কার কি জানিস্ ? আত্মজ্ঞান লাভ করবই করব ; এতে যে
বাধা বিপদ সামনে পড়ে, তা কাটাবই কাটাব,—এইরূপ দৃঢ়
সঙ্কল্প । মা, বাপ, ভাই, বন্ধু, স্ত্রী, পুত্র মরে মরুক, এ দেহ
থাকে থাক্, যায় যাক্, আমি কিছুতেই ফিরে চাইব না, যত-
ক্ষণ না আমার আত্মদর্শন ঘটে,—এইরূপে সকল বিষয় উপেক্ষা
ক'রে, একমনে আপনার উদ্দেশ্যের দিকে অগ্রসর হবাব চেষ্টার
নামই পুরুষকার । সংসারে সকলে যে পথে যাচ্ছে, তুইও কি
সেই স্রোতে গা ঢেলে চলে যাবি ? তবে ত্বার তোর পুরুষ-
কার কি ? সকলে ত মরতে বসেছে । তুই যে মৃত্যু জয়
করতে এসেছিস্ । মহাবীরের গায় অগ্রসর হ ।

৩৬ । একটা সজ্জ-পরিচালনা-শক্তি চাই । কতকগুলো
চেলা চাই,—অগ্নিমন্ত্রে দীক্ষিত যুবক, বুদ্ধিমান্ ও সাহসী,
যমের মুখে যেতে পারে, সাঁতার দিয়ে সাগরপারে যেতে
প্রস্তুত । শত শত ঐ রকম চাই । মেয়ে মদ ছুই-ই । প্রাণপণে
তারই চেষ্টা কর । চেলা বনাও, আর আমাদের পবিত্রতার
সাধনযন্ত্রে ফেলে দাও । সমাজকে, জগৎকে বৈছাতিক
শক্তিতে অনুপ্রাণিত করিতে হইবে । ব'সে ব'সে গল্পবাজির
আর ঘটানাড়ার কাজ ? ঘটানাড়া গৃহস্থের কর্ম, তোমাদের

কাজ ভাবপ্রবাহ বিস্তার । চরিত্র গঠিত হয়ে যাক্ । দু হাজার, দশ হাজার, বিশ হাজার সন্ন্যাসী চাই, মেয়ে মদ,—বুঝলে ? গৃহস্থ চেলার কাজ নয়, ত্যাগী, বুঝলে ? এক এক জনে এক শ মাথা মুড়িয়ে ফেল, শিক্ষিত যুবক,—আহাম্মক নয়, তবে বলি বাহাদুর । হুলস্থূল বাধাতে হবে ; হুঁকো ফুঁকো ফেলে, কোমর বেঁধে খাড়া হয়ে যাও । নীচ মহৎ হয়ে যাবে, মূর্খ মহাপণ্ডিতের গুরু হয়ে যাবে, তাঁর কুপায় । “উত্তীর্ণত জাগ্রত প্রাপ্য বরান্ নিবোধত ।” যে আত্মস্তুরি আপনার আয়েস্ খুঁজছে, কুঁড়েমি করছে, তার নরকেও জায়গা নাই । যে আপনি নরকে পর্য্যন্ত যেয়ে জীবের জন্ম কাতর হয়, চেষ্টা করে,, সেই রামকৃষ্ণের পুত্র । যে এই মহাসন্ধিপূজার সময় কোমর বেঁধে খাড়া হয়ে গ্রামে গ্রামে, ঘরে ঘরে তাঁর সন্দেশ বিতরণ করবে, সেই আমার ভাই, সেই তাঁর ছেলে । এই পরীক্ষা,—যে রামকৃষ্ণের ছেলে, সে আপনার ভাল চায় না ; প্রাণত্যাগ হলেও, পরের কল্যাণাকাজক্ষী তাঁরা । যারা আপনার আয়েস্ চায়, কুঁড়েমি চায়, যারা আপনার জিদের সামনে সকলের মাথা বলি দিতে রাজী, তারা আমাদের কেউ নয়, তারা তফাৎ হয়ে যাক্, এই বেলা ভালয় ভালয় । তাঁর চরিত্র, তাঁর শিক্ষা ধর্ম্ চারিদিকে ছড়াও,—এই সাধন, এই ভজন, এই সাধন, এই সিদ্ধ । উঠ, উঠ, মহা তরঙ্গ আসছে ; এগিয়ে যাও, এগিয়ে যাও । মেয়ে মদ আচণ্ডাল, সব পবিত্র তাঁর কাছে । নামের সময় নাই, যশের সময় নাই, মুক্তির সময় নাই, ভক্তির সময় নাই, দেখা

যাবে পরে । এখন এ জন্মে অনন্ত বিস্তার, তাঁর মহান্ চরিত্রের, তাঁর মহান্ জীবনের, তাঁর অনন্ত আত্মার । এই কার্য,—আর কিছুই নাই । যেখানে তাঁর নাম যাবে, কীটপতঙ্গ পর্য্যন্ত দেবতা হয়ে যাবে, হয়ে যাচ্ছে, দেখেও দেখছ না ? এ কি ছেলে খেলা, এ কি জ্যাঠামি, এ কি চ্যাঙ্গরামি ?—“উত্তীর্ণত জাগ্রত”,—হরে হরে । তিনি পিছে আছেন । যে এই চিঠি পড়বে, তাদের ভিতর আমার ভাব আসবে, বিশ্বাস কর । সব ভেসে যাবে । হুঁসিয়ার ! তিনি আসছেন । যে যে তাঁর সেবার জন্য,—তাঁর সেবা নয়, তাঁর ছেলেদের,—গরীব গুর্কো, পাপী তাপী, কীটপতঙ্গ পর্য্যন্ত তাদের,—সেবার জন্য যে যে তৈয়ার হবে, তাদের ভিতর তিনি আসবেন । তাদের মুখে সরস্বতী বসবে, তাদের চক্ষে মহামায়া মহাশক্তি বসবেন । যেগুলো মাস্তিক, অশ্বাসী, নরাধম, বিলাসী, তারা কি করতে আমাদের ঘরে এসেছে ? তারা চলে যাক্ ।

৩৭ । এখন রজোগুণের দরকার । দেশে যে সব লোককে এখন সত্বগুণী বলে মনে কচ্ছি,—তাদের ভিতর পনর আনা লোকই ঘোর তমোভাবাপন্ন । এক আনা লোক সত্বগুণী মিলে ত চের । এখন চাই প্রবল রজোগুণের তাণ্ডব উদ্দীপনা,—দেশ যে ঘোর তমসচ্ছন্ন, দেখতে পাচ্ছি না ? এখন দেশের লোককে মাছ মাংস খাইয়ে উত্তমী করে তুলতে হবে, জাগাতে হবে, কার্যতৎপর করতে হবে । নতুবা ক্রমে দেশশুদ্ধ লোক জড় হয়ে যাবে,—গাছ পাথরের মত জড় হয়ে যাবে ।

৩৮। সর্বদা শ্রীকৃষ্ণে আত্মসমর্পণ করিবে। সর্বদা মনে রাখিবে যে, প্রভুর হস্তে আমরা পুতুলিকা মাত্র। সর্বদা পবিত্র থাকিবে। কায়মনোবাক্যেও যেন অপবিত্র না হও, এবং সদা যথাসাধ্য পরোপকার করিতে চেষ্টা করিবে। মনে রাখিও, কায়মনোবাক্যে পতিসেবা করা স্ত্রীলোকের প্রধান ধর্ম। নিত্য যথাশক্তি গীতা পাঠ করিও।

৩৯। দিবারাত্র তাঁহার নিকট প্রার্থনা করিতে ভুলিও না ; দিবারাত্র বলিতে ভুলিও না, 'তোমার ইচ্ছা পূর্ণ হউক। তুমি আমাদিগকে বল দাও। এস প্রভো, এস হে আচার্য্য-চূড়ামণি ! তুমি আমাদিগকে শিখাইয়াছ, সৈনিককে কেবল আজ্ঞাপালন করিতে হইবে, তাহার কথা কহিবার অধিকার নাই। এস প্রভো, এস হে পার্থসারথি ! অর্জুনকে তুমি এক সময়ে শিখাইয়াছিলে, তোমার উপর সম্পূর্ণ নির্ভরই জীবনের সর্বশ্রেষ্ঠ উদ্দেশ্য। যেন প্রাচীনকালের মহাপুরুষ-গণের সহিত আমিও দৃঢ়তা ও নির্ভরের সহিত বলিতে পারি, ওঁ শ্রীকৃষ্ণার্পণমস্তু।'

৪০। সময় পেলেই ধ্যান করবি। সুষুপ্ত পথে মন যদি একবার চলে যায়, ত আপনা আপনি সব ঠিক হয়ে যাবে, বেশী কিছু আর করতে হবে না।

৪১। প্রত্যহ একাকী ধ্যান করবি। সব আপনা আপনি খুলে যাবে। বিদ্যারূপিণী মহামায়া ভিতরে ঘুমিয়ে রয়েছেন ; তাই সব জানতে পার্ছিস্ না। ঐ কুলকুণ্ডলিনীই হচ্ছেন

তিনি। ধ্যান করবার পূর্বে যখন নাড়ী শুদ্ধি করবি, তখন মনে মনে মূলাধারস্থ কুণ্ডলিনীকে জোরে জোরে আঘাত করবি আর বলবি, “জাগ মা,” “জাগ মা।” ধীরে ধীরে এ সব অভ্যাস করতে হয়। ভাবপ্রবণতা ধ্যানের কালে একেবারে দাবিয়ে দিবি। ঐটের বড় ভয়। যারা বড় ভাবপ্রবণ, তাদের কুণ্ডলিনী ফড়্ ফড়্ করে উপরে উঠে বটে, কিন্তু উঠতেও যতক্ষণ, নামতেও ততক্ষণ। যখন নামেন, তখন একেবারে সাধককে অধঃপাতে নিয়ে গিয়ে ছাড়েন। এজন্য ভাব-সাধনার সহায় কীর্তন ফীর্তনের একটা ভয়ানক দোষ আছে। নেচে কুঁদে সাময়িক উচ্ছ্বাসে ঐ শক্তির উর্দ্ধগতি হয় বটে,—কিন্তু স্থায়ী হয় না, নিম্নগামিনী হবার কালে জীবের ভয়ানক কামবৃত্তির আধিক্য হয়।

৪২। খুব সাবধানে ধ্যান ধারণা করবি। সামনে সুগন্ধি ফুল রাখবি, ধূনা জ্বালবি। যাতে মন পবিত্র হয়, প্রথমতঃ তাই করবি। গুরু ইষ্টের নাম করতে করতে বলবি,—জীব জগৎ সকলের মঙ্গল হক! উত্তর দক্ষিণ, পূর্ব পশ্চিম, অধঃ উর্দ্ধ সব দিকেই শুভ সঙ্কল্পের চিন্তা ছড়িয়ে তবে ধ্যানে বসবি। এইরূপ প্রথম প্রথম করতে হয়। তার পর স্থির হয়ে বসে (যে কোন মুখে বসলেই হল) ধ্যান করবি। এক দিনও ঝাদ দিবি না। কাজের ঝঞ্জাট থাকে ত, অন্ততঃ পনের মিনিটে সেরে নিবি। একটা নিষ্ঠা না থাকলে কি হয় রে বাপ?

৪৩। সময়ে হতেই হবে। তবে কারও শীগ্গীর, কারও বা একটু দেরীতে হয়। লেগে থাকতে হয়,—নাছোড়বান্দা হয়ে। এর নাম যথার্থ পুরুষকার। তৈলধারার মত মনটা এক বিষয়ে লাগিয়ে রাখতে হয়। জীবের মন নানা বিষয়ে বিক্ষিপ্ত হয়ে আছে, ধ্যানের সময়ও প্রথম প্রথম মন বিক্ষিপ্ত হয়। মনে যা ইচ্ছে উঠুক না কেন, কি কি ভাব উঠছে, সেগুলি তখন স্থির হয়ে বসে দেখতে হয়। ঐরূপে দেখতে দেখতেই মন স্থির হয়ে যায়, আর মনে নানা চিন্তাতরঙ্গ থাকে না। ঐ তরঙ্গগুলোই হচ্ছে, মনের সঙ্কল্পবৃত্তি। ইতিপূর্বে যে সকল বিষয় তীব্রভাবে ভেবেছিস্, তার একটা মানসিক প্রবাহ থাকে, ধ্যানকালে ঐগুলি তাই মনে উঠে। সাধকের মন যে ক্রমে স্থির হবার দিকে যাচ্ছে, ঐগুলি উঠা বা ধ্যানকালে মনে পড়াই তার প্রমাণ। মন কখন কখন কোন ভাব নিয়ে একবৃত্তিস্থ হয়,—উহারই নাম সবিকল্প ধ্যান। আর মন যখন সর্ববৃত্তিশূন্য হয়ে আসে, তখন নিরাধার এক অখণ্ড বোধস্বরূপ প্রত্যক্ চৈতন্যে গলে যায়। উহার নামই বৃত্তিশূন্য নির্বিকল্প সমাধি।

৪৪। প্রথম কোন একটি বিষয় নিয়ে ধ্যান অভ্যাস করতে হয়। যে কোন সামান্য বাহ্য বিষয় ধরে ধ্যান অভ্যাস করলেও, মন একাগ্র বা ধ্যানস্থ হয়। তবে যাতে যার মন বসে, সেটা ধরে ধ্যান অভ্যাস করলে মন শীঘ্র স্থির হয়ে যায়। তাই এদেশে এত দেবদেবী-মূর্তির পূজা।

৪৫। মন মুখ এক ক'রে নিজের কর্তব্য সাধন করে যাও, সব ঠিক হয়ে যাবে। সত্যের জয় হবেই হবে।

৪৬। চালাকী দ্বারা কোন মহৎ কার্য হয় না। প্রেম, সত্যানুরাগ ও মহাবীর্যের সহায়তায় সকল কার্য সম্পন্ন হয়।

৪৭। আত্মতত্ত্ব জানবার জন্ত, আত্মা উদ্ধারের জন্ত, এই জন্ম-মরণ-প্রহেলিকার যথার্থ মীমাংসার জন্ত, যমের মুখে গেলে যদি সত্যলাভ হয়, তাহ'লে নির্ভীকহৃদয়ে যমের মুখে যেতে হবে। ভয়ই ত মৃত্যু। ভয়ের পরপারে যেতে হবে।

৪৮। সত্ত্বগুণ যখন খুব বিকাশ হয়, তখন মাছ মাংসে রুচি থাকে না। কিন্তু সত্ত্বগুণ প্রকাশের এই সব লক্ষণ জানবি,—পরের জন্ত সর্বস্ব পণ, কামিনী-কাঞ্চনে সম্পূর্ণ অনাসক্তি, নিরভিমানিত্ব, অহংবুদ্ধিশূন্যত্ব। এই সব লক্ষণ যার হয়, তার আর আশিষাহারের ইচ্ছা হয় না। আর যেখানে দেখবি,—মনে ঐ সব গুণের স্মৃতি নাই, অথচ অহিংসার দলে নাম লিখিয়েছে, সেখানে জানবি, হয় ভগ্নামী, না হয় লোক-দেখানো ধর্ম।

৪৯। এইটি জেনে রেখো যে, যখনই তুমি দুর্বলতা বোধ কর, তখন তুমি শুধু নিজের অনিষ্ট করছ, তা নয়, তুমি কাজেরও ক্ষতি করছ। অসীম বিশ্বাস ও ধৈর্য্যই কৃতকার্য হবার একমাত্র উপায়।

৫০। যার বিশ্বাস হয় না, তার দেখলেও বিশ্বাস হয় না। মনে করে মাথার ভুল, স্বপ্ন ইত্যাদি। দুর্ঘোষনও বিশ্বরূপ:

দেখেছিল, অর্জুনও দেখেছিল। অর্জুনের বিশ্বাস হল ;
 'দুর্যোধন ভেকী বাজী ভাব্লে। তিনি না বুঝালে, কিছু
 বল্‌বার ন্বা বুঝ্‌বার যো নাই। না দেখে, না শুনে, কারও ষোল
 আনা বিশ্বাস হয় ; কেউ বার বৎসর সাম্নে থেকে নানা
 বিভূতি দেখেও সন্দেহে ডুবে থাকে। সার কথা হচ্ছে,— তাঁর
 কৃপা ; তবে লেগে থাকতে হবে, তবে তাঁর কৃপা হবে।

৫১। গুরুভক্তি থাকলে, সব সিদ্ধান্ত প্রত্যক্ষ হয়,—
 পড়্‌বার শুন্‌বার দরকার হয় না। তবে একরূপ ভক্তি ও বিশ্বাস
 জগতে দুর্লভ।

৫২। যখনই তোমাদের মধ্যে কেহ অসুস্থ হইয়া পড়িবে,
 তখন সে নিজে, অথবা তোমাদের মধ্যে অপর কেহ তাহাকে
 মনশ্চক্ষে প্রত্যক্ষ করিবে। ঐরূপে দেখিতে দেখিতে মনে
 মনে বলিবে ও দৃঢ়ভাবে কল্পনা করিবে যে, সে সম্পূর্ণ সুস্থ
 হইয়াছে। ইহাতে সে শীঘ্র আরোগ্যলাভ করিবে। অসুস্থ
 ব্যক্তিকে না জানাইয়াও তুমি একরূপ করিতে পার। সহস্র
 মাইলের ব্যবধানেও এই কার্য চলিতে পারে। এইটি সর্বদা
 মনে রাখিয়া আর কখনও অসুস্থ হইও না।

৫৩। ব্যাকুলতা,—ঈশ্বরলাভ বা আত্মজ্ঞানের জন্য উন্মাদ
 হওয়াই,—যথার্থ ধর্ম প্রাণতা।

৫৪। যারা কায়মনোবাক্যে সর্বদা পবিত্র, যাদের
 অনুরাগ প্রবল, যারা সদসৎ বিচারবান্ এবং ধ্যান ধারণায়
 রত, তাদের উপরই ভগবানের কৃপা হয়।

৫৫। আজকাল দেশের কি ছরবস্থাই না হয়েছে ! শাস্ত্র-পথ পরিত্যাগ ক'রে কেবল কতকগুলো দেশাচার, লোকাচার ও স্ত্রী-আচারে দেশটা ছেয়ে ফেলেছে। তাই ত তোদের খলি, তোরা প্রাচীনকালের মত শাস্ত্রপথ ধরে চল্ ! নিজেরা শ্রদ্ধাবান্ হয়ে, দেশে শ্রদ্ধা আনয়ন কর্ ।

৫৬। হিঁদুর (এখনকার) ধর্ম বেদে নাই, পুরাণে নাই, ভক্তিতে নাই, মুক্তিতে নাই ; ধর্ম ঢুকেছেন ভাতের হাঁড়িতে। (এখনকার) হিঁদুর ধর্ম বিচারমার্গেও নয়, জ্ঞানমার্গেও নয়, ছুঁৎমার্গ,—আমায় ছুঁয়োনা, আমায় ছুঁয়োনা, বস্। এই ঘোর বামাচার ছুঁৎমার্গে পড়ে প্রাণ খুইও না। “আত্মবৎ সর্ব-ভূতেষু”, কি কেবল পুঁথিতে থাকবে না কি ? যারা এক টুকরা রুটি গরিবের মুখে দিতে পারে না, তারা আবার মুক্তি কি দিবে ? যারা অপরের নিশ্বাসে অপবিত্র হয়ে যায়, তারা আবার অপরকে কি পবিত্র করবে ? ছুঁৎমার্গ একপ্রকার মানসিক ব্যাধি, সাবধান !

৫৭। “আহারশুদ্ধৌ সত্ত্বশুদ্ধিঃ”, এই শ্রুতির অর্থ করতে গিয়ে শঙ্করাচার্য্য বলেছেন,—“আহার” অর্থে “ইন্দ্রিয়বিষয়” ; আর, শ্রীরামানুজ স্বামী “আহার” অর্থে “খাড়া” ধরেছেন ! আমার মত হচ্ছে, তাঁহাদের ঐ উভয় মতের সামঞ্জস্য ক'রে নিতে হবে। কেবল দিনরাত খাড়াখাড়ের বাচ্ বিচার করেই জীবনটা কাটাতে হবে,—না ইন্দ্রিয়সংযম করতে হবে ? ইন্দ্রিয়-সংযমটাকেই মুখ্য উদ্দেশ্য বলে ধরতে হবে, আর ঐ ইন্দ্রিয়-

সংযমের জন্মই ভালমন্দ খাদ্যাখাদ্যের অল্পবিস্তর বিচার করতে হবে। শাস্ত্র বলেন, খাদ্য ত্রিবিধ দোষে ছুঁষ্ট ও পরিত্যাজ্য হয়।^১ ১ম, জাতিছুঁষ্ট,—যেমন পেঁয়াজ, রশুন ইত্যাদি ; ২য়, নিমিত্তছুঁষ্ট,—যেমন ময়রার দোকানের খাবার, দশগুণা মাছি মরে পড়ে আছে,—রাস্তার ধুলোই কত উড়ে পড়ছে ইত্যাদি ; ৩য়, আশ্রয়ছুঁষ্ট,—যেমন অসৎ লোকের দ্বারা স্পৃষ্ট অন্নাদি। খাদ্য জাতিছুঁষ্ট ও নিমিত্তছুঁষ্ট হয়েছে কি না, তা সকল সময়ে খুব নজর রাখতে হবে। কিন্তু এদেশে ঐদিকে নজর একেবারেই উঠে গেছে। কেবল শেষোক্ত দোষটি—যা যোগী ভিন্ন অণু কেউ প্রায় বুঝতে পারে না,—তাই নিয়েই দেশে যত লাঠালাঠি চলছে ; ‘ছুঁও না,’ ‘ছুঁও না’ করে ছুঁৎমাগীর দলে দেশটাকে বালাপালা করেছে। ‘তাও ভালমন্দ লোকের বিচার নাই,—গলায় একগাছা সূতো থাকলেই হলো, তার হাতে অন্ন খেতে ছুঁৎমাগীদের আর আপত্তি নাই।

৫৮। আহার, পোষাক ও জাতীয় আচার ব্যবহার পরিত্যাগ করলে, ক্রমে জাতীয়ত্ব লোপ হয়ে যায়। বিদ্যা সকলের কাছেই শিখতে পারা যায় ; কিন্তু যে বিদ্যালোভে জাতীয়ত্বের লোপ হয়, তাতে উন্নতি হয় না,—অধঃপাতের সূচনাই হয়। কার্য্যানুরোধে বিজাতীয় পোষাক পরবি বৈ কি। কিন্তু ঘরে গিয়ে ঠিক বাঙ্গালী বাবু হবি।

৫৯। ধর্ম আমাদের মজ্জাগত,—সকল সংস্কার ওর ভিতর দিয়েই আন্তে হবে। নতুবা mass (জন সাধারণ) ত গ্রহণ

করবে না। তা ছাড়া অন্য রকম কর্তে গেলে, গঙ্গাকে ফিরিয়ে হিমালয়ে এনে অন্য পথে প্রবাহিত করার মতই শক্ত হবে।

৬০। শরীরটাকে খুব মজবুত কর্তে তোকে শিখতে হবে ও সকলকে শেখাতে হবে। দেখছিস্ নে, এখনও রোজ আমি ডাম্বেল কসি। রোজ রোজ সকাল সন্ধ্যায় বেড়াবি। শারীরিক পরিশ্রম করবি। দেহ ও মন সমানভাবে উন্নত হওয়া চাই। সব বিষয়ে পরের উপর নির্ভর করলে চলবে কেন? শরীরটা সবল করবার প্রয়োজনীয়তা বুঝতে পারলে নিজেরাই তখন ঐ বিষয়ে যত্ন করবে।

৬১। শরীর জোরালো হ'লে তবে মন জোরালো হবে। যাদের শরীরে জোর নাই, তাদের আত্মসাক্ষাৎকার হওয়া অসম্ভব। যখন একবার মনটা বশে আসবে, আর আপনার উপর প্রভুত্ব করতে পারবি, তখন শরীর থাকলো আর গেলো দেখবার দরকার নাই, কারণ তখন ত আর শরীরের দাস ন'স্।

৬২। সর্বপ্রকার বিস্তারই জীবন, সর্বপ্রকার সঙ্কীর্ণতাই মৃত্যু। যেখানে প্রেম, সেইখানেই বিস্তার; যেখানে স্বার্থপরতা, সেখানেই সঙ্কোচ। অতএব প্রেমই একমাত্র বিধি। যিনি প্রেমিক, তিনিই জীবিত; যিনি স্বার্থপর, তিনি মৃত। অতএব যেহেতু প্রেমই জীবনের একমাত্র বিধি, যেমন নিশ্বাস প্রশ্বাস না হইলে বাঁচা যায় না, প্রেম ব্যতীত

যখন সেইরূপ জীবনধারণ অসম্ভব, সেই হেতুই অহেতুক প্রেম প্রয়োজন।

৬৩। আমি যাদের শিক্ষা দেব, তারা হিন্দুই হোক, মুসলমানই হোক, আর খ্রীষ্টিয়ানই হোক, আমি তা গ্রাহ্য করি না,—যারা প্রভুকে ভালবাসে, তাদেরই সেবা করতে আমি সর্বদা প্রস্তুত আছি জান্বে।

৬৪। কপট, হিংসুক, দাসভাবাপন্ন, কাপুরুষ, যারা কেবল জড়ে বিশ্বাসী, তারা কখন কিছু করিতে পারে না। ঈর্ষ্যাই আমাদের দাসশুলভজাতীয় চরিত্রের কলঙ্কস্বরূপ। এমন কি, সর্বশক্তিমান্ ভগবান্ পর্য্যন্ত এই ঈর্ষ্যার দরুণ কিছু করতে পারেন না।

৬৫। এ দেশের পুরুষেরা মেয়েদের একেবারে manufacturing machine (পুত্র উৎপাদনের যন্ত্র) মাত্র করে তুলেছে! মহামায়ার সাক্ষাৎ প্রতিমা এই সকল মেয়েদের এখন না তুললে, বুঝি, তাদের আর উপায়ান্তর আছে?

৬৬। তাদের জাতের যে এত অধঃপতন ঘটেছে, তার প্রধান কারণ, এই সব শক্তিমূর্তির অবমাননা করা। মনু বলেছেন, যেখানে স্ত্রীলোকের আদর নাই, স্ত্রীলোকেরা নিরানন্দে অবস্থান করে, সে সংসারের,—সে দেশের কোন উন্নতির আশা নাই। এইজন্য এদের আগে তুলতে হবে,—এদের জন্ম আদর্শ মঠ স্থাপন করতে হবে।

৬৭। ভারতের কল্যাণ স্ত্রীজাতির অভ্যুদয় না হইলে

সম্ভাবনা নাই, এক পক্ষে পক্ষীর উত্থান সম্ভব নহে। সেই-
জন্মই রামকৃষ্ণাবতারে স্ত্রী-গুরু গ্রহণ, সেইজন্মই নারীভাব
সাধন, সেইজন্মই মাতৃভাব প্রচার। সেইজন্মই আমার
স্ত্রী-মঠ স্থাপনের জন্ম প্রথম উদ্যোগ। উক্ত মঠ গার্গী, মৈত্রেয়ী
এবং তদপেক্ষা আরও উচ্চতর ভাবাপন্ন নারীকুলের আকর-
স্বরূপ হইবে।

৬৮। মেয়েদিগকে ধর্ম, শিল্প, বিজ্ঞান, ঘরকন্না, রন্ধন,
শেলাই, শরীরপালন,—এই সকল বিষয়ের স্কুল স্কুল মর্শ্বগুলি
আগে শেখাতে হবে। নভেল নাটক ছুঁতে দেওয়া উচিত
নয়। কেবল পূজাপদ্ধতি শেখালেই হবে না; সব বিষয়ে
চোখ ফুটিয়ে দিতে হবে। আদর্শ নারীচরিত্র সব মেয়েদের
সামনে ধরে বুঝিয়ে দিতে হবে। সীতা, সাবিত্রী, দময়ন্তী,
লীলাবতী, খনা, মীরা,—এঁদের জীবনচরিত্র মেয়েদের বুঝিয়ে
দিতে হবে, যাতে তারা নিজেদের জীবন ঐরূপে গঠিত কর্তে
পারে। মেয়েদের ধর্মপরায়ণ ও নীতিপরায়ণ কর্তে হবে।
কালে যাতে তারা ভাল গিন্নী তৈরি হয়, তাই কর্তে হবে।
এই সকল মেয়েদের সম্মানসম্মতিগণ পরে ঐ সকল বিষয়ে
আরও উন্নতিলাভ কর্তে পারবে। যাদের মা শিক্ষিতা ও
নীতিপরায়ণা হন, তাদের ঘরেই বড়লোক জন্মায়।

৬৯। কলিযুগে দানই একমাত্র ধর্ম, তন্মধ্যে আবার
ধর্মদান সর্বশ্রেষ্ঠ দান; বিদ্যা দান তাহার নিম্নে,—তারপর
প্রাণদান; সর্বনিকৃষ্টদান,—অন্নদান।

৭০। বিদ্যাদান বড় দান। তবে গ্রামে গ্রামে যাতে Man Education (মনুষ্যোচিত শিক্ষা) বিস্তার হয়, তাই করুন। আর চাই character (চরিত্র)। ছাত্রদের চরিত্র বজ্রের মত গ'ড়ে তুলুন। বাঙ্গালী যুবকদের অস্থিতে ভারতের মুক্তিবজ্র তৈয়ার হবে। আর চামার, মুচি, মেথর, মুদ্দফরাসদের ভিতর গিয়ে বলুন, “তোরাই জাতের প্রাণ,— তোদের অনন্ত শক্তি রয়েছে। ছুনিয়া ওলট পালট করতে পারিস্। একবার তোরা গা ঝাড়া দিয়ে দাঁড়া দেখি; জগতের তাক্ লেগে যাবে।”

৭১। আমার বন্ধুগণকে বলবে, যাঁরা আমার নিন্দাবাদ করছেন, তাঁদের কথা আমার একমাত্র উত্তর,—একদম চুপ্ থাক। আমি তাঁদের ঢিলটি খেয়ে যদি তাঁদের পাট্কেল মারতে যাই, তবে ত আমি তাঁদের সঙ্গে একদরের হয়ে পড়্‌লুম।

৭২। অনন্ত ধৈর্য, অনন্ত পবিত্রতা, অনন্ত অধ্যবসায়,— এই তিনটি জিনিস থাকলে যে কোনও সাধু-আন্দোলনে অবশ্যই সফল হতে পারা যায়,—সিদ্ধির ইহাই রহস্য।

৭৩। শ্রদ্ধাবান্ হ,—বীর্যবান্ হ,—আত্মজ্ঞান লাভ কর,—আর ‘পরহিতায়’ জীবন পাত্ কর,—এই আমার ইচ্ছা ও আশীর্বাদ।

শুদ্ধিপত্র

পৃষ্ঠা	পঙ্ক্তি	অশুদ্ধ	শুদ্ধ
৪৬	• ১১	ডাক্তো	ডাক্তে.
৮৬ •	২২	পাতুকুয়া	পাতকুয়া
১১০	২০	একও নও	একও নয়
১২০	১৫	প্রথম, তিন	প্রথম তিন
১৭১	১৮	পত্নী, দেওর	পত্নী,—দেওর
২৮৭	১০	করফলায়তে	করতলায়তে

গল্প-সূচী

সংসারশ্রম

বিষয়	প্যারা
১। গুরুর ঔষধে সংসার জ্ঞান	২
২। হঠযোগীর স্ত্রী পরীক্ষার ফন্দি	৩
৩। কোপীন কা ওয়াস্তে গৃহস্থালী	৪
৪। চাষবাসে ব্যস্ত ভাগবত পণ্ডিত	৯
৫। অজ্ঞানী পণ্ডিতের ভাগবত গুনান	৯
৬। বাগানে আম খাওয়ার বুদ্ধি	১২
৭। চিলের মুখে মাছ ও কাক	২২
৮। চাকুরের বৃথা গর্ব	২৭
৯। ছুতোর মেয়েদের চিঁড়ে কোটা	২৮
১০। পেটের ভাতের জন্তু ভিক্ষা	৪৯
১১। নাতির সঙ্গে সোণার থালে খাওয়া	৫০
১২। রাজকন্যার জন্তু চোরের সাধু বেশ	৬১
১৩। মাছ চুরি করতে সাধু সাজা	৬২
১৪। চোঁড়া সাপ ও ব্যাঙ	৬৬
১৫। সিদ্ধাইএর ঝড় খামান	৭০
১৬। রামের ইচ্ছা ও তাঁতী	৭৪
১৭। সাপের অহিংসা অভ্যাস	৯৬
১৮। পাগল হস্তী ও মাহত নারায়ণ	৯৯

জ্ঞান-যোগ

	বিষয়		প্যারা
৩৬।	বাসা পাকড়ে সাধুর বেড়ান	...	১৪
৩৭।	ছেলেদের ব্রহ্মজ্ঞান পরীক্ষা	...	২১
৩৮।	রামের তীব্র বৈরাগ্য	...	২৪
৩৯।	ভূতের চুল সোজা করা	...	৪৬
৪০।	ভক্তের সাহায্যে নারায়ণ	...	৪৭
৪১।	পাঁচিল ঘেরা জায়গা	...	৫৫
৪২।	হাতে লণ্ঠন, টিকে ধরাতে যাওয়া	...	৬৫
৪৩।	ভীষ্মের কান্না	...	৭৬
৪৪।	গুরুর মুচি চাকর	...	৭৭
৪৫।	বাঘের মুখোসে হরিদাস	...	৭৮
৪৬।	জ্ঞানী চাষার পুলশোক	...	৯২
৪৭।	পথিক ও বনের তিন ডাকাত	...	৯৭

কর্ম-যোগ

৪৮।	কাঠুরের এগিয়ে যাওয়া	...	২১
-----	-----------------------	-----	----

ভক্তি-যোগ

৪৯।	ভক্তের জগন্নাথ দর্শন	...	১১
৫০।	ভক্ত শ্রাকুরার দোকান	...	৩২
৫১।	বাঘ ও তিন বন্ধু	...	৩৪
৫২।	বেণ্ডার জন্তু ছ'স্ হারান	...	৪৫
৫৩।	বাবুর দ্বারবানের আতা লওয়া	...	৫১

	বিষয়			প্যারা
১৯।	শৃগাল ও বলদের অণুকোষ	১০৪
২০।	কসাইকে খাওয়ানর পাপ	১০৭
২১।	সাধুর শুচিবাই ও ভিস্তি	১২৩
২২।	বিষ্ণুঘরের গহনা চুরি	১৩৯
২৩।	কল্পতরু ও পণিকের কামনা	১৫২
২৪।	ছাগলে মানুষ-করা বাঘ	১৫৩

কামিনী-কাঞ্চন

২৫।	মালির ঘরে মেছুনী	২৮
২৬।	পূজারীদের বিয়ের ফল	২৯
২৭।	ফকির ও আকবর সা	৪১

সন্ন্যাস-আশ্রম

২৮।	যুবতীর স্তন ও বাল-ব্রহ্মচারী	৩
২৯।	কপুনী এঁটে সন্ন্যাস-গ্রহণ	৮
৩০।	গামছা কাঁধে গৃহত্যাগ	৯
৩১।	সাধুবশে বহুরূপী	১৩
৩২।	মোমাছি ও অবধূত	১৯
৩৩।	কবিরাজের গুড় লুকান	২৬

ত্যাগ

৩৪।	ভোগী রাজার বনে ষাওয়া	৫
৩৫।	মাস্তুলের পাখীর সমুদ্রে আসা	৬

		যোগতত্ত্ব		
	বিষয়			পাঠ্য
৫৪।	শ্রাক্ষার জিব উল্টে সোজা হওয়া	২৫
		ধ্যানতত্ত্ব		
৫৫।	ব্যাধ ও রর আসা	২
৫৬।	একমনে মাছ ধরা	২
		বিশ্বাস		
৫৭।	ব্যাসদেব ও গোপীগণ	৮
৫৮।	বিধবার গুরুভক্তি ও দধি পাওয়া	১০
৫৯।	কুকুরের রুটিতে ঘি মাখান	১৪
		ব্যাকুলতা		
৬০।	জটিলের দাদা মধুসূদন	১
৬১।	ছেলের হাতে কুকুরের ভোগ খাওয়া	১
৬২।	স্বাতিনক্ষত্রে যোগাযোগ	১৯
		সাকার নিরাকার		
৬৩।	সাকার নিরাকার জগন্নাথ পরীক্ষা	৮
৬৪।	জানোয়ার বহুরূপীর নানা রং	১১
৬৫।	এক গামলায় নানা রং ছোপান	১২
		অবতার তত্ত্ব		
৬৬।	বরাহ অবতারে নারায়ণের উদ্ধার	১৪
৬৭।	বাজারে হীরার দর যাচাই করা	২১
		শাস্ত্র ও পাণ্ডিত্য		
৬৮।	চিঠি প'ড়ে সন্দেশ ও কাপড়ের যোগাড়...	৯

বিবিধ

	বিষয়		প্যার
৬৯।	বেশ্যার পাপ গুণে সন্ন্যাসীর ফল	...	১৪
৭০।	ভাগবত শোনা ও বেশ্যালয় যাওয়া	...	১৫
৭১।	দ্রৌপদীর লজ্জা নিবারণ	...	১৯
৭২।	তুই শবসাধকের আরাধনা	...	২০
৭৩।	জগদম্বার ভক্তের মুখে আল্লা নাম	...	২১
৭৪।	কার্ত্তিক ও গণেশের ব্রহ্মাণ্ড প্রদক্ষিণ	...	২২
৭৫।	বিবাগীর হীরা মাটি তফাৎ বোধ	...	২৩
৭৬।	চোখে দেখা বাড়ী-পড়ার প্রমাণ	...	২৪
৭৭।	রাম নামে সমুদ্র পার হওয়া	...	২৫
৭৮।	পম্পা-তীরে ব্যাঙ ও রাম	...	৩০
৭৯।	সাধুকে প্রহার ও দুধ খাওয়ান	...	৩১
৮০।	ঝড়ে কুঁড়ে ঘর বাঁচান	...	৩৪
৮১।	শাণ্ডির বৌদের ভাত দেওয়া	...	৩৭
৮২।	নিকষার বাঁচবার সাধ	...	৩৯
৮৩।	জমিদারের পাগল সাজা	...	৪৪
৮৪।	চাষাদের অম্বল খাওয়া	...	৪৭
৮৫।	নিলিপ্ত সংসারীর স্ত্রীর হাতে সব	...	৫০
৮৬।	বড়বাবু ও চাকুরির উমেদার	...	৫১
৮৭।	সতী-সাধবীর গঙ্গাযাত্রা	...	৫২
৮৮।	অন্ধদের হস্তীদর্শন	...	৬৩

